

ეღბუჯე ენდუქე

ეეეეე

ენთე ეიქეენე,

სახელმწიფო გამომცემლობა
„საბჭოთა საქართველო“
თბილისი
1963

თავისი დროის თვალსაჩინო ეურნალისტსა და საზოგადო მოღვაწეს დაეიო მიქელაძეს — მეველეს მნიშვნელოვანი ადგილი უჭირავს ქართული ეურნალისტიკისა და საზოგადოებრივი აზროვნების ისტორიაში. იგი ეკუთვნოდა ქართული ინტელიგენციის იმ პლეადას, რომელმაც უმწიკვლო, გაბედული, მრავალფეროვანი და ნაყოფიერი მოღვაწეობით ძვირფასი წვლილი შეიტანა ქართული კულტურის საგანძურში.

მეველე ნიადაგ მხარში ედგა ეროვნულ-გამათავისუფლებელი მოძრაობის მებაირახტრესა და ამირბარს ილია ჭავჭავაძეს და თავისი ნიჭით, კალმით და საჭიროების შემთხვევაში — მახვილითაც ფასდაუდებელი ამაგი დასდო ქართული კულტურის ისტორიას.

მეველის მებრძოლი სულით გაქენთილი პუბლიცისტური წერილები ისეა გაფანტული ქართულ პერიოდულ პრესაში, რომ ფართო მკითხველი საზოგადოებისათვის თითქმის ხელმეუწვდომელია. არა გვაქვს გამოკვლევა მეველის ცხოვრებასა და მოღვაწეობაზეც.

წინამდებარე წიგნი მიზნად ისახავს ამ ხარევის გამოსწორებას.

შ ე ს ა ვ ა ლ ი

„აკაკიები, ბაკაკიები,
მესხი, მეველე, მელიქ-ალები“.
გ რ . ო რ ბ ე ლ ი ა ნ ი

პაექრობის შემოქმედებითა ცეცხლი გიზგიზებდა ძველთა-
განვე ჩვენი კულტურის ტაძარში. ეს ცეცხლი არ ჩამქრალა
საუკუნეების მანძილზე და ახალი ძალით აენტო მეცხრამეტე
საუკუნეში. „ცისკარი“ და „ივერია“, „კვალი“ და „დროება“,
მამათა და შვილთა ბანაკი და უკლებლივ ყველა რედაქცია —
ამ შემოქმედებითა ძიების საცეცხლე წერტები იყო.

ახალი დროის სიოს ქროლა საგონებელში აგდებდა ბევრ
უნიჭო, შურიან თანამედროვეს, რომელსაც ყოველგვარი სიახ-
ლე და პროგრესი აშინებს ხოლმე.

გრიგოლ ორბელიანიც, ჩვენი პოეზიის მშვენება და მხცო-
ვანი გენერალი, ძველი პოზიციებიდან უტევდა „ლიბერალებს,
პატრიოტებს“, მესხსა თუ მეველეს. ეპიგრაფად მოტანილ სი-
ტყვებშიც იგრძნობა პოლემიკის სუსხი. ეს სუსხი უმიზეზო არ
ყოფილა. ახალი პროგრესული მოძრაობის ერთ-ერთი მედრო-
შე — მეველეს იყო. დაახ, მედროშე და არა რიგითი ჯარისკა-
ცი. ამაში დარწმუნდება ყველა, ვინც გასული საუკუნის მეორე

ნახევრის ჩვენი კულტურულ-საზოგადოებრივი ცხოვრების მატთანეს დაწვრილებით გაეცნობა.

ყოველი ერის კულტურის ისტორიას უკვდავ კორიფეებთან ერთად ჰყავს ნიჭიერ, მამაც, პატიოსან მოღვაწეთა რაზმი, რომელიც ზურგს უმაგრებს, მხარს აძლევს და ეხმარება წინამძღოლებს. რარიც სწორუპოვარიც არ უნდა იყოს ხუროთმოძღვარი, ის ვერ ააგებს დიდებულ ტაძარს, თუ გვერდით არა ჰყავს ნიჭიერი თანამემწეები, თანამდგომნი და მშენებეულნი, რომლებიც ხორცს ასხამენ მის ქმნილებას. ასევე, გამოჩენილი მოღვაწეები, მწერლები, წინამძღოლები და ბელადებიც კი ვერაფერს გახდებიან, თუ ხალხთან ერთად, უშუალო თანამებრძოლებად არა ჰყავთ ღირსეული თანამოაზრეები. მეცხრამეტე საუკუნის ჩვენი კულტურული და საზოგადოებრივი ცხოვრების ასპარეზზე ასეთ უანგარო, შეუდრეკელ, ნიჭიერ და პატიოსან მოღვაწეთა რაზმს ამშვენებს ერთი უსამართლოდ მივიწყებული პიროვნება — დავით მიქელაძე, იგივე დ. ზურაბის შვილი¹, იგივე კულაშელი, იგივე მეველე, იგივე W., „დროების“ მუდმივი კორესპონდენტი. ესაა რაინდული გამბედაობით, დიდი ცოდნითა და ნიჭით აღჭურვილი კაცი, რომლის ღვაწლი უდავოდ სერიოზული ყურადღების ღირსია.

როგორც მისივე სიტყვით ირკვევა, მეველის ერთ-ერთი ფსევდონიმია W. ასეთი ხელმოწერით იბეჭდებოდა მეველის ზოგი წერილი „ვერიაში“.

¹ ზურაბის შვილი — მიქელაძეების იმ შტოს ზედწოდებაა, რომელსაც დავითი ეკუთვნოდა: მისი წინაპარი ზურაბი — სოლომონ მეფის მრჩეველი ყოფილა.

მისი ერთი სტატია „ივერიის“ 1894 წ. № 157-ში ასე იწყება: „წარსულ წერილში ჩვენ გამოვთქვით ის აზრი, რომ შესაძლებელია ჩინეთსა და იაპონიას შორის ატეხილმა დავამ ... ნაპერწყალი დასავლეთშიაც გადმოიტანოსო“ (w). წინა სტატიას ამ თემაზე ხელს აწერს მეველე.

ხშირად ხელმოუწერლადაც აქვეყნებს სტატიებს, რომელთა სტილის, ენისა და აზრთა მსვლელობის ანალიზი გვარწმუნებს, რომ ეს ხელმოუწერელი სტატიები მეველეს ეკუთვნის (მაგ. წერილები საერთაშორისო ურთიერთობაზე „ივერიის“ 1894 წლის № 182 და 183-ში და სხვ.).

გ. წერეთლის ცნობილი განსაზღვრით, მწერლის ვალია გამოამყდვენოს თანამედროვე ცხოვრების ნაკლოვანებანი და თან საზოგადოებას „უჩვენოს იმ გვარი საშუალებები, რომლებიც მისი ფიქრით, საუკეთესო არიან ამ ნაკლოვანებების მოსასპობლად“. მწერლის ამ ვალს იხდოდა მეველაც მთელი თავისი მოღვაწეობით.

მეველეს არ ჰქონია მწერლის პრეტენზია, მაგრამ თუ საქმე პუბლიცისტურ ნაწერებზე მიდგება, მისი სახელი მუდამ იქნება გასული საუკუნის გამოჩენილი ქართველი პუბლიცისტების სახელთა შორის.

ყოველ მაღალ კულტურულ დონეზე მდგომ ერს ჰყოლია მეველას ტიპის დაუცხრომელი მოღვაწეები, რომელთაც მცირე როლი როდი ითამაშეს თავიანთი ქვეყნის კულტურულ თუ ეკონომიურ ცხოვრებაში. ეს ის მოღვაწენი არიან, რომელთაც ბევრი ყამირი გაუტეხიათ ეროვნული კულტურის ჯანსაღი და ნაყოფიერი თესლისათვის.

კორესპონდენციაში, ფელეტონში თუ წერილში მეველის ფიქრი თავს დასტრიალებდა საქართველოს. იგი თავისი უპრეტენზიო რჩევით ეხმარებოდა თანამემამულეებს და მათთან ერთად ეძებდა გზებს უკეთესი მომავლისაკენ. ფსევდონიმიც უბრალო და ბევრის მთქმელი ჰქონდა: მეველე! ასე ეძახიან... ნათესისა და ველ-მინდვრის მცველს, რომელიც დღე და ღამე თავს დასტრიალებს მამულს, რათა საქონელმა არ გააფუჭოს, ქურდმა ვერ გააჭაჭანოს, ავი თვალი არ დაადგეს. გადატანითი აზრით მეველე მამულის გუშაგსა და მოამაგეს ნიშნავს და დ. მიქელაძემ ფსევდონიმად ამ სიტყვის არჩევით უდავოდ სამუდამოდ განუმტკიცა და დაუმკვიდრა ამ სიტყვას იმთავითვე მიცემული ეს მაღალი აზრი.

დ. მიქელაძე და მისი თანამებრძოლები სწორედ ასეთ მაზნანს ისახავდნენ: დაეცვათ ქართული მიწა, ერგოთ რამე თავისი ხალხისთვის. ეს იყო შეუპოვარ, თავმდაბალ, ნიჭიერ და უპრეტენზიო მოღვაწეთა თაობა, რომელიც, სერგეი მესხის სიტყვით რომ ვთქვათ, იმაზე ოცნებობდა, რა იქნება, „ერთი პატარა რევოლუცია მაინც გვენახაო!“ და არა მარტო ოცნებობდა, ბევრ რამეს აკეთებდა კიდევ ამისთვის. ამგვარად, ხშირად ჩვენი „მეველეები“ კიდევაც სცილდებოდნენ იმ მოვალეობას, რასაც ფსევდონიმად არჩეული სიტყვა გულისხმობს.

იმ დროს, როცა ახალგაზრდობაჲს დიდ ნაწილს ოცნებად გაეხადა „მეტი სიტკბოებისა და ნეტარების მოპოვება ცხოვრებაში“, მეველის „გულდამჯდარად“ ლაპარაკი ქვეყნის ავ-კარგსა და მომავალზე უკვალოდ არ იკარგებოდა. ისიც ერთ-ერთ ბურჯად უდგა ჩვენს ზნეობას, იმედსა და სადღეისო საქმეს. ეს არის დამსახურება, რასაც ხალხი არასოდეს არ ივიწყებს.

წინამდებარე შრომაც ამ დამსახურების ანალიზს ასახავს მიზნად.

როცა კვლევის საგნად ავიღეთ დავით მიქელაძის ცხოვრების, ღვაწლისა და შეხედულებათა რამდენადმე სრული სურათის აღდგენა, ამით გვინდოდა პირველ რიგში მადლიერი მემკვიდრის ვალის მოხდა უანგარო ადამიანის წინაშე, რომ მისი სახელი დავიწყების ფერფლმა არ დაფაროს. დროა მეველეს დავუსაკუთროთ თავისი კანონიერი ადგილი ჩვენი კულტურული წარსულის ისტორიაში, როგორც მოღვაწეს, რომელზედაც დღემდე საგანგებოდ არავის შეუჩერებია ყურადღება. როგორც კვლევის საგანზე, თუ არ ჩავთვლით აწ განსვენებული მკვლევარის სოლომონ ცაიშვილის მცირე ზომის ნარკვევას და ორიოდ სხვა ცნობას, გაბნეულს ჩვენს ძველსა თუ ახალ პრესაში, არქივებსა და ბიბლიოთეკებში, ნათესავებსა და მეგობრებში.

თუ ჩვენ მოვახერხეთ ამ მასალის საკმაო სისრულით თავმოყრა, გარჩევა და მეველის ცხოვრებისა თუ ღვაწლის რამდენადმე სრული სურათის შექმნა, ამით ჩვენს მთავარ მაზანს მიღწეულად ჩავთვლით.

•

ცხოვრების გზა

„ამ დღის ვარამს მედგრად ებრძვის და
მით ყოფა უჩანს უხამად“.

ნ ი კ ო დ ა დ ი ა ნ ი

დავით მიქელაძე, ახალი თაობის მებრძოლი მოღვაწე, ქუთაისის თავადაზნაურობის წინამძღოლის ოჯახშია დაბადებული და გაზრდილი. მეველე — მარშლის შვილია.

უკვე ამ კონტრასტიდან ჩანს „მამათა“ და „შვილთა“ მიზნებისა და იდეალების სხვადასხვაობა, მრავალ სფეროში მათი მისწრაფებების ერთიანობის მიუხედავად.

დაიბადა სოფელ კულაშში, 1843 წელს, სწორედ სამი წლით გვიან აკაკი წერეთელზე და ექვსი წლით გვიან ილია ჭავჭავაძეზე, რომელთა მეგობარი და თანამებრძოლიც იყო ათეული წლების მანძილზე.

გამოჩენილი მოღვაწის მამა, ალექსანდრე მიქელაძე, ქართული მილიციის ვეტერანი, თურქებთან ბრძოლის მონაწილე, რუსეთის გვარდიის პოლკოვნიკი, ქუთაისის გუბერნიის თავადაზნაურობის პირველი წინამძღოლი (მარშალი), არაერთგზის ყოფილა დაჯილდოებული, არაერთხელ უსახელებია მას ქართული

იარაღი. სხვა თანამოგვარეებმა აგან გასარჩევად, რომელთაც აგრეთვე ალექსანდრე ერქვათ, მას ჩვეულებრივ „დიდ ალექსანდრეს“ ეძახდნენ.

ნიკო ნიკოლაძე იგონებს მამის ნაამბობს, — ყირიმის ომის დროინდელ ამბავს, როცა დავითის მამას, ალექსანდრეს, თათრებთან ბრძოლაში თავი გამოუჩენია: „სალდათის ჭარი ჩვენ ნაკლები გვყავდა და მილიცია მტერს შეტაკებას ვერ უბედავდა ამ დროს, ვხედავ: საყდრის გალავანზე შეხტა თავის ალისფერი მუნღირით უზარმაზარი ალექსანდრე მიქელაძე (მწერალ შეველეს მამა) და საზარელი ხმით დაგვიღრიალა: „თათრები მირბიან, ბანაკი და ბარგი არ გავატანოთო“. მთელი მილიცია იმავე წუთში გალავანს გადაახტა და სროლაში გართულ თათრებს ისეთი სიმამაცით თავს დაესხა, რომ არა თუ ზარბაზნები, თოფებიც კი დაავიწყდათ...“¹

ცხადია, მხედრულად ნაწრთობი, ამაყი და მამაცი ალექსანდრე შვილშიაც იმავე თვისებებს ნერგავდა, მაგრამ აღრევე საგრძნობი ხდება, რომ შვილი არ აპირებს მამის კვალზე წასვლას. დათას სძაგს ომი, ხოცვა-ჟლეტა, პოლიცია, სამაგიეროდ უყვარს წიგნები, თხზავს ლექსებს, ოცნებას ეძლევა. მაგრამ კულაში ბევრს ვერაფერს აძლევს ცნობისმოყვარე ყმაწვილს.

კულაში იმ დროს შვიდასამდე კომლი მცხოვრები იყო, აქედან ასოცამდე — ებრაელები, მეტწილად სისხლისმწოველი ვაჭრები, რომლებიც უწყალოდ ყვლეფდნენ ისედაც გაჭირვებაში მყოფ მოსახლეობას. როგორც „დროება“ წერდა, მამისახ-

¹ ნ. ნიკოლაძე, „რჩ. ნაწერ.“, ს. ხუნდაძის რედაქციით, 1831, გვ. 26.

ლისიც ამ ვაჭრებს ექომავებოდა, რის გამოც გლეხი უფრო და უფრო ღარიბდებოდა. ბინძურ ქუჩებში მუდამ ეგდო ცხენის ან ძაღლის ლეში, საშინელი უსუფთაობა აჩენდა მრავალ სნეულებას და ერთი ექიმიც არსად იყო, თუ არ ჩავთვლით გაიძვერა ხანამ ისხაკს.

ბუნებით მგრძობიარე ყმაწვილს აღაშფოთებდა ჩარჩ-ვაჭრების უსინდისობა და გულში ენერგებოდა მჩაგვრელთა სიძულვილი, რაც მთელ მის ცხოვრებას აძლევს მიმართულებას. თავადი, რომელსაც ელის დიდება; პატივი და სიმდიდრე, ეკლიან გზას ირჩევს და არც ნანობს თავის არჩევანს.

1853 წ. დათა მიქელაძე შეიყვანეს ქუთაისის გიმნაზიაში, რომელიც 1863 წელს დაამთავრა. იმავე წელს გაგზავნეს პეტერბურგის უნივერსიტეტში. აქ რჩება 1867 წლამდე.

ამ ხანებში დ. მიქელაძე უკვე ყალიბდება, როგორც მოწინავე ჟურნალისტი და მოღვაწე.

1864 წელს დ. მიქელაძემ ი. მელიქიშვილისა (მელიქ-აღას) და ვ. თულაშვილის თანამონაწილეობით დააარსა სტამბა, სადაც იბეჭდებოდა ქართული ჟურნალები და წიგნები:

თვით დ. მიქელაძე ამ დროს უკვე წერს სტატიებსა და ლექსებს, რომელთა ნაწილი შემონახულია.

1867 წელს 24 წლის დ. მიქელაძე ივ. კერესელიძის „ცისკარში“ ბეჭდავს საკმაოდ გონებამახვილურსა და მსუბუქ სატირულ ლექსს „სოფლის მებატონე“. აი ამ ლექსის ნაწყვეტი:

„არ მომდის ღვინო,
რით მოვილხინო,

ღვინო არ არი,
რით გავიციანო?

ნეტა იმ ღღეს, რომ
გლახები მყვანდნენ,
წითლის ყულუხს რომ
ბევრს მომიტანდნენ.

ახლა სადღაა
ჩვენი ბეგარი,
ვის აღარ ახსოვს
ის ღღე ნეტარი!”

რაკი ღვინო არ არის, მებატონეს სიცოცხლეზე ხელი აუღია. ლექსი მხატვრულად სუსტია, მაგრამ მასში უკვე ჩანს მომავალი მწერლისა და მოღვაწის იუმორისტული ნიჭი, აგრეთვე მისი დამოკიდებულება მჩაგვრელებისადმი.

დ. მიქელაძემ დროზე შენიშნა, რომ ლექსების წერაზე ფუჭად კარგავს ძვირფას დროს, რაც შეიძლება გამოიყენოს უფრო სერიოზული საქმეებისათვის. თავს ანებებს პოეზიას და დგება იმ საქმის სამსახურში, რითაც, მისი რწმენით, მეტ სარგებლობას მოუტანს ხალხს. ბუნებრივია, რომ მალე მჭიდროდ უახლოვდება სამოციანელთა მეთაურებს, მეტადრე კი თავის თანამოაზრესა და მეგობარს სერგეი მესხს, გასული საუკუნის ამ გამოჩენილ ადამიანს, რომლის სიცოცხლის მიზანი იყო სამშობლო ქვეყნის უანგარო სამსახური:

ს. მესხმა 1867 წელს დაამთავრა პეტერბურგის უნივერსიტეტი და საქართველოში დაბრუნდა: ორი წლით გვიან შეაღ-

გინა „ახალი ახალ გაზრდების“ ჯგუფი, რომელმაც თავი მოიყარა „დროების“ გარშემო. 15 წელი განაგებდა ამ გაზეთს, მას შესწირა ჯანმრთელობა, ენერგია და სიცოცხლე (კლექით გადაიცვალა აბასთუმანში, 1883 წელს).

ს. მესხთან სიახლოვემ გარკვეული ზეგავლენა მოახდინა ისედაც მებრძოლი ბუნების მოღვაწე დ. მიქელაძეზე.

დ. მიქელაძის ნაწერებიდან ჩანს მისი მაღალი კულტურა და კლასიკური განათლების მაღალი დონე, თუმცა, ბევრი მისი თანამედროვე სახელოვანი მწერლას მსგავსად, უმაღლესი განათლების დასრულება ვერ მოახერხა.

უმაღლესი განათლების მისაღებად დ. მიქელაძე მიემგზავრება პარიზში, სადაც ვხედავთ 1873 წლის ბოლომდე.

ზოგიერთ საყურადღებო ავტობიოგრაფიულ ცნობას დ. მიქელაძე გვაწვდის განცხადებაში, რაც წარუდგინა კავკასიის საცენზურო კომიტეტს ყოველდღიურ გაზეთ „რიონის“ დაარსების საქმეზე, 1880 წლის 6 იანვარს¹. როგორც ამ განცხადებიდან ჩანს, მიქელაძისათვის მოუთხოვიათ მეცნიერებათა კურსის დამთავრების მოწმობა, რაზედაც ის წერს, რომ მოწმობა არა აქვს, რადგან ასეთი კურსი არ დაუმთავრებია, მიიღო შინაური განათლება, შემდეგ რამდენიმე წელს მეცადინეობდა პეტერბურგში, ბოლოს ერთი წელი ისმენდა ლექციებს პარიზში, სადაც, მისივე ცნობით, სწავლობდა ისტორიას, ლიტერატურას და „ზოგიერთ პოლიტიკურ მეცნიერებას“. სწორედ ამ „ზოგიერთ პოლიტიკურ მეცნიერებაში“ განსწავლის მიზნით მიუწევ-

¹ ეს დოკუმენტი ინახება ნ. ნიკოლაძის არქივში.

და გული პარიზისაკენ დ. მიქელაძეს, და მართლაც, ბევრი რამ შეისწავლა როგორც უშუალო დაკვირვებით, ასევე ლექციების მოსმენით და მოწინავე რევოლუციური აზრის მედროშეთა ნაწერების კითხვით, განსაკუთრებით კი მარქსის შრომების გაცნობით.

უცხოეთში მყოფი დ. მიქელაძე უნებური მოწმე და ერთგვარა მონაწილეც ხდება მსოფლიო-ისტორიული მნიშვნელობის მოვლენებისა, რომელთა ცენტრი იყო პარიზის კომუნა და და მისი გამომძახილი.

დ. მიქელაძე რომ პარიზის კომუნის მღელვარე დღეებისადმი გულგრილი არ ყოფილა და შემდგომაც, გამოსვლასა თუ შეკრებაში რომ აქტიური მონაწილეობაც მიუღია, ეს ჩანს, სხვათა შორის, ისეთი ავტორიტეტული პირის მოწმობიდან, როგორცაა გიორგი წერეთელი. წერილში „ქუთაისის ბანკის ისტორია“ ის მოგვითხრობს: როცა ქუთაისში ბანკის საქმეზე ჩასული ბესარიონ ლოლობერიძე უახლოეს თანამებრძოლებს — სერგეი შესხსა და დავით მიქელაძეს ასახელებდა, მოწინააღმდეგეები აფრთხილებდნენ: „არა, ეგენი საშიში კაცები არიანო, მთავრობისგან შენიშნულებიო; ზოგზე ამბობდნენ, რომ საზღვარს გარეთ იგვარდნილ კაცებთან ჰქონიათ მეგობრობაო, ზოგზე — საფრანგეთში რომ იყო, იქაურს რევოლუციაში ერეოდანო...“¹ ეს უკანასკნელი სიტყვები არავის ისე არ ეხება, როგორც დავ. მიქელაძეს. ყველგან, სადაც კი თავისი მოგზაურობის ან ყოფნის წვრალმანებს გადმოგვცემს, უსათუოდ გადაჰ-

¹ „დროება“, 1879, № 82.

კრავს ხოლმე რეაქციონერებს და დაუფარავად გვაუწყებს თავის პოზიციას. მაგალითად, წერილში „პეტერბურგიდან ჟენევაში“ ასეთ აღგილს ვხვდებით: „დასრულდა, მადლობა ღმერთს, უკანასკნელი ბისმარკის სადიანბეგო და გარდმოვცილდი შვეიცარიის საზღვარზე“. უხარია, რომ ველარ ხედავს „შავ ორბსა და გვირგვინს“ და სხვ.

დ. მიქელაძემ ევროპა მოიარა. პეტერბურგიდან ბერლინის, ბაზელისა და ჟენევის გავლით პარიზში ჩადის 1872 წლის შემოდგომაზე (პეტერბურგიდან გავიდა სექტემბრის მეორე ნახევარში)¹.

პარიზში მანამდეც იყვნენ ქართველი ინტელიგენციის მოწინავე წარმომადგენლები. ზოგიერთ მათგანს რევოლუციურ გამოსვლებშიც მიუღია მონაწილეობა.

როგორც „დროება“ იუწყებოდა, კომუნარებს შორის კარაბინებით ხელში ქართველი მოხალისეებიც იდგნენ². აშკარაა, მამაცი დათა მიქელაძე კალმით თუ იარაღით თავისუფლებისათვის მებრძოლთა შორის იქნებოდა, იმ დღეებში რომ პარიზის ბარიკადებზე მოხვედრილიყო.

„მსოფლიოს გულში“ მყოფ მეველეს, ნ. ნიკოლაძეს და სხვა მოწინავე ქართველ მოღვაწეებს თავისუფლების საქმისადმი საერთო სიმბათიის გარდა შორეული ფარული მიზანიც აქვთ: სამშობლოს განთავისუფლება უცხოეთის სახელმწიფო მოღვაწეების დახმარებით.

¹ „დროება“, 1872, 26 სექტ. და 27 ოქტ.

² „დროება“, 1872, № 22.

ამ მიზნით დ. მიქელაძე თვალყურს ადევნებს ევროპის მცირე და დიდ ერთა ცხოვრებას და დგას იმ დროის ისტორიული მოვლენების ცენტრში. იგი თვითონვე გვაუწყებს, რომ „მრავალგან დასწრებია საზოგადო კრებას რუსეთსა და ევროპაში“¹.

დავით მიქელაძე. ნიკოლაძე და იზმაილოვი პარიზში იმ დროს იმყოფებოდნენ, როცა პარიზელები, პარიზის კომუნის მონაწილე დორიანს ასაფლავებდნენ. „დორიანმა, — სწერდა ნიკო ნიკოლაძე თავის მომავალ შეუღლებს ქენევაში, — პარიზის გარემოცვისას ის გააკეთა, რაც გამბეტამ პროვინციაში. დორიანის დასაფლავეებაზე პროცესიის თავში ღრმად მწუხარე გამბეტა მიდიოდა, რომელსაც მოსდევდნენ ლუი ბლანი, კონსიდერანი და სხვები. ერთი სიტყვით ყველა, რაც კი პარტიაში რაიმე როლს ასრულებს... მიქელაძე თავდავიწყებული იყო ალტაცებისაგან, მე და იზმაილოვი რომ არა, ალბათ, გადაეხვეოდა გამბეტას, მაგრამ ჩვენ ვაოკებდით მის გულის წადილს. მიქელაძემ, რომელსაც ხელი შევეუშვიტ, რომ ნერვები როგორმე შეგვემაგრებინა, უცბად დაიღრიალა — ვივ ლა რესპუბლიკ, უფრო კი ვივ ლია რესპუბლიკე და ასე დაიღრიალა, რომ ათიათასიანმა ბრძომ მორთო ღრიალი, ტამისცემა, ხმაური, თითქოს თეატრში ყოფილიყოს და არა დასაფლავეებაზე. მინდოდა პირზე ხელი მიმეფარებინა, მაგრამ გვიან იყო. დასაფლავეებაზე რომ არ ვყოფილიყავი, ალბათ მეტი განდიდებისათვის მეც დავყვირებდი: ბატონებო მეტქი, ეს თავადია რესპუბლიკის გამარჯვების წარმომტქმელი“... „როცა ალყაფის კარებში გამოვ-

¹ „ივერია“, 1893, № 87.

დიოდით, მიქელაძემ, რომელიც გამბეტას გვერდით მოჰყვებოდა, მოიხადა თავისი უცნაური ქულა და დაიწყო: ვივ ლე სიტოიენ გამბეტა. ბრბომ, რომელსაც მიქელაძის აქცენტთან არა ესაქმებოდა რა, ამ ყვირილს მქუხარედ მისცა ხმა“¹.

პარიზში დ. მიქელაძე ბევრ გამოჩენილ ადამიანს ეცნობა და უახლოვდება. მის მეზობლად ბუნებას იზიდავდნენ პრუდონი, ლუი ბლანი, ლანგლუა, გამბეტა, მეტადრე — გარიბალდი.

განსაკუთრებით საკურადღებო ფაქტია დ. მიქელაძის მიერ გარიბალდის გაცნობა. როგორც ცნობილია, იტალიის ლეგენდარული გმირი 1871 წელს საფრანგეთის რესპუბლიკას სთავაზობს დახმარებას გერმანიის წინააღმდეგ ბრძოლაში და ამარცხებს გერმანელთა კორპუსს.

ერთხელ პარიზს მყოფი დ. მიქელაძე ტირში შესულა და სროლაში მონაწილეობის ნება უთხოვია. როცა იარაღი მიეღო, მის უკან მდგარ უცნობს შეუნიშნავს, — არ გირჩევთ, ამ ნიშანში მოხვედრება გაგიჭირდებათ.

დათას მოუხედავს, არაფერი უთქვამს, უსვრია და მიზანში მოუხვედრებია. ზუსტი სროლით აღტაცებულ უცნობს მიულოცავს და ძლიერ ნასიამოვნები დარჩენილა, როცა გაუგია, რომ ეს ახოვანი, ლამაზი ჩუბინი ქართველი აღმოჩნდა. თავის მხრივ დათას სიხარულსაც საზღვარი არა ჰქონია, როცა დარწმუნებულა, რომ მას ესაუბრება თვით გარიბალდი.

¹ ნ. ნიკოლაძის ეს წერილი ციტირებულია ჟურნალ „დროშაში“ გამოქვეყნებულ ს. ხუციშვილის სტატიიდან — „დავით მიქელაძე“ („დროშა“, 1959, № 9).

უცხოეთს იყოფი დ. მიქელაძე არაერთ სტატიასი ამქლავ-
ნებს მარქსის მოძღვრების ცოდნას, ხანდახან ახერხებს კიდეც
მის ქადაგებას.

მეველეს უთარგმნია კიდეც შესავალი ნაწილი წიგნისა
„პოლიტიკური ეკონომიის კრიტიკისათვის“, მაგრამ სასტიკი
საცენზურო პირობების გამო არ დაბეჭდილა¹.

შეიძლება უდავო ფაქტად ჩაითვალოს, რომ დავით მიქელა-
ძეა ერთი პირველთაგანი, რომელმაც საქართველოში მარქსის-
ტული იდეების პოპულარიზაცია დაიწყო.

პარაზში დ. მიქელაძე, ზარაფოვთან ერთად, ბინად დგას
ს. მესხის პირდაპირ.

მესხი ხედავს თავისი მეგობრისა და თანამოკალმის ღირ-
სებებს და დიდ იმედებს ამყარებს მასზე. 1873 წ. 13 სექტემ-
ბერს პარიზიდან თავის დანიშნულს სწერს: „მინდა მიქელაძე
წავათრიო აქედამ და ახალი წლიდამ სამჯერ გამოვსცე გაზეთი“².

1873 წლის ოქტომბერში მიქელაძე და ზარაფოვი ვენისაკენ
მიემგზავრებიან. მესხი სულ ფიქრობს მის წაყვანას თბილისში.

1873 წელს „დროების“ ორი პარაზელი კორესპონდენტი —
ნ. სკანდელი (ნ. ნიკოლაძე) და მეველე (დ. მიქელაძე) ინაწი-
ლებენ საქმეს: დ. მიქელაძე დაწერს ზოგად საკითხებზე, სკან-
დელი — „ქალებზე, ბულვარზე“ და ა. შ. — ასეთია ფორმალუ-
რი შეთანხმება. მაგრამ ორივე წერს საჭირბოროტო საკითხებ-
ზე, რომელთა მიმართაც გულგრილი ვერ დარჩებოდა „დროე-
ბის“ კორესპონდენტი.

¹ «Заря Востока», 1947, № 112, 7 ივნისი.

² ს. მესხი, „წერილები“, სოხუმი, 1950, გვ. 49.

1873 წელს ნ. ნიკოლაძესა და პ. იზმაილოვთან ერთად დ. მიქელაძე პარიზში სცემს ჰექტოგრაფზე დაბეჭდილ არალეგალურ გაზეთ „დროშას“. სულ გამოვიდა ათი ნომერი, ას-ას ცალად. ტირაჟი მცირეა, მაგრამ მნიშვნელობა განუზომელი და ჩანაფიქრიც — ისტორიული.

„დროშის“ სამი ნომერი ინახება თბილისში, მარქს-ენგელს-ლენინის ინსტიტუტის ფილიალში, ზოგი ნომერიც დაცულია (ნ. ნიკოლაძის ცნობით) ლონდონში, ბრიტანეთის მუზეუმში.

ამ გაზეთის გამოცემა დ. მიქელაძის ერთ უმთავრეს ისტორიულ დამსახურებად უნდა ჩაითვალოს.

„დროშის“ პირველი ნომერი გამოვიდა პარიზში 1873 წლის 1 აპრილს. ზევით გამოხატულია გაშლილი დროშა და ზედ წარწერილია ილიას სიტყვები: „აწმყო თუ არა გვწყალობს, მომავალი ჩვენია“.

ეს იყო პირველი ქართული სოციალური გაზეთი არა მარტო უცხოეთში, არამედ საერთოდაც.

„დროშის“ პირველ ნომერებში მოცემულია გაზეთის პროგრამა: „ყველა კავკასიელი ხალხის თავისუფალი ფედერაცია“ (№ 2); „მუშების კავშირების შედგენა, რომლებიც მომავალი ევროპის სოციალური შეერთებული რესპუბლიკის თესლად გამოდგებიან“ (№ 3); „პოლიტიკური ერთობა, რომელშიც საზოგადოებრივი განწყობილება სოციალური იდეალისამებრ შეიცვლება ისე, რომ შრომის უპირატესობა და მშრომელი ხალხი წინა ადგილზე დააყენოს“ (№ 3).

როგორც გაზეთის პროგრამიდანაც ჩანს, „დროშის“ მესვეურებისათვის უქმად არ ჩაუვლია მარქსისა და პირველი ინტერნაციონალის მოღვაწეობის ცენტრთან სიახლოვეს. ისინი სერიოზულ ამოცანებს ისახავენ. დ. მიქელაძე რევოლუციური

იდეოლოგიის თვალსაჩინო მოღვაწედ წარმოგვიდგება. როგორც ირკვევა, იგი „დროშის“ ყველაზე აქტიური თანამშრომელი ყოფილა. სხვებთან ერთად ის დაინტერესებულია იმავე სოციალ-პოლიტიკური და ეროვნული თავისუფლების საკითხებით. ამავე სულისკვეთებით არის გამსჭვალული, როგორც ქვემოთ ვნახავთ, „უცხოეთის ამბების“ ციკლის ყველა სტატია, მეტადრე ის წერილები, რომლებიც მცირე ერების ბედს ეხება.

ბოლოს პარიზში ცხოვრებისა და მოღვაწეობის დროც იწურება.

ახალგაზრდა დ. მიქელაძეზე დიდ იმედს ამყარებდნენ მისი გამოჩენილი თანამედროვეები.

თუ რა ნდობით იყო გამსჭვალული სერგეი მესხი დავით მიქელაძისადმი, ეს ჩანს 1873 წ. 13 სექტემბრით დათარიღებული წერილიდან, რომელშიაც გასული საუკუნის ჩვენი კულტურული ცხოვრების ეს ერთი საიმედო ბურჯი მომავალ მეუღლეს კეკე (ეკატერინე) მელიქიშვილს სწერს: „მომავალი წლიდან ახალი პლანები მაქვს გაზეთის თაობაზე... მინდა მიქელაძე წავათრიო აქედამ და ახალი წლიდან სამჯერ გამოვსცე გაზეთი. თუ მთავრობამ ნება მოგვცა, სხვა დაბრკოლება არა იქნება რა. ეს თუ მეყოლა, მერე არც შენი კირილე, არც ნიკოლაძე, არც წერეთელი, არც სხვა არავინ თანამშრომელი არ მინდა: ჩვენ ორნი ძალიან კარგად გამოვიყვანთ გაზეთს კვირაში სამჯერ...“¹

შემდეგაც არაერთხელ ახსენებს ს. მესხი დ. მიქელაძეს, იმედი აქვს, რომ მასთან და კირილე ლორთქიფანიძესთან ერთად კვირაში, ერთს კი არა, სამ ნომერსაც კარგად გამოსცემს. ერთ

¹ ს: მესხი, „წერილები“, სოხუმი, 1950, გვ. 49—50.

წერილში ვარაუდობს, „მოწინავე სტატიებს- მე და მიქელაძე გავიყოფთ... სადაც ლოკრუასავით გაცხარებული სიტყვა, ყვირალი, ბაქა-ბუქი იქნება გამოსადეგი — იქ მიქელაძე მეყოლებოა“¹. მაგრამ მიქელაძის ასეთი დახასიათება მთლად სწორი არ უნდა იყოს... „ლოდიკა და დამჭდარი ლაპარაკი“ არც მიქელაძისთვის არის მიუწვდომელი ღირსება.

1873 წლის ოქტომბერში ს. მესხი პარიზიდან აცილებს მიქელაძეს და ზარაფოვს.

1873 წ. ოქტომბრის პირველ რიცხვებში „დროება“ მკითხველებს ახარებს. რომ პარიზიდან დაბრუნდა „პარიკული წერილების“ და „თანამედროვე“ შენიშვნების და სურათების“ ავტორი, დ. მიქელაძე და „ამ დღეებში „დროებას“ რედაქციის შრომაში ჩაებმება“².

იმ ხანებში უცხოეთს იმყოფებიან ს. მესხი და გ. წერეთელი. ამ დროებით დანაკლისს ღირსეულად ავსებენ კირილე ლორთქიფანიძე და დავით მიქელაძე.

იმავე წლის 23 ნოემბერს მეველე უკვე იწყებს მოზრდილი წერილის გამოქვეყნებას მხიარული სათაურით — „კაი გამარჯობა“, სადაც ისევ ქვეყნის საკირბოროტო საკითხებს ეხება.

იწყება მეველის კიდევ უფრო ცხოველი მოღვაწეობა „დროებაში“, რომლის უახლოესი თანამშრომელი, ფაქტიურა რედაქტორი და გამომცემელიც ის იყო 1873-1874 წლებში. საერთო ხელმძღვანელობის გარდა, გაზეთში წერს ქალების უფლებებზე, ახალგაზრდობაზე, პოლიტიკაზე, ბანკზე...

¹ ს. მესხი, „წერილები“, გვ. 94.

² „დროება“, 1873, № 40.

„დროება“ (1866—1885 წწ.) პირველი ქართული პროგრესული გაზეთია. მას რედაქტორობდნენ ჯერ გ. წერეთელი, მერე ს. მესხი და 1883 წლიდან — ი. მაჩაბელი.

დ. მიქელაძესთან ერთად ამ გაზეთში იბეჭდებიან ი. ქავჭავაძე, ა. წერეთელი, ს. მესხი, ნ. ნიკოლაძე, ალ. ყაზბეგი, პ. უმიკაშვილი, გ. წერეთელი, ივ. მაჩაბელი... შეიძლება ითქვას, რომ მათ შორის ყველაზე უფრო „შმაგი“ მაინც მეველე იყო, ამ სიტყვის უკეთესი გაგებით.

ფრანგული ტემპერამენტი კეთილისმყოფელ ზეგავლენას ახდენს დ. მიქელაძის ისედაც მგზნებარე ბუნებაზე. საერთოდ, პარიზმა წარუშლელი შთაბეჭდილება დასტოვა დ. მიქელაძეზე. ის აღტაცებულია ფრანგების პოლიტიკური ცხოვრებით და როგორც ს. მესხი ხუმრობით შენიშნავს, ჩვენს საბანკო კრებაზეც ლაპარაკის დროს „ცდილობს იმათ წაბაძოს ხელების ქნევითა და სიტყვის მანერით“.

თუ ნ. ნიკოლაძეს ეძახდნენ ისეთ თვინიერ ვეფხს, რომლის ძარღვებშიც სისხლის ნაცვლად რძეაო, დ. მიქელაძე იყო ბუნებით ნამდვილი გამეხებული ვეფხი, რომლის ძარღვებშიც ვეფხის სისხლი ჩქეფდა.

ის ვერ ეგუებოდა მორჩილებას, პესიმისტურ წუწუნსა და უქმად ყოფნას. უიმედო ადამიანებზე საგანგებო წერილსაც კი წერს:

„ნიადაგ უიმედო და მოშიშარ კაცთან ბეჯითი და უდავო საქმეც კი გაგიფუჭდება, თორემ თუ ცოტა საფრთხილო რამეა, მაშინ ხომ რაღა! დაიკარგება ყველაფერი. უიმედო ადამიანი საბრალო სულდგმულია, ის ნიადაგ დატანჯულია. ის ყოველთვის ოხრავს, ხვნეშის, იმტვრევს თავს უსარგებლო წარმოდგი-

ნებებით, იხეთქს გულ-ღვიძლს ათასნაირი გაფრთხილებით და შიშით. იმის არსებაში ყოველთვის გამოუღეველად ბუდობს ურიცხვი მცირე დაბრკოლებანი, რომელიც სხვისთვის უმნიშვნელო იქნებოდა, მაგრამ ამ საბრალოს დაჩაგრულს კი განუწყვეტლად უხვრეტს გულს და ართმევს უკანასკნელს ისეც შემცირებულს სულის ძალას. წვრილმანობა სდევნის მისის გულისგან უმაღლეს მიზანს და რამდენიმე წლის შემდეგ კაცი ერთიანად მახინჯდება. ამას კიდევ რა გაეწყობა. მაგრამ თავის ამნაირი საქციელით ის სხვებსაც რომელიმე ხარისხით აჩნევს გულში საკუთარ სიმზდალეს. მტკიცე ტვინის და ხასიათის პატრონ კაცებზედაც ცუდი ზედ მოქმედება აქვს ამ გლახა კაცების შეხედვას. ეს გავლენა იმ შთაბეჭდილებასა ჰგავს, როდესაც თქვენ მშვენიერ ზაფხულის დღეში, სავსეს სიცოცხლით და ნეტარებით, ერთბაშად სუნგადენილ მკვდარს დაინახავთ... შექსპირი ამ საგანზედ აი რას ამბობს: სასოწარკვეთილება გვექმნის ჩვენ სულმოკლედო“¹.

სულმოკლე, მშიშარა, უიმედო ადამიანთა ფსიქოლოგიის ამ უბრალო და უზადო ანალიზიდან მეველეს გამოჰყავს ორიგინალური დასკვნა: ადამიანმა ცხოვრებას თვალი უნდა გაუსწოროს და წუწუნის ნაცვლად იმოქმედოს, როგორც გული და სინდისი. კარნახობენ: „გასწი შეუპოვრად! რა გამოდგება იქიდგან, ამის ფიქრში რომ აყო: აი ამას ფეხს წავკრავ, ამას შუბლით შევეტაკებო? თუ ცხოვრება ლოდიკური რიგით არ მიმდინარეობს, მაშინ, შენც რომ არაფერს წაკრა ფეხი და არც შუბლი შეახალო, მაინც ისეთს კინწს გკრავენ, თუ კი სურთ, რომ ორი-

¹ „დროება“, 1874, № 408.

ვე ცხვირის ხესტოებიდან კოკასავით წამოხეთქს სისხლი... სტიქიონტ ძალი, რომელიც შენს ხელში არ არის, იმ წამს გაგსრესს, რა დროსაც ენებება მას. მაშ სჯობია ისევ კეთილი საქმის დროს წამოგეწიოს გრიგალმა, ქარიშხალმა და ათასმა მოვლენამ. ესენი ხომ მაინც ყოველთვის შენს თავს ზემოთ დაგცქერაან!“

ადამიანი, რომელიც თანამემამულეებს ასე ამხნევებდა, თვითონ იყო სამაგალითო, იმედიანი მებრძოლი ქვეყნის წინსვლისათვის.

„დროების“ ერთ-ერთ ფელეტონში მოცემულია დ. მიქელაძის ასეთი დახასიათება:

„აი სიმპატიური, ყველასათვის და განსაკუთრებით ქალებსათვის საყვარელი ყმაწვილი კაცი! კარგი ტანადი, ლამაზი, თვალადი, კარგად გაზრდილი — წვერ-ულვაში, ყუყუნა თვალები, ფართო შუბლი... მაგრამ მალლა ნულარ ააწევით... ქუდი რო ეხუროს, ისე ნახეთ. ხასიათში საშუალო — საუკუნის რაინდული თვისებანი და მეცხრაშეტე საუკუნის დემოკრატიული მიდრეკილება ერთად აქვს შეზავებული“¹.

უფრო ნათელი დახასიათება გასული საუკუნის ამ ერთი იშვიათი ადამიანისა სწორედ ძნელი იქნებოდა. ოღონდაც! ფელეტონის ავტორია სერგეი მესხი (მეყენჭე).

უცხოეთიდან დაბრუნების შემდეგ დ. მიქელაძემ შეირთო ელისაბედ ირაკლის ასული, ლორთქიფანიძის ქალი (გარდაიცვალა 1943 წელს), რომელთანაც ოთხი შვილი ეყოლა. მის სამაგალითო ქართულ ოჯახში მუდამ მებრძოლი, პატრიოტული სული ტრიალებდა, ხოლო მისი სახლი იყო ერთგვარი სალონი.

სადაც თავს იყრიდნენ გამოჩენილი მოღვაწეები, მწერლები, პოეტები, მსახიობები, და მსჯელობდნენ ქვეყნის ავ-კარგზე.

მაინც დ. მიქელაძე საკუთარ საქმეზე მაღლა მუდამ თავისი მოწოდების საგანს აყენებს. ეს ჩანს თუნდაც ერთ ცნობილ „არჩილურ“ ლექსში, რომელიც ნიკო დადიანმა უძღვნა.

აი ეს აკროსტიხიც:

„დროზე მკვერი სიტყვა იცის, წერითაცა სწერს თამამად,
აწინდელის ცხოვრების სვე საზრუნად აქვს და საწამად,
თავისასა არას დასდევს, ეკიდება არა მგამად,
ამ დღის ვარამს მედგრად ებრძვის და მით ყოფა უჩანს შხამად“¹.

დ. მიქელაძე დამსახურებული ავტორიტეტით სარგებლობს თანამედროვეთა შორის. თუ იმ დროის ერთ-ერთ მოღვაწეზე, ბ. ლოლობერიძეზე „დროება“ სამართლიანად წერს, „დიდ ძეგლად“ არასოდეს არ მიგვაჩნდა, მაგრამ თავისი უკანასკნელი წერილებით ისიც დაანგრია, რაც მყარ ძეგლად ჩანდაო,—დ. მიქელაძეზე ამნაირ სასტიკ თავდასხმას ვერსად ვხვდებით. ის არ ებრძვის ჩვენს მოწინავე მოღვაწეებს, დგას მათ რიგებში და შეაქვს საგრძნობი წვლილი საერთო საქმეში.

ი. მანსვეტაშვილი იგონებს ერთ შემთხვევას, რაც მეველის რაინდულა ტაქტისა და ზემოქმედებითი ძალის უტყუარი საბუთია. ერთ მნიშვნელოვან შეკრებაზე თავადებს დავა მოსვლიათ. „... აქ წამოხტა კოლა ორბელიანი და რევოლვერით ხელში გამოეჭანა სცენისაკენ. თითქოს მიწიდან ამოძვრაო, გაჩნდა თავზე ხელადებული ლელო ანდრონიკაშვილი და ხანჯალ ამო-

¹ „ივერია“, 1891, № 136.

წვდილი გაეგება კოლა ორბელიანს. უსათუოდ უბედურება და-
ტრიალდებოდა, რომ ამ დროს კორესპონდენტების ადგილიდან
არ წამომხტარიყო მარდი დათა მიქელაძე (მწერლობაში ცნო-
ბილი „მეველეს“ ფსევდონიმით) და შუაში არ ჩადგომოდათ.

— ბატონო, — მიუბრუნდა ორბელიანს, — მიბრძანდით
თქვენს ალაგას. როგორც ხედავთ, თქვენ იარაღის ხმარება არ
გცოდნიათ!

ეს ისეთი დანჯი და მტკიცე გულით იყო ნათქვამი, რომ
დარცხვენილი ორბელიანი უსიტყვოდ უკან გაბრუნდა¹.

გ. ლასხიშვილიც თავის მემუარებში დადებით შეფასებას
აძლევს დ. მიქელაძის განათლებას, პატრიოტულ სულისკვეთე-
ბას და ადამიანობას. „როგორც ადამიანი; უნდა ვთქვათ, პა-
ტიოსანი და პირდაპირი კაცი იყო, მეტად ზრდილობიანი, თავა-
ზიანი, არისტოკრატი. ახალგაზრდობაში, როგორც გამიგონია,
ის თითქმის რევოლუციონერიც ყოფილა, მაგრამ იმ ხანებში,
როცა „ივერიას“ განაგებდა, დავითი მეტად ზომიერა მწერალი
და მოღვაწე იყო“².

ამ უკანასკნელ თვალსაზრისში გ. ლასხიშვილი ცალმხრივ
პოზიციაზე დგას. თუ მხედველობაში მივიღებთ მეველის მხო-
ლოდ ერთ სტატიას, რაც ჩეხების „ახირებულ პრეტენზიას“
ეხება, და კიდევ ორიოდე გამონაკლისს, იგი მართალი გამოდის.
მაგრამ ეს სტატია ერთგვარ გამონაკლისად ჩანს მეველის
მთელს მდიდარ პუბლიცისტურ მემკვიდრეობაში. გაუგებრო-

¹ ი. მანსვეტაშვილი, „მოგონებები“, გვ. 196.

² გ. ლასხიშვილი, „მემუარები“, გვ. 101.

ბაზე აგებული და გარკვეული კუთხით გამაზნული ეს სტატია სულაც არ გამოხატავს დ. მიქელაძის საერთო შეხედულებებსა და მის პიროვნებას, რომელიც ერთიანად ეროვნული და პოლიტიკური თავისუფლების ცეცხლით იწვოდა.

დ. მიქელაძეს ყველა სხვა თანამედროვეც ახასიათებს როგორც თავაზიან, სასიამოვნო, განათლებულ ადამიანს.

ცოტა განსხვავებულ შთაბეჭდილებას ტოვებს ს. მესხის დახასიათება. ის უფრო შფოთიანსა და მგზნებარე მებრძოლს: ზედავს თავის თანამებრძოლში, ვიდრე თავაზიან ჯენტლემენს და, ცხადია, ამ დაკვირვებაშიც იყო სიმართლის ნაწილი, გადაშეტებულია მხოლოდ მისი ამ თვისების განზოგადება, რაც ზემოთაც მოვიხსენიეთ:

„სადაც ლოკრუასავით გაცხარებული სიტყვა, ყვირილი, ბაქა-ბუქი იქნება გამოსადეგი, იქ მიქელაძე მეყოლებაო“, — წერს ს. მესხი 1874 წელს, — ხოლო „ფელეტონების წერა მისი საქმე არ არისო“; (შემდეგაც ჩივის, ვერ მოვაშლევინეო); მესხი გულისხმობს მეველის სტატიას: „გაიმინდვრა ადვოკატმა“ („დროება“, 1873, № 404), სადაც დ. მიქელაძე თავს ესხმის იმ ადვოკატებს, რომლებიც ისე „მოურიდებლად ექცევიან ხალხს, როგორც დამშეული მგელი თავის მსხვერპლს“. დღეს აშკარაა, ვინ არის მართალი ამ შემთხვევაში. საერთოდ, მესხას კეთილგანწყობილება მიქელაძისადმი ურყევი რჩება ბოლომდე.

1873 წლის ოქტომბერში მას იმედი აქვს, რომ მიქელაძე „დროებას“ მიხედავს, გაზეთს გამოაცოცხლებს და თავს დაანებებს ქუთაისის ბანკზე დაუსრულებელი სტატიების ბეჭდვას.

მესხი კმაყოფილია მეველის „თანამედროვე შენიშვნებით და სურათებით“ და წერს, რომ „მიქელაძე, როგორც ეტყობა, კარგი, ცოცხალი ჟურნალისტი დადგება“¹.

1873 წლის დეკემბერში მესხის ვარაუდს ხორცი შეესხა. მას უხარია, რომ გაზეთი უკვე მიქელაძეს ჩაბარდა. მაგრამ გაზეთის რედაქტორად ფაქტიურად კირილე ლორთქიფანიძე ხდება. მიქელაძე მხოლოდ წერილებს აწვდის და საერთოდ იცავს გაზეთის ღირსებას.

ს. მესხი, კ. ლორთქიფანიძე და დ. მიქელაძე არიან „დროების“ სული და გული, „მთელი მისი რედაქცია“.

ამ გამოჩენილი სამოციანელების გარშემო თავს იყრიდა ბევრი ნიჭიერი კორესპონდენტი. დავით მიქელაძის და კირილე ლორთქიფანიძის „დროება“ ღირსეულ პასუხს აძლევდა ზოგიერთ მკითხველს, რომელსაც გაზეთი პირად გასართობად მიაჩნდა და არ მოითხოვდა საზოგადო საკითხებზე სჯას. აქ მიქელაძის პოზიცია, მესხთან შედარებითაც კი, უფრო სწორი ჩანს.

თუ რამდენად აუცილებელი იყო დ. მიქელაძე გაზეთისათვის, ეს აშკარა ხდება თუნდაც ს. მესხის წერილიდან: იგი ამ დაუდგრომელი ადამიანის დროებით წასვლასაც კი გაუნაწყენებია.

1874 წ. ოქტომბერში ს. მესხი უკვე თბილისიდან სწერს მეულეს, მიქელაძე იმერეთში წავიდაო დროებით, დალღას უჩივისო, და ემდურის, ვითომ ისეთი რა საქმე ჰქონდათ მას და კირილესო!

მეველე „დროებაშიაც“ ისევე პირდაპირი კაცი და მგზნებარე პატრიოტია, როგორც ადრე იყო, პატივსა სცემს ყოველ

¹ ს. მესხი, „წერილები“, გვ. 71.

ხალხსა და ყოველ ადამიანს, ქადაგებს მშვიდობას, თავისუფლებასა და განათლებას. მაგრამ სადაც საქმე პირადი ღირსების დაცვას ეხება, დ. მიქელაძე არც უკან იხევს და არც თავის ვინაობას მალავს. ასე, „ღროების“ რედაქტორისადმი მიწერილ ერთ წერილში ის იძლევა იმის ახსნას, თუ რა პირობებში გაჰყვა არაერთხელ დუელში მის 'შეურაცხყოფელთ და როგორ უთხრეს ერთი-ორჯერ უარი გამოწვევაზე'. უნდა ვიგულისხმოთ, რომ ესენი იყვნენ არა პირადი მტრები, არამედ იმ საქმის მტრები, რასაც მეველე ასე უანგაროდ ემსახურებოდა თავისი კალმით.

მეველე მოამაგედ ევლინება „ღროებას“ და მოამაგევე ტოვებს მას.

„ღროებაც“ მუდამ მაღალ შეფასებას აძლევს თავის უახლოეს კორესპონდენტს. ერთი ცნობილი შემთხვევის გამო გაზეთი წერს, რომ ხშირად იბეჭდებოდა იმისი „ცოცხალი, ჩინებული და კეთილშობილურ გრძნობით აღსავსე კორესპონდენტები პარიჟიდან, რომელნიც ხელმოწერილნი იყვნენ „დ. ზურაბაშვილის“ სახელობით. 1874 წელს დაიბეჭდა იმისივე რამდენიმე სტატია, „მეველეს“ პსევდონიმით“².

ასეთი დახასიათება და ხმაური დ. მიქელაძის გარშემო გამოიწვია ერთმა პირადმა უსიამოვნებამ.

1877 წლის 10 მარტს ქუთაისში დავით მიქელაძეს დუელი ჰქონდა თავად ალექსანდრე სიმონის ძე წულუკიძესთან. პირველს ხმალი ეჭირა, მეორეს — ხანჯალი. ორივე მძიმედ დაჭრი-

¹ „ღროება“, 1877, № 34.

² „ღროება“, 1877, № 30.

ლა. მიზეზი, ეტყობა, ქალი იყო. თვით დავით მიქელაძე რედაქტორისადმი მიწერილ და „დროებაში“ გამოქვეყნებულ წერილში ამტკიცებს, რომ ჩხუბის მიზეზი მანდილოსანი არ ყოფილა, მაგრამ შეიძლება ეს მისი ვაჟკაცური თავმოყვარეობით აიხსნას. თვით „დროება“ ამ შეტაკებას „რაინდულ საქმეს“ უწოდებს.

დ. მიქელაძის მოუსვენარა სული დიდხანს ვერ ჩერდება ერთ ადგილზე.

1877—1878 წლებში კულაშშია და წერილებს უგზავნის ნ. ნიკოლაძეს, ითხოვს ბრძოლის ველის რუკას. იმ ხანებში ქუთაისსა და რაჭაშიც მოგზაურობს, ნ. ნიკოლაძეს შესჩივის თავის გაჭირვებას და მამულის გაყიდვაზე ფიქრობს!

მაგრამ პრესისათვის დაბადებული კაცი დიდხანს ვერ გაჩერდებოდა განზე, უსაქმოდ, პროვინციაში მყოფ მეველეს გული სხვაგან მიუწევს.

1879 წლის შემოდგომაზე „დროება“ აცხადებს, ქუთაისში ახალი გაზეთი არსდება, რედაქტორი და ინიციატორი დავით მიქელაძე იქნებაო... 10 ნომებერს ახალი ცნობაა: მიქელაძეს მართლა შეუტანია თხოვნა კვირეული გაზეთის გამოცემაზე მეფის ნაცვალთანო. გაზეთის სახელწოდება უნდა ყოფილიყო „რიონი“. ცნობილია აგრეთვე გურგენაძის თხოვნა ჟურნალ „იმედის“ დაარსებაზე, მაგრამ ორივე იმედი ჩაქრა. „რიონის“ დაარსების დამაბრკოლებელ მიზეზად ის დაასახელეს, რომ სასამართლო ქრონიკაც ექნებაო, ასეთი გაზეთის ფასი წლიურად კანონით შვიდი მანეთი მაინც უნდა იყოს, მიქელაძე კი ექვს მანეთს აცხადებსო. ცხადია, შეიძლებოდა ამ დაბრკოლების გა-

1 ნ. ნიკოლაძის არქივი (13—137, 13—139, 13—140).

დალახვა, მაგრამ თავი იჩინა უფრო ძლიერმა დაბრკოლებამ: „მთავრობის მიერ შენიშნულ“ მიქელაძეს, ტირანიასთან გაბედულ მებრძოლს, აღარ მიახდეს საშიში იარაღი.

ამის შემდეგ კარგა ხანს დ. მიქელაძე ლიტერატურულ ასპარეზზე ნაკლებად ჩანს, თუმცა ისევ „დროების“ თანამშრომლად ითვლება.

1885 წ. თებერვალში კულაშიდან ნ. ნიკოლაძეს სთხოვს საქმე გაუჩინოს მასაც, დაავალოს ნახშირის გაყიდვის საქმე, და ამაშიაც ერთგულებას ჰპირდება. მაგრამ იმ ხანებში ჩვენი პრესის ცხოვრებაში ხდება ცვლილება.

1885 წელს მთავრობამ „დროება“ დახურა. უგაზეთობის გამო ილიამ ყოველთვიური ჟურნალი 1886 წელს ყოველდღიურ გაზეთად გადააკეთა. ამ დროს მიქელაძე ილიას „ივერიაში“ იქნა მიწვეული. მალე იგი „ივერიის“ აქტიური თანამშრომელი ხდება. „დროების“ ძველი მოღვაწე ჰაბუკური ენერგიით განაგრძობს ორი ათეული წლის წინ დაწყებულ საქმეს. საქართველოშია თუ მის საზღვრებს გარეთ, ფიქრით თავს დასტრიალებს მამულს. მაგალითად, 1888 წლის აპრილში ქვეყნდება „წერილი პეტერბურგიდან“.

მეველე ხან სტამბოლშია, ხან პეტერბურგში, ხან პარიზში და ხან ქუთაისში; ყველგან ეროვნული საქმიტაა დაინტერესებული და ხალხის კეთილდღეობისათვის მეცადინეობაშია.

1888 წლის იანვარში დ. მიქელაძე უკვე სტამბოლშია. თავის წასვლას სტამბოლში მიქელაძე ასე ხსნის: „რადაც უცნაური ინსტინქტი მამსილებდა, რომ ჩემს ქვეყანას, იმის ხალხს, იმის ცხოვრების გარემოებას, იმის ზნესა და იმის მიზიდულე-

ბას — გარეთვან, დამოუკიდებლად შევხედო, დაუფიქრდე და რაც აზრი შევადგინო, თამამად აღვიარო“¹.

სტამბოლს დ. მიქელაძე გამგზავრებულა ბერძენთა გემით „აღბანა“. კაპიტანი ნიკოლოზი აღტაცებული დარჩენილა, როცა მისი ქართველობა გაუგია, ალექსანდრე მაკედონელის ლაშქრობა გაუხსენებია და უთქვამს, რომ ბერძენები და ქართველები გარეგნობით, ზნითა და ჩვეულებით „ძალიან ნათესავი ხალხიაო“. მიქელაძეც თავის მხრივ აღტაცებულა ამ ახალგაზრდა პატრიოტით, რომელსაც უსაზღვროდ უყვარდა დაჩაგრული სამშობლო.

სტამბოლი მიქელაძეს მოსწონებია. იქ დარჩა მეუღლესთან ერთად თითქმის მთელი წელი. დ. მიქელაძის ქალიშვილმა, აწ ქაღარა ნინომ დაგვიდასტურა დედ-მამის სტამბოლში ყოფნა და ღიმილით თქვა: „ღიახ, მე სტამბოლში ვარ დაბადებულიო!“

90-იან წლებში დ. მიქელაძე „ივერიის“ ფაქტიური რედაქტორია. ეს უკვდავი ორგანო მან აქცია ეროვნულ-განმათავისუფლებელი მიმართულების ცენტრად, და ეს არ ყოფილა ახალი რამ მეველის მოღვაწეობაში: ამავე ხაზს ატარებდა ადრე „ღროებაშიც“.

ეს დაუცხრომელი ბუნების კაცი ზოგჯერ კალამს დადებდა და ხელში მახვილს იღებდა. მელიტონ ნაკაშიძესთან ერთად შექმნა საიდუმლო ორგანიზაცია და მოაწყო რამდენიმე საძულველ მოხელეზე ტერორისტული თავდასხმა. ამას მოჰყვა მთავრობის სასტიკი რეპრესიები. მელიტონ ნაკაშიძე სტამბოლს გადაიხვეწა, იქიდან ბულგარეთში გადავიდა და უცხოეთში გა-

¹ „ივერია“, 1888, № 18.

ნაგრძო ბრძოლა ბნელი ძალების წინააღმდეგ. დ. მიქელაძე კი ისევ კალმით განაგრძობს ბრძოლას და თანაუგრძნობს თავისუფლებისათვის ამბოხებულ ბულგარეთს, სადაც მისი თანამებრძოლი იმყოფებოდა.

დ. მიქელაძე არა მარტო გაბედულად ესხმოდა თავს გავლენიან მოხელეებს, არამედ თავშესაფარსაც აძლევდა მებრძოლ პატრიოტებს.

კულაშში იმალებოდა, დათასთან, მელიტონ ნაკაშიძე. გუბერნატორმა მისი ხელისუფალთათვის გადაცემა ითხოვა. დათას დახმარებით მელიტონი სტამბოლს გაიხიზნა. ვარლამ ჭერქეზი-შვილიც ორი წელი ცხოვრობდა კულაშში, როგორც უცხო მხატვარი.

ბუნებოთ მღელვარე, შეუპოვარ, მუდამ ბრძოლას ხასიათზე მყოფ დავით მიქელაძეს ზოგი ლუციუს ცინცინატს ადარებდა, ამ სახელოვან რომაელ კონსულსა და სარდალს, რომელიც ცნობილი იყო თავისი უბრალოებითა და გულკეთილობით. მართლაც, ბრძოლით დაღლილი დ. მიქელაძე მასავით სოფელს უბრუნდებოდა ხოლმე.

ოთხმოცი-ოთხმოცდაათიანი წლების ქართული გაზეთების რომელი ნომერიც არ უნდა გადაშალოთ, თითქმის ყველგან შეხვდებით მეველეს. იგივე დავით მიქელაძის, იგივე ზურაბის-შვილის სტატიებს, ფელეტონებს, წერილებს... სამი ათეული წელი იდგა დ. მიქელაძე ჩვენი კულტურული და საზოგადოებრივი ცხოვრების წინა პოზიციებზე და ემსახურებოდა ნათელ იდეალებს, იცავდა ხალხსა და ყოველ პროგრესულ საქმეს.

1893 წელს „ივერიის“ თითქმის ყოველ მეორე-მესამე ნომერშია მეველის წერილები ქვეყნის საჭირბოროტო საკითხებზე.

დროდადრო ეხება უცხოეთის ამბებსაც (მაგალითად. საარჩევ-
ნო ბროლას გერმანიაში და სხვ.), მაგრამ მისი მოღვაწეობის
ძირითადი სფერო, ესაა ერის კულტურული და ეკონომიურა
ცხოვრება, აღზრდა და ზნეობა.

ის ებრძვის ჩარჩებს, დიდი სარგებლით ფულის გამსესხე-
ბელთ, „ამ სეავებს, რომელთაც ლამის შთანთქან ერის კეთილ-
დღეობა“; ამხელს შოვინისტებს. ავყია ვაჟბატონებს. არჩევ-
ნებში ღირსეული მოღვაწის გამშავებლებს, უგულო მოხელე-
ებს, მექრთამე მოსამართლეებს და ა. შ.

თვით უმნიშვნელო, ყოველდღიური ხასიათის სტატებში
ეხედავთ რაიმე მტკიცნეულსა და საგულისხმოს.

1894 წელს დ. მიქელაძე ბეჭდავს წერილების სერიას „ივე-
რიაში“, იცავს „ივერიის“ ღირსებას ზოგიერთი ავტორის ცი-
ლისმწამებლური წერილების გაბათილებით...

1894 წ. დ. მიქელაძე ისევ პეტერბურგშია (ნადეჟდინსკის
ქუჩა, № 23). მას მიწერ-მოწერა აქვს მოწინავე ქართველ ინ-
ტელ-გენ კიასთან. ერთ გამოუქვეყნებელ წერილში ნიკო ნიკო-
ლაძეს სწერს. რომ მისი დავალებით ინახულა ვინმე მებური-
შვილი, ქაშვეთის ეკლესიასთან ყაზბეგის პანაშვიდზე მომხდარ
ინციდენტთან დაკავშირებით; და რომ ორა დღის ფიქრის შემ-
დეგ მებურიშვილმა ორჭოფული პასუხი გასცა.

ნიკო ნიკოლაძე და დავით მიქელაძე რომ ახლო მეგობრები
ყოფილან, ეს ყველაფრიდან ჩანს. ერთია მათი სამოღვაწეო ა-
პარეზი და პრინციპული — აზრთა მსვლელობა. მათი ურთიერ-
თაობის ბევრ ნივთიერ და წერილობით საბუთს შორის საგუ-
ლისხმოა ლევ ტოლსტოის დრამის „მეუფება წყვდიადისა“ მე-
ველისეული თარგმანი, რომლის ერთ ცალს სატიტულო ფურ-

ცელზე აწერია „ძვირფას მეგობარს ნიკო ნიკოლაძეს მთარგმნელისაგან“. ეს ცალი ამჟამად თბილისის საჯარო ბიბლიოთეკაში ინახება.

დ. მიქელაძე ახლო მეგობარია აკაკის და ილიასი. ილიასთან ხშირად დადის სტუმრად საგურამოში და ილიასაც არაერთხელ იწვევს თავის თავაზიან ოჯახში. სიამოვნებით იგონებს დიდ ილიასთან შეხვედრებს მიქელაძის ამჟამად ცოცხალი ქალიშვილი — ნინო მიქელაძე. მასივე მოგონებით, მამის ხშირი და სასურველი სტუმრები იყვნენ ვარლამ ჩერქეზიშვილი, ფილიმონ ქორიძე, მელიტონ ბალანჩივაძე, კიტა აბაშიძე, ნ. ზდანევიჩი, ნიკო თავდგირაძე (ცნობილი პატრიოტი, სოხუმის ქალაქის-თავი), იაკობ გოგებაშვილი (რომელსაც უჩუქებია „დედაენა“ გულთბილი წარწერით) და აკაკი. ამ უკანასკნელს სწორედ დავითის შვილისათვის, ივერისათვის მიუძღვნა უკვდავი ლექსი, რომელიც ასე იწყება:

„კრელი პეპელა დაათრო
და გააბრუა იამა,
მას მიეპარა ივერი,
დაიქირა და იამა“.

ამ ლექსში შემდეგ „ივერი“ შეიცვალა სხვა სიტყვით „ყმაწვილი“. მართალია, ეს უფრო განაზოგადებს ამ მშვენიერ ლექსს, მაგრამ მაინც საინტერესოა მისი დაწერის საბაზი და პირველი ვარიანტი.

ნინო მიქელაძე იგონებს მეორე ეპიზოდსაც. აკაკი ჭადრაკს ეთამაშა დავითს. მიქელაძემ მოუგო. მოუგია ივერისაც. მაშინ პოეტს უთქვამს: მამამ მომიგო, ძემ მომიგო, სულიწმინდა-ლა დამრჩაო.

დავით მიწეღადის სხვა მეგობრებიდან აღსანიშნავია ცნობილი პოეტი გრიგოლ აბაშიძე, რომელიც მასთან ერთად მუშაობდა და თანამშრომლობდა „ივერიაში“, აგრეთვე შესანიშნავი მოღვაწე და პოეტი, კარგი მოქართულე და პატრიოტი. აფხაზეთის უკანასკნელი მთავრის შვილი გიორგი შარვაშიძე. მათი ურთიერთობიდან ნინო მიქელაძე იგონებს ასეთ ეპიზოდს. ქუთაისის ბულვარში მაისის ერთ მზიან დღეს გამოსულა ქალი, რომელიც ძლიერ მოსწონდა გიორგის. დათას, რომელიც ამ დროს ბულვარში მოხვედრილა, ექსპრომტად მიუწერია მეგობრისათვის ფრანგულ-ქართული ლექსი:

„ღეპეშევეუ ელე ტისი,
თუ რომ ნახვა გინდა მისი“.

(სასწრაფოდ მოდი, თუ ამ ქალის ნახვა გინდათ).

შარვაშიძეს, ვიდრე გამოეწყობოდა, იქვე დაუწერია ასეთი პასუხი:

„ვე ვიენდრე სუიტ ლა ბა,
არ გაუშვა, მოსწი კაბა!“

(ახლავე მოვდივარო და სხვ.).

დამახასიათებელი ეპიზოდია. ბევრა მსგავსი ფაქტი მიქელაძის ლალი, მღელვარე, პოეტური ცხოვრებიდან დაკარგულია, მაგრამ ძუნწად შემონახული ცნობებიც მიუთითებენ ამ კაცის ხალისიან, მჩქეფარე ბუნებაზე.

1895 წ. დასაწყისიდან მეველის ხელმოწერა „ივერიის“ ფურცლებზე წყდება, თუმცა მრავალ ხელმოუწერელ და სხვა ფსევდონიმებით გამოქვეყნებულ სტატიებში ძნელი არ არის

მისი სტილის ცნობა: ამ წერილების ავტორი ქადაგებს ისევ სამართლიანობას, სიტყვის თავისუფლებას, ისეთი წესწყობილების საჭიროებას, რომელიც თითოეულ ეროვნებას აძლევს სრულს თავისუფლებას — „განავითაროს თავისი ბუნებრივი ჩიჭი, დაამყაროს თავისუფლება, სიყვარული და თანაგრძნობა“¹.

1895 წ. „ივერიიდან“ დავით მიქელაძე თავისივე თხოვნით მიდის (ქუთაისში გადადის) და მის ადგილას ილია იწვევს გიორგი ლასხიშვილს (1866—1933).

მომდევნო წლებში ომგადახდილა დ. მიქელაძის სახელი უკვე იშვიათად ისმის ჩვენს პრესაში. ამ დაუცხრომელი კაცის დუმილი თითქოს უჩვეულო ამბავია, რელაქციიდან წასვლისა და სხვა სამსახურში ჩადგომის შემდეგაც იგი ნაყოფიერ შემოქმედებით მოღვაწეობას ეწეოდა, მთავრად, სამწუხაროდ, ამ პერიოდის ხელნაწერები დაკარგულია. მეველის მეგობრების სახელით შენიღბულმა უცნობმა პირებმა მოტყუებით წაიღეს ხელნაწერები გაურკვეველი მიმართულებით.

1900 წელს დ. მიქელაძე თავს ანებებს პრესას და გადადის ქუთაისში, სადაც შავი ქვის მრეწველობის საბჭოში აირჩიეს, მერე ქუთაისის საადგილმამულო ბანკის გამგეობის წევრად, შემდეგ დირექტორადაც. 1910 წლიდან 1916 წლამდე დ. მიქელაძე ბანკის დირექტორია, მერე მსცოვანი მოღვაწე პენსიაზე გადის.

დ. მიქელაძემ ჩვენი ხალხის სამსახურს შესწირა სამშვიდე, სიმდიდრე, მამული და კარბერა. მას ხშირად უჭირდა. ეს ჩანს,

¹ „ივერია“, 1895, № 43.

მიუხედავად მისი სიამაყისა, წერილებიდანაც კი არაერთხელ სთხოვს შეწევნას ნ. ნიკოლაძეს, რომელსაც, როგორც ქალაქის თავს, შეეძლო დახმარების ხელის გაწვდენა.

საერთოდ, დ. მიქელაძე ხშირად სწერს ნიკოლაძეს კულაშიდან, ქუთაისიდან... ქუთაისიდან სთხოვს, დაიჭიროს მისთვის ერთი ადგილი „როდშელია სავაჭრო სახლში“, გულმოდგინებაზე თავდებობას მასვე აკისრებს. რადგან „კარგად იცნობს“.

კულაშიდან გაგზავნილ ერთ-ერთ წერილში ნიკოლაძეს შეჩივის, რომ ვერ იქნა, „ცხოვრების პრაქტიკა“ ვერ მიიღო, ხან ცხვირს იმტვრევს და ხან შუბლს, ხოლო გარეგნობით „თუ ვინმე დამსგავსებია ჩვენს წინაპარს ადამს, უკანასკნელი მეც არ ვიქნებო“.

ჩვენ გავეცანიით აღრეულ წერილებს ფოთის ქალაქისთავისადმი. 1903 წელს მასვე მადლობას უთვლის გაჭირვებაში თანაგრძნობისათვის¹.

დ. მიქელაძის სახელი უწინდებურად აღარ ქუბს. მაგრამ ექვი არ უნდა შეგვეპაროს იმაში, რომ გასული საუკუნის მოწინავე მოღვაწე ახალი დროის გარიჟრაჟზე გულგრილ მეშჩანად არ ქცეულა.

საყურადღებოა, მაგალითად, დ. მიქელაძის ღვაწლი 1905 წლის რევოლუციისა და რეაქციის პერიოდში. ეს ბუნებრივიცაა. მას არ შეეძლო დუმილი, როცა ალიხანოვ-ავარსკის პლანტუნები თელავდნენ საქართველოს, წვავდნენ დაბა-სოფლებს და შეურაცხყოფდნენ ქალებს.

1906 წლის 12 მარტს ხალხმრავალ მიტინგზე დ. მიქელაძე

¹ ნ. ნიკოლაძის არქივი (40—848, 849).

სასტიკი საპროტესტო სიტყვით გამოდის ალიხანოვის ველური მოქმედების წინააღმდეგ. შემდეგ ეს სიტყვა თავად-აზნაურთა საგანგებო ყრილობას გადასცა. ამ ყრილობაზე ირჩევდნენ დეპუტატს სახელმწიფო საბჭოში გასაგზავნად. მეველის ეს საპროგრამო სიტყვა ბრწყინვალე ნიმუშია ორატორული მკვერ-მეტყველებისა, მოქალაქეობრივი გაბედულებისა და კლასიკური დახვეწილობისა.

დედანში ამ სიტყვას „განცხადება“ ეწოდება, მაგრამ იგი შორს სცილდება განცხადების ფარგლებს.

აი ამ დოკუმენტის სრული თარგმანი:

„მთავრობის წინადადების თანახმად, თქვენ, ბატონებო, შეკრებილი ხართ სახელმწიფო საბჭოს ამომრჩეველთა ასარჩევად, მაგრამ ვიდრე ამ სამოქალაქო აქტის შესრულებას შეუდგებოდეს, თავადაზნაურობას, ერთადერთ წოდებას, რომელსაც ხმის უფლება აქვს, არ შეუძლია დუმილით აუაროს გვერდი თავისი სისასტიკით უმაგალითო მოვლენას ქართველი ხალხის ცხოვრებაში, უკანასკნელი ორი თვის მანძილზე რომ ხდება. ამ მოკლე ხანში ჩვენს სამშობლოს თავს დაატყდა რაღაც ისეთი, რომლის მსგავს მაგალითსაც ვერ ვიპოვნით ვერავითარ შემოსევებსა და კატაკლიზმებში, რაც კი საქართველოს განუცდია. როცა გამარჯვებული აოხრებდა ქალაქებსა და სოფლებს, ყლექდა მოსახლეობას, ცეცხლითა და მახვილით გადაუვლიდა ხოლმე ქვეყანას, მის წინაშე იდგა სარწმუნოებისა და ეროვნული თვითმყოფლობისათვის ამხედრებული ქართველი ხალხი და ამ შემთხვევაში შემოსეული ველური ურდოების ფსიქოლოგიას ჰქონდა ერთგვარი ახსნა. მაგრამ როგორც კი ქანცაწყვეტილი ხალხი მორჩილების სიტყვას დასძრავდა, მტერი დაუყოვნებლივ

სწყვეტდა დევხან და შურისძიებას ადგილი აღარა ჰქონდა. ასე იყო უწინ საქართველოს დამპყრობლებთან, მის საუკუნო მტრებთან; მაგრამ სულ სხვაა ახლა, როცა ჩვენ გვსჯიან არა მტრები, არამედ ისინი, რომელთაც ვალად აწევთ ქვეყნის დაშოშმინება, მშვიდობიანი მოსახლეობის დაცვა, თავისუფლების შენარჩუნება მათთვის, რომელთაც მონაწილეობა არ მიუღიათ დანაშაულში, რისთვისაც რუსეთის კანონები სჯიან. მთელი ქალაქები, დაბები და სოფლები ეძლევიან უწყალო ნგრევას, ცეცხლსა და ხანძარს, მოსახლეობა თავს აფარებს მთებსა და ტყეებს, რათა თავი დააღწიოს შემოსეულთა მახვილს, ხოლო შინ დარჩენილებს — მამაკაცებს მათრახით სცემენ, ქალებს კი საზიზღარ შეურაცხყოფას აყენებენ — შინაურების თვალწინ ნამუსს ხდიან. გარდა იმისა, რომ გაუქმებულია კანონი და გაუქმებულია უფლება, — გაუქმებულია ყოველგვარი თანაგრძობა და ქველმოქმედებაც მორჩილი, დაუძლურებული და უადრესად უბედური ხალხისადმი. მაინც რა დააშავა ასეთი საქართველოს მოსახლეობამ, სრული გაპარტახებისა და შეურაცხყოფისათვის რომ განწირეს? ხომ არ ჩაუდენია რაიმე დანაშაული რუსი ხალხის სახელმწიფოს ან უზენაესი სახელმწიფოს წინააღმდეგ? — სრულიადაც არა. საქართველოს სახალხო მოძრაობა მხოლოდ გამოხმაურება იყო მთელი რუსეთის განმათავისუფლებელი მოძრაობისა, რაიმე განკერძოების ან შეიარაღებული ამბოხების გარეშე.

მთელი ჩვენი დანაშაული იმაში მდგომარეობს, რომ ხელმწიფის მიერ ბოძებული თავისუფლება მივიღეთ საბოლოოდ მომხდარ ფაქტად და აზრადაც არ მოგვსვლია, რომ მას გათელავდა ის, ვისაც მართებდა მისი ცხოვრებაში გატარება. ნუთუ ხე-

ლისუფლების წარმომადგენლებსა და ჯარებზე მომხდარი ერთეული თავდასხმები, ისიც ცალკეული რევოლუციონერების მიერ... საკმაო საბაბია მთელი ქვეყნის აოხრებისა და გაპარტახებისათვის?

სამწუხაროდ, იძულებული ვხდებით, დავამოწმოთ ფაქტი, რომ ქართველი ხალხის საუკუნო ერთგულება, რუსი ხალხის ინტერესებისათვის ბრძოლა, მას არ ჩაეთვალა აქტივში. ჩვენი ერის ლოიალობამ ვერ შესძლო მისი დაცვა იმ საშიშვლებებისაგან, რომელთაც შურით შეხედავდა თვით უდიდესი კაცთმოძულე — აღა-მაჰმად-ხანი.

თქმულის საფუძველზე, თავადაზნაურობის წინაშე წინადადება შემომაქვს, გამოხატოს თავისი აღშფოთება უმიზეზო რეპრესიულ ღონისძიებებზე, რომელთაც მიმართავენ მხარეში, და სთხოვოს კავკასიის მთავარმართებელს, იშუამდგომლოს საქმის გამოსაძიებლად სასენატორო რევიზიის დანიშვნაზე. მე ეჭვიც არ მეპარება, რომ დიდი რუსი ხალხის წარმომადგენლები, რომლებიც მალე შეიკრიბებიან, არ დარჩებიან ყრუ ქართველი ერის უფლებებისადმი, ერისა, რომელმაც დიდსულოვნად ანდო თავისი ბედი ერთმორწმუნე რუსეთს. იმას, რაც ვერ მოგვცა ან არ სურდა მოეცა ძველ რუსეთს, მოგვცემს ახალი (ხაზი ჩვენია. ე. მ.), რადგან მას არ შეუძლია ანგარიში არ გაუწიოს საერთაშორისო სამართალს, რომლის ძალითაც საქართველო შევიდა რუსეთის იმპერიის სამსახურში, რუსეთის მფარველობის ქვეშ მყოფი მოკავშირის და არა დამონებულ, ყოველგვარ უფლებას მოკლებული ქვეყნის უფლებით. დიდი ისტორიული ცოდვა, რაც რუსეთის ბიუროკრატია ამ წლის წინათ მოახდინა, უნდა გა-

მოისყიდოს რუსი ხალხის წარმომადგენელთა პირველმა კრებამ. საქართველოს უნდა მიეცეს ფართო შინაგანი თვითმმართველობა, ადგილობრივი კანონების გამოცემამდე, ცხადია, სრულიად რუსეთის სახელმწიფოსთან სრული ერთიანობის საფუძველზე“.

ამ მიმართვაში, ცხადია, არ არის ლაპარაკი რევოლუკიაზე. მეფის ძალაუფლების ძალით დაშობაზე, და არც არის ეს მოსალოდნელი, მაგრამ მასში ბევრი რამ არის მინიშნებული, და საოცარი ძლიერებით. თანაც დიპლომატიური ტაქტით არის გამოხატული ხალხის საერთო აღშფოთება რეაქციის პერიოდში ალიხანოვის დამსჯელი რაზმების თარეშის გამო.

სიტყვით კი არა, საქმითაც შეუპოვარია „განცხადების“ ავტორი.

ერთხელ დ. მიქელაძე შინ მიუწვევია სიმონ წერეთელს, თავადაზნაურობის წინამძღოლს. როცა წვეულებაში ალიხანოვა ვარსკი გამოჩენილა, მას დემონსტრატიულად დაუტოვებია სუფრა და მასპინძლისათვის უთქვამს, მე იქ არ დავრჩები, ანდაც ქართველი ხალხის ჯალათი იმყოფებაო.

1907 წელს დ. მიქელაძემ ქართველი ხალხის სახელით დაწერა ტექსტი მემორანდუმისა ჰააგის საერთაშორისო კონგრესზე წარსადგენად.

1908 წ. მიქელაძემ თარგმნა და წიგნად გამოსცა ლევ ტოლსტოის ხუთმოქმედებიანი დრამა „მეუფეობა წყევლიადისა“. ერთი ცალი ავტორისათვის გაუგზავნია, თან წერილი დაურთავს, რომელშიაც წერია:

გისურვებთ ბანგრძლივ სიცოცხლეს სიკეთისა და სამარ-

თლიანობის სასარგებლოდ, რაც ასე ესაჭიროებათ ადამიანებს და მეტადრე დამონებულ პატარა ხალხებს“.

ტოლსტოის დავალებით მისმა მდივანმა ნ. გუსევემა მთარგმნელს მოსწერა თავაზიანი წერილი, რომელშიაც ნათქვამია:

„ლევ ნიკოლოზის-ძე ტოლსტოი დიდად მადლიერია თქვენ-ნი. რომ გითარგმნიათ „მეუფება წყვდიადისა“ და თანაც გამოგიგზავნიათ. რაც შეეხება საქართველოს მდგომარეობას, ამაზე ლევ ნიკოლოზის-ძემ მთხოვა მომეხსენებინა თქვენთვის. რომ ის ამ უკანასკნელ ხანებში განსაკუთრებულად და ნათლად ხილავს დიდ სახელმწიფოთა მიერ „მცირე“ ეროვნებათა ჩაგვრისაგან გამომდინარე ბოროტებას, დაინტერესებულია ამ ვი-ც.არებით და წერს ამაზე“¹.

სათარგმნი პიესის არჩევანში და ავტორისადმი მიწერილ წერილშიც ჩანს, რა ნათელი გონებით ჩასწვდომია მეველე ტოლსტოის შემოქმედების არსს და რა სწორად მოუხდენია არჩევანი.

1909 წლის მარტის დამდეგს, ქუთაისის თავადაზნაურთა დეპუტატების საკრებულო კრებაზე, სადაც იხილებოდა საქართველოს ავტოკეფალიის საკითხი, სიტყვებით გამოვიდნენ კ. აბაშიძე, ნ. თავდგირიძე და დ. მიქელაძე.

რამდენიმე დღის შემდეგ სამივე დააპატიმრეს და მოათავსეს ქუთაისის „დიდ ციხეში“.

ქუთაისის სასტიკმა გენერალ-გუბერნატორმა სლავოჩინსკიმ, რომელსაც ხალხი გონებამახვილურად ეძახდა „სეოლო-

¹ «Заря Востока», 1940, № 271.

ჩინსკის“, დაპატიმრებულ ორატორებს წარმოთქმული სიტყვების დაწერა მოსთხოვა.

დ. მიქელაძემ დაუფარავად დაწერა ის, რაც თქვა, დამატებით კი ისიც, „რაც უნდა ეთქვა, მაგრამ არა სთქვა“. გენერალი გააოცა თურმე მიქელაძის სითამამემ და მისდამი პატივისცემით აღივსო იმდენად, რამდენადაც სიმამაცეს პატივის სცემენ თვითონ ტირანებიც.

მაგრამ ორატორების მდგომარეობას გენერლის სიმპათია არ ამსუბუქებდა. სამივეს გაციმბირება ელოდათ. ქუთაისის საზოგადოება აღშფოთებით შეხვდა თავის რჩეულ წევრთა ტყვევანას. მოხელეებმა დათმეს. ერთი თვის პატიმრობის შეზღვევას მივე გაათავისუფლეს¹.

ეს მხოლოდ ეპიზოდია, მაგრამ ეპიზოდი საგულისხმო და დამახასიათებელი.

ზეპირი გადმოცემების გარდა, დ. მიქელაძის დაპატიმრებაზე მოგვითხრობს ზოგა სხვა მნიშვნელოვანი დოკუმენტიც.

1909 წლის სამ მარტს ი. მეუნარგია თავის მეგობარს ნიკო ნიკოლაძეს ფოთიდან პეტერბურგში სწერს ვრცელ წერილს. წერილის ავტორი ნ. ნიკოლაძეს ატყობინებს:

„სანამ დუმის სხდომა დაიწყებოდა, ამბავი შემომიტანეს: ქუთაისში დაუქერაათ დავით მიქელაძე, ნიკო თავდგირიძე და კიტა'აბაშიძე, მგონი სხდომის გამო, საცა უნდა ელაპარაკნათ ეპისკოპოს კირიონზე“².

¹ „შინაური საქმეება“, 1909, № 9.

² ნ. ნიკოლაძის არქივის მასალები, XII, 192—207.

დაპატიმრების შეზღვევ. ცხადია, ისედაც შენიშნული დ. მიქელაძის ავტორიტეტი მთავრობის თვალში უფრო დაეცა, ს. მაგაეროდ ის ამადლდა მეგობრებისა და ხალხია თვალში. ეს ჩანს ორიოდე გადარჩენილი ბარათიდანაც. დ. მიქელაძეს უჭირს, დახმარებას საჭიროებს როგორც მატერიალურად, ისე-ვე სულიერად, და არც ერთს არ ამადლიან ძველი მეგობრები.

ამადლევებელია წერილი, რაც მადლიერმა დ. მიქელაძემ მისწერა თავის მეგობარს, ფოთის ქალაქისთავს — ნ. ნიკოლაძეს 1909 წლის 5 ნოემბერს¹:

„მოგეხვევი, ძმაო ნიკო, და დიდ მადლობას გიძღვნი შენი სიყვარულით აღსავსე წერილისათვის. თუმცა ჩვენი უმთავრესი რწმენა კარგა ხანია განსხვავებულია, და შენ ეძებ იქ შველას, სადაც მე დალუპვის მეტს არას მოველა, მაგრამ, დამიჯერე, შენი მეგობრობა და სიყვარული ერთს წაშსაც არ შერყეულა ჩემს გულში. მე კარგად მახსოვს ის ძმური თანაგრძნობა და გამამხნევებელი სიტყვები, რომელიც შენ ჩემთვის გაგიწევია და გითქვამს მაშინ, როდესაც ლამის სასოწარკვეთილებაში ვვარდებოდი! რაც შეეხება ბესარაონისაგან გადმოცემულს ჩემს თხოვნას, ამაზე ის უნდა გითხრათ, რომ ამ მოხუცებულობის დროს სეკრეტრობა ერთობ გამიძნელდა, არა იმიტომ, რომ შრომა მაწუხებდეს და თავს ვერ ვართმევდე, არამედ თვით ხასიათი ამ თანამდებობისა ყოვლად აუტანელი და საზარელია...“ თან ხელფასიც მცირეაო, რის გამოც ითხოვს თანამდებობის გამოცვლას.

¹ წერილი ინახება ნ. ნიკოლაძის არქივში.

დ. მიქელაძე მოესწრო დიდი ოქტომბრის სოციალისტურ რევოლუციას. ასე რომ, მას გადამეტებით აუსრულდა ის, რაზედაც ოცნებობდა მისი მეგობარი სერგეი მესხი, „ერთი პატარა რევოლუცია მაინც მენახაო!“

მესამოციანელთა ვეტერანი მეველე გარდაიცვალა 1918 წლის 25 ნოემბერს, ქუთაისში. დაკრძალულია საფიჩხიის სასაფლაოზე.

ასეთია, დღეისათვის ცნობილი მასალების საფუძველზე, დავით მიქელაძის ცხოვრების გზა. ცნობები ძუნწია, მაგრამ რაც არის, ისიც ნათელ სურათს იძლევა ამ საინტერესო პიროვნების ღვაწლსა და ადამიანობაზე.

სოციალ-პოლიტიკური და ეკონომიური შეხედულებანი

„რევოლუცია საყოველთაო ბედ-
ნიერებას აახლოვებს“.

დ. მიქელაძე

დავით მიქელაძის სოციალური და პოლიტიკური შეხედუ-
ლებანი იმ დროის მოწინავე აზრის გამოძახილია. მასში იცნო-
ბა იგივე გამბედაობა, იგივე მებრძოლი და ნათელი სტილი,
რომელიც ჰქონდათ დიდ რუს რევოლუციონერ-დემოკრატებს
და მათს ქართველ თანამებრძოლებს.

მეველის მაღალ იდეალებზე, მის თავისუფლებისმოყვარულ
სულზე ნათლად ლაპარაკობს მისი ვრცელი სტატია, რომელიც
დ. ზურაბისშვილის ფსევდონიმით აქვს ადრევე გამოქვეყნებუ-
ლი „დროების“ ორ ნომერში — „ბასტილიის აღება და მისი
დღესასწაულობა წელს“¹.

აქვე აუცილებლად უნდა შევნიშნოთ, რომ დავით ზურაბის-
შვილის ფსევდონიმით გამოქვეყნებული წერილების ავტორი
არის დავით მიქელაძე და არა დავით ზურაბის-ძე ჩქოტუა, რო-

¹ „დროება“, 1872, № 29—30.

გორც ეს აღნიშნული აქვს „ლიტერატურულ ნარკვევებში“ აწ განსვენებულ მკვლევარს სოლომონ ცაიშვილს:

„... კიდევ მრავალი იდენტური მასალის ჩვენება შეიძლება საკითხის გარშემო, მაგრამ, ვფიქრობ, მოტანილითაც შეგვიძლია დავასკვნათ, რომ დავით ზურაბის ძე ჩქორტუა (ზურაბის-შვილი) ქართველ მესამოციანელთა ბრწყინვალე პლეადაში ერთს აქტიურ და ანგარიშგასაწევ მოქმედ ძალას წარმოადგენდა.

დავით ჩქორტუას დასახასიათებლად მოტანილმა მასალებმა ცოტა დაგვაწინაურა და ამ მიზეზით გამოგვჩა — უფრო დაწვრილებით გაგვეჩა მისი სხვადასხვა ხასიათის სტატიები, გაზეთ „დროებაში“, „სასოფლო გაზეთსა“ და ჟურნალ „კრებულში“ გამოქვეყნებული.

მათ შორის საგულახსოვა 1872 წელს გაზეთ „დროებაში“ (№ 29, 30) მოთავსებული ისტორიული ხასიათის ფელეტონები „ბასტილიის აღება 1789 წლის 14 ივლისს და ამისი დღესასწაულობა წელს“, წერილი, რომელიც ყველა ნიშნის მახედვით ეკუთვნის დავით ზურაბის ძე ჩქორტუას, გამოქვეყნებულია „დ. ზურაბისშვილის“ ხელმოწერით და დაწერილია თექვსმეტი ივლისის თარიღით პეტერბურგში, სადაც მაშინ იგი ცხოვრობდა როგორც სტუდენტი.

პეტერბურგიდან გამოგზავნილ სტატიებიდან უნდა დავასაბხელოთ აგრეთვე ფელეტონები სათაურით — „პეტერბურგიდან ენევაძე“¹...

¹ ს. ცაიშვილი, „ლიტერატურული ნარკვევები“, გვ. 60, გამოშვებობა „საბჭოთა საქართველო“, 1962 წელი.

ჯერ ერთი, ზურაბის შვილი მიქელაძეების იმ შტოს ზედწოდებაა, რომელსაც დავითი ეკუთვნოდა, მისი წინაპარი ზურაბი — სოლომონ მეფის მრჩეველი ყოფილა.

მეორე, „დროების“ 1873 წლის № 40-ში გამოქვეყნებულია დღიური, რომელშიც ვკითხულობთ:

„— ჩვენი რედაქტორი ს. მესხი ამჟამათ სამზვარს გარეთ იმყოფება, პარიჟში, სადაც ის რამდენიმე თვე დარჩება. მასი მაგიერობა აქ კირილე ლორთქიფანიძემ იკისრა.

— ამ მოკლე ხანში სამზვარს გარეთ მიდის ჩვენი თანამშრომელი გ. წერეთელი, რომელსაც მიზნათ ფილოლოგიას და ისტორიის შესწავლა აქვს, იმ მიზნით, რომელიც ჩვენის ქვეყნის წარსულს ცხოვრებას შეეხება.

— მაგიერათ ჩვენ შეგვიძლია ვახაროთ ჩვენს მკითხველებს მეორე ჩვენი თანამშრომლის დაბრუნება: „პარიჟული წერილები“ და „თანამედროვე შენიშვნები“ და სურათების“ ავტორი დ. მიქელაძე, ამ კვირეა პარიჟიდან დაბრუნდა და ამ დღეებში „დროების“ რედაქციის შრომაში ჩაებმება“

„დროების“ 1877 წლის 16 მარტის ნომერში დ. მიქელაძისა და ა. წულუკიძის ჩხუბთან დაკავშირებით გამოქვეყნებულია ერთი ისეთი საგულისხმო ცნობა, რომელიც საბოლოოდ ჰფენს შუქს „დ. ზურაბის შვილის“ ფსევდონიმს მოფარებული პიროვნების ვინაობას: „ჩვენს ქალაქშიაც კი ბევრს ლაპარაკობენ ამ ჟამად ერთს უბედურს შემთხვევაზე, რომელიც ამ თვის ათს მომხდარა ქუთაისში.

ორი ახალგაზრდა თავადი დავით ალექსანდრეს-ძე მიქელაძე და ალექსანდრე სვიმონის-ძე წულუკიძე დატაკებთან ერთმა-

ნეთს ქუთაისის ბულვარზე და ერთს ხრამლითა და მეორეს ხანჯ-
ლით დაუწყიათ ერთმანეთის ჩეხა...

... ამბობენ, რომ თ. დ. მიქელაძეს სამა დაჭრილობა აქვს
ხანჯლითაო; ერთი თავში, მეორე მხარზე და მესამეც გვერდ-
შიო. თ. ა. წულუკიძე კი მარტო ორ ალაგას არის დაჭრილიო:
თავში და მხარზე. როგორც ისმის, ორთავენი ისე მძიმედ არ
არიან დაჭრილი, რომ მათი მორჩენა შეუძლებელი აუოს... მი-
ზეზი ამათი ჩხუბისა, როგორც გავიგონეთ ქალი ყოფილა...

„დროების“ მკითხველი ერთს ამ დაჭრილთაგანს — დავით
მიქელაძე — კარგათ იცნობს: 1873 წელს იბეჭდებოდა ჩვენს გა-
ზეთში იმას ცოცხალი, ჩინებული და კეთილშობილურ გრძნო-
ბით აღსავსე კორესპონდენციები პარიჟიდან, რომელნიც ხელ-
მოწერილნი იყვნენ „დ. ზურაბისშვილის“ სახელობით. 1874
წელს დაიბეჭდა იმისივე რამდენიმე სტატია „მეველეს“ პსევ-
დონიმით“.

ვფიქრობთ, „დროების“ რედაქციაზე, რომელმაც დაბეჭდა
ზემოაღნიშნული წერილები, და მის რედაქტორ ს. მესხზე, რო-
მელიც პირადად იცნობდა და მეგობრობდა დ. მიქელაძეს, უკე-
თესად და სარწმუნოდ არავის ეცოდინებოდა, ვინ იყო „დროე-
ბაში“ გამოქვეყნებული წერილების ავტორი. აქედან გამომდინ-
ნარე, „დ. ზურაბისშვილის“ ფსევდონიმს მოფარებული პიროვ-
ნების ვინაობა, — რომ ის დავით მიქელაძეა, — საბოლოოდ
დადგენილად უნდა ჩაითვალოს.

ამ დროს მეველე პეტერბურგს იმყოფებოდა. მის მსჯელო-
ბაში ასახულია იმ დროის რუსეთის რევოლუციურ-დემოკრა-
ტიული აზრიც და მისი ნათელი გამოძახილიც ქართულ სინამ-
ღვილეში.

ამ სტატიაშიც და შემდგომაც ყურადღებას იპყრობს მევე-
ლის ზოგიერთი რადიკალური შეხედულება, მისი მოწოდება სა-
მართლიანობის დასაცავად, მისი „ბრძოლა კაპიტალთან“¹ და
ტირანთა მხილება. ის უკმაყოფილოა, რომ XIX საუკუნის და-
სასრულს ყოველ წმინდა და მაღალ გრძნობას ვერცხლით ზო-
მავენ.

მეველე აღტაცებით ლაპარაკობს გამბეტას „სასტიკ მკერ-
მეტყველებაზე“, ვრცლად მოჰყავს მისი სიტყვის ის ნაწილი,
სადაც ლაპარაკია ძმობასა და თანასწორობაზე: „ყველა წოდება
თანასწორად უნდა შრომობდეს ქვეყნისთვის. ძველი ჩვეულება
და წესი სამუდამოდ უნდა გაქრეს... და მის მაგიერათ უნდა
შობილიყო ახალი ცხოვრება, რომელშიაც იმყოფებოდა სი-
მართლე, ჭეშმარიტება, პირადი ღირსება, თავისუფალი აზრე-
ბი“... როცა მეველე ასე გულუხვად ახდენს „დროებაში“ გამ-
ბეტას ციტირებას, ცხადია, ის გულისხმობს ასეთივე რევოლუ-
ციური გარდაქმნის დროულობას თავის ქვეყანაში; ხოლო ბას-
ტილიის დანგრევაზე ყურადღების გამახვილება კანონზომიერი
აყო არა მარტო მეველის, არამედ იმ პროგრესული თაობის და
მისი პრესის თვალსაზრისითაც, რომლის წარმომადგენელიც
დავით მიქელაძე იყო.

მეველე იგონებს მირაბოს ისტორიულ სიტყვებს, დემულე-
ნის გმირობას, და დასძენს: „ამ დღეს დაიღუპა კოროლის ძლიე-
რება“. მოღვაწეები მეზღაპრეები როდი არიან. ხალხის ნებით
ლუდოვიკოს დაცემაზე რომ ლაპარაკობს, მეველეს ნიკოლოზის

¹ „ივერია“, 1893, № 141.

დაცემას წიხასწარმეტყველებს. მისი რწმენით, რევოლუცია „საყოველთაო ბედნიერებას აახლოვებს“.

ცხადია, ზომიერება იგულისხმება მეველის მსჯელობაში: „გონიერი მმართველის ღირსება ის არის, რომ სანამდინ ხალხი რასმე მოითხოვდეს, მანამდინ უნდა დააკმაყოფილოს ის, თორემ როდესაც ხალხი აღელვდება და მოთმინებიდგან გამოვა, მაშინ ის ცოტა რასმეს კი არ დასჯერდება. ყველა მმართველობა, რომელიც ამ კანონს გარდამხდარა, სასტიკათ დასჯილა თავის ჯიუტობისათვის“. მაგრამ თუ დავაკვირდებით, რომ აქ იგულისხმება არა მარტო მეფეების „თავაზი“ და სამართლიანობა, არამედ საერთოდ მმართველთა დამოკიდებულება ხალხისადმი, მის მსჯელობაში საყურადღებო აზრი და გამჭვირახობაა.

ნათელი და ისტორიულად ძირითადად სწორია მეველის დასკვნა, რომ „14 ივლისის რევოლუციის შედეგმა მთელი ევროპის ცხოვრება ძირიანად შეარყია; ძველი სახელმწიფო წყობილება მოიშპო, მონაობა და ბევრი ხალხის შემავიწროებელი კანონები სამუდამოთ გაქრა“. ის კმაყოფილებით ლაპარაკობს ფრანგი ხალხის „ზნეობრივ და ნივთიერ ძალაზე“, რამაც საფრანგეთი დიდი ხნით ევროპის საქმეების ფაქტიურ წარმმართველად აქცია. შესანიშნავია მეველის ალლო და ცოდნა, როცა ნაპოლეონზე ლაპარაკობს: „ამ გასაოცარმა კაცმა“, მეველის სიტყვით, მთელი ქვეყანა გააკვირვა. „ნაპოლეონი რევოლუციის შვილი იყო... მაგრამ როდესაც იმან უღალატა თავის უფლებას (ხაზი ჩვენია. ე. მ.), მაშინ თვითონ მოიშხადა თავისი დიდების სამარე!“

ამ მოკლე მსჯელობაშიც ნათლად იგრძნობა დ. მიქელანჯის

ერუდიცია, სალი აზრი და უტყუარა აღლო. როგორც ცნობილია, თვით ნაპოლეონი ამბობდა ვატერლოოს შემდეგ: „ევროპის მპყრობელები მე კი არ მებრძოდნენ, არამედ ჩემი სახით რევოლუციას ებრძოდნენ“. გამოდის, რომ თვით იმპერატორს შეგნებული ჰქონდა თავისი მისიას არსი, და როცა მან გადაუხვია ამ მისიას, როცა მან უარი თქვა ხალხის დანხარებაზეც კი, მისი მზეც ჩაესვენა. დ. მიქელაძემ ეს მშვენიერად იცოდა ამ ერთი საუკუნის წინ.

მეველეს არ სწამს შეშინებული ტარანების მიერ ხალხისათვის ნაბოძები კონსტიტუციები, საიდანაც შემდეგ თვითონვე შლიან ხალხზე მიცემულ უფლებებს, და იგონებს იგავს გველის სათნოებაზე: ყმაწვილმა გველს ვაშლი გაუწოდა, იმან კიდევ გამორთმევის ნაცვლად დაგესლაო. ასევე იქცევიანო ხშირად გაბატონებული ადამიანები, რადგანაც „სიამოვნებისა და ნეტარების ღრუბლები ერთობ გაუჭკვრეტელია უმრავლესობისათვის, რომ იქიდგან შეეძლოს კაცს დანარჩენი უბედური ხალხის დანახვა“¹.

უფრო ხატოვნად და თვალსაჩინოდ „თანამედროვე სურათების“ დახატვას ძნელად თუ რომელიმე მწერალა შესძლებდა. იქვე სტატიას მეველე ამთავრებს ქართული ანდაზით: მაძლარს მშიერიც მაძლარი ეგონაო, და ამ სიბრძნის დასადასტურებლად ფიხტეს სიტყვებსაც იშველიებს.

უცხოეთს მყოფი ახალგაზრდა დ. მიქელაძე მოხერხებულად არღვევს ცენზურის ბარიერს და „ღროებაში“ ათავსებს სტატიებოს მთელ სერიას პარიზის ცხოვრებაზე, პარიზის კომუ-

¹ „ღროება“, 1873, № 37. ♪

ნაზე, რაც მისი აზრით „ლუკმა-პურისათვის ბრძოლა იყო“, აქვეყნებს აგრეთვე წერილებს საფრანგეთ-პრუსიის ომზე, ინტერნაციონალის დაარსებაზე და ა. შ.

I ინტერნაციონალს დ. მიქელაძე ეძახის „ხალხთა შორისი მუშების საზოგადოებას“, რომლის მიზანია „გამოიყვანოს მუშა ხალხი იმ მდგომარეობიდან, რომელშიაც ის ახლა იმყოფება და რამდენადაც ეს შესაძლებელია პოლიტიკური ეკონომიის კანონების თანახმად“¹.

პარიზიდან გამოგზავნილ კორესპოდენციაში დ. მიქელაძე წერს: აქ შედგაო კრება, რომელმაც განახილა ქალებისა და ბავშვების შრომის პირობები ფაბრიკებში, და აღნიშნავს, რომ ფაბრიკებში შრომის აუტანელ პირობებს გაუმჯობესება უნდაო. „წარმოდგინეთ ჩემი გაკვირვება, — წერს მიქელაძე, — როდესაც ერთი სწავლულის თხზულებაში შევხვდი ამნაირ სიტყვებსა: ბევრ ფაბრიკებზედ ოთხი წლის ბავშვებს რამდენსამე საათს ამუშავებენ დღეშიო. მაგრამ ეს კიდევ რა! გაიგონეთ, რას ამბობს მარქსი: „ინგლისის ფაბრიკებზედ მცხოვრებნი ისეთ გაჭირვებულ მდგომარეობაში არიან, რომ ორი წლის ნახევრის ბალებს დააჯდენენ სამუშაოზედ და რვა-ცხა საათს დღეში ამუშავებენ... საბრალოთ საკმლის ჭამის დროც არა აქვთ და დედები შოშიასავით თავის ხელით უდებენ ბავშვებს პირში ლუქმასა, რომ არ ასცდნენ ისინი ხელთ-საქნარზედ. თითო ბავშვს იმდენი ჰაერი ერგება ამ საზარელ სადგომებში, რამდენი ჰაერიც დაეტევა ისეთ უჭრაში, სადაც ორი პატარა ბავშვი ძლივს ჩაეტევა“².

¹ „დროება“, 1872, № 7.

² „დროება“, 1873, № 6.

სხვაგანაც, ყველგან სამართლისა და პროგრესის რწმენას ქა-
დაგებს მეველე. წერილებში ყენევიდან, დ. ზურაბისშვილის
ფსევდონიმით წერს: „რაც უნდა დახლართული იყოს ახლან-
დელი აზრი და ლტოლვა, შეუძლებელია ერთ წამსაც მივიღოთ
ის, რომ ქვეყანაზედ სამართლიანობა და სიყვარული არ იქნება,
რომ ფიზიკური ძალა, მხეცური ინსტინქტები იმეფებენ დიდ-
ხანს! არა! ამ აზრზედ ხელის დათანხმება თავის ხელით თავის
მოკვლას ემსგავსება“. საყურადღებო და ყოველი უკუღმართი
ღროისათვის საგულისხმო ამ აზრს მეველე განამტკიცებს სავ-
სებით სწორი თვალსაზრისით: „სანატრელი დღას მოახლოვება
ჩვენზედვე არის დამოკიდებული... წინააღმდეგეთ მხნეთ ბო-
როტებას და ექვი არ არის, ვნახავთ გამარჯვების დღეს!“¹.

იქვე დ. ზურაბისშვილს ხაზგასმით მოჰყავს ინტერნაციონა-
ლის დევიზი: „არ არის უფლება, გარეშე ვალდებულებსა, არ
არის ვალდებულება, გარეშე უფლებისა“. იმავე სტატიისი ნა-
თლად და თითქმის ამომწურავად განმარტავს ინტერნაციონა-
ლის პროგრამას: „ხალხთა შორის საზოგადოება სცთილობს:
1) რომ ყველა მუშა თვითონ თავის ღონით განთავისუფლებუ-
ლი იქნეს, 2) რომ მუშები თავის შრომის პატრონი შეიქნენ,
ერთმა საზოგადოების ნაწილმა ბატონათ არ გაუხდეს მეორესა,
3) რომ მუშების დამოკიდებულება თავიანთ აღებზედ მავნებე-
ლია განათლებისათვის და ყოველი ზნეობით დამცირების, სო-
ციალური და პოლიტიკური უსამართლობის მიზეზია, 4) რომ
ეკონომიური განთავისუფლება მუშებისა დიდი საქმეა, რომ-
ლისთვის ყოველი პოლიტიკური შემთხვევა უნდა იზმარონ,

¹ „ღროება“, 1872, № 47.

5) რომ ყოველი მეცადინეობა მუშებისა დღემდე უნამყოფო იყო, რადგან მათ შორის არ სუფევდა თანხმობა და ძმური სიყვარული, 6) რომ მუშა ხალხის განთავისუფლება არ არის ადგილობრივი, ან ნაციონალური, არამედ ეს არის მიზანი ყოველი განათლებული ქვეყნისა და ყველამ მონაწილეობა უნდა მიიღოს ამაში“.

მეველე ანალიზს უკეთებს ექვსი წლის წინ ჩატარებულ ენევის კონფერენციას და აღშფოთებულია, რომ ასეთი მაღალი იდეების მატარებელ საზოგადოებას, რომელსაც ასეთი უმანკო და გონიერი მიზანი აქვს, ისე სდევნიან, „ როგორც ძველ ქრისტიანებს ნერონის დროს“. საგულისხმო შედარებაა! მაგრამ მისი მეორე შედარება კიდევ უფრო საგულისხმოა და მიუთითებს არა მარტო მის რწმენაზე, არამედ განსწავლულობასა და ალლოზზე: „განა იმ კარდინალებს, რომელთაც არ სურთ მიიღონ კოპერნიკის სისტემა და წინააღმდეგი არიან — დაარწმუნებს ვინმე, რომ ისინი სცდებიან?“

აშკარაა, მეველე მტკიცედ დგას სამართლიანობის მხარეზე და სწამს, რომ ქვემარტებას, რაც გინდა ბევრი ეღაჟონ, იარაღით ვერაფერს ავნებენ. ხოლო თუ არსებული წყობილება „რაიმე პრინციპს თავის მფარველობას ქვეშ მიიღებს, ეს იმ პრინციპის სიკვდილის ნიშანია: ცოცხალს რაღა წამლებით შეზავება სჭირია, რომ არ დაღპეს?“

„დროების“ ენეველი კორესპონდენტი უყურადღებოდ არ ტოვებს შვეიცარიაში არსებულ პოლიტიკურ თავისუფლებასა და შემწყნარებლობას. იმ დროს, როცა „ხალხთა შორის საზოგადოებას (ინტერნაციონალებს) ყოველ სახელმწიფოში — გარდა ინგლისისა და ამერიკისა — სდევნიან, და ... მანიფესტი კი-

დევ უფრო ამტკიცებს ბურჟუაზიის შიშს და თართოლვას ინტერნაციონალის პრინციპების წინაშე, უნენეაში ამ საზოგადოების წევრნი მართებლობის წევრთ რაცხვში არიან და საქვეყნო საქმეებს განაგებენ“¹.

დ. მიქელაძე მოურიდებლად შენიშნავს: ალბათ ხალხი იკითხავს, რატომ უნდა სდევნიდნენო ინტერნაციონალს? — „მაგრამ ჩვენს საუკუნეში სამართლის ტალახში გათელვა, თავისუფლების შეგნება, ხალხის ბედით თამაში, როგორც ქადრაკის კაცებითა, გულს აღარ გვიღელვებს... შევეჩვიეთ!“

აღტაცების ღირსია მთელი ესა და შემდგომი მსჯელობა იმის შესახებ, რომ „გარიბალდის საუკუნეში გუშინდელი გამოცხვარი „რაინდი“ გაიძახის: „ძლიერება არის სამართალიო“. ესაა არა რომელიმე დროებითი და მდარე მიმომხილველის, — არამედ მოაზროვნის, მწერლისა და პატრიოტის ტონი.

პარიზში მყოფ, უცხო ენების მცოდნე, ნიჰიერ ქართველ კორესპონდენტს ცხადია, უყურადღებოდ არ გამოჩებოდა თავისი დროის მოწინავე და რევოლუციური აზრი. ერთ-ერთ კორესპონდენციაში, სადაც ეხება ლუი ბლანის თავმჯდომარეობით შედგენილ კომისიის პროექტს, ვრცლად მოჰყავს მარქსის სიტყვები: „ინგლისის ფაბრიკებზედ მცხოვრებნი ისე გაჭირებულ მდგომარეობაში არიან, რომ ორი წლის ნახევრის ბაღლებს დააჯდენენ სამუშაოზედ და რვა-ცხრა საათს დღეში ამუშავებენ...“² ქვემოთ ციტატი შეწყვეტილია მრავალწერტილით.

¹ „დროება“, 1872, № 47.

² „დროება“, 1873, № 6. (ხაზი ჩვენია. ე. მ.).

XIX საუკუნის მოწინავე ადამიანები, ქართველი სამოციანელები კმაყოფილნი არიან მეველის შეუპოვარი მოღვაწეობით, თვალყურს ადევნებენ მის მუშაობას.

მეველე ს. მესხის „საყვარელი კაცია“. მესხი ხშირად ახსენებს და იმოწმებს კიდეც მის ავტორიტეტს, მაგალითად, როცა მსჯელობს ერთ კომიტეტზე, „რომლის მეთაური, როგორც მეველე წერს, ყოფილა ნემეცი კარლ მარქსი, რომელმაც კრებას საზოგადოების ანგარიში წაუკითხა. კრებამ გადაწყვიტა, რომ განსაკუთრებული ყურადღება საფრანგეთისა და რუსეთის მუშებს უნდა მივაქციოთ“¹.

ცხადია, მეფის მოხელეებს შეუმჩნეველი არა რჩებოდათ მეველის გაბედული გამოსვლები. მაგალითად, ცენზურას აუქრქალავს მეველის ერთი სტატია, რომელშიაც ციტირებულია მარქსის „პოლიტიკური ეკონომიის კრიტიკისათვის“.

მეველე შუბლშეკრული ხვდება ყოველ პირსა და კანონს, რაც ადამიანის, მწერლობის, მართლმსაჯულების თავისუფლებას ზღუდავს. მაგალითად, ხელოვნურსა და უდღეურს ეძახის საფრანგეთის პარლამენტის გადაწყვეტილებას, — მწერლობა და მართლმსაჯულება მთავრობისაგან უნდა იყოსო დამოკიდებული, და ირონიულად შენიშნავს: „თუმცა მთავრობა გამარჯვებულია და თავის მოწინააღმდეგეებს ასალაგმავად დიდი ღონე უპყრია ხელთ, მაგრამ ვაი ამისთანა გამარჯვებას!“²

მეველეს აღაშფოთებს გაზეთების აკრძალვა, სიტყვის თავისუფლების ჩახშობა, „სამხედრო მდგომარეობა“ შინ თუ გა-

¹ ს. მესხი, „თხზ.“, ს. მერკვილაძის რედაქციით, ტ. I, გვ. 334.

² „ივერია“, 1894, № 159.

რეთ. ქვეყნად არ ეგულება ისეთი შარაგზა, სადაც სიკვდილის არ უნდა ეშინოდეს ადამიანს, ქვეყნად არ არისო კუთხე, სადაც არ მძვინვარებდეს ძალადობა, ინკვიზიცია, დესპოტიზმი, შილატაკე და სიღუხჭირე, ლიტერატურის დევნა... მეველეს ერთ ხელმოუწერელ სტატიაში მოჰყავს საფრანგეთის, კანადის, მექსიკის, ესპანეთის მაგალითები, მეტადრე დიდხანს ჩერდება იტალიაზე, სადაც ხალხი არაერთხელ ამდგარა თავისუფლების დასაცავად. მეველე აღტაცებულია იტალიელთა მამაცობით, რომლებიც „ყოველთვის მხნედ და აღტაცებული გრძნობით შეხვდებოდნენ თავისი ქვეყნის თავისუფლებისათვის საკვდილსა. ამ კეთილშობილი და თავგანწირული მამულის შვილების სისხლი არ იკარგებოდა უბრალოდ... ერთი დახვრეტილი ან ჩამობრჩობილი პატრიოტის მაგიერად ასი და ორასი სჩნდებოდა...“¹. მეველე აღტაცებულია გარიბალდის სიმამაცით, ზიზლით იხსენიებს ვიქტორ ემანუელს, რომელმაც დახმარების ნაცვლად ეროვნულ გმირს ტყვია დაუშინა და ციხეში ჩააჯდო. მაგრამ იტალია მეფეებმა და პაპებმა ვერ დააჩოქეს. ხალხი მკვდრეთით აღსდგა.

უცხო. ქვეყნებზე რომ ლაპარაკობს, დ. მიქელანჯის ფიქრი მამულს დასტრიალებს.

უცხოეთის ამბების ხშირ მიმოხილვას მეველე თვითმიზნად როდი ზღის. ამ გარემოებას თვითონვე ირონიულად უყურებს: შეც ისე გამომდის, როგორც ანდაზაშია, — მამის სული დავიწყებია და პაპის სულს ფაცულობსო. მაგრამ ზოგჯერ ცხოვრე-

¹ „დროება“, 1873, № 36.

ბაში „სხვადასხვა დამოუკიდებელ გარემოებათა გამო“ ადა-
შინი იძულებულია ისევ შორეულ ამბებზე ილაპარაკოს, რა-
დგან „თავის მამის მოგონება, თავის მდგომარეობის განჩევა,
აწონა და დაფასება შეუძლებელია“¹.

ფრიად საყურადღებო მსჯელობაა! ისტორიაში თუ თანამე-
დროეობაში მეველე ნაცარს კი არ ქექავს, არამედ ნალევრ-
დალს. თავის ამ მსჯელობას საქმით ამტკიცებს, როცა უცხოე-
თის შენიშვნებში ჩვენი ქვეყნის ბედზე ჩამოაგდებს ხოლმე სი-
ტყვას. ის სულაც არაა მომხრე „თათრული სიბრძნისა“ — ემო-
ნე შენს ბედსაო. ევროპის ამბებში ბევრს ჭკუის სასწავლე-
ბელსაც ხედავს და „გარემოებაც ნაკლებად შემავიწროვებე-
ლია“. სადაც განახლების სულია, სადაც რესპუბლიკა ფეხს იდ-
გამს, სადაც მეფე გასაჭირშაა, — ჩვენი მიმომხილველიც იქით-
მაპყრობს მკითხველის თვალს და გადაკვრით თუ პირდაპირ
ანიშნებს: „აი ჩვენი გზა და მომავალიო!“

მაგრამ მეველე არაა ყოველთვის თანმიმდევარი. ზოგჯერ
თავის რევოლუციურ ძახილს თვითონვე ფარავს მოწოდებით
მშვიდობიანობისაკენ.

მართალია, მშრომელთა მხარეზე დგას, უხარია, რომ „მუშა-
ხალხი სახუმაროდ არ ამხედრებულა და ბოლოს და ბოლოს მი-
უგნია ნამდვილის საშუალებებისთვის ახლანდელი უსამართლო-
ბის მოსასპობად“, მაგრამ ის მაინც მშვიდობიანი გზით მოპო-
ვებულ უფლებებს აძლევს უპირატესობას და აძრწუნებს კი-
დეც რევოლუცია, რასაც „თან მოსდევს უსამართლობა და ადა-

¹ „დროება“, 1873, № 39.

მიანთა მსხვერპლი“¹. ამიტომ მოწონებით ხვდება ნანტში მიღებულ მშვიდობიან გადაწყვეტილებას — პარლამენტში უმეტესობა სოციალისტი იყოს არჩეული და კანონებიც ხელსაყრელი გამოუშვანო.

მეველეს თავისებური პოზიცია აქვს წოდებრავ საკითხში საერთოდ, ცდილობს მოშალოს წოდებრივი ზღვარი და ყველას შეაგნებინოს, რომ საჭიროა შეერთებული ძალით ქვეყნის წინსვლისათვის ზრუნვა. როცა მარტყოფელმა გლეხებმა ნასწავლი მამასახლისი აირჩიეს და გასამრჯელო დაუნაშნეს, მეველემ ამაში „ახალი სიოხს ქროლა“ დაინახა. მართალია, მერე გასამრჯელოს მიცემა გაუჭირდათ და ისევ უსწავლელი კაცი აირჩიეს, მაგრამ ცოტა ხნის შემდეგ იგივე ნასწავლი აზნაურა ამჯობინეს. მეველე გულუბრყვილოდ იმედოვნებს, რომ ასეთი ნასწავლი აზნაურები თავიანთ ამომრჩევლებს გულს არ გაუტეხენ და დაუმტკიცებენ, რომ „წოდებრივი უთანხმოება და სიძულვილი ჩვენი ახალი პუბლიცისტების მოჭორებული ამბავია“². ცხადია, ახალი საქმისა და ერისათვის ზრუნვას ორივე წოდების შვილები იჩენდნენ, მაგრამ ეს სულაც არ ნიშნავდა ისეთ წოდებრივ სიამტკბილობას, როგორაც მეველეს სურდა ყოფილიყო.

1894 წელს რაჭველ თავად კონსტანტინე ყიფიანს თავისი მამული თავისივე გლეხებისათვის უწყალობებია. მეველე ამ ფაქტსაც წერილით ეხმაურება, აქებს ამ თავადის საქციელს და გადამეტებულ მნაშვნელობასაც აძლევს მას: ცდილობს ამით

¹ „ივერია“, 1894, № 211.

² „ივერია“, 1894, № 49.

დაასაბუთოს ბატონისა და ყმის მამაშვილური დამოკიდებულების ლეგენდა და გააბათილოს იმ მკვლევართა აზრი, რომელთაც ჩვენში ბატონყმობა ჯოჯოხეთად ესახებოდათ. ცხადია, ეს დ. მიქელაძის თვალსაზრისთა აქილევსის ქუსლია, მაგრამ ეს მას ესაჭიროება მოცემულ მომენტში, „როცა გვჭირია საერთო შეთანხმებული შრომა ჩვენის ცხოვრების განსაკარგებლად“. მართლაც, განა ე. წ. დიდგვაროვანთა წრიდან არ იყო ყველა ქვეყნის და მათ შორის საქართველოს მრავალი გამოჩენილი მოღვაწე, მოაზროვნე, მწერალი და ხალხის სიყვარულით გარემოცული ქომადგი? ამ აზრით, დ. მიქელაძე შორს დგას ხელაღებით რომელიმე წოდებისათვის უპირატესობის მინიჭებისა და მეორეს კანონგარეშედ გამოცხადების უგნური მოთხოვნისაგან.

საქმე ისაა, რომ მეველე არ ავლებს ზღვარს თავადას და გლუხს შორის წინდაუხედავად, მხოლოდ წოდებრივი სხვადასხვაობის საფუძველზე. მისი აზრით, „ერი ძლიერია მხოლოდ მაშინ, როდესაც ყოველი მისი ნაწილი ერთიან და განუყოფელ აგებულებას შეადგენს და რომელ ნაწილშიც თავისთვის გამოსაყენებელ კაცებს იპოვის, იქიდგან მოიწვევს მოქმედებისათვის“¹. ეს აზრი, გამოთქმული მამასახლისად თავადაზნაურთაგანის არჩევასთან დაკავშირებით, იმ დროისათვის პრინციპულად გასაგებია და ბუნებრივი. მაგრამ ისიც უნდა აღინიშნოს, რომ მიუხედავად მთელი თავისი მაღალი ჰუმანურობისა და ნათელი გონებისა, დავით მიქელაძის გულში მუდამ ცოცხლობს ერთგვარი თავადიშვილური თავმოყვარეობა და იგი მუდამ უყოყმანოდ იცავს თავისი წოდების ღირსებასა და დამსახურე-

¹ „ივერია“, 1893, № 181.

ბას უსამართლო თუ სამართლიანი თავდასხმებისაგან. მაგალი-
თად, როცა ოდესეღმა პროფესორმა თავის ლექციებში ნაპო-
ლეონზე თქვა, რომ საფრანგეთის თავადაზნაურობა ასეთივე
თვალთ უყურებდა კორსიკის თავადაზნაურობას, როგორც
რუსეთის თავადაზნაურობა უყურებს კავკასიის თავადაზნაუ-
რობასო, — მეველემ შეურაცხყოფილი კაცის პასუხი გასცა და
აღნიშნა, რომ რაც ეპატიება მჭლაბნელებს, ის არ ეპატიება
მეცნიერსო¹.

სხვა შემთხვევებში მეველე ერთნაირად კიცხავს ყველას,
ვინც ახალი დროის ქროლას ვერა გრძნობს და განუსჯელად
ცდილობს ჩამოაგდოს შუღლი წოდებებს შორის. დ. მიქელა-
ძეს ესმის, რომ „ასეთს მიმართულებას თავისი ისტორიული სა-
ფუძველი აქვს“, მაგრამ ბატონყმობა უკვე გაუქმებულია და
ყოველი წოდების აღამიანს მოეთხოვება საერთო ძალით იბრ-
ძოლოს ქვეყნის კეთილდღეობისათვის. მართალია, მეველეს აქ
თითქოს ავიწყდება თავისივე აზრი უსამართლობის არსზე, თა-
ვის თავსვე ეწინააღმდეგება, როცა ამტკიცებს, რომ ჩვენში
აღრევე „გლეხისა და ბატონის ოჯახი შეადგენდა ერთს საერ-
თო ოჯახს“², მაგრამ ასეთი ისტორიულად მცდარი თვალსაზრი-
სი „ბატონყმური სიამტკებულობის“ შესახებ ბევრ სხვა პროკ-
რესულ მოღვაწესაც ჰქონდა. პრინციპი მეველის მოთხოვნი-
სა — არა წოდებრივი, არამედ მიზნობრივი დამოკიდებულები-
სა აღამიანებს შორის — მხოლოდ საერთო კეთილდღეობას გუ-
ლისხმობდა და სულაც არ ამტკიცებდა, რომ უკვე დამყარდა

¹ „ივერია“, 1874, № 77.

² „ივერია“, 1893, № 255.

საერთო თანასწორობა. არა, დ. მიქელაძე სულაც არ ჩქმალავს ჩაგვრის ფაქტს და არც ფაქრობს ხელი დააფაროს თავგასულ მებატონეებს, თავისი წოდების შვილებს. ძნელი შესამჩნევი არაა, რომ თავის თვალსაზრისს წოდებრივ სიამტკბილობაზე თვითონვე არაერთხელ არღვევს. გავიხსენოთ ლექსის სიტყვები:

„ვჭდებოდით ვახშმად,
ხელს ვყოფდით სმასა,
ვინ კითხულობდა
გლებთა ტანჯვასა!“

დ. მიქელაძე გვიანაც მოურიდებლად შენიშნავს, რომ თავად-აზნაურობამ „ვერ გამოიჩინა ის მცირე გაგებაც, რომელიც დაანახებდა, თუ როგორ საჭირო და სასარგებლო არის თვითონ მისთვის ძმურად ხელის მიწოდება ხალხისათვის“.

მიქელაძეს არაერთხელ უხდება შეტაკება წვრილმან, ეგოისტ თანამემამულეებთან, თავდაზნაურობის გავლენიან ბურჯებთან. მისი სიტყვით, „თავად-აზნაურობამ ზოგიერთი წვრილმანი ეგოისტების წყალობით ისეთი დანაშაულობა ჩაიღინა, რომლის გაადვილება შეუძლებელია“¹. მიქელაძე იმოწმებს თავისივე ადრესატის სიტყვებს და საქვეყნოდ ამხელს იმ წოდებას, რომელმაც ვერ გამოიჩინა „ვერც ქრისტიანული გრძნობა, ვერც მამულის შვილობა, ვერც ერთგვაროვნობის და ძმობის მეგობრობა, როცა თავის სასტიკ გადაწყვეტილებას ადგენდა“.

იბრძვის რა ერის წინსვლის, განათლების, ეკონომიკისათვის, მეველე მკითხველს თვალში არცხვენს წვრილმანი ში-

¹ „ღროება“, 1879, № 116.

ნაური შუღლითა და ყმებზე დავით გატაცებულ თავადებს, მაგალითად — აბაშიძეებს, რომელთაც კაცხის გლეხების დასაკუთრება მოუნდომებიათ, მოაგონებს, რომ „ერთი საუკუნეა რაც ევროპამ იცნო, რომ მოწობა საზოგადოების დამამცირებელი მოვლენაა“, რომ ამერიკამ სისხლი დაღვარა და გაათავისუფლა მონები. „რომელი საზოგადო საჭიროება მოითხოვს ადამიანის უფლების და შრომის დამოკიდებას მებატონისაგან?“¹ — სვამს კითხვას მეველე ცნობილ სტატიაში „ალივისა საწყაული“ და სასტიკად კიცხავს მებატონეებს, რომლებიც ახალ დროშიაც კი პირუტყვებით უსაკუთრებენ მათსავით ადამიანებს, თან სამწუხაროდ მიაჩნია, რომ „ამნაირი ლაპარაკი გვიხდება დღეს“. მეველე აღშფოთებულია ბატონყმობის აღდგენის მსურველთა საქციელზე და მწარე ირონიით კითხულობს: „პროგრესია ესა?“

დ. მაქელაძე რომ ზოგიერთი კომპრომისის მიუხედავად ამადღებულთა თავისი წოდების განურჩევლად დაცვის წვრილმან ინსტინქტზე, ეს ჩანს თუნდაც მისი დამოკიდებულებიდან თანამედროვეებისადმი. თუ კაცხელ აბაშიძეებს უწყალოდ კიცხავს, სამაგიეროდ მიესალმება ხალხის ღირსეულ შვილს, დიმიტრი ყიფიანს, და იმედი აქვს, რომ მისი ავტორიტეტული სიტყვა, რაც ათი ათას სიტყვად ღირს, დაანგრევს იმ ხელოვნურ კედელს, რომელიც აღმართეს განდიდებულმა ეგოისტებმა თავადაზნაურობის უმრავლესობასა და მისსავე ღირსეულ შვილებს შორის, მებატონეებსა და ხალხს შორის. „დროების“ კორესპონდენტი აქ ერის ბედს ეხება ზოგადად, და მისი მსჯელობა

¹ „დროება“, 1873, № 48. †

არ გულისხმობს, რომ განსაკუთრებულ იმედებს ამყარებს მჩაგვრელთა სათნოებაზე. არა, დ. მიქელაძე დაეძებს ადამიანებს, მოღვაწეებს, პატრიოტებს, განუჩრჩველად წოდებისა და მდგომარეობისა. ის პირუთვნელად ლაპარაკობს იმაზე, რომ თავდაზნაურობის წოდებიდან გამოვიდა მრავალი ეგოისტიც და მათი „გამომათხიზლებელიც“ — დ. ყიფიანის სახით. ის მოხარულია ამით, რადგან „საზოგადოება, რომელსაც თითო-ორ-ორი კაცი არ ეყოლება, რომელთაც ამგვარი შემთხვევების დროს შეეძლოს აღამაღლოს თავისი ხმა და პირუთვნელად უთხრას ამ გზადაბნეულ საზოგადოებას ქეშმარიტება, ასეთი ქვეყანა ჯოჯოხეთად გადაიქცეოდა და ხალხი შიგ მცხოვრებ მხეცებათ! მაგრამ ჯერ ჩვენი საქმე აქამდის არ მისულა“.

ამ სიტყვების ავტორის სახით ჩვენს წინაშე აღდგება არა რომელიმე საკვირადღეო ჟურნალისტი, არამედ ფართო დიპლომატიის მოღვაწე, რომელსაც გული შესტკივა თავისი ხალხისათვის. ასეთი იყო დ. მიქელაძე.

ზოგიერთი მიმომხილველი საქმეს ზერელედ ეხება და ბევრს ლაპარაკობს დ. მიქელაძის ლიბერალობაზე, ზომიერებაზე და ა. შ.

ფაქტების უმრავლესობა არ იძლევა საამისო საბაბს.

ერთ-ერთ ფელეტონში მეველე, მაგალითად, წერს: „რათ უგდებს რომელიმე საზოგადოება თავის თავს ცუდს გარემოებაში? მოსწონს მას დამჩაგვრელი საფუძვლების ქვეშ სიცოცხლე? არაო! მაშ თვითონვე გამოძვრეს ხათვანიდამ“¹. აქ აშკარად არის

¹ „დროება“, 1873, № 47. (შეცდ. № 400).

დასმული აქტიური მოქმედების, ბრძოლით თავის გამოხსნის საკითხი.

მეველე დასცინის იმ ავითატორებს, რომლებიც მაღალ მიზნებს ისახავენ, მაგრამ შევლენ თუ არა საზოგადოებაში, ნახავენ თუ არა მის დაყოფას მჩაგვრელებად და დაჩაგრულებად, ენა ებმებათ, გზას ვერ პოულობენ. მაგრამ თუ შეაგნებენ თავის მაღალ ვალს, სიცოცხლეს კარგია და სიკვდილი კიდევ უტყბესი!

მეველე მოკლედ და ნათლად არჩევს ნამდვილ, თავგამოდებულ მებრძოლთ და მხდალ, სუსტ, „უტვინო კაცს“, რომელიც პირველი დაბრკოლებისთანავე მოწინააღმდეგის ბანაკში გადადის, თბილად ეწყობა და დამჩაგვრელი ხდება. ფელეტონისტა ნამდვილ ხოტბას უძღვნის გაუტეხელთ, რომლებიც მალე ტოვებენ ქვეყანას, მაგრამ არ იცვლებიან. „მარტო ამისთანა კაცები წასწევენ კაცობრიობის სწავლასა და ზნეობას“. ცხადია, ამ სწავლისა და ზნეობის მიღმა მეველე უფრო სერიოზულ საგნებსაც გულისხმობს, მაგრამ ეზოპეს ენას თავისი საზღვარა აქვს. მეველე მოხერხებულად გადადის პრაქტიკულ საქმეზე, ხალხისათვის მტკივნეულ საკითხებზე, მეველე უფრო რაციონალურ, წმინდა ჰუმანურ პოზიციებზე დგას და თანაც ქვეყნის საკუროებისათვის ბრძოლაში ხშირად იძულებულია მოხერხებული გზა აირჩიოს, გადაკვრით შეეხოს მოვლენას ან პიროვნებას, იმას, რაც სძულს.

თავის წერალში, რომელიც მეფის ნაცვალ ალექსანდრე დონდუკოვის გარდაცვალებისადრია მიძღვნილი, ჯერ ლაპარაკობს ამ თავადის სახელმწიფოებრივ ნიჭზე, ვორონცოვის ამ „ღირსეულ“, თუმცა დარდიმანდ, შემცველზე, მერე კი გვა-

ნიშნებს, რომ გადაუხვია ევროინტეგრაციის გზას, აღარ ჩათვალა საჭიროდ მრჩეველთა მოწვევა და სხვა გზას დაადგა. ამ „სხვა“ გზაზე მეველე იძულებულია გაჩუმდეს, მაგრამ მისი ხასიათი უსიტყვოდ ნათელია. არსებული წყობილების უკუღმართობაში მეველეს ეჭვი არ ეპარება, ოღონდ მისი გარდაქმნის საქმეში უფრო მაინც გონების, ზნეობრივი სრულყოფის, ჰუმანურობის და ბოროტებისადმი საერთო ძალით წინ აღდგომის გზას ირჩევს.

ჩვენს ხელთ არის დავით მიქელაძის ხელნაწერი (რუსულად), რომელსაც აწერია: „პეტერბურგი. სახელმწიფო სათათბიროს თავმჯდომარეს“, —ეს გაბედული და მჭევრმეტყველი დოკუმენტი ჩვენი მგზნებარე მოღვაწის პატრიოტული სულისკვეთებისა. „დასავლეთ საქართველოს. თავადაზნაურობა, რომელიც მორიგ კრებაზე შეიყარა, უსაზღვრო პატივისცემისა და აღტაცების გრძნობით მიესალმება რუსი ხალხის წარმომადგენლებს, გაბედულად და თანაზომიერად რომ იცავენ თავისუფლებასა და სამართალს“. ამ ფრთხილი და ოფიციალური მიმართვისათვის აუცილებელი თავაზიანობის გამრჩატვის შემდეგ მიქელაძე გაბედულად ლაპარაკობს სასახლეში მომხდარ „დიდ განხეთქილებაზე“, რომლის შემდეგაც „მთავრობა ალბათ გაიგებს, ბოლოს და ბოლოს, თავისი ჭიუტობის მთელს უაზრობას და აღარ შეეცდება დაშრიტოს ამომავალი განთიადის შუქი“. ამაზე მეტის თქმა სახელმწიფო სათათბიროს თავმჯდომარის მისამართით თითქოს ძნელია, მაგრამ დავით მიქელაძე მეტსაც ამბობს: იმედოვნებს, რომ „მძიმე საუკუნო ცოდვები, რაც ჩაუდენია მთავრობას რუსი და სავსებით ასევე რუსეთის სხვა ხალხების წინაშე (ხაზი ჩვენია. ე. მ.),

გამოსწორებული იქნება პირველი რუსული წარმომადგენლობითი კრების მიერ“.

ცხადია, დ. მიქელაძემ არ იცოდა სათათბიროს ნამდვილი არსა, მაგრამ ის იბრძოდა ისე, როგორც ესმოდა და როგორც მოცემული ვითარება ამის საშუალებას აძლევდა, იბრძოდა, როგორც თავისუფლების რაინდი. პუბლიცისტი, დემოკრატი.

„გათელილი, დასერილი, თავის უკეთეს გრძნობებში შეუცხვოფილი საქართველო ელის მოძმე ხალხს რჩეულთაგან, რომ მიანიჭებენ მას ავტონომიურ დემოკრატიულ მმართველობას, თავის დიდ მშობლიურ რუსეთთან პოლიტიკური ერთიანობის საფუძველზე“, — ასეთი გაბედული და თანაც შორსმჭვრეტელური სიტყვებით თავდება მიმართვა, რომელმაც დავით მიქელაძის კალმითაა დაწერილი.

სწორედ ხალხის „გათელვა, გასრესა“ და დამონება მიაჩნია დ. მიქელაძეს ეკონომიური სიღატაკის მიზეზად.

მაგალითად, როცა „ივერიაში“ მეველე ეხება რუსეთის შიმშილის მიზეზებს, აკრიტიკებს გერმანელ ავტორს ჰიმელშტერნს, რომელიც რუსეთის შიმშილის ძირითად მიზეზად „ზნეობის სიმცირესა და უტაქტობას“ თვლის, და ასახელებს შიმშილობის ძირითად მიზეზებს: ბუნების პირობებს, გზებს, ეკონომიურ მდგომარეობას, პოლიტიკურ წყობას ქვეყნისას¹. მეველე თვლის, რომ სახელმწიფო მოღვაწეს — მეფეს თუ პრეზიდენტს — უადრესად მაღალი შეგნება, ჭკუა და სინდისი მოეთხოვება, რადგან „ყოველი შეცდომა და შეცოდება ერის წინაშე მთელის თავის სიმძიმით უმთავრესად მას დაატყდება თავს“².

¹ „ივერია“, 1893, № 136.

² „ივერია“, 1893, № 78.

ამაზე მიუთითებს, მაგალითად, იმ სტატიაში, რომელიც სერბი-ის კაბუჯი მეფის ალექსანდრეს მიერ ძალაუფლების ხელში ნაადრევად აღებას უძღვნა.

სოციალური უსამართლობით გულნატკენი დ. მიქელაძე, ბუნებრივია, ეძებს საიმედო გზებს უფრო გონივრული წყობი-ლებისაკენ.

მეველე მომხრეა დეცენტრალური მმართველობისა, „რო-დესაც ქვეყნის თვითოეულ ნაწილს მინიჭებული ექნება თვით-მართველობა“¹, და აქებს ამერიკას, შვეიცარიასა და ინგლისს, რომელთაც ასეთი პრინციპი აირჩიეს. ისევე, როგორც ლონ-დონსა და პარიზში ბევრი უკეთესა ექიბია, მაგრამ ინდოეთსა და ტონკინში ურჩევნიათ უარესი, ოღონდ ადგილობრივი, — ასე-ვეა მმართველობის საკითხიცო, და ასეთი დემოკრატიული პრინციპი მმართველობისა მუდამ უპირატესად მიაჩნია ჩვენს დაუღალავ მოღვაწეს.

როცა 1894 წელს ანარქისტმა კაზერიომ ხანჯლით მოკლა საფრანგეთის მესამე რესპუბლიკის პრეზიდენტი სადი კარნო. მეველე იმავე დღეებში უძღვნის ამ ფაქტს წერილს და თუმცა ჯერაც არ იცის მკვლელის მრწამსი, ვარაუდობს, რომ ეს აქნე-ბოდა ანარქისტი, მომხრე პრინციპისა: „რაც უარესია, ის ჯო-ბია“. მართალია, კარნოს მმართველობა აღინიშნება მძიმე კრი-ზისით, რეპრესიებით მუშათა მოძრაობას წინააღმდეგ, და ამ-დენად მეველის მიერ პრეზიდენტის გამოყვანა ღირსეულ მო-ღვაწედ გაუგებრობაა, — მაგრამ საყურადღებოა მისი მაჯელო-

¹ „ივერია“, 1874, № 78.

ბა ანარქისტებზე, რომელთა წყალობითაც, „არავინ იცის, როდის სად ააფეთქებენ, სად დასცემენ ხანჯალს...“

საფრანგეთს აქვს პრესა, აზრის გამოთქმის საშუალება. რისთვის დასჭირდათ ხანჯალი და დინამიტი?

დიდად საგულისხმოა და გონივრული მეველის მსჯელობა ქვეყნის მმართველობის ფორმებზე. მისთვის ნიმუშია საფრანგეთი და ლინკოლნის ამერიკა, როცა პრეზიდენტი კი არ არის მთავარი, არამედ „ერის ერთიანი მკვიდრი ტაძარი“. ხოლო იქ, სადაც სათავეშია ერთმართველი, მეფე, ტირანი, იქ, პირიქით, ქვეყნის შენობა კი არაა მთავარი, არამედ კერპი, პიროვნება, რომელიც განაგებს ერის ბედსა და უბედობას. „აქ თვითონ კაცი ფასდება და არა დაწესებულება“¹.

მეველეს აღაშფოთებს ანარქიზმი, ეს „ახალი დროის ვეშაპი“, რომლის დევიზია „ყველაფერი, გარდა წესისა“, და სასტიკად კიცხავს ფრანგ ანარქისტს ვალიანს, რომელმაც პარლამენტი ააფეთქა, ამასთან გმობს ჯუნგლების კანონს ადამიანთა საზოგადოებაში და საერთოდ სისხლით მოპოვებულ ბატონობას დღემოკლედ თვლის².

მეველე გმობს ანარქისტებს, არა იმიტომ, რომ არსებული წყობილება იდეალურად მიაჩნია, არამედ იმიტომ, რომ მათი გზა მრუდე და უნაყოფოა.

მეველე გრძნობს ახალი სიოს ქროლას, და თუმცა შორს დგას მეცნიერული სოციალიზმის გაგებისაგან, უდავოდ აღელვებს მშრომელთა ბედი. „ახლანდელი კაპიტალისტურ წეს-

¹ „ივერია“, 1894, № 126.

² „ივერია“, 1893, № 261.

წყობილების გაუქმება, ევროპის ბურჟუაზიის გაქრობა და მუშათა უფლებების დამკვიდრება და კიდევ სხვა მრავალი განსაფრანგეთის პრეზიდენტის მკვლელის ბასრ ხანჯალს შეუძლია?“¹

მკვლელობა ვერაფერი საბუთია მოძღვრების ქეშმარიტების დასამტკიცებლად. არა, ეს უსამართლო და მრუდე გზაა. უბრალოდ — მკვლელობაა; ერთმა კაცმა არ უნდა აგოს პასუხი საუკუნო უკუღმართობისათვის, — ასეთია მეველის აზრი, და ეს საღი კრიტიკა ანარქიზმისა, ამ „სრულიად წრეს გადასული ფანტაზიისა“².

დ. მიქელაძის მრწამსის კანონზომიერებას მოწმობს მისი გამოხმაურება გამოჩენილ ადამიანთა ბედზე.

მეველე წერს ქართულ თეატრზე და „დროების“ იმავე ნომერში ბეჭდავს ვრცელ სტატიას ყიულ მიზლებზე, „დიდს ისტორიკოსზედ, მხურვალე პატრიოტზე, ჩინებულ კაცზე“³, ყველაზე მეტად კი ხიბლავს ამ სწავლულის მისწრაფება თავისუფლებისაკენ. „სამოცდა ჩვიდმეტს წელიწადს უსამართლობასთან ბრძოლას ვერ მოეტეხა მისი მძლავრი ბუნება. ის დღესაც ისეთი აღმტაცი დამკველი იყო ადამიანის უფლების ამალღებისა, ნამდვილი თავისუფლებისა და ქეშმარიტებისა, როგორც ამ ორმოცი, ორმოცდა ათი წლის წინეთ“.

მიშლეს სიკვდილს მეველე ხსნის ორი მძიმე დარტყმით. რაც ამ დიდმა პატრიოტმა განიცადა პირველად პრუსიის მიერ

¹ „ივერია“, 1894, № 126.

² „ივერია“, 1894, № 127.

³ „დროება“, 1894, № 412.

საფრანგეთის დამარცხების, მეორედ კი — მონარქიული შე-
თქმულების გამარჯვების გამო.

მეველე მოკლედ და ნათლად მოუთხრობს ქართველ მკითხ-
ველს მიშლეს — ამ „გენიალური მოხუცის“ ცხოვრების ამბავს,
მის პროფესიონალობას სორბონში, სადაც მიიწვია ადამ მიცკევი-
ჩი და ედგარ კინე. „აქ ამ სამმა ჩინებულმა სწავლულმა თამა-
მად დაიწყეს ქადაგება კაცობრიობის განმაახლებელი აზრებისა.
ამ შკოლ.მ სამუდამოდ მოჰკვეთა ავტორიტეტი და ძალა ბევრს
ძველს კანონებსა და წესებს. აქ მოდიოდა მთელი ევროპა, რო-
გორც ერთ ღროს ათინას“...

მართლაც, წვრილბურჟუაზიული ისტორიკოსი, ჩვიდმეტ-
ტომიანი საფრანგეთის ისტორიის ავტორი მიშლე ცნობილია
თავისი ანტიკლერიკალური და დემოკრატიული იდეების ქა-
დაგებით. როცა უარი თქვა ნაპოლეონ მესამის ერთგულების
ფიცის დადებაზე, მას დაატოვებინეს კოლეჟ დე ფრანსი. მარ-
თალია, მიშლეს ფილოსოფია იდეალისტურია, კლასთა ბრძო-
ლას ის უარყოფს და არ იზიარებს კომუნისტურ იდეებს. მაგ-
რამ მისი შეუპოვარი ბრძოლა მონარქიის, კათოლიციზმისა და
მემამულეთა წინააღმდეგ ძვირფასი წვლილია, შეტანილი კა-
ცობრიობის ისტორიაში.

მეველე სწორად აფასებს „მის გამპირიას გონებას, საგნის
პოეტურ გამოხატულებას და უსაზღვრო სიყვარულს სამართ-
ლიანობისადმი“.

მეველე ვრცლად და აშკარა სიმპათიით ლაპარაკობს ხალ-
ხის ერთგულ მოღვაწეებზე, მაგალითად — სატირიკოს ანრა
როშფორზე, რომელიც ნაპოლეონ მესამის ყველაზე უფრო სა-

შიშ მტრად მიაჩნია; მის ბრძოლაზე, დუელეებზე, ჰიუგოს ამაო გამოქომაგებაზე და ახალ კალედონიაში გადასახლებაზე.

როგორც ვხედავთ, დ. მიქელაძე მთელი სიგრძე-სიგანით ეხება სოციალური უთანასწორობის საკითხს და მას საფუძვლად ეკონომიურ უთანასწორობას უდებს. „მთელი სოციალური ბრძოლა... მთელი ეს რევოლუციები, სახელმწიფო წესწყობილების გაუქმება და დანგრევა ყოველთვის ყოფილა გამოწვეული, უმთავრესად, ეკონომიური უთანასწორობის მიზეზით“¹, — ასეთაა მეველეს თვალსაზრისი, და ის არ ხედავს ამ მდგომარეობის დასასრულს, „სანამღი ადამიანის სინდისი და გონება ითმენს ქვეყნის ქონების უსამართლო განაწილებას“.

მეველეს, როგორც ნათელი გონების მოღვაწეს, კარგად ესმის, რომ „საცა ხალხი მატერიალურად შევიწროებული აღარ არის, მაშინ ზნეობითი და გონებითი მისი მხარეებიც სანუგეშო სურათს წარმოადგენს“². ამიტომ გაზეთ „კავკაზის“ მოწოდების საპასუხოდ ის მოითხოვს ქართული ადგილ-მამულები რუსეთის კაპიტალისტებს კი არ მიჰყიდონ, არამედ გამოიჩინონ ინიციატივა, თვითონვე დაამუშაონ, დაიწყონ წარმოება, და იმის ნაცვლად, რომ „სიმდიდრე გარეთ გავიდეს, მან ერთი ჯიბიდან მეორეში გადაინაცვლოს“.

სტატიაში „ზოგიერთი აზრები ჩვენს მდგომარეობაზე“ დ. ზურაბისშვილი (მეველე) ანალიზს უკეთებს წარსულსა და აწმყოს³. ნათელი და საქმიანია მისი მსჯელობა. თუ საზოგა-

¹ „ივერია“, 1893, № 198.

² „დროება“, 1874, № 423.

³ დროება“, 1872, № 19.

დოებამ სადმე მიაღწია იმ დონეს, როცა მისი ყოველი წევრი ნორმალურად იკმაყოფილებს მოთხოვნილებას, ხოლო მისი ზნეობა და გონება იქამდე, ამაღლებულან, რომ სხვას არ უშლის, ასეთ ხალხს ნეტარი ეთქმის. მაგრამ „კაცობრიობის გონების სასირცხლოთ, ამ მდგომარეობამდის არ მიუღწევია ჯერ მას“. ზოგი ფუფუნებისათვის იბრძვის, ზოგი ლუკმა პურისათვის. მაგრამ მოწინავე ძალები სულ მეტ მომზრეს იძენენ. მსხვერპლი უკვალოდ არ იკარგება, თუმცა ჯერ კიდევ დიდი ბრძოლაა საჭირო, რომ „მივალწიოთ იმ მიზნამდის, რომელსაც შორიდგან აღტაცებით შევცქერით“¹. როგორ ესმის მეველეს ეს მიზანი? — „ხალხის ნივთიერ ზნეობითი და გონებითი საჭიროების სრულად დაკმაყოფილება“. რა გზას ხედავს სამამსოდ ჩვენი მიმომხილველი? — პირველ რიგში განათლებას (აქ მოჰყავს პრუსიის მაგალითი), მერე — მეურნეობის მოწესრიგებას. „მხოლოდ განათლება და მეურნეობის წარმატება შეჰქმნის ხალხს გონიერათ, სამართლიანათ და ძლიერათ“. სხვა რეცეპტები მას არ სჯერა. ცხადია, ის არ გვთავაზობს აქ რევოლუციას (თუმცა სწორედ იმავე წელს იმავე გაზეთში დიდი ხალხით ჩამოაგდებს სიტყვას ბასტილიის დაცემაზე!). მაგრამ იმ დროის ჩვენს სინამდვილეში ასეთ საწყისებზე მითითება უდავოდ იმავე რევოლუციის საქმის სამსახური იყო. მეველე საგულისხმო საქმეს ითხოვს: სოფლად წასვლას, სოფლის მიხედვას. თუმცა ძნელია ქალაქის სახელის გაცვლა მყუდრო სოფელზე, მაგრამ „ვისაც განათლებული ეწოდება, იმას პირველად პ რ ი ნ ც ი პ ი უნდა ჰქონდეს სახეში... პატიოსანი კაცი მოვალეა საზოგადო-

¹ „დროება“, 1872, № 19.

უბას პირობებზედ ამაღლდეს, რომ წავიდეს იმ გზაზედ, რომელიც მეტს ნაყოფს მოიტანს ხალხისათვის, თუმცა მას არ შეხვდება ამ გზაზედ არც სურნელებით სავსე ბალები, არც სამოთხის ხმით მოძღვრალი ფრინველები“.

ქვემოთ მეველე ედავება იმ ნებიერ ბატონებს, რომლებიც მის წინადადებას უდავოდ ექვით შეხვდებოან, „ლამაზ სიტყვათა მქადაგებელთ და ულამაზო საქმეთა მოქმედთ“, რომელთაც საკუთარი საქმე ზეცამდე აპყავთ: მას არონიაშიც იგრძნობა გულშემატკივარი მამულიშვილი, რომელიც ერის წინსვლის გზებს ეძებს.

მეველე ერთი პირველიაგანია, რომელიც ხმას იმაღლებს ჩაქვის ჩაის პლანტაციების სასარგებლოდ — ნათლად ხატავს მაღლაანი ქართული მიწის სიუხვეს, კიცხავს ურწმუნოებს, თავს ესხმის იმ თანამემამულეებს, რომლებიც მხოლოდ კანცელარიებში ეძებენ ადგილს და ჭეროვან ყურადღებას არ აქცევენ ქვეყნის სიმდიდრის ნამდვილ წყაროებს: „ჩვენ ვამბობთ: მარტო კანცელარიებში და სამსჯავროებში კი არ არის საჭირო გვყავდეს კაცები, არამედ საჭიროა გვყავდეს ყველგან, სადაც კი მზადდება ქვეყნის აზრისა და ღონის მიმნიჭებელი გარემოებანი“. აქვე მოითხოვს გაიგზავნოს რამდენიმე ახალგაზრდა ჩინეთში, შეისწავლონ ჩაის მოვლა-მოყვანა და გაავრცელონ ეს ფრიად ძვირფასი კულტურა საქართველოში. მართალია, ეს ძნელია, — დასძენს მეველე, — მაგრამ „ახალგაზრდობაც იმისთვის არის, ძნელსა და მძიმე საქმეს მოერაოს, თორემ მსუბუქი საქმისათვის ხომ მოხუციც ვარგა!“¹.

¹ „ივერია“, 1893, № 180.

მკითხველები ინტერესით შეხვდნენ მეველის მოწინავე სტატიას. „ივერია“ მიიღო წერილები, რომელთა ავტორები ჩინეთში წასასვლელად საჭირო ხარჯების უქონლობას ჩიოდნენ¹. მეველე მზადაა ხელის მოწერიტაც კი დაფაროს ეს ხარჯები.

შექმნილ ვითარებაში, როცა „კავკაზი“ თავის „განუშორებელ ოცნებად“ თვლიდა მამულების შესყიდვას, უფრო სასარგებლო გამოსავლის პოვნა ძნელი იყო. მეველის მოკლე და ბევრის მთქმელი სიტყვით, თუ მამულს განაგებს უცხო ტომი. მიწა იფიტება, მუშახელი იქცევა მათხოვრად, ან უბრალო მანქანებად, რასაც კაპიტალისტი თავის ნებაზე ატრიალებს. და აგჱ ასეთ დასკვნამდე მიდის: „რამდენათ ნამდვილს ღონისძიებას ვიხმართ იმ ტალღის შესაჩერებლად, რომელიც ჩვენ მოგველის შთაგვნთქას, იმდენად უშიშრათ იქნება ჩვენი ბედი“.

მეველე არაერთხელ აჩერებს მკითხველს ყურადღებას საქართველოს სულიერ და ბუნებრივ სიმდიდრეზე, რომელთაც უპირისპირებს მის მატერიალურ სიღარიბეს და დაჩაგრულ მდგომარეობას. მისი თქმით, „ქართველ კაცს შეუძლიან სულ აღვილად თავისსავე ქვეყანაში იშოვოს, მოიყვანოს და გააკეთოს ყველაფერი, რაც დღეს გარედან მოაქვს“². მაგრამ მან ისიც კარგად იცის, რომ საამისოდ საჭიროა ცოდნა, — ცოდნა არა ისეთი, სალონებში რომ გამოადგება, არამედ ნამდვილი, პრაქტიკული, რაც აუცილებელია ერის წარმატებასათვის. ამასთან მეველე ებრძვის გადაშეტებულ პირად მოთხოვნებს და მოითხოვს მეტ ზრუნვას ქვეყნის საკეთილდღეოდ.

¹ „ივერია“, 1893, № 184.

² „ივერია“, 1893, № 144.

მეველე შესანიშნავ მერმონს უწინასწარმეტყველებს საქართველოს მეურნეობას, არ თაკილობს თუნდაც ევროპული გუთნების გამოფენაზე წერას და მოითხოვს აგრონომიული განათლების წინ წაწევას. ქვეყნის ღონის უთანაბრო განაწილებად მიაჩნია ის, რომ ერთ აგრონომზე ორმოცდაათი იურისტი მოდის, და მოითხოვს ცოდნის მიღება ხალხის საჭიროებას შეეფარდონ.

დ. მიქელაძე არ არის კმაყოფილი სიმდიდრის ახლანდელი განაწილებით და მოითხოვს მეურნეობის გონივრულად წარმართვას, საქართველოს სიმდიდრის ისე გამოყენებას, რომ ხაზინასაც შემოსავალი მისცეს და ხალხიც მადლიერი იყოს. როცა რუსეთის მეურნეობის პირველი მინისტრის ერმოლოვის საქართველოში გამომგზავრება ცნობილი გახდა, მეველემ საგანგებო სტატიაც დაახვედრა მას „ივერიაში“, სადაც ამგვარ იმედს გამოთქვამს, თუმცა იმასაც აღნიშნავს, დღემდე ასეთი იმედები მუდამ გვიცრუვდებოდაო. გვიან იმასაც აღნიშნავს, გლახს მინისტრამდე არავინ მიუშვებს და თავადაზნაურობას კი შეიძლება სათანადო სინდისი არ აღმოაჩნდესო.

მეველე უქადაგებს გლეხებს ბანკის საჭიროებას, რაც ექაპლოატატორთა ბრწყალებითაგან ოდნავ მაინც იხსნიდა მათ, და ისევ კიცხავს „სერთუკ გადაცმულ“ მოხელეებს, რომელთაც სამშობლოს ცარიელი დაპირების მეტი არაფერი მისცეს, ბანკის საქმეშიც კი არ ეხმარებიან ხალხს. „სირცხვილია, ყმაწვილებო, სირცხვილი!“ — ამ სიტყვებით ამთავრებს მეველე ერთ თავის ფელეტონს.

საერთოდ, მეველე არაერთხელ გამოსულა ბანკის სასარგებლო აგიტაციით.

ყველგან, სადაც კი ეკონომიურ ცხოვრებას ეხება, მეველე მას სოციალურ ასპექტში შლის, ყოველ საჭირო შემთხვევაში ებრძვის მოხელეთა თვითნებობას და მოაგონებს თავდასულ მჩაგვრელებს, რომ „მოხელე დადგენილია ქვეყნისთვის და არა ქვეყანა მოხელეთათვის“.

მეველე ნიღაბს ხდის მჩაგვრელთა ვერაგულ საცრუეს, ხალხის მოტყუების აღმაშფოთებელ ფაქტებს და ხშირად იმველებს ხატოვან მაგალითებს.

ფრანგებს აქვთ ახირებული ჩვეულება: აღდგომის წინა დამეს ბუხარში ჩუმად ჩადებენ ბავშვის ფეხსაცმელს: ღმერთი საჩუქარს ჩადებსო, და როცა ბავშვები იძინებენ, თვითონვე დებენ ამ საჩუქარს. დილით ბავშვები იღვიძებენ და უხარიათ: ღმერთმა საჩუქარი გამოგვიგზავნაო. ასე ემართებათ არა მართო ბავშვებს, არამედ მოზრდილებსაც; წლიდან წლამდე გულხელდაკრეფილი იცდიან, როდის გამოუგზავნის ღმერთი წყალობას, იმის ნაცვლად, რომ შრომით და ბრძოლით მოიპოვონ!

ამაზე უფრო სურათოვნად ჩაგრული ხალხის ბედის დახატვა ძნელია, და ამგვარი სტატიებით მეველე თვალს უხელს დაბრმავებულ ადამიანებს.

დ. მიქელაძე ხალისით ეხმაურება ქართული სალიტერატურო ფონდის დაარსებას¹, რაც განახორციელეს ეკატერინე გაბაშვილმა და მისმა მეუღლემ. მისი მიზანი იყო ახლად ფეხადგმულ მწერალთა დახმარება. ასეთი ინიციატივით გახარებულ მეველეს მაინც აფიქრებს ერთი რამ: ვაი თუ ამ საზოგადო და კეთილშობილურ საქმესაც გამოჰყვეს „უკეთურება და უური“,

¹ „ივერია“, 1894, № 30.

დაიწყო „დას-დასობა და ინტრიგები და აირიოს მონასტერი“. მეველე სულაც არაა პესიმისტი, მაგრამ მწარე სინამდვილე და მრავალი წლის გამოცდილება ქმნიან წესით საფრთხისათვის რეალურ ნიადაგს.

მეველე მიესალმება საზოგადოებაში „ენერგიით სავსე, გამჭრიახი კაცების გამოჩენას“, „შეერთებული შრომით საქმის გამოწყობას“, რისი ნიმუშიცაა კიათურის შავი ქვის წარმოების სწორად დაყენება, „კახეთის ვენახის პატრონთა ამხანაგობა“ და სხვა მრავალი, — რადგან ფიქრობს, რომ ეს იხსნის ხალხს დამღუპველი შუაკაცების, ჩარჩების, საქმოსანთა ყვლეფისაგან. ეს მიაჩნია ჩვენი ეროვნული ენერგიისა და გამჭრიახობის საბუთად, გამოფხიზლების ხანად ჩვენი ერის ცხოვრებაში.

მეველის სოციალ-პოლიტიკური კრედო შეიძლება ნათლად წარმოვიდგინოთ მისივე ცნობილი სიტყვებით: „ცხოვრების კანონს ხუმრობა არ უყვარს, იგი უღმობელია და ათჯერაც რომ გაჯავრდეთ და განრისხდეთ, თავის მიმდინარეობას მაინც არაფრისთვის არ შესცვლის“.

ამ რწმენით ემსახურებოდა მეველე წლების მანძილზე თავის საყვარელ სამშობლოს.

მეველე — საერთაშორისო მდგომარეობის მიმოხილველი

დ. მიქელაძე თავისი დროის საერთაშორისო მდგომარეობის ნიჭიერი მიმომხილველია. მისი მრავალრიცხოვანი სტატიები ამ თემაზე განირჩევიან პროგრესული თვალსაზრისით, ანალიზისა და განზოგადების უნარით. ეს სტატიები იმდენადვე ორიგინალურნი არიან, რამდენადაც აქტუალურნი.

მეველისათვის მისი თანამედროვე საერთაშორისო ურთიერთობა ცოცხალი ილუსტრაციაა მისივე სოციალ-პოლიტიკური შეხედულებებისათვის, იგი ცოცხალი დაკვირვების საფუძველზე. ისტორიის გამოცდილებაზე დაყრდნობით აღგენს თავის თვალსაზრისს და აკეთებს სათანადო დასკვნებს.

მაგრამ დ. მიქელაძის საერთაშორისო მიმოხილვები თავისთავად გარკვეული ღირებულებების დოკუმენტებია და მათი ანალიზი საინტერესო სურათს გვაძლევს „დროების“ კორესპონდენტის კონცეპციაზე. სიცხოველე, აქტუალობა და პირადი დაკვირვება თავისი დროის დიდ ისტორიულ მოვლენებზე ხსენებულ დოკუმენტებს ორმაგ მნიშვნელობას ანიჭებენ.

მეველე, როგორც მოღვაწე და მოქალაქე, არც ისტორიულ მოვლენათა შეფასების საქმეში ჩამორჩება თავისი დროის დი-

პლონატებს. „ვეგობთ და გვძაგს ყოველი უმადურობა და უგულლობა. ჩაიდენს ამას ერთი ადამიანი თუ მთელი ქვეყანა“, — შესძახა ერთ სტატიაში, რომელიც მიუძღვნა თავის კამათს ერთ ძველ პოლიტიკოსთან. ეს პოლიტიკოსი გაუცხარებია იტალიის „უმადურობას“ საფრანგეთისადმი, რომელმაც თითქოს იხსნა იტალია ნაპოლეონ მესამის მახვილით. მეველე ფხიზელია. „ნაპოლეონმა იტალიას განთავისუფლებაში გვარიანი ქრთამი აართვა: ჩამოაცალა სავოია და თვით იტალიის ნამდვილი განმათავისუფლებლის (ხაზი ჩვენია. ე. მ.). გარიბალდის სამშობლო ნიცა“; ხოლო 1848 წელს კი ფრანგებმა „არ ითაკილეს იტალიის რესპუბლიკის დამხობა“. ამის შემდეგ გასაკვირიც არ არის, რომ იტალიამ თავისი ეროვნული ინტერესებისათვის კავშირი შეკრა გერმანიასთან. მეველე მახვილანალიზს უკეთებს მოვლენებს და არჩევს განსხვავებას ცალკეული ადამიანისა და ერის „უმადურობას“ შორის, რასაც საფუძვლად ისტორიული აუცილებლობა უდევს.

დ. ზურაბისშვილი ნათელ ანალიზს უკეთებს ევროპის ქვეყნების პოლიტიკურ და საერთაშორისო მდგომარეობას, გამოაქვს თავისი დასკვნები და ვარაუდები. მაგალითად, წერილში „პეტერბურდიდან ჟენევაში“, რგონებს ჰაუგოს სიტყვას პარლამენტში, — გერმანელებს რომ მადლობას უხდის საფრანგეთის ტირანის ჩამოგდებისათვის და სამაგიეროს გადახდას ჰპირდება გერმანიას. თავის მხრივ დ. ზურაბისშვილიც წინასწარმეტყველებს პრუსიის დამპყრობელთა დაცემას, ხალხის გადარჩენას, და მოგვაგონებს ცნობილ თქმას: „რომელი აღმალდეს მახვილითა, მახვილითა წახდეს იგი“. დრომ გაამართლა დროებებს კორესპონდენტი.

უცხოეთს მყოფი დ. მიქელაძე შენატრის შევიცარას, თავისუფალ ქვეყანას, სულ შვიდი საათის სავალ გზაზე რომ ძევს, მაგრამ აღარ ჰყავს მეფეები, ჰერცოგები... „მართლაც, სასიამოვნო არის ასეთი ქვეყნის ნახვა, სადაც კაცის ნიქსა სრული თავისუფლების ასპარეზი აქვს“; მაგრამ მეზობლება „ბარე ორ დღეს ვერ მოესწრებიან იმ დღეს, რაც მას აქვსო“.

დ. მიქელაძე აღტაცებას ვერ ფარავს: „სულ ასი ათასი მცხოვრებია, და რა მშვენივრად მოუერთავს თავისი ბედით!“

„როდესაც ვაკვირდები ენევის რესპუბლიკის ცხოვრებას, სულ უფრო და უფრო ვრწმუნდები, რომ ხალხის სიპატარავე რაცივნით არ უშლის მას გააწყოს თავისი ცხოვრება განათლებულად, სამართლიანად და მხიარულად“¹.

გვიან დ. მიქელაძე მწერლის ალლოთი ხატავს პარიზის ცხოვრებას: „შესანიშნავი ისაა პარიუში, რომ ვერც ერთი დიდი ამბავი ერთს და ბევრი ორ დღეს ვერ გასცილდება, ჰყარავს თავის ინტერესს და ავიწყება პარიუში, როგორც ცხოვრების ოკეანეში, თქვენ ვერ შეჩერდებით, ვერ მოსვენებთ. მუდამ მოძრაობა, მუდამ სხვა და სხვა ახალი შემთხვევაა. აი, ამას ჰქვიან სიცოცხლე! აქ კაცის ტვინს ვერ გაყინავს მყუდროება...“²

მუდამ წინდახედული და დამაფიქრებელია დ. მიქელაძის მსჯელობა შინაურ თუ საერთაშორისო საკითხებზე. აი, როგორ იწყებს თავის ერთ-ერთ კორესპოდენციას პარიზიდან: „საზოგადოების განსჯის საგნად, მის მბრძანებლადაც კი ხშირად ხდე-

¹ „დროება“, 1872, № 45.

² „დროება“, 1873, № 16.

ბიან არა ღირსეულნი, არამედ გაიძვერები. ჩვენს ღროში კაცის აღმადლებსათვის საზოგადოებაში მიუცილებელ პირობათ არც პატიოსნების, არც უანგარობისა, არც სიმტკიცისა და ხშირად არც გონიერების ქონება არ ითვლება. თამამად შეგიძლიათ: წინააღმდეგი თვისებებითაც შესანიშნავი და გამოჩენილი კაცი შეიქნეთ, თუ კი თქვენ „ცხოვრების ცოდნას“ რომ ეტყვიან — ის გაქვთ. თქვენ უნდა იცოდეთ საზოგადოების მაჯის მდგომარეობა, მისი ძლიერი და სუსტა ძარღვი და მაშინ დარწმუნებული იყავით, რომ რაც ომში არ შეხვოდეთ, გამარჯვებული გამოხვალთ“¹. ყოველივე ამის შემდეგ მეველე — კულაშელი დაასკვნის: „მაშ რით უნდა ავხსნათ, რომ ამ დიდებულ, მოწინავე ხალხს (ფრანგებს. ე. მ.) უდგას თავში ისეთი კაცა, როგორც უფ. ტიერი, რომლის ტვინი ენაშია წასული?“

ეს გარკვეული საზოგადოებრივი ურთიერთობის, პერიოდის, კლასის დახასიათების მშვენიერი ნიმუშია. გვაგონდება ზომიერკოს მსჯელობა კერენსკიზე: ამ მეორე დიდ ისტორიულ მყვირალას აღზევება შედეგი იყო იმ კლასის უბადრუკობისა, რომელმაც სახელმწიფოს მეთაურის პოსტზე ასეთი უბადრუკი პოზიორი წამოსწია.

დ. მიქელაძე სწორად შენიშნავს, რომ თავისუფლების რაინდის, ლომკაც დანტონის ადგილი ახლა მასხარა ტიერს უჭირავს, „ნამდვილი ბურჟუის ტიპს“, რომელიც ჟამთა ვითარების წყალობით ახლა თავისი ხალხის წარმომადგენელია! ყოველივე ამას ის წერს პარიზიდან, ტიერის დედაქალაქიდან!

¹ „ღროება“, 1873, № 1, სტატია გამოქვეყნებულია კულაშელის ფსევდონიმით.

თანამედროვეობაზე დაკვირვებული მოღვაწის ალლო იგრძნობა დ. მიქელაძის ირონიულ შენიშვნებში: ბუდაურები დაიხოცნენ, ვირებს დარჩათ მოედანო; გაზეთები ზედიზედ აცხადებენ, დღეს ვისთან მიირთმევს სადილს ტიერო; უფალ ტიერს ფეხი წაუცდაო, და ა. შ. მისი მოხდენილი თქმით, ამ „პოლიტიკური სუბიექტის“ ბიოგრაფია და საფრანგეთის უბედურება ნახევარი საუკუნის მანძილზე გადაჯაჭვულიაო: „არც ერთი მავნებელი და დამამცირებელი საქმე არ მომხდარა ისე, რომ ტიერს შიგ მონაწილეობა არ ჰქონდეს. ჯერ ხალხს უღალატა, ლუი ფილიპეს მინისტრის პოსტი დაიკავა, მერე გახდა მილიონერი, ხაზინის ფული გაფლანგა, პალატას თავი ცრემლით შეაბრალა; პარიზის ბარიკადებზე 50 000 ფრანგი გაჟლიტა, და ახლა ეს თავისუფლების ჯალათი იმავე ხალხის ბედს უძღვის, როგორც კანონიერი სარდალი! რაც შეეხება მის „საფრანგეთის ისტორიას“, ამ წიგნის კითხვას ლუი XVI-ის ლაქიის მემუარების კითხვა ჯობია ათასწილად!“ საერთოდ, დ. მიქელაძე „ჰატარა პრეზიდენტისაგან“ კარგს არას მოელის.

კომუნის ჯალათის უკეთესი დახასიათება სიტყვის ოსტატსაც გაუჭირდებოდა.

რამდენიმე თვის შემდეგ დ. მიქელაძე ტიერს ადარებს დონ-ჟუანს, რომელიც ერთდროულად რამდენიმე ქალს ეფიცება ერთგულებას, და დაასკვნის: „ამ უკანასკნელ დროს ისეთი ფეხი მოიდგა რესპუბლიკურმა გრძნობამ საფრანგეთში, რომ ბევრი შიში და ეჭვი არ მართებს კაცს მომავლისათვის“¹.

შემდგომაც დ. მიქელაძე მზარდამზარ მისდევს ქვეყნის მა-

¹ „დროება“, 1873, № 13.

ჯისცემას. შეშფოთებით ლაპარაკობს მონარქისტების ხრიკებზე, პროგრესული გაზეთების დახურვაზე, აუტანელ შრომის პირობებზე; შლის თანმიმდევრულსა და სრულ სურათს საფრანგეთში არსებული რთული პოლიტიკური ვითარებისას.

ყოველივე ეს საყურადღებოა იმიტაც, რომ თვით კორესპონდენტი ცოცხალი მოწმეა იმისა, რაზედაც წერს, ესწრება საუბრებს, უსმენს გამოსვლებს, შედის ნაციონალურ კრებაში და ა. შ. მან ნახა, როგორ ალტაცებით მიიღო კონსერვატორიის დარბაზში პარიზმა „პატარა მოხუცი“. რომლის პატივმოყვარეობა დაკმაყოფილებული იყო; მაგრამ მეველეს არც ის რჩება შეუნიშნავი, რომ ეს ალტაცება „რესპუბლიკა“სადმი თანაგრძნობის ნიშანი იყო და არა ტიერის სიყვარულისა“.

დ. მიქელაძე იქვე გამოხატავს თავის აზრს — და ფრანგი ხალხის აზრს მარშალ ბაზენზე, რომელმაც გაყიდა სამშობლო, როცა მეცში გერმანიას დანებდა, და შენიშნავს, რომ ტაერი იცავს მას დახვრეტისაგანო.

ამრიგად, „კულაშელი“ სავსებით კომპენტენტურად, ნაცადი დიპლომატიისა და მწერლის სერიოზულობით იტყობინება პარიზიდან საფრანგეთის ამბებს. მომდევნო წერილებშიც იმავე აზრს ავითარებს და ყველგან ვარაუდობს: რესპუბლიკა გაიმარჯვებსო.

მეველე სალსა და საქმიან ცნობებს აწვდის ქართველ მკითხველს იმ ამბებზე, რაც კომუნას მოჰყვა: შეშფოთებულიაო საფრანგეთი გამბეტას, „ამ ექს-დიქტატორის“ ქადაგებით, მაგრამ ალტაცებული — მისი ორატორული ნიჭით; მისი ეშინიაო „ტიერჭინკას“, როგორც გარიბალდის უწოდა კომუნის ჯალათს

1872 წელს. ალბათ მალე საფრანგეთის პრეზიდენტი იქნებაო, წერს მეველე უენევიდან. მართლაც, ლეონ მიშელ გამბეტას როლი დიდი იყო თავის დროზე, თუმცა მისი ვარაუდები არ გამართლდა და სიკვდილამდე ერთი წლით ადრე იძულებული გახდა გადამდგარიყო. თუ საფრანგეთის შემდგომი ისტორიის ფურცლებს გადავშლით, ვნახავთ, რომ ქართველი კორესპონდენტის მახვილი ალღო ჩვეულებრივ მართლდება ხოლმე. სიცხალი მოწმეა იმ ქვეყნის მღელვარებისა, რაც მაშინდელი მსოფლიოს ყურადღების ცენტრში დგას, და თუ სხვა ქვეყნებზე (ესპანეთზე, იტალიაზე, გერმანიაზე და ა. შ.) „დროება“ იძულებულია „მოსკოვის უწყებები“ ან სხვა გაზეთები დაიმოწმოს, საფრანგეთში, ევროპის მღელვარე გულში, მას ჰყავს ნათელი გონების მოღვაწე, რომლის ცნობები საიმედო და დროულია.

1873 წ. 9 მარტს მეველე ასევე პარიზიდან იტყობინება საფრანგეთის ახალ ამბებს (შუა თებერვლისას): ედგარ კინეს დეპეშა მოუვიდა კასტელარისაგან, სადაც ესპანელი პატრიოტი წერდა: „ხვალ რესპუბლიკა გვექნებაო“. მეველე დასძენს: „ადვილად წარმოიდგენთ, რა მეხის დაცემა იქნებოდა ვერსალის მონარქიელებისათვის მეზობლათ რესპუბლიკის დაარსება. კოროლმა ტახტი დატოვა და გავიდა მადრადილგან“. იქვე ესპანეთის მაგალითზე წერს: ბევრნაირი მონარქია გამოსცადა, მაგრამ ვერც ერთმა ვერ მოუტანა მას სიკეთეო. შეესალმება მეფის გადადგომას, რესპუბლიკის წარმატებას. ის გმობს სავოიის პრინცს, იტალიელს, რომელიც დათანხმდა და მიიღო ესპანეთის მეფის გვირგვინი...

მსუბუქად, კალმის ერთი მოსმით ხატავს დ. მიქელაძე ნსო-ფლიო-ისტორიულ მოვლენებს, რომელთაც მის თვალწინ ჩა-იქროლეს.

„ივლასის რევოლუციამ იგრიალა ზაფხულის ქუხილსავით და შარლე მეათის მონარხია შვაფსავით ჩაიტანა გაბრაზებულ-მა პარიჟის ხალხმა“¹.

დ. მიქელაძე ყველგან ზიზღით ლაპარაკობს ნაპოლეონ III-ზე, რომელიც ღამით „ავაზაკურად დაესხა თავს და გამო-ახრჩო საფრანგეთისგან მიბარებული თავისუფლება“, რომელ-მაც ადამიანთა უთვალავი გვამი დაიგო კიბეზე და ასე ავიდა ტახტზე.

ადრეც და გვიანაც „დროებისა“ და „ივერიის“ ნიჭიერი მი-მომხილველი დასცინის ნაპოლეონ III-სა და მის მსგავს ჩლუნგ მმართველებს, რომლებიც უცხო ქვეყნებისათვის ზრუნვასა და ყალბი საზეიმო სიტყვების კორიანტელში ივიწყებენ საკუთარ ქვეყანას და ისე ხრწნიან, რომ მტერი ერთი წკიპურტის დაკვ-რით სრესს, როგორც გასრისა გერმანიამ საფრანგეთი.

ნაპოლეონ მესამეს მეველე „ჩვენი დროის განსწავლულ ფოკუსმაისტერს“ ეძახის და უპირისპირებს ამ მხრივ ბისმარკს, რომელიც თავის ქცევას ნიღაბს შაინც არ აფარებს.

მეველე სწორად ერკვევა თავის თანამედროვე საერთაშო-რისო ვითარებაში და მუდამ პროგრესული მოძრაობის მხარე-ზე დგას. ის არაერთხელ ესხმის თავს ნაპოლეონ მესამეს, ევ-როპის მონარქებს, რეაქციონერებს, კერძოდ — იმავე გენერალ ტიერს, რომელმაც ხალხი „ასე უმოწყალოდ გაჟლიტა სამოც-

¹ „დროება“, 1874, № 412.

დათურთმეტში, მაისის დღეებში¹. იმავე დროს მიესალმება პროგრესულ გაზეთს „La Avenir National“-ს, რომელიც მებრძოლი ხალხის დრტვიწვას ყველა სხვა გაზეთზე უკეთ ასახავდა, ვიდრე ამ გაზეთმა არ უღალატა პრინციპს და არ შეუთანხმდა ეერომ ნაპოლეონს. რესპუბლიკელების შეკავშირებამ ნაპოლეონთან გაუტეხა ამ გაზეთს სახელი, მან დაკარგა საუკეთესო კორესპონდენტები და მათთან ავტორიტეტიც. ქართველი პუბლიცისტის პოზიცია გარკვეულია: „არც ბურბონები, არც ბონაპარტისტები! განა კავენიაკს, ტიერს, ფაერს — ამ რესპუბლიკელებს — ნაკლები სისხლი დაუქცევიათ ხალხისა, ვინემ ნაპოლეონს?“²

დ. მიქელაძე არ უარყოფს ტიერის ჭკუასა და ზოგ ღირსებას, მაგალითად მონარქიის აღდგენის მომხრეთა წინააღმდეგ გაბედულ ბრძოლას, მაგრამ არსად არ ივიწყებს მისი ბრძანებით კომუნარების სისხლის დაღვრას, რომლის დროსაც ის ყრუ იყო; საბოლოოდ კი ასკვნის: „ისტორია იტყვის მასზედ, რომ ის არ ყოფილა დიდი პოლიტიკოსი, მას არ ჰქონია სახელმწიფო კაცების ნიჭი, რომელნიც აარსებენ ხალხის ბედნიერ ცხოვრებას“³. ბოლოს, როცა აღარ სჭირდებოდათ, „მონარქიელებმა ის გააგდეს, როგორც ჭინჭი. იქნებ ჭკუა ისწავლოს, მაგრამ ცოტა გვიანაა: 76 წლისაა!“

ტიერი გადაყენებულია, მის ადგილზე დგას მაკ-მაპონი, მონარქიელი, ახალი ტირანი, რომელიც 18 000 ამომრჩეველს „სისხლის გამოშვებას უპირებს“. დ. მეველეს პირადად უნახავს

¹ „დროება“, 1873, № 40.

² იქვე.

³ „დროება“, 1873, № 21.

იმ დღეების მღელვარე პარიზი, პირადად მოუხმენია ლუქსემბურგის ბალთან უბრალო ფრანგთა მსჯელობა „თავიანთ უბედურ სამშობლოზე“. ეს ორმაგ ფასს აძლევს „დროების“ კორესპონდენტის ცნობებს. „აი, რას ნიშნავს მაკ-მაჰონის ახალი დიქტატურა“, — შენიშნავს დ. მიქელაძე და უკვე ამ თქმაში იგრძნობა მისი მახვილი ალლო.

დ. მიქელაძე ირონიულად წერს: ტიერის შემცველი ახალი პრეზიდენტი (მარშალი მაკ-მაჰონი) „ჯერჯერობით მაგრად დგას თავის პირობაზედ: „ზნობითი წესიერების“ დასადგენათ მას საუმჯობესოდ უპოვნია, რომ მთელი დღე და ღამე ქვეითი და ცხენოსანი ჯარები ნაღარის ცემით ატაროს პარიზის ქუჩებში“, ჟანდარმებისა და ზარბაზნების დახმარებით მოიპოვოს ნდობა¹.

დრომ გაამართლა დ. მიქელაძის სიტყვები: მაკ-მაჰონი, იეზუიტთა კოლეჯის აღზრდილი რეაქციონერი სახელმწიფო მოღვაწე, ბონაპარტისტი, ალჟირის ყოფილი გენერალ-გუბერნატორი და ყირიმის ომის მონაწილე, რომელმაც თავი მხოლოდ იმათ ისახელა, რომ სედანში გერმანელებს დანებდა ასიათასიანი არმიით, — ადრე ვერსალელთა საზრდალი იყო და პარიზის კომუნის ერთ-ერთი ჯალათი. რას მიიღებდა მისგან ხალხი? ტიერის ნაცვლად პრეზიდენტად რომ დაინიშნა, მონარქიულად გადატრიალება სცადა, მაგრამ ხალხის მღელვარებას შეუშინდა და ვერ გაბედა. დ. მიქელაძეს უკვე პირველსავე დღეებში აქვს გამოთქმული ასეთი ვარაუდი: „საეჭვოა, რომ საფრანგეთმა გულგრილად აიტანოს თავისი უფლების შეგინებაო“. 1879 წელს მაკ-მაჰონიც გადააყენეს.

¹ „დროება“, 1873, № 22.

სწორედ რეაქციულ, ტირანულ ხროვას გულისხმობს დ. მიქელაძე, როცა ტიერისა და მონარქიული პარტიის შესახებ ლაპარაკობს, რომ ასეთ, ხალხსმოწყვეტილ, ცალკე პარტიას დიდი ხნით ბატონობა არ უწყევია, რადგან ხალხის საწინააღმდეგო საქმეს აკეთებსო.

როცა „ნაიმპერატორალ“ ნაპოლეონ მესამის სიკვდილს იტყობინება, დ. მიქელაძე იგონებს ცეზარის სიკვდილსა და ოქტავიანეს გაბატონებას, თან დაასკვნის, რომ ეს სასაცილო შედარებაა: „ამ ორ ისტორიულ პირს იმდენი მზგავსება აქვს ერთმანეთთან, რამდენიც ორბსა და იმ ყვავს, რომელიც წიწილებს სტაცებდა ჩემს ძიძასო“.

ამ ორიგინალურ ხუმრობას მოსდევს შენიშვნა ტიერზე, რომელმაც „უმალლესი მოსაზრების“ გამო შეაჩერა მოლაღატე მარშლის ბაზენის საქმე, და დ. მიქელაძე განაგრძობს: „კარგი იქნებოდა ეს „უმალლესი მოსაზრება“ მაშინ მოსვლოდა, როცა პარიზის ქუჩებში ორას-სამასობით ახვრეტიებდა თავის სალდათებსო!“

თავის დროზე მეველე იტყობინება, რომ ბაზენს მიუსაჯეს დახვრეტა, რაც პატიმრობით შეუცვალეს. საფრანგეთის შემარცხვენელი მარშლის დასჯით, შენიშნავს ქართველი მიმომხილველი, პრუსიის გვირგვინს წაეწერა არა „მეცის კაპიტულაცია“, არამედ „მეცის სარდლის მოსყიდვა“, რამაც შეარცხვინა ფრიდრიხ კარლი, თავი რომ ახალი ალექსანდრე. მაკედონელი ეგონა!

მეველე შენიშნავს, რომ სავსებით გამართლდა მისი ადრეული ვარაუდი ბაზენზე, მას შთამომავლობა ზიზლით მოიხსენიებს. „ღალატი და ისიც სამშობლოსი — ღმერთმა ყველა ჩვენს

მტრებსაც აშოროს! ოსტატი ჩიტი ორივე ფეხით გაებაო, ამა-
ზეა ნათქვამი“. მაგრამ ბაზენი დახვრეტას მაინც გადარჩა! მით
უარესი მისთვის, ვინც გადაარჩინა.

თვით იმ ფელეტონში, რომელიც ყველის ქარხნის საქმეს
ეხება, მეველე მკითხველს მოაგონებს ნაპოლეონ პირველისა
და ნაპოლეონ მესამის დაპირებას: ბედნიერებას მივცემთო
ხალხს, მაგრამ რა მისცეს? იმავე ხალხმა გააგლო ერთიც და მე-
ორიც, მერე ეს მაგალითიც შინაურ საქმეზე გადააქვს: ბევრი
საპატიო კაცი ბედნიერებას გვპირდებოდა, მაგრამ რა მოგვცეს?
სიტყვის თქმაც კი სირცხვილად მიგვაჩნიაო! — შწარედ შენიშ-
ნავს მეველე. ან ის, ვინც აცხადებს საქმის კაცების პირით, სა-
მართალს, კანონსა და ქვეშაპირებას ვაცავთო, იცავს კი ამას?
„რა მოგახსენოთ, — შწარე ირონიით შენიშნავს თვითონვე, —
კაცობრიობა ბედნიერების, სამართლიანობის და პატიოსნების
მთაზედ ჯერ არ არის და ან როდის იქნება — ეს უფალმაც არ
უწყის!“¹

განა ინგლისი განათლებას და სამართალს არ დაჰპირდა ან-
დოეთს და ოსმალეთი — კანდიელებს? მერე, რა მისცეს?
თურმე თავიანთი გამდიდრების მიზნით შედიოდნენ სხვა ქვეყ-
ნებში.

მეველე სერიოზულ საგანს ეხება: „კაცობრიობის სინდისი
და გრძნობა ჯერ არ მისულა ამ უმაღლეს ხარისხამდე. სანამდის
მაგალითს არ ვნახავთ, ჩვენ არ გვჯერა „უანგარო მზარუნველო-
ბაო“. ეს მჩაგვრელთა მთელი თაობებისათვის ნიღაბის ჩამოღ-
ლეჯაა, და განა ამ გმირობას ფასს უკარგავს ის გარემოება, რომ

¹ „ღროება“, 1873, № 46.

ამას აკეთებდა — სხვებთან ერთად — ერთი უპრეტენზიო ქართველი კორესპონდენტი, პატარა ერის ნიჭიერი შვილი?

გვიან, როცა ბაზენი გაიქცა და მონარქიის აღდგენის მომხრეები გაახარა, მეველე ისევ თავის პოზიციებზე რჩება: ამოა სიხარულია! ვინც სამშობლო გაყიდა, მას ერთი ჯარისკაციც არ მიემხრობა, ვერც ვერავითარ სარგებლობას ვერ მოიტანსო. მართლაც, ბაზენმა ესპანეთში გაატარა თავისი შერცხვენილი სიცოცხლის ბოლო ნაწილი, თუ შეიძლება სიცოცხლე ეწოდოს იმ მარშლის არსებობას, რომელმაც უბრძოლველად ჩააბარა იმტერს 173-ათასიანი არმია.

მეველის სიტყვის ირონიულ კილოშიაც იგრძნობა, როგორ გახარებულია ტირანთა მარცხით და როგორ ახარებს ხალხის ყოველი გამარჯვება. ერთ ცნობილ მოვლენაზე ის წერს: „ბონაპარტისტები ძლიერ ჯავრობენ, მაგრამ ცა, ვგონებ, არ ჩამოინგრესო“¹.

მეველეს შესწევს უნარი ალღო აუღოს დიპლომატიურ თამაშს, რაც გარკვეულ მიზანს ისახავს. მაგალითად, რუსეთთან საფრანგეთის გულითადი შეკავშირების მიზანს მეველე ხედავს ელზას-ლოთარინგიის დაბრუნებაში; არც მეფის რუსეთის გულწრფელობა სჯერა საფრანგეთის მიმართ (1893). მიმომხილველი გონებამახვილურად დასცინის საფრანგეთის მთავრობის მესვეურთ, რომელთა „ზრუნვის“ შედეგად რუსეთის პურს დაედო დიდი ბაჟი და ფრანგ მშრომელს ახალი სიძნელე დააწვა, თანაც ეს მოხდა, როცა საფრანგეთის პატრიოტებს „ჯერ

¹ „დროება“, 1873, № 15.

კიდევ ის ხელათმანები არ გასცვეთიათ. რომლითაც აღტაცებით ართმევდნენ ხელს თავის ძვირფას რუსის სტუმრებს“¹.

საერთოდ, დ. მიქელაძე შემთხვევას არ უშვებს, რომ არ დასცინოს მონარქებს. კერძოდ, ირონიულად ლაპარაკობს ავსტრიის იმპერატორსა და იტალიის მეფეზე. ორად ორ აღამიანზე, რომელთაც გულწრფელად დაიტირეს ნაპოლეონ მესამე, მონარქი, რომლისგანაც ორივე ქვეყანა შეუტრაცხოფილა და დამცირებული იყო.

მეველეს თითქმის არა რჩება უყურადღებოდ და შეუქაწავლელად ცხოვრების არც ერთი დარგი. ქვეყნის არც ერთი მხარე, არც ერთი ხალხი. ის მოხიბლულია ჩინელი ხალხის ნიჭით, მისი ძველი კულტურითა და წარმატებებით: „ჩინეთის დიადსა და საოცარ ხალხის მოძრაობასთან შედარებით ევროპის დიდი რევოლუციები, ომები და ცვლილებანი ნამდვილი ხუმრობაა, უსუსურ ბავშვთა თამაშია“. მაგრამ უამთა ვითარების წყალობით ჩინეთს ომს უცხადებს და სძლევს კიდევ ამ რაღაც ოცდაათი წლის წინათ ძილისაგან გამოფხიზლებული იაპონია. მეველე პატივს სცემს იაპონიის ხალხის ნიჭს, ენერგიასა და წარმატებასაც, მაგრამ, მისი აზრით, ისტორიას განაგებს რაღაც ღრმა შინაგანი კანონზომიერება, რასაც აღამიანი ვერ შეცვლის.

ჩინეთ-იაპონიის ომთან დაკავშირებით მეველე ფრიალ გონივრულ მოსაზრებებს გამოთქვამს, რთულ და ჭერაც გაურკვეველ საერთაშორისო ურთიერთობებზე. ის ვარაუდობს, რომ ციმბირი — მომავლის ხმელეთია; ამასთან დაკავშირებით რუსეთს ესაჭიროება დიდ ოკეანეზე გასასვლელი, ამიტომაც შე-

¹ „იერია“, 1894. № 38.

იძლება მან გატეხოს ინგლის-ამერიკის ძლიერება, დაიკავოს კორეის სამეფო და ა. შ.¹.

ჩინეთ-იაპონიის ომთან დაკავშირებით მეველე მოხდენილად შენაშნავს: ზოგი ქირი მარგებელია, იაპონიის წინსვლამ დააფიქრა და ძილსაგან გამოაფხიზლა ჩინეთი, რომელსაც სათავეში მხოლოდ ერთი წოდება ჰყავს და წინ არ იძვრისო. იგივე სამსახური გაუწიო რუსეთს ყირიმის ომმა, საფრანგეთს — სედანმა და მეცმა. ქვეყნის „დაძვრის“, გამოღვიძების, მეტი ამოქმედების თვალსაზრისით ომს აქვს რალაც მნიშვნელობა.

მეველეს, თვითონ მორწმუნე კაცს, აღაშფოთებს „მხოლოდ გარეგანად აღიარებული ქრისტეს რწმენა“; „თავით ფეხამდე შეიარაღებული ევროპა, ხმელეთსა და ზღვაზედ კაცთა სამტროდ აღდგინებული, განა ნიშანია ქრისტიანობისა?!“ ყველა შეპყრობილია საკუთარი ანგარებით, ყველა ერთმანეთს სამარეს უთხრის, და ევროპა, „ეს განათლებული და დაწინაურებული ქვეყანა... ოც მილიონამდე იარაღით შეჭურვილი კაცი, რომელმაც თვითონაც არ იცის, რა მოელას ხვალ“, — მხოლოდ გარეგნულად აღიარებს მოყვასის სიყვარულს. რამდენადაც გვახარებს ნიუტონისა და გალილეის, შექსპირის, დარვინის, ვაშინგტონისა და სხვათა ხსენება, იმდენად გვაშფოთებს კაცობრიობის მომავალი... ამ გაბედული მსჯელობით მეველე თავისი დროის მოწინავე მოღვაწეთა სიმაღლეზე დგას.

დ. მიქელაძეს სძაგს ყოველგვარი სიცრუე, დაფარულობა და ორპირობა თვით დაპლომატიურ სფეროში. გულახდილობა შეშვენის ცალკე კაცსაც და სახელმწიფოსაცო.

¹ „ივერია“, 1894, № 157.

როცა ლინკოლნის დროის ამერიკელთა გულახდილობი გაოცებულ ფრანგ მწერალს ლაბულეს ეხება, მეველე აშკარად დგება ამერიკელთა მხარეზე, საკუთარ დანაკლისზე რომ საქვეყნოდ წერენ: სიმართლის დაუფარავად თქმა, რაც უნდა სამწუხარო და საშიში იყოს, არასოდეს არ არის მავნებელი. მთავრობის გულახდილობა არ ავნებს ერს, არამედ აღძრავს სურვილს, რაიმე გარემოებით ეშველოს საქმესო.

მართალია, მეველეც არაა ბოლომდე თანმიმდევრული, ზოგჯერ ცდება ხოლმე ისტორიულ მოვლენათა და პიროვნებათა შეფასებაში. მაგალითად, ერთვან თანაგრძნობით იხსენიებს იმავე ავსტრიის იმპერატორს, რომელმაც თავის ქვეშევრდომ ჩეხებს, უნგრელებს, პოლონელებს, გერმანელებს და სხვ. შეუნარჩუნა ენა, ჩვეულება, თვითმმართველობა, და გმობს ჩეხებს, რომლებიც „მეტს ითხოვენ“ და შფოთავენო, რის გამოც ამართლებს მეფის მიერ სამხედრო წესების შემოღებას ბოჰემიაში. მუდამ თავისუფლების ქომიგს, მეველეს, აქ ვერ გაუგია მეფის „წყალობის“ ნაზღვილი არსი.

მეველის პოზიციის მცდარობას აქ გულუბრყვილობის ბეჭედი აზის და აიხსნება მხოლოდ იმით, რომ მცირე ერებთან თავის საკუთარი ენის შენარჩუნებამ და თვითმმართველობის მინიჭებამ მაინც მოხიბლა მისი პატრიოტული გრძნობა.

ბევრი რამ რჩება სათქმელი და სარკვევი მეველეზე, როგორც გონებაფხიზელ კორესპონდენტსა და საერთაშორისო მიმომხილველზე, მაგრამ თქმულითაც ნათელია მათი პროგრესული, მოწინავე, თავისი დროისათვის აქტუალური და დღეისათვის ძვირფასი ისტორიული ხასიათი.

ეროვნული საკითხი

„მე ერთობ დარწმუნებული ვარ, რომ საქართველო აღორძინდება“.

დ. მიქელაძე

სოციალ-პოლიტიკური ხასიათის მოსაზრებები და საერთაშორისო მიმოხილვები დ. მიქელაძეს არასოდეს არ გაუხდია თვითმიზნად ან განუყენებელი მსჯელობის საგნად. მისთვის ყოველივე ამის ქვაკუთხედი და მამოძრავებელი ღერძია ეროვნული საკითხი — როგორც ზოგადად, ისე კერძოდ — ქართული სინამდვილის სახით.

„სადაც არ უნდა ხდებოდეს მოქმედება მის პიესებში, იტალიაში, საფრანგეთსა თუ ნავერაში, არსებითად ჩვენს წინ ყოველთვის მზიარული ინგლისია“...

ენგელსის ეს სიტყვები, რომლებიც მან აღორძინების ეპოქის ტიტანზე შექსპირსა და მის პიესებზე გამოთქვა, თავისუფლად შეიძლება დავით მიქელაძეზე, მის წერილებსა და სტატიებზე წარმატებით გავრცელდეს.

მართალია, დავით მიქელაძეც ხანდახან უცხოეთზე წერს, მაგრამ თავისი საშრობლო ჰყავს მხედველობაში, პირველ რიგ-

ში მისი აწმყო და მომავალი. ამავე თვალსაზრისით ეხება ჩვენი ქვეყნის წარსულს.

დ. მიქელაძე საქართველოს წარსულში ხედავს მომავლისათვის აღმაფრთოვანებელი გმირობას მაგალითს.

„მისთვის, ვისაც შეუძლია გადაფრინდეს გონებით წარსულს ჩვენს ცხოვრებაში, საქართველოს რაინდული სიცოცხლე მშვენიერს, სხივით სავსე სურათს წარმოუდგენს“¹, — წერს ერთ სტატიაში მეველე. ამით გამოთქვამს რწმენას, რომ საქართველოს მომავალშიც პატივა და დიდება მოელის. წერილში, რომელიც დავით აღმაშენებლისადმი მიძღვნილი, იგივე იმედიანი აზრია გატარებული, რომ დავითის დიად საქმეთა სხავი მომავლის ტაძარს ანათებს.

ერის შინაგან ძალასა და პოტენციას ჩვენი მოღვაწე გმირულ წარსულშიც ხედავს.

საგულისხმოა, რომ გერმანელთა დიდმპყრობელურ გულზვიადობას მეველე იქვე უპირისპირებს ფრანგი მწერლის ვილნევის სიტყვებს: „ხალხი მისი გაჭირვების და არა დალხინების დროს იცნობა. საქართველომ ისეთი გასაოცარი სიცოცხლის ნიჭი, ძლიერება ხელისა და სიმხნე მკლავისა გამოიჩინა რამდენიმე საუკუნეების ბრძოლის დროს უძლიერეს თავის მტრებთან, რომ ისტორია მსგავს ჩინებულ მაგალითს არ წარმოგვიდგენსო“².

დ. მიქელაძე არაერთხელ მიუთითებს ქართველი ხალხის ღირსებებზე, რაინდულ ბუნებაზე, დარბაისლობაზე, და ყოველივე ამით სიამაყით გულმოსული კი არ იკვებხნის, არამედ

¹ „დროება“, 1874, № 429.

² „დროება“, 1873, № 38.

უკეთესი მომავლისათვის საბრძოლველად და სამოქმედოდ მოუწოდებს თანამემამულეებს: „მაღალმა ღმერთმა ყოველივე უხვად მოჰმადლა ჩვენს ქვეყანას: მდიდარი და მრავალფეროვანი ბუნება, მშვენიერი, საკმაოდ ნიჭიერი და კეთილშობილი ხალხი, სახელოვანი წარსული და ფართო განათლებული ასპარეზი მომავალში. ამნაირს მდგომარეობაში ერი რომ არ დაწინაურდეს, ნამდვილი ღვთის რისხვა იქნებოდა“¹.

თვით წმინდა ნინოს დღეობის ამბავს ეროვნული სიმტკიცისა და თავისუფლების სიყვარულის სიმბოლოდ იყენებს. ახალი სარწმუნოებით შეკრული „საქართველოს ხალხი გასაოცარის სიმტკიცით და გონიერებით უმაგრდებოდა საუკუნეების განმავლობაში ურიცხვი მაჰმადიანი მეზობლის გავლენას. ამ ერთი მუჰა ხალხმა შესძლო დაცვა თავის ქვეყნის თავისუფლების და სარწმუნოების ათას ხუთას წელაწადს!“ — მერე გიორგი მეფემ ასე უმწიკვლოდ ჩააბარა ეს ხალხი რუსეთის ხელმწიფეს, და ის ღირსია კარგი მომავლისა²...

„ივერია“ მუდამ ხალხის სამსახურში დგას. ამ პროგრესული ქართული გაზეთის კორესპონდენტმა კარგად იცის, რომ კაპიტალიზმმა „წარმოების ყველა იარაღი ერას უმცირესობას მისცა და უმრავლესობის შრომით აგროვებს დიდძალ სიმდიდრეს“³.

მუდამ, როცა რომელიმე რეაქციონერი მჯღაბნელი თავს წამოჰყოფდა, ყველგან, სადაც შოვინისტური სუსხი იგრძნობო-

¹ „ივერია“, 1893, № 87.

² „დროება“, 1874, № 407.

³ „ივერია“, 1895, № 85.

და, მეველე ხმას იმადლებდა და თამამად ლაპარაკობდა ტრიბუნიდან თუ პრესაში ყველა ხალხის, ყველა მცირე და დამცირებული ერის სასარგებლოდ. ამის ნიშნუშია მისი სტატია „ივერიაში“ „გასაკვირველი თავხედობა“. საქმე ეხება „ნოვოე ვრემიას“ რედაქტორის ალექსი სუვორინის გამოხდომას „რუსეთის იმპერიაში შემავალი ერების გარუსებაზე“. ერთი გერმანული გაზეთი, რომელიც პეტერბურგში გამოდიოდა, წერდა, რომ იურიევის (ყოფილი დერპტის) უნივერსიტეტში ღვთასმეტყველების ფაკულტეტზე სწავლება ალბათ გერმანულ ენაზე იქნებაო. ამით რატომღაც შეურაცხყოფილი სუვორინი აცხადებს: „გადაწყვეტილია, რომ ყველა გარეშე ტომი, რომელიც კი შემოსულია დიდი რუსეთის იმპერიაში, ბეჯითად უნდა გარუსდესო“. მეველე არ ისახავს მიზნად სუვორინთან დავას, რადგანაც „კამათობა და ბრძოლა მხოლოდ მაშინ არის წესიერი და სამართლიანი, როდესაც თანასწორის იარაღით ვუსწორდებით ერთმანეთსო“. მაგრამ ერთი დაკვრით ანარცხებს მას მიწაზე თავისი პატარა იარაღით: ვინ მისცა ასეთი დიდი მინდობილობა სუვორინს? „როდის აქეთ შეიქმნა ბ-ნი სუვორინი უმაღლესი ნებისა და განაჩენის გამომეტყველი?“ რუსეთი ამას არ მოითხოვს, თვით იმპერატორს ასეთი აზრი არ მოსვლია, და ეს სუვორინი რა შფოთს ავდებსო? — ასეთაა მეველის მოხერხებული პასუხის ტონი. ის იშველიებს „შვეიცარიელთა დევიზს: „კავშირი შეიქს ძლიერებასო“, და სავსებით გონივრულად შენიშნავს: „გაგებული და ერთგული მოღვაწე“ იმას უნდა ცდილობდეს, რომ ერთა შორის, რომელნიც შეადგენენ ნაწილს მისის სამშობლოსას, დაინერგოს სათნოება და სიყვარული თა-

ვის ქვეყნისადმი და არა შიში თვითარსებობისათვის¹. რეაქციონერ ჟურნალისტებთან ილია ჭავჭავაძის და დიმიტრი ყიფიანის ცნობილი შეჯახებების გვერდით მეველის რაინდულო ბრძოლაც დიდად საგულისხმო მოვლენად უნდა მივიჩნიოთ, არა მარტო საქართველოს, არამედ საერთოდ მოძმე ერების საერთო კეთილდღეობისათვის ბრძოლის ისტორიაში. „რუსეთის თამამი პუბლიცისტის ბრანდვა“, ცხადია, უნაყოფო მცდელობად დარჩა.

გადის დრო და „ნოვოე ვრემია“ ისევ ხმას იმაღლებს. რაკი ლუვორინის გაზეთი ხმას იმაღლებს, ცხადია, სიკეთეს არ იტყვის, რადგან ის „ყველგან და ყველაფერში ღალატს ეძებს და თუ არა რუსისა, სხვა ტომისა არა სწამს-რა — არც მეგობრობა, არც მოვალეობის აღსრულება, არც რომელიმე ღირსება“². ამისთანა გაზეთის აზრი, ცხადია „არავისთვის არ არის დასაფასებელი და საყურადღებო“. ამჯერად „ნოვოე ვრემიამ“ მოითხოვა რუსეთში ხალხის აყრა და კავკასიაში გადმოსახლება, რასაც მეველე ნათელსა და გონივრულ მოსაზრებებს უპირისპირებს — რომ მასიურად ასეთი ღონისძიების გატარება არავისთვის არ არის ხელსაყრელი.

ლუვორინს ზედიზედ ხვდება მეველის მათრახი, როგორც უნიჭო მლიქვნელს, რომელიც არავითარ საშუალებას არ თაკილობს, რათა „იერარქიის კიბეზე“ აბობლდეს, უტიფრულად ითხოვს კანონგარეშედ გამოაცხადონ და ციმბირს გადაასახლონ ის ქართველ-სომეხნი, რომელთაც ვინმე პოპოვს ხელი შეუშა-

¹ „ივერია“, 1893, № 83.

² „ივერია“, 1894, № 136.

ლეს ბათუმში დასახლებაში. მეველე მის „ნოვოე ვრემიას“ უპირისპირებს არანაკლებ პატრიოტულ ჟურნალს „ნედელიას“. რომლის რედაქტორი გაიდებეროვი მოითხოვს, გადაკიდების ნაცვლად რუსეთის იმპერიამ თავისუფლება მიანიჭოს განაპირადამორჩილებულ ერებს, თორემ მაკედონელას ან ხალიფას იმპერიასავით გადატყდება წელშიო.

მეველე შესანიშნავ ანალიზს უკეთებს ამ ორი ჟურნალის ორ თვალსაზრისს და ამბობს, რომ მიზანი მათ ერთი აქვთ, ოღონდ „ერთს ალაპარაკებს სამართლიანობა და უმადლესი სახელმწიფო სიბრძნე, მეორეს წუთიერი, მოდაში შესული ყალბი პატრიოტიზმი, რომელსაც თან ჯიბის საქმეც ერთვის“¹.

აი, როგორ ახასიათებს ა. სუვორინს, კომუნისტური პარტიისა და საბჭოთა სახელმწიფოს დამაარსებელი, კაცობრიობის გენია ვ. ი. ლენინი: „ღარიბი, ლიბერალი და დემოკრატიკი თავისი ცხოვრების გზის დასაწყისში, — მილიონერი, თვითკმაყოფილი და უსირცხვილო მეზობტბე ბურჟუაზიისა, ძლიერთა ამა ქვეყნისათა პოლიტიკის ყოველი შემობრუნების წინაშე მლიქვნელი ამ გზის დასასრულს. განა ეს ტიპიური არ არც ეგრეთწოდებული საზოგადოების „განათლებულ“ და „ინტელიგენტ“ წარმომადგენელთა მასისათვის? რა თქმა უნდა ყველა როდი თამაშობს რენეგატობას ისეთი თავბრუდამხვევი წარმატებით, რომ მილიონერი გახდეს, მაგრამ ცხრა მეთათედი. თუ ოთხმოცდაცხრამეტი მეასედი არა — ეწევა რენეგატობის სწორედ ასეთსავე თამაშს, იწყებს რადიკალური სტუდენტ-

¹ „ივერია“, 1894, № 166.

ტობით, ამ თავრებს ამა თუ იმ სამსახურის, ამა თუ იმ აფიორის „შემოსავლიანი ადგილით“.

ღარიბი სტუდენტი, რომელიც უსახსრობის გამო ვერ მოხვდა უნივერსიტეტში; სამაზრო სასწავლებლის მასწავლებელი, რომელიც, გარდა ამისა, მსახურობს თავადაზნაურობის წინააღმდეგობის მდივანად ან კერძო გაკვეთილებს აძლევს წარჩინებულ და მდიდარ მეზობანეთა ოჯახებში; დამწყები ლიბერალი და დემოკრატი ჟურნალისტიც კი, რომელიც განსჭვალულია სიმპათიით ბელინსკისა და ჩერნიშევსკისადმი, მტრობით რეაქციონისადმი, — აი რით დაიწყო სუვორინმა გასული საუკუნის 50—60-იან წლებში.

ლიბერალმა ჟურნალისტმა სუვორინმა მეორე დემოკრატიული აღმავლობის დროს რუსეთში (XIX საუკუნის 70-იანი წლების დასასრული) პირი იბრუნა ნაციონალიზმისაკენ, შოვინიზმისაკენ, მოურიდებელი ლაქობისაკენ წინაშე ძლიერთა ამა ქვეყნისათა. რუსეთ-თურქეთის ომმა ხელი შეუწყო ამ კარიერისტს „მიეგნო თავისი მოწოდებისათვის“ და მოენახა თავისი გზა ლაქიისა, რომელიც ჯილდოდ იღებდა უდიდეს შემოსავალს მისი გაზეთისა „რას ი ნ ე ბ ე ბ თ?“.

სუვორინის „ნოვოე ვრემიამ“ მრავალი ათეული წლით მტკიცედ შეინარჩუნა ეს სახელწოდება „რას ი ნ ე ბ ე ბ თ?“. ეს გაზეთი გახდა მექრთამე-გაზეთების ნიშნში რუსეთში. „ნოვოევრემიელობა“ იქცა გამოთქმად, რომელსაც იგივე მნიშვნელობა ჰქონდა, რაც ცნებებს: მოღალატეობა. რენეგატობა, მლიქვნელობა. სუვორინის „ნოვოე ვრემია“ ნიშნულია გაცხოველებული ვაჭრობისა „ქიქობით და გატანით“. აქ ვაჭრობენ

ყველაფრით, დაწყებული პოლიტიკური რწმენით და დამთავრებული პორნოგრაფიული განცხადებებით“¹.

სუვორინთან — „ლიტერატურულ პროკურორთან“ დავა ამით არ დამთავრებულა. როცა ამ შუბლვიწრო რეაქციონერმა „ნოვოე ვრემიაში“ დაბეჭდა ვიღაც სტაროჩილის სტატია ქართველთა რუსეთის შიდა გუბერნიებში გადასახლების უაზრო წინადადებით, მეველემ ეს სტატია „ივერიაში“ გაღმობეჭკა და მომდევნო ნომერშივე მიაყოლა საკუთარი წერილი, რომელშიაც ამ უმეცრულ და უაზრო სტატიას „საზარელი და შემადრწუნებელი“ უწოდა.

სტაროჩილის სტატია გაუგებრობის შედეგი იყო და მეველე ფარდას ხდის ამ ნაჩქარევ გამოხდომას ქართველთა წინააღმდეგ — ვიღაც ბათუმელი კორესპონდენტის ყალბი ცნობის შედეგს.

„ნოვოე ვრემია“ ქართველთა მისამართით გაჰყვიროდა: „თქვენ, ბატონებო, რუსის სკოლაში იზრდებით რუსის ფულით, ჯამაგირებიც რუსის ხაზინიდან გეძლევათ...“ და ა. შ. „აქ კი უნდა დავეთანხმოთ ბ-ნ სუვორინს, — წერს მეველე, — რომ ქართველებს არც სკოლა აქვთ, არც თავის ხაზინა, მაგრამ ნუთუ „ნოვოე ვრემიას“ ყოველავე ეს მხოლოდ ახლა შეუტყვია?“².

მახვილი პოლემიკური ტონის მიუხედავად მეველე წუთითაც არ ივიწყებს, რომ ასეთი ცილისწამება ქართველ ხალხს არ დაუმსახურებია და ითხოვს საბუთს „ქართველი მოხელეების

¹ ლ ე ნ ი ნ ი, ტ. 18, გვ. 324—325, მეოთხე გამოცემა.

² „ივერია“, 1894, № 14.

ეროვნული მიმართულებისა რუსეთის წინააღმდეგ“. ასეთი საბუთები არ არსებობენ. „90 წლის ისტორიამ ქართველებსამ რუსეთის მართებლობის დროს მრავალი საბუთი მისცა ქვეყანას იმისი, რომ ქართველობას არც ერთხელ არა ჰქონია მიზიდულობა სამართლის სასწორი თავისკენ გადაეწია და რუსი დაეჩაგრა“. მაგრამ „მადამორეულ ყურნალისტს“ განა ესაჭიროება სიმართლე? მას ამოძრავებს წინასწარ აღებული აზრი.

მეველის ბრძოლა სუვორინის და მისი „ნოვოე ვრემიას“ წინააღმდეგ ნაწილია იმ საერთო ბრძოლისა, რასაც რუსეთსა და ჩვენში პროგრესული ძალები ეწეოდნენ რეაქციის წინააღმდეგ. ამდენად მას ისტორიული მნიშვნელობა ენიჭება.

მეველის პოლემიკური მახვილი მყისვე გაიღვებს ხოლმე ჩვენს მოწინავე პრესაში, როგორც კი სადმე უსამართლობას შენიშნავს. 1893 წლის 9 ოქტომბერს „ივერიის“ პირველ გვერდზე იბეჭდება მისი ერთი უპრეტენზიო, უსათაურო წერილი, რომელშიაც იცავს ჩურჩქსუს ქართველ მაჰმადიანებს ვინმე „ბათუმელის“ თავდასხმისაგან. ხსენებული კორესპონდენტი, „ჩაგრულთა მოსარჩლე“, როგორც ირონიულად უწოდებს მეველე, შეეცადა საქმე ისე დაეხატა, ვითომ დაბა ჩურჩქსუსში ადრე სულ ხუთი ქართველი ცხოვრობდა, მერე კი, როცა იქ რუსი ახალმოშენენი დასახლდნენ, მოზღვავდნენ სხვა ადგილობრივი მცხოვრებლები და „შეავიწროვეს“ ჩამოსულნი. მეველე გაოცებულია ასეთი ლოგიკით და პეტერბურგის გაზეთის „მართალ მემატიანეს“ ასეთ პასუხს აძლევს: „ბ-ნ ბათუმელის სიტყვით გამოდის, რომ ახალმოშენენი რაღაც ისეთ უღმერთო ქვეყანაში დაბინავებულან, სადაც არც სამართალია.

არც სინდისი და არც მთავრობა“¹. მეველე იცავს სამხრეთ საქართველოს შევიწროვებულ მოსახლეობას უსამართლო ბრალდებისაგან და წერს, რომ ქართველი არასოდეს არ უმტრობს სხვას, ისიც დედაკაცთა შეგინებით. მეველეს გამოურკვევია, რომ ჩურჩუქსუში მოახალშენეთა ჩასვლამდე „500 კომლზე ნაკლები არ ყოფილა მკვიდრთა რიცხვი“ და უკვირს, როგორ მოახერხა ბ-ნჰა ბათუმელმა, რომ ხუთასი ხუთად გადააქცია. ასეთ კორესპონდენტს, მისივე თქმით, ეპატიება იმის თქმა, რომ რაკი ადგილობრივ მკვიდრთ საბუთები არა აქვთ იმ მიწა-წყლის საკუთრებისა, რომელზედაც ათასი წელიწადია ცხოვრობენ, მაშასადამე, ეს ადგილები მათი არა ყოფილა! ასეთი საბუთები, როგორც ცნობილია, ბანკების დაარსებამდე არც არსებობდა.

მეველე არაერთხელ ეხება უჩინარი ბათუმელი „მწერლის“, ვინმე დამთხვეული „სტაროჟილის“ სტატიას „ნოვოე ვრემიაში“: რომ „კავკასია, ეს „დალოცვილი ქვეყანა“, ჯერ კიდევ მთლად არ გარუსებულა“; რომ აქ ქართველები და სომხები „ხელს უშლიან“ რუსეთის საქმეს, ავიწროებენ რუს მოახალშენეებს, და სხვა მსგავსი აბღაუბდა. მეველე ისევ მოაგონებს პეტერბურგის გაზეთს — დიდი ლენინის მიერ სასტიკად დაგმობილ რეაქციულ გაზეთს — რომ ამნაირი მჭლახნელები რუსეთის სახელს აძულებენ ქართველებს, რომლებიც ნებაყოფლობით შეუერთდნენ მას და ასი წელია ერთგულად უდგანან მხარში. „მაგრამ „ნოვოე ვრემიას“ მწერლებისათვის ისტორიის უთუოდ მნიშვნელობა არ უნდა ჰქონდეს“, — განაგრძობს მეველე და აფრთხილებს სუვორინს, რომ ამნაირი აზრებით უხეი-

¹ „ივერია“, 1893, № 216.

რო სამსახურს უწევს თვით რუსეთს, როცა ქართველს უქადაგებს — დაივიწყე შენი ენა, ზნე-ჩვეულება, კულტურა, და გადასახლდი ცივ გუბერნიებშიო!¹ კიდევ კარგი, მთავრობამ ქართველები გაამართლა, თორემ სუვორინი სულ შეგვჭამდა და იქნებ გადასახლებაც არ ეკმარებინაო! — ასე ამთავრებს მეველე თავის სტატიას.

მეველე დიდ მნიშვნელობას აძლევს ერობას, დაწესებულებას, რომელიც „ნებას აძლევს მკვიდრთ თავიანთი შინაური საქმეები თვითონვე განაგონ“². როცა ამ საქმეს ასრულებს ცალკე მოხელე, რომელმაც ხალხის არც წარსული იცის და არც ხასიათი, დიდად საზიანოდ მიაჩნია. ქართული ერობის წარმატების საბუთად მას მოჰყავს საბანკო კრება.

მეველე ქომაგია ქართველი ხალხისა საერთოდ და მისი ყოველი კუთხისა კერძოდ.

მას აოცებს ის გარემოება, რომ გურიაში დიდხანს ვერ გასძლო ვერც ერთმა მაზრის უფროსმა. ნუთუ ამ ენამახვილმა, გამრჯე, მკვიარცხლმა ხალხმა ვერ შეითვისა ვერც ერთი მმართველი? არა, ამბობს მეველე, აქ დამნაშავე გურულები კი არ არიან, არამედ ის უფროსები, რომელთაც ალლო ვერ აუღეს გურულთა თავმოყვარეობას, ამ ეროვნულ ღირსებას, რასაც ნაკლად უთვლიანო, და იმოწმებს პოეტის სიტყვებს:

„ვერა, ვერ ჰმართონ ვერსად ერი იმა მმართველთა,
ვისაც არა აქვს ერის სიყვარული და შეწყნარება“.

¹ „ივერია“, 1894, № 83.

² „ივერია“, 1894, № 140.

მეველე იმედს გამოთქვამს, რომ ახალი მაზრის უფროსი ალშობაია არ დაემსგავსება იმ მოხელეებს, „რომელთაც ჰგონიათ, რომ ყოველ ნაკლულოვანებისა და სენის წამალი მათრახიაო!“¹ არა, ეს ცუდი და გმობილი საშუალებაა და მას სიკეთე არავისთვის მოაქვსო, — აფრთხილებს მეველე ახალ მმართველს.

როცა პროკურორის თანაშემწე, ვინმე ბაიკოვი მჭარცველების გასამართლების დროს თავს ესხმის მთელს ერს, თვლის მას დამნაშავეთა ნიადგად, მეველე სასტიკად ესხმის თავს ამ ხეპრეს, იმოწმებს რუს მეცნიერს კოვალევსკის, აგრეთვე სენატს, რომელმაც დაარღვია განაჩენი, და მოითხოვს თავდაპირილ მსჯელობას, როცა მთელს ხალხს ეხებიან.

თვით ნიკოლოზის გამეფებასთან დაკავშირებულ წერილში ურთავს მეველე გადაკრულ სიტყვას: „ამიერიდან მაინც მოედება, ალბათ, ბოლო წადალს, რომ ყველა ეროვნების ბუნებრივი უფლება და საჭიროება ერთის რომელსამე ერის თავმოყვარეობას შეეწიროსო“². ასეთი გაბედული სიტყვა ახლად გარდაცვლილი იმპერატორის სამგლოვიარო არშის ქვეშ უნდა დარჩენილიყო ისტორიაში და დარჩა კიდევ. ამ სიტყვიდან ჩანს, რამდენად „კმაყოფილი“ ყოფილა მეველე ალექსანდრე მესამის პოლიტიკით ჩაგრული ერების მიმართ.

მეველე მუდამ აღნიშნავს, რომ „რუსეთის მეფენი არასოდეს არ თვლიდნენ საქართველოს დაპყრობილ და ძალით აღებულ მხარედ“, ამდენად ის სხვა ერებივით დამონებული არ

¹ „ივერია“, 1893, № 258.

² „ივერია“, 1894, № 230.

ყოფილა, ნებაყოფლობითაა შეერთებული და სათანადო უფლებებსაც ითხოვს. მეველე მოხერხებულად იწონებს ნიკოლოზის მანიფესტს, რომელიც პოლონელ პატრიოტებს შეეხო, ციმბირში რომ იყვნენ გადასახლებულნი 1863 წლის ამბოხებისათვის, და ასეთსავე ყურადღებას ითხოვს ქართველებისათვის. ცხადია, ეს მხოლოდ დიპლომატიური ხერხია. ოფიციალური გაზეთის მესვეური მეტს ვერც იტყოდა.

ცხადია, დ. მიქელაძე ვერ ამალდა კლასთა ბრძოლის იდეამდე. მას ვერაფერ საშუალებად მიაჩნია ერის შინაგან ცხოვრებაში ცეცხლი და მახვილი. მაგრამ თუ ხალხის ღირსებას შეეხო გარეშე ძალა, „აქ ყოველი საშუალება სახმარებელია და წმინდა, რადგანაც ერის თავისუფლება, იმისი საუკუნოებით დაცანონებული ენა, ზნე და გრძნობა ხელშეუხებლად უნდა დარჩეს, რადგანაც ამ თვისებათა წყალობით განსხვავდება ერთი ერი მეორისაგან და ეს ეროვნული სხვადასხვაობა, ეს განსხვავება, ეს საკუთარი სახე, ისე საჭიროა და დამამშვენებელი მსოფლიო ჰარმონიისა, როგორც ერთს დიდს ნობათში დამამშვენებელი და შემამკობელი სხვადასხვა ფერისა და სუნის ყვავილი“¹.

ბუნების ამ წესის დარღვევა მეველეს არასწორად მიაჩნია და შეუძლებელ საქმედაც. ეს ისეთი საღი შეხედულება და მოხდენილი შედარებაა, რომ ბევრ გამოჩენილ მწერალს შეშურდებოდა, ხოლო ბევრ ობსკურანტს საგონებელში ჩააგდებდა.

1879 წ. 2 ივლისს დ. მიქელაძე კულაშიდან სწერს დიმიტრი ყიფიანს:

¹ „ივერია“, 1893, № 261.

„ჩვენ, მართალია, დამარცხებული ვართ დღეს, ამგვარივე დამარცხება მოგველის. იქნება ხვალაც, მაგრამ უმაღლესი და უკეთილშობილესი პრინციპი კი ჩვენსკენ არის. ჩვენ ვემსახურებით ამ აზრს, რომ საზოგადოებაში ძმობა და სამართლიანობა დამყარდეს“¹. დ. მიქელაძე რწმენას გამოთქვამს, რომ „ვინც კი ნამდვილად ქვეყნისათვის გულშემატკივარია, ვინც საქართველოს ერის ბედნიერებას ჰფიქრობს, იმათ ჩვენი მხარე უჭირავთ“, ეს კი ნათელი მომავლის საწინდარია.

მეველე თავგამოდებული წინააღმდეგია ეროვნული ჩაგვრისა: „ერი, რომელსაც ყოველივე მინიჭებული აქვს ღვთისაგან, რომ თავისუფლად იცხოვროს, მოიხმაროს თავის ქვეყნის ბუნებას სიმდიდრე, განვითარდეს და აღმაღლდეს — როდესაც ამისთანა ერს წინ ეღობება მეორე ერი და დაფნის შტოს ნაცვლად მუშტსა და ხმალს მიაწოდებს, მაშინ ქვეყანაზე ანგელოზი ძაძით იმოსება, ხოლო ბოროტი სული, ნიშნად გამარჯვებისა, ხარხარებს“². ამ ხატოვან შედარებას მოსდევს მოკლე დასკვნა: „ჯერჯერობით ჯოჯოხეთური ხარხარი უფრო ხშირად მოგვესმის, ვიდრე ანგელოზთა გუნდის გალობა ზეცათგან“.

1872 წლის ნოემბერში დ. მიქელაძე პარიზიდან გზავნის ფელეტონებს და ისევ ეროვნულ საკითხს ეხება. მთელი სამი სარდაფი უჭირავს „ღროებაში“ 1873 წლის 15 იანვარს ფელეტონს „სურათი ოსმალთა საქართველოს ცხოვრებიდან“.

აქაც ერისათვის ფრიად საჭირბოროტო საკითხია დასმული: ბევრმა ქართველმა აღარც კი იცის, რამდენიმე ასი ათასი

¹ „ღროება“, 1879, № 116.

² „ივერია“ 1893, № 234.

ქართველი კაცი, მისი ძმები, ოსმალეთის ხელშია დღესაცო. აქ მეველე იგონებს მეტად ამაღელვებელ ეპიზოდს: პარიზის ერთ ყავახანაში „დროებას“ ვკითხულობდი, ვიღაც ჩემს გვერდით დაჯდა, დასცქეროდა გაზეთს და მკითხა: „თქვენ ქართველი ბრძანდებითო?“ ეს კაცი „ოსმალთა საქართველოდამ“ ოციოდე წლის გადმოვარდნილი აღმოჩნდა: დასჯა ელოდა ყაზილარ-ფაშას საქმეზე და სულთანის ქეშიკებს გამოსხლტომოდა. ლტოლვილმა თურმე ასე შესჩივლა მეველეს: ჩვენს ამბავს აღარც კი კითხულობთო! „თქვენ შესაძლებელია არ იცოდეთ, რომ ოსმალთა საქართველოს თქვენზედ აქვს სასოება და ცას-ქვეშეთში თქვენს გარდა არავის შესცქერის თავის იმედათო“, — უთქვამს. „გახსოვდეთ თქვენი ძმები, შვილო“, — ასე დაასრულა თურმე ამაღელვებელი საუბარი მოხუცმა, რომლის სიღარბაისლემ და წმინდა ქართულმა გააოცა „დროების“ კორესპონდენტი პარიზში.

მეველე დაწვრილებით გადმოგვცემს მოხუცის ნაამბობს. კერძოდ ყაზილარ-ფაშას ვერაგობის ამბავს, და ამ ერთი შეხედვით უწყინარ ფელეტონსაც განზოგადების იარაღად იყენებს უსამართლობასთან ბრძოლაში. თურმე ეს ყაზილარ-ფაშა „იმ ჯოგიდან იყო“, სადაც დესპოტები პატარა ურჩობასაც კი თვით წმინდა საიდუმლოების შეგინებად თვლიან და ვინც ყველაფერში მათ არ დაეთანხმება, სახელმწიფოს მავნებელ წევრად აცხადებენ ხოლმე. დამთხვეულმა ყაზილარ-ფაშამ თურმე თითქმის აკრძალა სწავლა, ქართული ენა, დასცა ზნეობა. იმდენს ეცადა, ქართველთა ამორჩიული კაცი გადააყენებინა. მაშინ რამდენიმე ქართველმა შეთქმულება მოაწყო, მაგრამ გაუგეს, და დროზე გადავარდნენ „თავისუფალ ქვეყნებში“. მათ შორის

ყო თვით ამ საქმის მოხრობელი, რომელსაც გადაუწყვეტია. სხვა ქვეყნებში მაინც ვიბრძოლებ თავისუფლებისთვის; ასე ბრძოლით მოუვლია იტალია, საბერძნეთი, საფრანგეთი, და ყველგან თავისუფლების დროშის ქვეშ მდგარა: იქნებ საქართველოს ღვაწლად ჩაბმეთვალოსო.

ამაღელვებელი, უკვდავი მოთხრობაა! მეველია ერთი უღვაწო დანსახურება ისაა, რომ ასეთი ფაქტი ნახა და შთაშობაგლობას შემოუნახა. ის არ იყო მბატრული სიტყვის ისეთი ოსტატი, რომ ეს ამბავი ვრცელ მოახრობად ექცია, მაგრამ მისი მასალა, მშვენიერი ქართულით მოთხრობილი, საიმედო სიუჟეტია ყოველი მწერლისათვის.

ქართველ მაჰმადიანთა საკითხს მეველე არაერთხელ უბრუნდება. ის აღშფოთებულია ერთი უცნობი ქართველი პედაგოგის ქცევით, რომელიც მაჰმადიან ქართველთა მხარეში ჩასულა და მაჰმადიანური სარწმუნოების ლანძღვით ისე აღუშფოთებია მსმენელები, რომ იმათ ქართული წიგნის კითხვაც კი შეუწყვეტიათ და ქართული ენის შესწავლაზეც ხელი აუღიათ. მეველე უკმაყოფილოა ამ „მოხეტიალე არსებით“ და არ იცის, უნეცრობით მოუვიდა ეს თუ ბოროტგანზრახვით, მაგრამ შენიშნავს. რომ „ორსავე შემთხვევაში კი ეს ვაუბატონი მავნებელი ბრძანებულა“¹, და მოათხოვს ჩვენი ყამთა სიაცით დაწორებულ კმებისადმი მეტი გულისხმეირების გამოჩენას.

სიყვარულისა და პატივისცემის გრძნობითაა აღსავსე სტატია, რომელიც მეველემ უძღვნა დიდი უნგრელი პატრიოტის,

¹ „ივერია“, 1894, № 40.

92 წლის კომუტის გარდაცვალებას¹ და რომელიც ახასიათებს მის გაზეთს „ვესტი ჰირლაჰ“-ს, მის მკვერმეტყველებას და ბრძოლას ავსტრიის ბატონობისაგან ერის განთავისუფლებისათვის; თანაც შენიშნავს მის შეცდომას: რომ მან უგულვებელყო სლავები, რომლებიც იმავე ავსტრიას ჰყავდა დამონებული. და მარტო შეება იმპერიას; ერთხანს დიდ წარმატებასაც მიაღწია და ალბათ დაანგრევდა კიდევ ძალით შეკოწიწებულ იმპერიას, მაგრამ აქ ჩაერია ნიკოლოზი და რევოლუცია სისხლში ჩაახრჩო. თუმცა მისმა საქმემ ნაწილობრივ მაინც გაიმარჯვა.

მეველე პატივისცემით არას განწყობილი ყოველი ერისა და ხალხისადმი და ამასვე ითხოვს ყველასაგან. არ არსებობს ხალხი, რომელმაც არ იცოდეს კარგისა და ცუდის, კეთილისა და ბოროტის გარჩევა და სათანადო პასუხის გაცემა. ამიტომ ყოველი ხალხის მიმართ რიდი და სამართლუიანობა ჰმართებს ყოველ მმართველს.

ასე ექომაგება მეველე ბათუმელ მაჰმადიანებს, რომელთაც არ იციან, რას უპირებს კანონი; ასევე ესარჩლება ჩერქეზებს, რომლებიც ჩარჩებმა და მოხელეებმა დააშინეს.

მეველე უყოყმანოდ ექომაგება ყოველი ერისა და სარწმუნოების წარმომადგენელს, თუ მას უსამართლოდ ექცევია. რომელიღაც ჩერქეზი მაჰმადიანი ეკატერინოდარის ხაზინადართან შეესულა, ამ უკანასკნელს ქუდის მოხდა უბრძანებია, ჩერქეზს არ მოუხდია, რასაც მოჰყოლია ამ ჩერქეზის გასამართლება, დაჯარიმება და უშედეგო საჩივარი სენატში.

მეველე ამ ამბავს „ივერიაში“ წერილით ეხმაურება. მას

¹ „ივერია“, 1894, № 54.

არასწორად მიაჩნია სენატის გადაწყვეტილება და მოაგონებს იმავე სენატს, როგორ აუკრძალეს ლონდონში მოლას მეჩეთიდან ქადაგება, რის შედეგადაც სულთანმა სტამბოლში აკრძალა ეკლესიის ზარების რეკვა. ლონდონში იძულებული გამხდარან ბრძანება შეეცვალათ, რასაც ხელახლა მოჰყვა ზარების რეკვა სტამბოლში. ამ საუცხოო მაგალითით მეველე ანიშნებს სენატს, რომ „ერის ყოველი ჩვეულება, ზნე და ნამეტურ სარწმუნოება, პატრუსაცემია და შესაწყნარებელი, თუ რაიმე საენებელი ხასიათი არ ახლავს“. შემცდარი აზრია, ხალხი მცირეოდენი წესის შელახვას არაფრად ჩააგდებსო. წვრილმანებლისაგან შედგება მთელი ჩვენი ცხოვრება და მათი უგულვებელყოფა სარგებლობას არავის მოუტანსო.

იბრძოდა რა ყველა ერისა და ხალხის უფლებებისათვის, ამით მეველე იბრძოდა უწინარეს ყოვლისა თავისი ხალხის ინტერესებისათვის, და ზოგადკაცობრიულობა აძლევს მის ბრძოლას ფასსა და წონას.

როცა საქმე ეხებოდა თერგის მხარის უფროსის ჰუმანურ ბრძანებას, ყაბარდოს მკვიდრთა ოსმალეთში მხოლოდ მათი სურვილისამებრ გადასახლებაზე, მეველე თავს ესხმის ჩარჩვაჭრებსა და აკაცებს, და გახარებულთა, რომ „დამფრთხალი და შეშინებული კეთილშობილი ჩერქეზი ხალხი ამხანად გულს დაიმშვიდებს“¹. ამასთან ეს ხალხი თავისი კუთხის სიყვარულის ნამუშაოდ მოჰყავს და იგონებს პოეტის სიტყვებს: „სადაც ვმობილვარ...“

„ასეთ წმინდასა და მაღალს გრძნობას გაიგებს მხოლოდ ის,

¹ „ივერია“, 1894, № 70.

ვისაც ღვთაებრივი ნაპერწკალი უღვივის გულში, ვისაც ესმის, რა არის ეროვნული ცხოვრება და არა ის, რომელსაც მხოლოდ ნივთიერი მოგება და გაძღომა გაუხდია თაყვანისსაცემელ კერძად“. ბრწყინვალე მსჯელობაა! თანაც ეს მსჯელობა მიზართულია იქითკენ, რომ კარგი მაგალითის ქებით ჩააფიქროს უტიფარი და რეაქციონერი მოხელეები. რამდენად გულუბრყვილობის იერიც არ უნდა გადაჰკრავდეს მათს დაპირისპირებას ვორონცოვთან და ბარიატინსკისთან, მაინც ეს არის დიპლომატიური ბრძოლა დამონებულ ერთა სასარგებლოდ და ორი ბოროტებიდან უკეთესის არჩევა.

ძლიერია ეროვნული გრძნობის ნაკადი მეველის სხვა უთვალავ სტატიებში. ხან აშკარად ლაპარაკობს, ხანაც სხვა ერების მაგალითზე მიუთითებს მკითხველს. „ერთ სიტყვაზე „სამშობლო“ ფრანცუზს ყველაფერი ავიწყდება ამ ქვეყანაზედ... რამდენათ აღამაღლა ფრანცუზის ზნეობა, ჭკუა, ნივთიერი მდგომარეობა მსგავსმა სამშობლოს გიჟურით აშიყობამ — ამას მისი ახლანდელი ძლიერება და გავლენა გვიმტკიცებს“¹.

„ჩვენი ბედი ასე თუ ისე ჩვენს ხელთვე არის, და თუ ვერა მოვახერხეთ რა, ავიწიწენით და ავირიენით — ჩვენივე ბრალ იქნება“, — განაგრძობს მეველე და იმედს გამოთქვამს, რომ ცამტრედისფერი ხდება, „ელის მხოლოდ საკვირველის ბუნებისაგან დადგენილ დროს, რომ ამობრწყინდეს დიდებულად და განანათლოს ქვეყანა“. აი, ამ „სანუგეშო სიმპტომის“ ძიებასა და ცდაში აყო მეველე მთელი თავისი შეგნებული სიცოცხლის მანძილზე.

¹ „დროება“, 1873, № 38.

მეველე არსად არ არის ფიცხი და განუსჯელი. როგორც პუბლიცისტი, ორატორა თუ კორესპონდენტი, მუდამ სიღინჯისა და საქმის ჭკვიანური განსჯისაკენ მოუწოდებს მკითხველსა და მსმენელს — საბანკო საქმეა, სკოლის. პროგრამა, ქალთა სასწავლებლის საკითხი თუ სხვა რამ, მუდამ უკუაგდება წვრილმან შეხლა-შემოხლას, ნაჩქარევსა და ვნებათა ლელვაზე აგებულ მსჯავრს. „...შურისა და განკერძოების ჩამოგდება დამლუპველია ერისა. ამ პროვინციულმა პატრიოტიზმმა, ამ ამერიკელობამ მრავალჯერ აწყევლინა ბედი საქართველოს!“¹ — წერს მეველე და ფიცხ ადამიანებს აფრთხილებს, რომ სადაც კერპად აღიარებულია არა პ რ ი ნ ც ი პ ი, არამედ მ ა დ ა, იქ საეჭვოა სიკეთე დაიბადოს.

მეველე შორს დგას ეროვნული შუღლის და განკერძოების ყოველგვარი გამოვლინებისაგან, მაგრამ როცა მას აძლევენ ასეთ მაგალითს, ხმას იმალლებს და საკმაოდ მკაცრადაც. აი. 1893 წლის მაისში თბილისის ქალაქის საბჭოს არჩევნებში სომხებს მოუხერხებიათ 58 კაცის გაყვანა 14 რუსის და ქართველის წინააღმდეგ. მეველე გაუოცებია ამ არაგონივრულ ნაბიჯს საერთოდ გონიერი სომხების მხრივ, და ეკითხება მათ: რისთვის დაგჭირდათ ჩვენს დედაქალაქში ხმათა ასეთი უმრავლესობა, როცა აქ სომხები მხოლოდ ვაჭრობას ეწევიან? ქალაქს ხომ მართვაც უნდაო? და თავაზიანად აფრთხილებს კიდევ: ნავში მჯდომი მენავეს არ უნდა ეჩხუბებოდესო².

¹ „ივერია“, 1893, № 23.

² „ივერია“, 1893, № 101.

პატიოსნების, სიმართლისა და კეთილსინდისიერების მცვე-
ლია მეველე ქვეყნის ცხოვრებაშიც და მწერლობაშიც.

როცა საქართველოში „თითქმის ჩვეულებად ქცეულ“ საქ-
ციელს — სხვისი აზრის შეუწყნარებლობას ეხება, მეველე
დროულად იხსენებს ცნობილ კატკოვს: „განსვენებულმა კატ-
კოვმაც ასე იცოდა: ბუქსა და ნალარას მეორედ მოსვლას
სცემდა, როცა ვინმე გაბედავდა თავის აზრის თავისუფლად
თქმასა“¹. სამარცხვინოდ მიახნია მეველეს ასეთი საქციელი,
მეტადრე მაშინ, როცა „ლიტერატურის ასპარეზზედ კადრულო-
ბენ შებოჭონ და შეხუთონ აზრთა თავისუფლად მოძრაობა და
წარმოთქმა“.

მცირე ერების წარმატებაში დ. მიქელაძე საკუთარი ქვეყნის
ხვალინდელ დღეს ხედავს, ამიტომაც ასე აღტაცებით მიესალ-
მება ყოველი ერის განთავისუფლებას — მაგალითად, ბულგა-
რეთის დახსნას ოსმალთა ხუთასწლოვანი ბატონობისაგან.

ხან ფსევდონიმით, ხანაც „თანამედროვე შენიშვნების“ სა-
თაურით მეველე „დროებაში“ ანალიზს უკეთებს უცხოეთის
ამბებს და ყველგან გამოდის პროგრესული თვალაზრისის მო-
ღვაწედ. საფრანგეთიდან პრუსიელი ოკუპანტების წასვლას ასე
მიესალმება: „მშვენიერს სურათს წარმოადგენს დაკავებული ქა-
ლაქები იმ დროს, როდესაც პრუსიელები გადიან იქედგან“. თუ
მანამდე ქალაქი უდაბნოს ჰგავს, გერმანელების წასვლისთანავე
ფარჩით, ეროვნული დროშებითა და სიმღერებით ივსებაო. უც-
ხო კაცო, ამის შემხედვარე, იტყვის: „რა თილისმა ყოფილა ეს
თავისუფლებათა!“

¹ „ივერია“, 1894, № 68.

მიმოხილველი როდი კმაყოფილდება უცხოეთის ამბების მოხდენილი და ნათელი გადმოცემით! იქვე შენიშნავს: „ჩვენ სრულიადაც არ გვაკვირვებს ეს ალტაცება ფრანკუზებისა. ყ ჩვენ გვესმის, რას უნდა გრძნობდეს შემთხვევით დაჩაგრული ხალხი. უმართლა, ამაზედ უარესი მდგომარეობა კიდევ იქნება?! რომელაზე ახირებული თავმოყვარე, ან გამოჩერჩეტებული მშართველის წყალობით, ხალხი ჩავარდნილა გარეშე ხალხის მონებაში. არ ესმის მისი ენა, არა აქვს მასთან ერთობა შთამომავლობით, ჩვეულებით, ხასიათით, ლტოლვით და მიმართულებით. უკანასკნელად, არ დგას განათლებით და ხელოვნებით თავის დამმორჩილებელზედ დაბლა... როდესაც ხალხი ამისთანა საზარელ მდგომარეობიდან დაახწევს თავს, მაშინ იმას არ ეზრახება, რაც გინდ გიყურ მხიარულებას არ მიეცეს იგი“¹.

მომდევნო სტატიებში მეველე უკვე ალტაცებით წერს: „საფრანგეთი განთავისუფლდა გერმანიის ჯარისაგან! დღეს მტერი აღარ სთელავს საფრანგეთის მიწას! ხალხი გიყურ ალტაცებით ეგებება თავის ნაციონალურ სამფეროვან დროშას...“² ორიოდ ხაზის მოსმით ხატავს გერმანიის დიდმპყრობელურ ფსიქოლოგიას: „ძლევამოსილი პრუსია, დატვირთული ფრანკუზების ცრემლითა და სისხლით, დატვირთული აუარებელის ომის ნაქაფითა, სიამაყით და ნეტარებით სავსე, შედის თავის GROSS ფაქტერლანდში. დარწმუნებული თავის უპირატესობაზედ კაცობრიობაში, გერმანია ლოთურ ოცნებასა და ტრებასს ეწაფება“³.

¹ „დროება“, 1873, № 33.

² „დროება“, 1873, № 38.

³ „დროება“, 1873, № 38.

მეველე დამონებულ ერს ადარებს ბავშვს, რომელიც ჭერ-
კიდევ სუსტ წინააღმდეგობას გვიწევს, ჩხავის და შფოთავს.
როცა არტახებს ახვევენ. მაგრამ მოლონიერდება და თავს აიხ-
სნის. ვერავინ ჩაკლავს ადამიანში თავისუფლების ძალას, თუნ-
დაც გონებრივად ჭერაც დაბალ დონეზე იდგეს და თუ მაღალ
დონეზე დგას — მით უმეტეს.

მეველე მიესალმება გლადსტონის პროექტს ირლანდიისა-
თვის დამოუკიდებლობის მინიჭების შესახებ და იმდენად კმა-
ყოფილია პატარა ერის ამ ერთგვარი თავისუფლებით, რომ აღ-
ფრთოვანებულ ქებას უძღვნის 80 წლის „დიდებულ მოხუცს“
რომელშიაც „ბუნებამ თითქოს საგანგებოდ მოჰკრიბა, რაც კი
რამ მშვენიერი და ძვირფასი მოიპოვებოდა“¹. აქვე „ივეოიის“
მიმომხილველი პარალელს ავლებს გლადსტონსა და ზოგიერთ
სახელმწიფო მოღვაწეს შორის, რომელიც რამდენიმე ათასი
ვერსის დაშორებით კაბინეტში ზის და არც ქვეყანას იცნობს.
არც ქვეყნის საჭიროებას. „ასეთი უბადრუკი „ჩინოვნიკებისა-
გან“ განსხვავებით, გლადსტონი თვითონ მართებლობის სათა-
ვეში დგას და ამის მიუხედავად ცდილობს უფლება შეიმციროს
და მიანიჭოს თავისუფლება თითოეული ქვეყნის ნაწილს“
მეორე საკითხია, რამდენად შეზღუდულია ასეთი თავისუფლე-
ბა, მაგრამ პრინციპულად რომ მეველე აქაც თავისუფლების და
პროგრესის ქომაგად გამოდის, ექვს არ იწვევს. თითქოს ინ-
გლისის იმპერიაში მეფის წყობალებას გულისხმობდეს და ირ-
ლანდიაში — თავის ქვეყანას, — მეველე გლადსტონის მოშვე-
ლიებით ქადაგებს, რომ „სამეფოს ძლიერება ერთა შორის უსა-

¹ „ივერია“. 1893, № 158.

ქართლობაზე და ძალადობაზე კი არ უნდა იყოს დამყარებული, არამედ სრულს თანასწორობაზე და სიყვარულზე ურთიერთ შორის; მხოლოდ ამ წესით მოწყობილ ქვეყანას აქვს სასურველი და უკეთესი მერმისიო“.

მეველე გლადსტონს „თავისუფლების მოციქულს“ უწოდებს¹ და ფერებს არ იშურებს მის დასახატავად: „გლადსტონს შეუძლიან ამგვარად სიკვდილი, რადგანაც მან შეასრულა თავისი მოვალეობა არა თუ მარტო ინგლისის წინაშე, არამედ მთელის კაცობრიობისა. იგი იყო და არის მოსაჩილე და მეგობარი ყველა ლაჩაგრულთა და დამონებულ ერთათვის“².

ნურავინ იფიქრებს, რომ მეველე გატაცებულია უცხო ქვეყნებით თვით იმ წერილებში, რომელთა თემაც უცხოეთია! არა. ის ყველგან ეძებს ტირანიის დამხობის გზებს, „თავისუფლების მოციქულებს“, სამართალსა და თანასწორობას, ხოლო გლადსტონის ასეთი დახასიათება სჭირდება სწორედ საკუთარი ქვეყნის ბედზე უფრო გულახდილი საუბრისათვის.

სტატიებში; რომელთაც უძღვნის თურქეთის საშინელი ბატონობისაგან ბულგარეთის განთავისუფლების საკითხს, მეველე სწორად შენიშნავს, რომ თურქეთისაგან თავდახსნილ ბულგარეთზე ახლა კბილებს ილესავენ ევროპის ქვეყნები, რადგან აწ ქვეყანას აქვს ხელსაყრელი გეოგრაფიული მდებარეობა, რაც მას ხდის „საფრთხილო ერად, რომელზედაც დამოკიდებულია მრავალი დიდი და თვალსაჩინო ინტერესი ევროპის სახელმწი-

¹ „ივერია“. 1893. № 158.

² იქვე.

ფოეებისა“¹. მეველე აღფრთოვანებულია ბულგარელი ხალხის გმირობით. „ამ ქვეყანამ ცხადად დაინახა და დარწმუნდა, თუ რა განსხვავებაა დამორჩილებულ, უფლებათაგან დეპრესიონალურ მონასსა და თავისუფალ მამულიშვილს შორის“². ცხადია, ასეთი მსჯელობის დროს დ. მიქელაძე ყველგან თავის სამშობლოსაც გულისხმობს.

მეველე გულთბილად ლაპარაკობს ყოველი ერის ღირსეულ პატრიოტზე. როცა გარდაიცვალა იტალიელი მამულიშვილი ნინო ბიქსიო, ის „ღროებაში“ წერილს ათავსებს და ამბობს: „ეს ჭეშმარიტი პატრიოტი, გარაბალდის თანამებრძოლი, სარდალიც იყო, სენატორიც, მაგრამ მის ჯიბეს ამით სისქე არ მომატებიაო“. „ჩემმა ქვეყანამ მოშცა სიცოცხლე და მასვე. ეკუთვნის“, — იგონებს ბიქსიოს სიტყვებს და თანამემამულეებს მის თავს პატრიოტის ნიმუშად უხატავს.

დ. მიქელაძემ წერილი უძღვნა აგრეთვე ქუთაისში გარდაცვლილ „ფრანგ-ქართველ“ გრაფს აღფრედ დე-როსმორდუეს, იმ ცნობილი გრაფის შვილს, რომელსაც ფაღავას ქალი ჰყავდა; სამეგრელოში ცხოვრობდა და ყველას სიყვარული დაიწსახურა. ამასთან დაკავშირებით მეველე ამბობს: „მართალია, ქართველი ერის შეყვარება და დამეგობრება ძნელი არ არის, თუკი აღამიანური გრძნობა უღვივის კაცს გულში, მაგრამ ისიც ცხადია, რომ ჩვენმა ხალხმა ჩინებულად იცის დაფასება კეთილის მეგობრისა“³.

მეველე მიესალმება მექსიკელ პატრიოტთა სიმამაცეს, ლუი

¹ „ივერია“, 1893, № 149.

² „ივერია“, 1893, № 243.

³ „ივერია“, 1894, № 29.

ხაპოლეონს რომ გვირგვინი ხელში შეამსხვრიეს, მექსიკაში იმპერიის შექმნის ცუდა ანანეს და დახვრიტეს მომხდური ავაზაკი მაქსამილიანე, რომელმაც ექვსი ათასი მექსიკელი დაახვრეტინა.

ქართველი მამულიშვილი ასევე მიესალმება ამერიკის განთავისუფლების თარიღს, თავგანწირული, თავდახსნილი ხალხის დღესასწაულს, იგონებს ლუი XVI-ის მდიდრულ სასახლეში სადად ჩაცმული ფრანკლინის გამოჩენას.

1894 წლის გაზაფხულზე უნგრელებს განუზრახავთ ავსტრო-უნგრეთის იმპერიაში მოსახლე რუმინელებისათვის საკუთარი ენის აკრძალვა. მეველე აღშფოთებულია. როგორ! — კითხულობს ის. — „ნუთუ კოშუტის ქვეყანაში არ გამოჩნდა კაცი, რომელსაც ემხილებინა თავის მემამულეთათვის, რომ ენა არსებობაა ერისა და მისი აღკრძალვა, სანამდე იგი ერი ცოცხალია, შეუძლებელია?“¹ — და თავის მხრივ ისტორიის სასტიკი მაგალითით აფრთხილებს: ხვალ შეიძლება უნგრეთი ჩავარდეს უარეს დღეშიო.

დ. მიქელაძე მიესალმება ბულგარეთში დიქტატორ სტამბულოვის გადადგომას, რადგან ის ავიწროვებდა ხალხს...

ყოველი ხალხისათვის გულშემატკივარი დავით მიქელაძე ერთგან წუხს, რომ ხალხის გადასახლების შემდეგ „ჩერქეზთა სამშობლოს სიბნელე და დუშალი მოეფინა“, არ იწონებს მოხელეთა აზრს შავი ზღვის გავერანებულ ნაპირზე ჰაევას შეუჩვეველ ჩრდილოელთა დასახლებაზე და სრულიად ბუნებრივად მიიჩნევს იქ ძველ კანონიერ მფლობელთა, რუსეთის ერთ-

¹ „ივერია“. 1894, № 96.

ბულ ქვეშევდრომთა, ქართველთა დასახლებას, მით უმეტეს. როცა აქ ამდენი უმიწაწყოლო გლეხია¹.

მართალია, მეველე ტირანიისა და ყოველგვარი ძალმომრეობის მტერია, მაგრამ ზოგჯერ გულუბრყვილო შემარიგებლობასაც იჩენს. მაგალითად, მას გადამეტებულ პრეტენზიად ეჩვენება ჩეხების დემონსტრაცია, რომელიც 1893 წლის სექტემბერში ჩატარდა ავსტრიის მიერ პრალაში სამხედრო წესების შემოღებასთან დაკავშირებით. მეველის აზრით, ჩეხებმა ჰაბსბურგებისაგან მიიღეს საკუთარი პარლამენტი, სამართალი, ეროვნული სკოლა, უნივერსიტეტი, მწიგნობრობა და ა. შ., ამიტომ მათ არ ჰმართებდათ ავსტრიის დროშის გათელვა და ლერბის შეურაცხყოფა. მეველე ამას აღნიშნავს მხოლოდ გარკვეული გარემოების შესაბამისად და იმავე სტატიაში აღტაცებას გამოთქვამს ჩეხთა დეპუტატის გრეგორის სიტყვის გამო, რაც იმას ავსტრიის პარლამენტში წარმოუთქვამს და რასაც თვითონ თითქმის მთლიანად იმორწმებს. აი ამ სიტყვის ნაწილიც: „შეძლება მოგვეციოთ, რომ ჩვენსავე ქვეყანაში ბედნიერნი ვიქნეთ, რომ ჩვენს თავს თავისუფლად ვგრძნობდეთ, და მხოლოდ მაშინ გვექნება უფლება მოლოდინისა, რომ ავსტრიისათვის თავს დასდებენ ჩეხნი“. მეველეს ხიბლავს გრეგორის სიტყვა და თავის მხრივ დასძენს, რომ „ხმალი, სახრჩობელა და სამარე, არავის გულში არ გაადვივებს არც სიყვარულს და არც ერთგულებას“². ამ თვალსაზრისის ავტორს შეეცდომა მოსდის უფრო იმიტომაც, რომ ვერ ამალღებულა კლასთა ბრძოლის და ერთა ნაბღვილი

¹ „ივერია“, 1894, № 120.

² „ივერია“, 1893, № 272

თავისუფლების რაობის გაგებაზე, და ჰაბსბურგების მიერ ბოძებულ „თავისუფლებას“ სინამდვილედ თვლის.

მეველის სტატია-ფელეტონებას მთავარი თემა მაინც საქართველოა. ყოველ საჭირობორტო საკითხს ეხმაურება ეს გულშემატკივარი კაცი, „დროების“ მუღმივი კორესპონდენტი: ქუთაისს რომ რკინიგზა ასცდა („ქუთაისის დამცილება“); აბაშიძეებმა რომ გლეხების ხელახლა დამონება განიზრახეს („ადიგსო საწყაული“); ვიდაც დილეტანტმა რომ დიდ ქართველ პოეტებს ღუმლით აუარა გვერდი, — ყოველთვის და ყველგან მეველე გამოჩნდა და კეთილსინდისიერების, წესრიგისა თუ შეცნებისაკენ მოუწოდა, აღაშინებდა.

მეველას იმედიანი, იუმორით შეზავებული, ოპტიმისტური საქმიანი ფელეტონები ალტაცებას იწვევენ და ხშირად არ ჩამოუვარდებიან უფრო სახელმოხვეჭილ მწერალთა ფელეტონებს არც მახვილგონიერებით, არც აქტუალობით. აი, ერთ ფელეტონში ის აღფერქვლებს ახალ (1873) წელს, თეთრწვერა ბერიკაცს, რომელსაც თუმცა ისეთი არაფერი მოუცია: რაინდობაც სწორედ ისაა, ადიდო ის, ვინც არაფერს გაძლევს, თორემ თუ აგავსო, საუნჯე სალაროებში არ ეტევა, მაშინ ქებაც ადვილიაო, — შენიშნავს ირონიულად.

ფელეტონისტს აღელვებს ქვეყნის ბედი, სანუგეშოს არაფერს ელის არც ახალი წლისაგან, მაგრამ იმედს როდი კარგავს: „მე ამით იმის თქმა კი არ მინდა, რომ ჩენა მაჯის ცემა სამუდამოთ თუ არა, ძალიან დიდი დროით მაინც შეჩერებული იქნება-თქო, არა! ღმერთმა დამიფაროს ამნაირი სასოწარკვეთილებისაგან! მე ერთობ დარწმუნებული ვარ, რომ საქართველო აღორძინდება: საზოგადოება დაეწაფება შრომას, ხალხი მშვე-

ნავრად მორთავს თავის ბედს“¹. აღტაცების ღირსია ასეთ პირობებში მისი მსჯელობა: „უნდა გითხრათ, უიმედობა საზოგადოთ საძაგელი თვისებათაგანია აღამიანში“.

ჩვენს ქვეყანას მეველის დროს არაფერი არ ესაჭიროებოდა ისე, როგორც იმედი და გაუტეხელობა, ამასვე ეძღვნა ილიას „ჩემო კარგო ქვეყანავ“, აკაკის „ჭალარა“...

მეველის იმედიანი სიტყვაც ნუგეშად გაისმოდა „დროებისა“ თუ „ივერიის“ ფურცლებზე და ამზადებდა ხალხს უკეთესი მერქისისათვის საბრძოლველად.

1

¹ „დროება“. 1874, № 408.

მეველე — ლიტერატურული და თეატრალური მიმოხილველი

დ. მიქელაძე დიდ ცოდნას, ტაქტს, ალღოს და გემოვნებას ამჟღავნებს თავის მოკლე ლიტერატურულ წერილებში. მეველე საქმიანად და გონივრულად იხილავს ქართული ლიტერატურის ზოგ კარდინალურ საკითხს. წერილში „ლიტერატურა სხვა და სხვა ქვეყანაში“, ის სვამს კითხვას: „განა ჩვენი მწერლობა ეხება უმთავრეს საზოგადოებრივ ნაკლოვანებებს? განა ის სძრავს ქვეშაღიერად ხალხისათვის საინტერესო და სასარგებლო კითხვებს?“ — და ნიმუშად მოჰყავს საზღვარგარეთის მწერლობა. სადაც ყოველი ძირითადი საკითხი „ჭერ ლიტერატურაში წყდება“ და გაზეთის სიტყვას დამცველთა ლეგიონები უჩნდება. „ეს არის თავის შრომის გამოყენება ხალხისათვის! ეს არის მოქმედება! თორემ თქვენი მოღვაწეობა და ფაციფუცი აბა რა სამნიშვნელოა? ხმა მლაღადებლისა უდაბნოსა შინა...“¹.

მაგრამ მეველე გულუბრყვილო მრჩეველი როდია. მან იცის ჩვენი მწერლობის დუმილის მიზეზი. ევროპის მრავალ ქვეყანაში მწერალს „აქვს სრული უფლება და საშუალება ილაპა-

¹ „დროება“, 1873, № 50.

რაკოს ყოველ საგანზედ, რაგინდ მოსარიდალი იყოს. იმას შეუძლია გამოააშქარაოს თვითოეული ბორბტება, შეეხება ეს მალლა მდგომს პირს თუ მთელს საზოგადოებასაც. იქ მწერალს სავსე აქვს ხელები მომაკვდინებელი ისრებითა — ის თავისუფლად გრძნობს თავს“, და საზოგადოებაც იოუთმენლად ელის მწერლის, თავისი მეგობრის სიტყვას.

ასეთ მდგომარეობაში, მეველის დასკვნით, ლიტერატურა ერთი უძლიერესი საშუალებათაგანია აზრების მოსაფენად ხალხში. მეველე აქ გვევლინება როგორც დიდი მოაზროვნე. ჰეშმარიტად ღრმად განსწავლული მოღვაწე, რომელსაც კარგად ესმის მწერლობის დანიშნულება, რომ მწერლობას — ერის წყლული უნდა აჩნდეს წყლულად. აქვე მოითხოვს იგი მწერლობისათვის თავისუფლებას, ურომლისოდაც არ არსებობს ნამდვილი შენოქმედება!

მეველე გრძნობს, რა მძიმე დღეშია ქართველი მწერალი, რომელსაც პირა წყლით აქვს სავსე, მაგრამ მაინც მოითხოვს. ისე მაინც ემსახუროს ხალხს, როგორც შეუძლია.

ყოველ ზოგად საკითხს მეველე უკავშირებს ღროსა და ადგილს, აყენებს მას საღღესო საჭიროების სამსახურში. ამის ნიმუშია მისი სტატია, მიძღვნილი გრიგოროვიჩის 50 წლისთავისადმი.

მეველე გრძნობს ტექნიკის განვითარებასთან დაკავშირებულ სიკეთეს, მაგრამ იმასაც შენიშნავს, რომ „ორთქლმა და ელექტრონმა შეიტანა ხალხში ისეთი გასაოცარი სისწრაფე და სულწასული მუშაობა, რომ ადამიანის აზრი ველარ ახერხებს სრულად მოიფიქროს, შეიმუშავოს, ასწონოს და მხოლოდ ამის

შემდეგ გამოთქვას, რასაცა ჰფიქრობს“¹. ამ მოვლენასთან დაკავშირებით მეველე შეშფოთებულია ღარიბ მწერალთა მდგომარეობით, რომლებიც იძულებულნი არიან ნაჩქარევად წერონ არსებობის შენარჩუნებისათვის, თანაც წერონ ვრცლად, ხოლო „ზრუნვა ყურნალისტთა იმაზედ, რომ ნაწერა იყოს მშვენიერი, უნაკლულო, სრულიად მივიწყებულია“. ამასვე მიაწერს მეველე „ათ-ათი და ათასი წიგნების დაბადებასა და სიკვდილს“, რომელთაც „თავზე ხელის შემომრტყმელი არავინა ჰყავთ, გარდა თავის ავტორისა“.

აქ საინტერესო არაა მეველის შეხედულება „მდიდარ“ და „ღარიბ“ მწერლებზე, არც სოციალურ საფუძვლებზე ყურადღების შესუსტება, არამედ მისი თვალსაზრისი მწერლობის მალა დანიშნულებაზე. მისი თქმით, „მწერლობა არ არის ისეთი საგანი, რომელშიაც ჯაფითა და მეცადინეობით ბევრი რამ მოიპოვებოდეს, როდესაც მწერალი მოკლებულია ნიჭს. ამგვარი მუყაითი და მშრომელი შეიძლება მეცნიერი გახდეს, მაგრამ მწერალი კი ვერასდროს ვერ შეიქმნება“. ფრიად საყურადღებო, საღა და ნათელი აზრია. მწერლობა ნიჭის, სინდისისა და მოწოდების ნაყოფია და არა ჯაფისა და სურვილისა, როგორც დღემდე ეჩვენება ზოგიერთ მოხალისეს.

მეველეს სტამბა მიაჩნია „უღარესად მოქმედ ძალად კაცობრიობის ცხოვრების ბედნიერებისათვის“, მწერლობა — განთიადის პირველ მაუწყებლად; „იგი ხმამაღლა აღიარებს ჩაგრულთა უფლებას; მას არ უნდა ჰქონდეს კავშირი სიბნელესთან, არამედ მეგობარი უნდა იყოს მხოლოდ სინათლისა და კე-

¹ „ივერია“, 1893, № 236.

თილისა“. აი ასეთ მაღალ დანიშნულებას უსახავს მეველე მწერ-
ლობას, და არც ის რჩება უთქმელი, რომ „ზოგის ქვეყნის მდგო-
მარეობა არ აძლევს ნებას მწერლობას შეასრულოს თავისი
წმინდა და მაღალი დანიშნულება“; რომ ზოგჯერ „ანგელოზის
და ღვთის სამსახურის ნაცვლად იგი ემსახურება ეშმაკს და
სატანას“¹.

ასე ნათელი, პირდაპირი და რადიკალურია მეველე ყოველ
საქმეში, რასაც კი მსჯელობის საგნად ხდის. ამიტომ ვასაგებია,
რომ უპირატესობას ანიჭებს იმ მწერლებს, რომლებიც სპარტა-
კოვით ბორკილის დამსხვრევას ცდილობენ.

სავსებით საღი, მრავალმხრივი და მისაღებია მეველის ზოგა-
დი თვალსაზრისი ლიტერატურის, მწერლობის დანიშნულება-
ზე: „ლიტერატურის დანიშნულება იმაშია, რომ მან უნდა გა-
ავრცელოს საზოგადოებაში სამართლიანობა, თავისუფლებისა
და დამოუკიდებლობის სიყვარული, განათლება, ქვეშარტი
აზრები. ლიტერატურამ უნდა ჩაუწეროს კაცს სამსახური და
თავის შეწირვა სამშობლოს ბედნიერებისათვის და სხვ.“².

მაგრამ უმეცარი და ბოროტი ადამიანების ხელში ლიტე-
რატურა და პრესა ხშირად კერპობის, უსამართლობისა და მო-
წიბის იარაღად ქცეულა. ამისი მაგალითია კრაევსკი თავისი
„გოლოსით“. მეველე მოუკრიდებლად ესხმის თავს „შესაბრა-
ლისი ცოდნის“ პატრონ კრაევსკისა და მის „გოლოსს“. წერა-
ლის ეს ადგილი მრავალწერტილით წყდება. ჩანს, ცენზურამ არ
გაუშვა ის, რაც მრავალწერტილითაც ნათლად იგულისხმება.

¹ „ივერია“, 1893, № 236.

² „დროება“, 1872, № 47.

„გოლოსის“ გამოხდომა, მეველის თქმით, ბოროტებაა, რასაც „მთელი დედამიწა რომ გადააფარო, მანც ვერ დაფარავ“.

რაში მდგომარეობდა ეს გამოხდომა? საქმე კავკასიის ხალხებს ეხება. „გოლოსი“ წერდა: „ადგილობრივი ენები მხოლოდ განათლების მისაღებად არის საჭიროო“. დ. ზურაბისშვილი აღშფოთებულია: გამოდის, რომ ენა მიზანია და არა საშუალება. იქვე განაგრძობს „გოლოსის“ აბსურდული, რეაქციული და დღემოკლე „აზრების“ ანალიზს: „ადგილობრივი ენების გავრცელება ბარბაროსობის ქადაგება იქნებაო; რადგანაც ამ ხალხებს არა აქვთ არავითარი კულტურა, იმათი არსებობა შეუძლებელიაო“, — მოჰყავს კრავესკის სიტყვები და თავის მხრივ აშბობს: „თანახმა ვარ, რომ ჩვენი კულტურა ღარიბია ისე, როგორც ზოგიერთი სამოცდაათი მილიონი ხალხის კულტურა, მაგრამ ამ მიზეზით რომ ხალხებს სიცოცხლე აღკრძალოდა, ახლა ცის ქვეშეთზედ არავინ იქნებოდა“.

აქ ჩვენს კმაყოფილებას იწვევს არა იმდენად თავისთავად მახვილი და ენერგიული გალაშქრება ბარბაროსული ღონისძიების წინააღმდეგ, რასაც კულტურის პოზიციებიდან ტვან-ნაღრძობი დილექტანტები ქადაგებდნენ, არამედ მეველის შიერ ხალხის ენის მჭიდრო დაკავშირება ხალხის სიცოცხლესთან: ენის მოკვდინება — ხალხის მოკვდინებაა! ხალხის მოკვდინება კი შეუძლებელია და ასეთი აზრი მხოლოდ სულით ავადმყოფ დესპოტს შეუძლია მოუვიდეს თავში.

„გოლოსის“ აბსურდული ხმის თანახმად, ერთ ორგანიზმში (სახელმწიფოში) „შეუძლებელია სხვა და სხვა ენები ერთიმეორესთან მოთავსდნენ“. ამ უაზრო „ღრმა სიბრძნის“ გასაფანტავად დ. მიქელაძე ცოცხალ მაგალითებს მიმართავს: ავსტრიაში

კარგად თავსდებიან გერმანული, უნგრული, სლოვენური; ამერიკის შეერთებულ შტატებში — ინგლისური, ფრანგული, გერმანული და ა. შ. ამ ენებზე სწავლობენ, არსებობს დაწესებულებები. მაგრამ თვით „გოლოსი“ ვერ იტყვის, რომ ეს ქვეყნები ორგანიზმები არ იყვნენ, რომ მათში არ არის განათლებათ.

შემდეგ მეველეს მოჰყავს „გოლოსის“ სასაცილო მოსაზრება: „გურული, იმერელი, კახელი, ქართლელი ერთიმეორის ლაპარაკს ვერ გებულობენო“, — და მიქელაძე აღშფოთებული ეკითხება მკითხველს: „რა არის ეს? უაზრო სიცრუე თუ უსინდისო განზრახვა?“ — ცხადია, ორივე, მაგრამ ასეთი ფაქტების შემდეგ „განა ღირს საკადრისი მუსაიფის გაგრძელება?“

ცხადია, კრაევსკის გარდა იყვნენ ნათელი გონების რუსი მოღვაწეები, სკალკოვსკი და სხვები, რომელთაც ამაგი დაუდვიათ ჩვენი კულტურისათვის, და მეველეც მათ მადლიერების გრძნობით იხსენიებს.

თუ მხატვრული სიტყვა თავის ჭეშმარიტ მოწოდებას ლატობს, პირუთვნელი კრიტიკოსაც უღმობელია და კილავს უნდილ, უიდეო მწერლობას. „როდესაც მწერლობა საქვეყნო ინტერესების და პრინციპების მწვერვალებიდან ჩამოეშვება და ჭენჭყობში დაიწყებს ყიყინს ბაყაყსავით, კერძო და პირადის ანგარიშების გასასწორებლად, — მაშინ ჩვენ ასეთის მწერლობისა არა გვწამს რა და ჭეშმარიტად გვებრალება ავტორიცა და იმისი მკითხველიც“¹.

შსგავს შემთხვევაში კრიტიკოსი კლასიკოსთა მაგალითებზე მიუთითებს.

¹ „ივერია“, 1893, № 139.

დ. მიქელაძის კალანს ეკუთვნის მრავალი სტატია, მიძღვნილი მხატვრული სიტყვის ოსტატებისადმი. აი, მაგალითად, რამდენიმე სიტყვა სტატიიდან, რაც რუსთაველის უკვდავ პოემას უძღვნა: „აქ ყველაფერი უმწვერვალესს ხარისხამდეა აღყვანილი: სურათები, აზრები და თვით ჰარმონია ლექსთა წყობისა... ეს პოემა სძენს ქვეყანას სახელსა და დიდებას ერთა წინაშე; ეს პოემა ამკობს და ამშვენებს ქართველის ოჯახს, ქართველის ღმერთს, ქართველის სულსა და გულს“¹.

მაგრამ ეს თავისთავად მშვენიერი, ხატოვანი შეფასება თვითმიზნად კი არ სჭირდება მეველეს; შემდეგ ის უნიშნავს, რომ „რუსთაველს ჯერაც არა აქვს აგებული ძეგლი“, და სამარცხვანოდ მიაჩნია, რომ ჯერაც არ გვაქვს ისეთი მწერლის ძეგლი, როგორც შოთაა.

1893 წლის 25 აპრილს განჯიდან ნიკოლოზ ბარათაშვილის ნეშტის გადმოსვენებაზე დ. მიქელაძე, თ. რაზიკაშვილთან, ი. მეუნარგიასთან და სხვებთან ერთად, პირველთაგანი გამოხატავს ხალხის გულისთქმას, ბექდავს „ივერიაში“ საკმაოდ ვრცელ წერილს, გაყდენთილს ღრმა სიყვარულით პოეტისადმი, რომელიც „ელირსა საუკუნო ბინას, ბინას შესაფერს და სანატრელს“. მართლაც, ეს იყო ქვეყნის დიდი ხნის სურვილი. „ქართველი ერი სასოებით და მოწიწებით მოელოდა ამ დიდებულს წამს!“ — წერს დ. მიქელაძე და წუხილით იგონებს ჭაბუკ პოეტს, რომელსაც მხოლოდ მეგობარ-ნათესავთა წრე იცნობდა, ისე გარდაიცვალა შორს, უცხოთა შორის, უნუგეშოდ, უჭირისუფლოდ.

¹ „ივერია“, 1893, № 140.

მეველეს ნ. ბარათაშვილი მიაჩნია ხალხის „ჭირისა და ლხინის მგოსნად“, რომლის ჭირისუფალი „მთელი ქართველი ერია“, და „გზა უვალი მისგან თელილი“ გაფართოვდა. ერი არ ივიწყებს რჩეულ შვილებს, აღრე თუ გვიან უთუოდ გადაუხდის სამაგიეროს. ამ მოკლე და ფრიად გონივრული დახასიათებიდან მეველეს ისევ გამოჰყავს დამახასიათებელი დასკვნა: „ერს, რომელსაც ბარათაშვილის მსგავსი მგოსანი გამოეზრდება, თამამად, გაბედვით შეუძლიან თვალი გაუსწოროს მომავალს“¹.

საყურადღებოა, რომ მეველე ყოველ საგულისხმო მოვლენას — ქვეყნისა და ხალხის მომავალს, მის წინსვლასა და უკვდავებას უკავშირებს. ამ თვალსაზრისით აფასებს ნ. ბარათაშვილსაც. ქვეყანა ხშირად ვარდება განსაცდელში, და სწორედ ამ განსაცდელში მოევიწინება ხოლმე იმედის შთამნერგველი მგოსანი, გაღის დრო და მის სიტყვას ნაყოფი გამოაქვს. პოეტის ვალის ასეთი მაღალი გაგება განასხვავებს მეველეს იმ ვიწრო პორიზონტის მწერალებსაგან, რომელთაც უნარი არ შესწევთ ხოლმე შენიშნონ და განაზოგადონ მოვლენები.

1893 წლის 1 დეკემბერს ალექსანდრე ყაზბეგის გარდაცვალებას „ივერიის“ პირველ გვერდზე ერთდროულად ეხმარებიან დ. მიქელაძე და ვაჟა-ფშაველა — პირველი სტატიით, მეორე კი ლექსით.

მეველე მაღალ შეიფასებას აძლევს ყაზბეგს. მისი თქმით, „იქნება არც ერთი ქართველი მწერალი მეცხრამეტე საუკუნისა არ ჰლორსებია ყაზბეგისთანა დიდს ასპარეზს. ყაზბეგის „მო-

¹ „ივერია“, 1893, № 85.

ძღვარი“, „ელგუჯა“ და „მამის მკვლელი“ უძვირფასეს განძს შეადგენს ჩვენს ლიტერატურაში!“

მეველე ცოცხალი მოწმეა იმისა, რომ „ყაზბეგის ოდენი მკითხველი, მკითხველი გატაცებული, გულაქანკალებული, ოვალზედ ცრემლმორეული და აღელვებული — არც ერთს ქართველს ავტორს იქნება არა ჰყოლია“. მთელს მის სამწერლო ღირსებას „საფუძვლად და მცნებად აქვს სამშობლოს უანგარო სიყვარული, რაც განსვენებულს უხვად უღვივოდა გულში“. ამით ხსნის მეველე ყაზბეგის განსაკუთრებულ პოპულარობას. „ყაზბეგის ნიჭი და ღვაწლი იყო ჩვენი აწმყო ლიტერატურის შვენება“; მისი „სინაზე, რაინდული ღირსება და კაცური კაცობა“, მეველეს თქმით, ჯერ კიდევ ელის ჯეროვან დაფასებას.

მეველეს ყურადღებიდან არა რჩება არც უცხოეთის და რუსეთის გამოჩენილი მოღვაწეები. მან სპეციალური სტატია უძღვნა ალექსი პლეშჩეევის გარდაცვალებას, მაღალ შეფასებას აძლევს ამ ცნობილ პოეტს, რომელსაც „არც ერთხელ არ უღალატნა მტკიცედ განსაზღვრულის კეთილშობილის აზრისათვის“¹. მის მთავარ დამსახურებად მაინც ის მიაჩნია, რომ „იგი ხშირად ძლიერის და მშვენიერის ლექსით შეებრძოლებოდა ქვეყნის უსამართლობას და ბოროტებას“. მან იცის, რომ პოეზიაში „პლეშჩეევი არ ყოფილა პირველი ხარისხის ვარსკვლავი“, მაგრამ მომადლებულ ნიჭს „კეთილად ხმარობდა“.

ასევე გულთბილად იხსენიებს ყველგან დიდ ტოლსტოის, პუშკინს, ლერმონტოვს, ბელინსკის, გრიგოროვიჩს და მოძნე რუსეთის სხვა გამოჩენილ ადამიანებს.

¹ „ივერია“, 1893, № 209.

მეველე, როგორც თავისი დროის ჭეშმარიტ მოღვაწეს შე-
ეფერება, უყურადღებოდ არ ტოვებს საზოგადოებრივი და
კულტურული ცხოვრების არც ერთ მხარეს. კერძოდ, საგუ-
ლისხმოა მისი მსჯელობა თეატრზე საერთოდ, და კერძოდ, მისი
დროის ზოგიერთ დადგმაზე.

1873 წლის დეკემბრის დასაწყისში მეველე დასწრებია ერთ-
ერთ შაბლონურ წარმოდგენას და, „უაზრო და გახეხილი მო-
რალათ“ ხასიათწამხდარი, „დროებაში“ ათავსებს სტატიას
„თეატრის მნიშვნელობა“¹.

მეველეს თეატრი მიაჩნია სარკედ, რომელშიც ადამიანი და-
ინახავს თავის სახეს, საზოგადოება — თავის გამოხატულებას.
რამდენადაც კარგია სარკე, იმდენად სწორია მიღებული სუ-
რათი.

მთავარია პიესა, როგორც ლიტერატურული მოვლენა, მაგ-
რამ ეს არ კმარა. ის უნდა იყოს „სიცოცხლიდან გამოტანილი
სცენაზედ“, უნდა გვალეღვებდეს. ზოგი პიესა უხვად შეიცავს
ხმაურს, მტვერს, მაგრამ რა საჭიროა ასეთი რამე სცენაზე?
შრომა დაკარგულია, თუ ავტორი ვერ ხედავს ბოროტების მი-
ზეზს და ვერც მისი გამოსწორების გზას. ეს არაა დრამატურ-
გობა.

მეველის აზრით, არიან მწერლები, რომელთა სიტყვა, აზ-
რი, იდეა, ზოგადკაცობრიულია და ყველა ხალხისათვის საინ-
ტერესო (შექსპირი, ჰიუგო, გოეთე); არიან აგრეთვე თავისი
ხალხისათვის საინტერესო და სასარგებლო მწერლები, რომელ-
თა პიესა სხვა ხალხისათვის შედარებით უცხოა (გოგოლი, ოს-

¹ „დროება“, 1873, № 49.

ტროვსკი). დასკვნა მეტად მკვეთრია, მაგრამ თუ ზოგიერთ ეროვნულ სპეციფიკას გავითვალისწინებთ, მეველის დასკვნა ბუნებრივია.

სტატიაში „ორიოდე სიტყვა ქართული სცენის მოყვარულებზე“ მეველე ესაღმება „სამ კვირაში სამ წარმოდგენას“, ამ „შესანიშნავ მოვლენას ჩვენს დაყრუებულ ცხოვრებაში. ის დასცნის მათ, ვინც ამტკიცებს, ქართული თეატრის არსებობა შეუძლებელი საქმეაო. „ქართველი სცენის მოყვარეები“ ფანტავენ ამ მცდარ შეხედულებას. მათ პირველად გამართეს რეგულარული წარმოდგენები. მაყურებელიც არის. საჭიროა მხოლოდ ერთი კაცი, ვინც მომწიფებულ იდეას ხორცს შეასხამს.

ერთი კვირას შემდეგ „დროებაში“ მეველე აქვეყნებს სტატიას „რათ იქნება ჩვენთვის ქართული თეატრი“. პირველ რიგში ის ზნეობისა და კულტურის მდგომარეობას ეხება. „ღვინის სმა, ქალაღდის თამაში, საკიცხავი დროს ტარება! აი, ჩვენი ქალაქის თავის შესაქცევი საგნები“. „საზარელ საგნებზე“ ფიქრით მოცული მოღვაწე იბრძვის ასე უმსგავსოდ დროს ტარების წინააღმდეგ და ეძებს გამოსავალს. ერთადერთ გამოსავლად რომ სმა და ღრეობა მიგვიჩნევია, განა არ ჯობია შევექმნათ თეატრება, კლუბები, ჩავატაროთ ლექციები, კრებები და დავაარსოთ ამხანაგობანი, როგორც ეს განათლებულ ქვეყნებში ხდებოა? — სვამს საკითხს მეველე. მისი აზრით, ასეთი რამ ამაღლებს ზნეობას და განათლებას. პირველ რიგში ითხოვს თეატრის დაარსებას. ქალაქში ასი ათასამდე მცხოვრებია, ნახევარზე მეტი ქართველია და დროა შეიქმნას ქართული თეატრი. ერთი რუსული თეატრია და ის ვერ აუღის ყველას. მეველე იგონებს 1852 წლის, ვორონცოვის დროის თეატრს და მის კე-

ჯილისყოფელ გავლენას თუნდაც სისხლის სამართლის დამნაშავეთა შემცირების აზრით. „ერთი საშუალება იქნება თუ მეორე, თეატრი უნდა დაარსდეს მაინცა და მაინც“, — წერს მეველე და დაყინებით ითხოვს თეატრისათვის სათანადო შენობის გამოყოფას, თან ამტკიცებს, რომ ეს არ მისცემს არავის ზარალს.

დ. მიქელაძეს, ლიტერატურულ კრიტიკოსსა და თეატრალურ მიმომხილველს, თვითონაც არაერთი მომხიბლავი სიტყვით გაუმდიდრებია ჩვენი მწერლობის ნოყიერი ნიადაგი.

მეველე — ილია ჭავჭავაძის თანამებრძოლი და „შვილთა“ ბანაკის ერთ-ერთი ბურჯი

„წუთიერი გამარჯვება, უმრავლესობის
უგუნურობაზედ წაქეზება და მით სახე-
ლის მოპოვება არაოდეს არ სწერებულა
ჩვენს დროშაზედ“.

დ. მიქელაძე

„შვილთა“ კადნიერებით აღშფოთებული პოეტი-გენერა-
ლი — გრიგოლ ორბელიანი ასე მიმართავდა ახალი თაობის მე-
სვეურებს:

„ბევრნი მოვიდნენ თქვენისთანები:
კოლო-ბუზები,
ლიბერალები,
ცრუ-პოეტები,
პატრიოტები,
აკაკიები, ბაკაკიები,
რიონელები¹, გოგიტელები²,

¹ ნ. ნიკოლაძე.

² გ. წერეთელი.

გრ. ორბელიანი ახალ ვითარებასა და მომავლის გათვალისწინებაში თუ სწორ პოზიციასზე არ იდგა, მართალი იყო მეველეს პუბლიცისტური ძალის შეფასებაში.

რაზე ბრახობდა „მამების“ ბურჯი? განა მას კი არ ჰქონდა ცოდნა, ახლის გაგება და სამშობლო ქვეყნის სიყვარულის გრძნობა? უდავოდ ჰქონდა.

გრ. ორბელიანის საყვედური სხვა რამეს გულისხმობს. სწავლა „მამებსაც“ ჰქონდათ მიღებული და „შვილებსაც“, მაგრამ ეს ცოდნის თესლი სხვადასხვა ნიადაგზე მოხვდა. თვალსაზრისთა სხვადასხვაობამ განსაზღვრა ორი ბანაკის ქიშპობა. ერთიანი პატრიოტული სულისკვეთების მიუხედავად, ისულ სხვადასხვაგვარი აღმოჩნდა მათი იდეალები. დ. მიქელაძეც თავადი იყო და გრ. ორბელიანიც, მაგრამ რა დიდი განსხვავებაა მათ შორის როგორც პორტრეტულად, ისე თვალსაზრისებსა და ცხოვრების ხასიათში! გრ. ორბელიანი, ჩამომავლობით ამაყი არისტოკრატი, ასეთივე არისტოკრატი დარჩა ბოლომდე, დ. მიქელაძე კი სახითაც და მისწრაფებითაც უფრო ბელინსკის ან დობროლუბოვის მოგვაგონებს და სრული კონტრასტია თვით თავისი მამის, მარშალ ალექსანდრე მიქელაძისა.

იდ. მიქელაძე ახალი ტიპის მოღვაწეთა წარმომადგენელია. მისი მრწამსი, თუ ზოგიერთ განხილულ წინააღმდეგობას არ მი-

¹ ს. მესხი.

² ი. მელიქიშვილი — „დროების“ გამომცემელი.

ვიღებთ მხედველობაში, თავიდანვე ნათლადაა ჩამოყალიბებული. ესაა ახალი ახალგაზრდობის მრწამსი.

„ახალი ახალგაზრდობა“ ს. მეჩხმა შეადგინა გ. წერეთელთან და ნ. ნიკოლაძესთან ერთად. მისი იდეალი იყო ეროვნული თავისუფლება, აზრის, სიტყვისა და სინდისის თავისუფლება, ხალხთა ძმობა, მშვიდობა და პროგრესი, აზრის ტრიუმფი... აი იდეალები, რომელნიც დავით მიქელაძესა და მისი თაობის რჩეულ წარმომადგენელთ ამოძრავებდათ.

მაინც როგორია საკუთრივ მეველის გზა და მრწამსი?

ახლასა და ძველის, მამათა და შვილთა, პროგრესულთა და დრომოქმულის ისტორიულ დავაში მეველის როლის გასარკვევად საყურადღებოა მისი სტატია „საჭირო განმარტება“¹.

„დღეს ვპასუხობთ იმათ, ვისაც შეუდგენია აზრი, ვითომ ჩვენ ძველს ცხოვრებას არავითარს პატივს არ ვსცემდეთ, ვითომ ყველაფერი, რაც კი ძველია, სამასხროდ და სავნებლად მიგვაჩნდეს“...

მეველე გაცხადებულია ამნაირი ბრალდებით და აცხადებს, რომ მათ განუჩივლად, ხელალებით არ უგინებიათ ძველი, ისევე როგორც არ უქიათ ყოველივე ახალი და ნორჩი.

მაგალითად, ახალი თაობის სახელით მეველე აცხადებს, რომ მუდამ სასოებით იხსენიებს ძველ ქართველობას, ვინც თავი გასწირა სამშობლოსათვის და „გაამაგრა საქართველოს ერის თავისუფლება ორიათას წელს“, ვისაც „ოცს საუკუნეს ეჭირა ხელში უმაღლესი ზნეობისა და ქვეშევრდობის ლამპარი“. სისულელე იქნებოდა ამნაირ პირთა შეგინება. მაგრამ განა კიცხ-

¹ „დროება“, 1874, № 429.

ვის, ზიზღის და დაღას ღირსი არ არიან სამშობლოს სიწმინდის შემბლაღველნი, ანგარიშის გულისათვის მისი სიწმინდის გამყიდველნი? — ეკითხება მოდავეებს მეველე, და აცხადებს, რომ ასეთებს, გინდ ძველი თაობის წარმომადგენლები იყვნენ, გინდ ახლისა, შებრალება არ უნდა ეღიროსოთ.

უნდა აღინიშნოს, რომ მეველის ამ სტატიას მოჰყვა ახალი თაობის სხვა წარმომადგენლის, ჭადაგიძის „საქირო განმარტება“, რომლის ავტორიც უფრო სასტიკად ესხმის გაუტანელ, უზნეო, მოძმეთა მძარცველ, ხარბ და მოლაღატე მამებსა და პაპებს (ამათზე შორს არ მიდის!), მათს „ტალახიან სინდისს“, თანაც მათ ყურადღებას აჩერებს იმაზე, რომ მეველე აქებს ძველ, ნამდვილ მამულიშვილებს და არა ამ წარჩინებაზე დახარბებულ ძველ თაობას.

მეველის მოღვაწეობა ბანკის საკითხში ცალკე ვრცელ მიმოხილვას ითხოვს და აქ ამაზე არ შევჩერდებით, გავიხსენებთ მხოლოდ მისი მძაფრი პოლემიკის იმ ნაწილს, რომელიც ილია ჭავჭავაძესაც შეეხება.

1894 წლის მაისში ბანკის მესვეურთა კრებაზე გამოვიდა ოპოზიციის მეთაური მიხეალ მაჩაბელი. მეველე ირონიულად შენიშნავს: მთელი მისი სიტყვიდან მხოლოდ ის გავიგნეთ, რომ თორმეტი წელიწადია ოპოზიციის სათავეში დგას, მაგრამ ვერ გავიგეთ, რა პროგრამა აქვს მის ოპოზიციასო. ყოველ ოპოზიციას პროგრამა უნდა ჰქონდესო, — უკვე ხუმრობის გარეშე აცხადებს ილიას თანამებრძოლი, — მაშ გვიბოძეთ, რა განსხვავებული აზრები გაქვთ სამშობლოს ბედნიერებისათვისო?

აქ საინტერესოა ოპოზიციის დაარსების მიზანი: „მავნებელი მოქმედება თავადის ილია ჭავჭავაძისა, რომელიც უმთავრესად

იმით იყო ძლიერი, რომ სალიტერატურო ავტორიტეტი თან ახლდაო“¹.

მართლაც, ძნელია ილიასთვის ომის გამოცხადებაო, შენიშნავს მეველე, მაგრამ მიხეილ მაჩაბელმა მაინც აღმართა ღროწო და ზედ წააწერა „ახალი პრინციპები, ახალი გზა, ახალი საშუალებანი ქვეყნის დასახსნელად ამ ბარბაროსი ჭავჭავაძისაგან!“ მაგრამ „ჩვენს ტრიბუნს“, როგორც უწოდებს მას მეველე, არ მოუხსენებია კრებისათვის, რაში მდგომარეობს ილიას აზრი და რაში ეწინააღმდეგება მიხეილ მაჩაბელი. მომდევნო სტატიებდანაც ჩანს, რომ მეველე, ილიასთან ერთად, ებრძვის აგრეთვე ივანე მაჩაბელს, რომელსაც, გრ. ორბელიანის თქმით, მუდამ საწინააღმდეგო აზრი აქვს, დასცინის კიდევ მას „ივერიაში“, — „სიტყვა რომ დაეკარგა“ და საკუთარ თავს მეტიჩარა უწოდა.

საერთოდ, ამ სტატიებში აშკარაა, რომ მიქელაძე იცავს ჭავჭავაძეს, და იცავს არა მლიქვნელურად, არამედ პრინციპულად და თავშეკავებულად.

მან საათნახევარი მოთმინებით უსმინა მიხეილ მაჩაბელს, რომელმაც „ივერიის“ მოთხოვნის შემდეგ ინება თავისი პროგრამის გამხელა. მაგრამ ვიდრე სხვა გაზეთებიდან შევიტყობთ, ჩვენ ვერას ვიტყვით ამ პროგრამაზე. რადგან ვერაფერი გავიცეთ, გარდა იმისა, რომ ილია ჭავჭავაძეს „არავენ არ სწამს, თავისი თავის მეტიო“, — შენიშნავს მეველე². მიხეილ მაჩაბელს

¹ „ივერია“, 1894, № 102.

² „ივერია“, 1894, № 104.

განუზრახავს ილიასათვის სახელის გატეხა და მეველის მოხდენილი თქმით, საამისოდ გამოუყენებია ოცდაათი წლის წინ უცნობი ავტორის მიერ დაწერილი ლექსები და დანტეს „ღვთაებრივი კომედია“. საბოლოოდ მიხეილი „შორს მტერს კლავს და ახლოს მოყვარეს“.

მეველე ვერ ასცდა სერიოზულ პოლემიკას ივანე მაჩაბელთან და ვერც ასცდებოდა. ცოტა მოგვიანებით ის ეხება მაჩაბლის გამოსვლას საბანკო კრებაზე და მის მიერ „ივერიის“ დამუშავებას. მისი ცდა, მეველის თქმით, ესაა „ადექ შენ, რომ მანდ მე დაგვდე“: ოლონდ კი ჭავჭავაძეს მეკენჭეები ჩამოაცილოს და ქვა ქვაზედაც ნუ დარჩებაო! ბოლოს კი ამოა მცდელებს აფრთხილებს: ბანკიც და თქვენც წახვალთ, ილია კი დარჩებაო.

მაგრამ მეველე აღიარებს მაჩაბლის ღირსებებს, აფასებს მის მიერ დიმიტრი ყიფიანის პატივისცემით მოხსენიებას და კიცხავს კვეზელს, რომელიც ამ საქმეში შაჩაბელს არ ეთანხმება. საერთოდ, მეველე გმობს ოპოზიციის ორსავე მხარეს.

მას საზიანოდ მიაჩნია ეს დაუსრულებელი შფოთი და ოპოზიციური შუღლი. როცა საბოლოოდ კრებამ ერთხმად აირჩია ილია და „გააშავა“ მაჩაბელი, მეველე ამ უკანასკნელს საყვედურობს სრული უნდობლობის გამო.

მეველე არაერთხელ ჩივის შინაურ უთანხმოებაზე, შუღლსა და შურზე, რაც ვნებს საერთო საქმეს. „დას-დასობამ ყველგან არია და მოწამლა სიცოცხლეო“, — ამბობს ერთ-სტატიისში. მაგრამ ეს სულაც არ ნიშნავს იმას, რომ „დასებისა და პროგრესის წინააღმდეგ აღჭურვილია, უარყოფს განათლებას

და სხვ. და სხვ.“¹. პირიქით, მისივე სიტყვით, ეს მხოლოდ იმ მკვლახელთა ცილისწამებაა, რომელთათვისაც „ღმერთს არც საკუთარი აზრი მიუცია და არც ნიჭი სხვისი აზრის გაგებისა“. მეველე დაუნდობელია ასეთი კალმოსნების მიმართ და ამბობს: „გაიგეთ, რომ ჩვენ დას-დასობაც მოგვეწონს და აზრის აზრთან შებრძოლებაც, მაგრამ ყოველსავე ამას საფუძვლად აზრი უნდა ჰქონდეს, აზრი ადამიანური“.

ქართველი ხალხის სულიერ წინამძღოლებზე — ილიაზე და აკაკიზე — დ. მიქელაძე შეძლებისამებრ საქმითაც ზრუნავდა. ეს ჩანს, მაგალითად, ერთ საბანკო კრებაზე მისი გამოსვლიდან.

ბანკის მუშაობაში, როგორც გიორგი წერეთელი ამბობდა, ჩანდა „ერის ცოცხალი მაჯის ცემა, სიცოცხლის ნაპერწკალი“, „კეთილშობილური გულის ძგერა“. ამ სიტყვის ერთი დადასტურება იყო დავით მიქელაძის მიერ შემოტანილი წინადადება, რასაც ბანკის კრება ტაშის ქუხილით შეხვდა: „ბატონებო, ახლა ჩვენ სხვანაირად გამოვხატოთ ჩვენი სიყვარული და მადლობა იმ კაცისადმი, რომელიც უანგაროდ ემსახურება ჩვენს საქმეს ამდენი ხანია: დავუნიშნოთ აკაკის ათას ხუთასი მანეთი სიკვდილამდე“².

მეველე დიდ იმედებს ამყარებს ახალ თაობაზე. მისი რწმენით, „ყოველი საზოგადოების პროგრესის, მისი ყოველგვარი განათლებისა და სიკეთის წინამძღვარი ყოველგან ახალი თაო-

¹ „ივერია“, 1894, № 138.

² „ივერია“, 1889, № 104.

ბა ყოფილა და იქნება“¹, რადგან ის ნაკლებად იტანს უსამართლობას, ძველ წყობილებას და უმეცრებას. საზოგადოების უკეთესი ნაწილიც ყურს უგდებს, ენდობა და მიჰყვება მას. მაგრამ თუ რწმუნდება, რომ ეს წინამძღოლები შარლატანები ყოფილან, მხოლოდ საკუთარი ანგარების დაკმაყოფილება სდომებიათ, საზოგადოებაც კარგავს მის იმედს და უწყებს ლანძღვას. საზოგადოება რჩება უმეცრებაში. — „ამნაირ დანაშაულებასთან რომელი მომაკვდინებელი ცოდვა გამოჩნდება?“ — სვამს კითხვას მეველე; ეს კითხვა დღემდე არაერთხელ დასმულა და შეიძლება დაისვას ბევრი გზასამცდარი, თავხედი, უმეცარი, ყალბ და ფორმალისტურ გზაზე დამდგარი პირისა თუ ჯგუფის წინაშე, რომელიც მუდამ ისევე განწირულია დავიწყებისა და გაკიცვისათვის, როგორც იყო ძველის დროსაც და იმაზე ადრეც. მეველე მოითხოვს ამნაირი ხალხის დევნას საზოგადოებისა და პრესის მხრივაც, თორემ თუ საზოგადოება მიენდობა პირადი სარგებლობისათვის აღძრულ „ჯამიტლეკია განათლებულებს“, კარგი დღე არ დაადგება. გაუფუჭებელი ადამიანი ადვილად გაარჩევსო ნამდვილ კეთილისმსურველს. შარლატანებისაგან, და ამ აზრში ნამდვილი სიბრძნეა. მეველე იგონებს ერთი თანამემამულის ნათქვამს ერთ მოხელეზე: ახალი სერთუკი ჩაეცვა, უანგარო კაცი გვეგონა. მგელი აღმოჩნდა, ცხვრის ტყავ გადაცმულიო, და ხალხს აფრთხილებს, ყველა სერთუკიანს ნუ ჩათვლის ახალი თაობის უანგარო წევრად, გაარჩიოს ავი და კარგი.

¹ „დროება“, 1874, № 426.

მეველეს კარგად ესმის, რომ ჩვენს სინამდვილეში ბევრი საჭირბოროტო და მოუგვარებელი საკითხია, მაგრამ „ამის მიზეზით სასოწარკვეთილებაში ჩავარდნა არ შეიძლება. გავადრო, გაშოჩნდება ახალი თაობა, რომელიც ნათლად გაიგებს ხალხის მდგომარეობას“.

სწორედ ამ ახალ თაობაზე ამყარებს მთელს იმედს ილია ჭავჭავაძის ერთგული თანამებრძოლი: „მე ახალი თაობის იმედი უფრო მაქვს და მის ნიჭიერებაზედაც ნაკლებად ვიქვნეულობ ხოლმეო“, — წერს მეველე „დროებაში“¹.

შადლიერი ახალი თაობაც, მეველის იდეალების კანონიერი მემკვიდრე, დღეს ღირსეულად ამართლებს დ. მიქელაძის იმედს.

¹ „დროება“, 1872, № 32.

**მეველე — სადღეისო საპირობათა მიმომხილველი,
სახალხო განათლებებისათვის მზრუნველი და
პროგრესის მესიტყვე**

„რა ნაყოფს მოუტანს ქვეყანას, თუ
გინდა, დიდად განათლებული ახალგაზრ-
და, უკეთუ მისი იდეალი კაცისა და
ქვეყნის სიყვარული არ არის?“

დ. მიქელაძე

გასული საუკუნის ჩვენი გამოჩენილი მოღვაწეები, თერგ-
დალეულები, პირველ რიგში ქვეყნის სადღეისო საპირობებში-
სათვის ბრძოლით იჩენენ თავს, ამითვე მოიპოვეს ხალხის გან-
საკუთრებული ნდობა და სიყვარული. ჯვისაც თავისი ხალხი
არ უყვარს, ვისაც მისთვის გული არ შესტკივა, ის ვერც შექ-
მნის რაიმე საგულისხმო ღირებულებას. ი. ჭავჭავაძის, ა. წე-
რეთლის, ნ. ნიკოლაძის, გ. წერეთლის, ს. მესხის და სხვათა
სასახელოდ უნდა ითქვას, და არაერთხელ თქმულა კიდევ,
რომ მთელი თავიანთი ნიჭი, ენერგია და სიცოცხლე ხალხის
სამსახურს შესწირეს. მათ შორის თვალსაჩინო ადგილი უჭი-
რავს დავით მიქელაძესაც.

მეველე წლების მანძილზე ნამდვილი ჭირისუფალია თავისი
ხალხისა, ახარებს მისი წარმატება და სწყინს მისი ავი. როცა

1894 წელს 1 იანვარს „ივერიაში“ გასულ წელს ახასიათებს, სიამოვნებით აღნიშნავს, რომ ამ წელს დაიბადა ჟურნალი „კვალი“ და ფეხი აიდგა ჟურნალმა „მოამბემ“; რომ გაიზარდა ქართველთა ინტერესი განათლებისადმი, ალებ-მიცემობა, ბეჭდვის საქმე, კულტურული ღონისძიებების რიცხვი... ხედავს ბნელ მხარეებსაც, მაგრამ „გასული წელი მკვდარია“ და მკვდარზე ძვირის თქმა მიღებული არაა.

ცხოვრების საჭიროებათა ფხიზელი მეთვალყურე მიესალმება ყოველ „სანუგეშო ამბავს“ ქვეყნის ცხოვრებაში, როგორცაა მწერალთა ძეგლების გახსნა, „მოამბის“ გამოსვლა, სკოლების დაარსება, გზების გაყვანა, მადნის აღმოჩენა და ა. შ.

მეველე, როგორც უანგარო მოღვაწე, შორს დგას ყოველგვარი ეგოისტური მიდრეკილებისაგან. „ანგარიშები, დავთრები და საქმეები ვის არა აქვს, მაგრამ ამეებს ლიტერატურასთან რა ხელი უნდა ჰქონდესო!“¹ — წერს დ. მიქელაძე და მოითხოვს განდევნონ უღირსნი საერთო ასპარეზიდან, როგორც განდევნეს ტაძრიდან ვაჭრები და ფარისეველნი.

თითქოს სწორედ „დროებისთვის“ დაბადებულაო, მეველე ყურს უგდებს ქვეყნის მაჯისცემას, მას ახარებს ყოველი ახალი წამოწყება, საზოგადოებრივი აზრის გამოღვიძება, გლეხისა თუ ინტელიგენტის დაინტერესება საქვეყნო საქმეებით; ახარებს სიღნაღის დამწეული მოსახლეობისათვის დახმარების გაწევა, ქუთაისის თვითმმართველობის გამოცხადება და ა. შ.

ყოველივე ეს მეველეს ახარებს, როგორც ქვეყნის ნათელი მომავლის სიმპტომები. „რომ ჩვენი ხალხი ერთი უცხოველეს

¹ „ივერია“, 1893, № 159.

და საინტერესო ხალხთაგანი იქნება კაცობრიობის სახლობაში. ეს მისი ახალი ცხოვრების დასაწყისისაგან სჩანს“¹.

მეველეს არ დარჩენია შეუმჩნეველი არც ის სარეველა, რომელიც თან დაჰყვება ყოველ ჯანსაღ აზრსა და ცხოვრებას. მას მხედველობაში ჰყავს ახალი თაობის სახელით გამოსული ვაჟბატონები, რომელთაც „აუღერიათ თავი“ და ბატონყმობის საშართლიანობაზე ლაპარაკობენ. „დროების“ მოღვაწე გადაჭრით აცხადებს, რომ აზნაური, გლეხი, ბერი თუ ვაჭარი ერთნაირად ქართველია და თანასწორია, მოვალეა ემსახუროს საქართველოს, ებრძოლოს ჩაგვრას ან „განეკვეთოს და ცეცხლსა ზედა დაედოს“.

დ. მიქელაძე იმდენად არის შთაგონებული ქვეყნის აღორძინებისა და თავისუფლების იდეით, რომ პარიზიდან ერთ-ერთ წერილში თავს ესხმის კიდეც თავად მინგრელსკის, რომელმაც გამოჩენილ როზენტალს მოუგო ჰადრაკში: თუმცა სულაც არ თვლის ჰადრაკის თამაშს სააუგოდ, და თვითონვე კარგად თამაშობს, მაგრამ ქვეყანას ახლა სხვა სამსახური სჭირდება და ჯობია ქართველმა თავადებმა ამ საქმეში გაითქვან სახელით. ცხადია, ეს ერთგვარი უკიდურესობაა, რაც მეველეს იშვიათად მოსდის.

მეველეს აღელვებს ხალხის ცხოვრების ყოველი მხარე: რომ გლეხს ცხოვრების სახსარი არა აქვს; რომ „ხალხი სიღარიბით ირჩობა, ხოლო იქვე კი მიწაში აუარებელი სიმდიდრე არის შენახული“².

¹ „დროება“, 1874, № 408. ჟ

² „ივერია“, 1894, № 187.

მართლაც, ყველა უცხოელს აკვირვებს საქართველოს სიმდიდრე, და „ერთხმად აღიარებენ, რომ ცოდვა არ არის ასეთ მშვენიერს, მდიდარსა და შემკობილს ქვეყანაში ხალხი კმაყოფილი და ბედნიერი არ იყოსო?“

ამასთან დაკავშირებით მეველე ეხება ქვეყნის სიღარიბის მიზეზებს, მკაცრად უკუაგდება გავრცელებულ აზრს იმაზე, რომ „ქართველი ხალხი ზარმაცია“. არა, მიზეზი ამ ქვეყნის მესვეურებია, რომლებიც ხალხს გზას უბნევენ, იმის ნაცვლად, რომ განათლების გზა უჩვენონ, და მეველე თვითონ ცდილობს, საქმე ისე წავიდეს, სამშობლოს სიყვარული, ნათელი აზრი და თავისუფლება სუფევდეს. ის მოითხოვს იმის განხორციელებას, რასაც მხოლოდ სიტყვით ქადაგებენ: განათლებული კაცები ხალხს მიეშველონ, იქ იცხოვრონ, დანერგონ ცოდნა და აუხილონ თვალი.

თუ სადმე საქვეყნო საქმე იყო, თუ სადმე პატიოსნების დაცვა ან ჩაგრულის გამოქომაგება გახდებოდა საჭირო, დავით მიქელაძეც, ბესარიონ ლოლობერიძისა და სერგეი მესხის მსგავსად, იქ გამოჩნდებოდა, თავს არ იზოგავდა. ის იყო იმ ახალგაზრდობის აქტიური წევრი, რომელსაც იმავე ბესარიონ ლოლობერიძემ უწოდა „რიგიანი და კეთილის მომნდომები, ქორთვა, მხნე, შრომის მოყვარე და მამულის ერთგული ახალგაზრდობა“.

1879 წ. 26 მაისს ბესარიონ ლოლობერიძე ქუთაისს ჩავიდა და ენერგიულად შეუდგა ბანკის წესდების დამუშავებას, მაგრამ მას წინ აღუდგნენ უგნური და უმეცარი ადამიანები, პირველ რიგში მისივე ბიძაშვილები. სადაც კი სერგეი მესხს ან

დავით მიქელაძეს დაასახელებდა, პირში მიახლიდნენ: „ეგენი საშიში კაცები არიანო, მთავრობისაგან შენიშნულიო...“

ლოლობერიძემ შაინც დიდ-ამაგი დასდო ქუთაისის ბანკს და როცა 1879 წელს გარდაიცვალა და „სამი წლის ობოლი“ ბანკი დატოვა, ჰკუამოკლე საქმოსნები საგონებელში ჩავარდნენ.

დავით მიქელაძის გამოსვლა ბანკის კრებაზე, რომელსაც ასობით ადამიანი ესწრებოდა, გამოხმაურების გარეშე არ დარჩენილა. პრესის აზრისა და დიმიტრი ყიფიანის საგულისხმო წერილის გარდა, ყურადღების ღირსია კონსტანტინე ყიფიანის წერილი, რომელიც „დროების“ 1879 წლის 24 ივლისის ნომერში დაიბეჭდა. შადლიერი მოხუცი „დროების“ მწერალს გულთბილი სიტყვებით მიმართავს: „მე, რაჭის მაზრის მცხოვრებმა, მოხუცებულობაში მიწევნილმა, რომ წავიკითხე თქვენი გრძნობით წარმოთქმული სიტყვა... ვთქვი: „აი კაცი, მოყვარული თავისი უშეცროსი თანამოძმის, აი კაცი-მეთქი, რომელსაც აქვს ნამდვილი სიყვარული ერთობისა, რომელიც არის წყარო საზოგადო კეთილწარმატებისა და ხალხის წინ ფეხის წადგმისა-მეთქი!“ წერილის ავტორი მიქელაძეს სთავაზობს თავის მხურვალე თანაგრძნობას და რწმენას, რომ ჰყავს მრავალი თანამოაზრე. „მე ნასწავლი არ გახლავარ, — წერს კ. ყიფიანი. — მაგრამ თანშობილის აზრით, ჰეშმარიტათ დიდად ვწუხვარ იმ სამასის გულმოსულობას და ბოროტების საქმის გამარჯვებას“. ეს გაუნათლებელი, ალალი გულის კაცი ამბობს, რომ თვითონაც ძველს ეკუთვნის, მაგრამ რატომ არ უნდა შეხვდეს ყველა აღტაცებით სასარგებლო და ქვეყნის სასიამოვნო საქმეს, ეს კი ვერ გაუგია!

მსგავს შემთხვევებში. მეველე მსჯავრის გამოტანას მომავალ თაობას ანდობს: „რას იტყვის და რა ისტორიას დასწერს მათზედ მათის ახლანდელის ბოროტის საქმის გამარჯვებაზედ ჩვენი შემდეგი ახალი თაობა? ეს მათთვის მიმინდვია. როგორც ენებოთ, ისე განსაჯონ“. სადაც ხეპრე ქადაგებს, მეველე მოკლედ მოუპრის და ზურგს აქცევს, მაგრამ ამას კი დასძენს: „გლეხები არიან ყოველის წოდების კაცის მზრდელიო“.

აქედან ნათლად ჩანს, რა ზეგავლენაც ჰქონდა მეველის სიტყვას, რა გამომხაურებას პოულობდა მისი საქმიანი სტატია თუ გამოსვლა სადღეისო საჭირბოროტო საკითხებზე:

გასული საუკუნის ჩვენი ეროვნული, საზოგადოებრივ-პოლიტიკური თუ ლიტერატურული ცხოვრება საოცრად არის გადაჯაჭვული ბანკის საქმესთან. ბანკი გახდა ერთგვარი ასპარეზი, ტრიბუნა, ფორუმი, სადაც ერთმანეთს ეჯახებოდნენ თვალსაზრისები, წოდებები, მოღვაწეები, ვნებათა ღელვანი, რედაქტორები, თუ ეგოისტები.

ამ საბანკო ორომტრიალში თავისი მღელვარე ბუნებით იყო ჩაბმული სხვა პროგრესულ მოღვაწეებთან ერთად უანგარო დავით მიქელაძეც.

„დროებაში“ არაერთხელ ვხვდებით ბანკთან დაკავშირებულ ცნობებს, სტატიებს, ფელეტონებს, რომელთა ავტორი ან ობიექტია დავით მიქელაძე.

ცნობილია, რა ვაი-ვაგლახით დაარსდა ქუთაისის საადგილმამულო ბანკი. როგორც ს. მესხი შენიშნავდა, ჯერ კიდევ დაბადებამდე აწვალეს უხეირო ბებიებმა, შემდეგ კიდევ რამდენ გაჭირვებაში ჩავარდა! მთავარი უბედურება მაინც ის იყო, რომ ყველა იძახდა „მეო“ და არავინ — „ჩვენო“.

მით უფრო საგულისხმოა ამ საქმეში დავ. მიქელაძის როლი, რადგან სწორედ ბანკის საზოგადოებრივი მნიშვნელობა წამოსწია წინ, მოითხოვა მისი სამოქმედო არის გაზრდა და მისი ჩაყენება პირველ რიგში პროგრესის სამსახურში.

პირადი გამორჩენის მიზნით მოცული თავადები ცილს სწამებდნენ „დროების“ გარშემო თავმოყრილ ახალგაზრდობას,— ბანკის ხელში ჩაგდება გინდათო; უარს ამბობდნენ საქვეყნო საქმისათვის ფულის გაღებაზე და საქმის განსჯის ნაცვლად გაგყებით გაიძახოდნენ: „კენჭი! კენჭი მოგვეცითო!“

ფელეტონში „საგომბელი და საქებელი“ განხილულია დ. მიქელაძის და მისი მომხრეების შეჯახება ქედმაღალ და ბევრ თავადებთან, რომლებიც უაზრო გულმოსულობას ბანკის კრებაზე „გადარეულ მხეცად“ უქცევია.

✓კრებამ შოისმინა ზედამხედველი კომიტეტის მოხსენება: ორასიოდე მანეთს ითხოვდნენ ორი გლეხკაცის შვილის გასაგზავნად რუსეთში უმაღლესი სწავლის მისაღებად. ამ მოთხოვნას გაუბრაზებია „ნაადვოკატარი“ ვინმე მიხეილ დარახველიძე, დაუწყია კრებაზე „სიტყვების რახა-რუხი, აზრების ბრახა-ბრუხი, კეთილშობილების ჭახა-ჭუხი“¹, გულმოსულობის ბოროტ სულს ბევრი მომხრე გამოსჩენია: „როგორ თუ ჩვენი ქისიდან ორას მანეთამდე მიგიციათ ვიღაც გლეხკაცის შვილების შესაწევნათო!“

სწორედ ამ სხდომაზე, როცა თავადები გადაყლაპვას უპირებდნენ ბანკსაც და მის კომიტეტსაც, სამართალი აღდგა კე-

¹ „დროება“, 1879, № 110.

თილშობილი და გონიერი ახალგაზრდა დავით მიქელაძის პი-
რით (ამ დროს მეველე 36 წლისა იყო) და ამბოხებულ თავა-
დებს მიახალა:

„— ჩვენ გვრცხვენია, ბატონებო, გვრცხვენია, რომ ამის-
თანა საყვედური წარმოითქვა ამ ჩვენ კეთილშობილ საზოგა-
დოებაში მიხილ დარახველიძისაგან, რომელიც ასე დაუფიქ-
რებლად თანაუგრძნობს თავად-აზნაურობას... ორასი მანეთის
თაობაზედ, რომელიც მას (კომიტეტს) მიუწოდებია ორიოდე
გლახკაცის შვილისათვის, რომელთაც დასჭირებიათ ამგვარი
შეწევნა სწავლის შესასრულებლად იმ მაღალ სასწავლებელ-
ში, სადამდინაც იმათ მიუღწევიან ბეჯითობითა და შრომი-
თა. — სირცხვილია, ბატონებო, ეს! ათასი წელიწადი მუქთად
გვემსახურებოდა, მუქთად გვარჩენდა ჩვენ ეს გლახკაცობა
თავისი ოფლითა, და თქვენ, კეთილშობილნი, ასე დასტირით
იმ ორას მანეთსა, რომელიც მთელი ჩვენი საზოგადოების
მხრითა დახარჯულა ამ გლახკაცის შვილზედა, იმ ჩვენივე მა-
შულის შვილზედა! სირცხვილია ეს, ბატონებო, სირცხვილი
ჩვენი საზოგადოებისათვის!“¹.

მართლაც, ეს დიდი სირცხვილი იყო, და ასევე დიდი სახე-
ლია ახალგაზრდა თავადისათვის, რომელიც თავისი ფხიანი
სიტყვით გამოვიდა გლახკაცთა ინტერესების დამცველად, რო-
გორც მოღვაწე და მოქალაქე. მისი ეს გამოსვლა დიდ ორა-
ტორულ ნიჭზე მეტყველებს. თვით „დროების“ აზრით, ეს
სიტყვა ისარივით ეცა გულში გულმოსულობის მხეცს და თუმ-
ცა იქვე ვერ მოკლა, საშინლად კი დაკოდა.

¹ „დროება“, 1879, № 110.

დარახველიძის მომხრეებმა მაშინ ბანკის წესდების შეცვლა და „არაკეთილშობილთა“ გარიცხვა მოითხოვეს და თავმჯდომარე აიძულეს კენჭი ეყარა. უმრავლესობამ სძლია ახალგაზრდობას, „რომლის ბაირალი ეჭირა ხელში დავით მიქელაძეს“. ეს სამწუხარო იყო. მიქელაძე ამ კრებაზე ისე ჩანს, როგორც ერეტიკოსი რაინდი იეზუიტების სამსჯავროზე: სამასი ხმის უმრავლესობით ორმოცის წინააღმდეგ „გაიმარჯვა“ დარახველიძემ. ამ სამარცხვინო გამარჯვებას, ცხადია, შუქი არ შეუტანია თავადაზნაურობის ბნელ ისტორიაში. თვით „დროების“ პირით, მთელი ქართველი ხალხი მას ბევრად ამჯობინებდა მიქელაძის სახელოვან დამარცხებას. ეს იყო დრომოკმულის და პროგრესულის ხანგრძლივი ბრძოლის მორიგი ეპიზოდი, რომელიც წოდებათა სხვადასხვაობის მიჯნასაც არღვევდა: აზნაური დარახველიძე უკადრისობდა გლეხებთან გარეგანს, თავადი მიქელაძე კი ძმურად უწვდიდა ხელს გლეხკაცს და იბრძოდა ქვეყნის საერთო წინსვლისათვის. იმ დროსა და ვითარებაში ეს უკვე რაინდული საქმე იყო. ცხადია, მიქელაძისაგან ვერ მოვითხოვდით კლასთა ბრძოლის მარქსისტულ იდეამდე ამადლებას, თუმცა მისთვის უცხო არ ყოფილა მჩაგვრელებთან ბრძოლის გარდუვალობა.

ეს იყო ძნელბედობის უამი.

ჩვენს პრესას და მოღვაწეებს ხშირად უხდებოდათ იმედის დამყარება „კეთილშობილთა“ წყალობაზეც კი, რათა ორიოდ ნიჭიერი ახალგაზრდა სწავლის მისაღებად რუსეთში გაეგზავნათ. მაგრამ ისინი კი არ მათხოვრობდნენ, — იბრძოდნენ კიდევ, და იბრძოდნენ შკაცრად, იმედიანად, არც თუ უშედეგოდ. მათი დევიზი იყო ქვეყნის საყოველთაო კეთილდღეობა.

დარახველიძის გამარჯვებაც დროებითი იყო. ყველამ იგრძნო მიუტევებელი შეცდომა, პატივი სცეს ბანკის პირველი წესდების შემდგენს ბესარიონ ლოლობერიძეს და დაეთანხმნენ კირილე ლორთქიფანიძეს, რომ დადგენილება წესდების შეცვლაზე გადაისინჯოსო.

ამრიგად, ბანკის საკითხზე ატეხილ დავაშიც დავით მიქელაძე იდგა პროგრესის სადარაჯოზე და უმწეო დარახველიძესთან საბოლოო გამარჯვება მხოლოდ ერთი ეპიზოდია მისი რაინდული ცხოვრების გზაზე.

აქ მოთხრობილ საქმესთან დაკავშირებით მოხუცმა დ. ყიფიანმა 1879 წ. 29 მაისს „დროების“ საშუალებით მიმართა დავით მიქელაძეს წერილით, რომელშიაც კმაყოფილებას გამოსთქვამს „ორმოცის სამასთან შებმისა და მათი გამარჯვების ამბავზე“, თანაც წუხს — ძმანი არიან ჩვენი, ამ საუკუნის დამლევის შვილნი, და ასეთი რთული წინდაუხედავობა როგორ მოუვიდათო! ყიფიანი წუხს ამ გონიერი სამასი კაცის აჩქარებაზე, სწუხს გამარჯვებულთათვის, ხოლო მამაც ახალგაზრდა მამულიშვილებს, რომლებიც დამარცხდნენ, სასიქადულო და სახელოვან ადამიანებს უწოდებს¹.

მეველე მოითხოვს ბანკის სამოქმედო არის გავრცელებას ბათუმზე, სადაც „ცხოვრობენ ჩვენი ძმები ქართველები... მუდამ ჩვენთან იქნებიან შემოერთებული და ვერ დაგვაშორებენო“².

მეველე „დროების“ კორესპონდენტია და გვერდს ვერ აუვლის თავისი დროების საჭირობოროტო საკითხებს; ის პატრიო-

¹ „დროება“, 1879, № 113.

² „დროება“, 1879, № 98.

ტია და გულგრილი ვერ იქნება თანამედროვეთა ქცევის მიმართ. წერილში, რომელიც „საქართველოს“ რუბრიკის ქვეშ იბეჭდება, 1874 წლის 12 ივლისს მეველე შენიშნავს, რომ იმერლები ბუნებით მკვირცხლი, მოძრავი, ნიჭიერი ხალხია, მაგრამ გარკვეულ გარემოებაში ეს ღირსება საზიანოდ იქცევა ხოლმე: არსად არ არის იმდენი საჩივარი, დავა და ერთიმეორის დასმენა, როგორც იმერეთში. და მეველე მათ აფრთხილებს: „ჩვენმა ხალხმა კარგათ უნდა იცოდეს, რომ ერთმანეთის გადაკიდება, უთანხმოება, გვავენებს მხოლოდ ჩვენ! იმითი, რომ ქართველებმა ერთმანეთი დავასუსტოთ, არავის არ აუტირდება შვილი ჩვენს გარდა!“ ეს საგულისხმო დასკვნაა, რომლისადმი ყურადღება არ აწყენდა არც ერთი დროის ქართველს. მეველე თავის თითქოს უპრეტენზიო სტატიაში ქართველებს მოუწოდებს ერთობისაკენ, ერთადერთი ხსნისაკენ, რაც ხალხს უქადის ბედნიერ მომავალს.

მეველე ფხიზლად და დაუზარებლად ეხმაურება ყოველგვარ ძნელბედობას, დანაკლისსა თუ ურიგო საქციელს ქვეყნის ცხოვრებაში და პრესის მსჯელობის საგნად ხდის მას.

აი, მეველემ შეიტყო პლატონ იოსელიანის რომელიღაც შრომის მოპარვისა და მითვისების ამბავი და მტკიცედ მოითხოვს ამგვარი დოკუმენტების დაცვის საქმის წესიერად დაყენებას, რათა ხელნაწერები და ნივთები „ხოხბის ჭუჭყულასავით“ არ გაეპაროს ხელიდან იმ პირს, ვისაც მათი დაცვა მიანდეს.

მეველე წინასწარ ეხმაურება ეპიდემიის მოახლოვებას, მოუსავლიან წელს, შიმშილს...

აი, დაიმშა კახეთი, და „ივერიის“ პირველ გვერდზე ვხედავთ მეველის მსხვილი შრიფტით აწყობილ წერილს: „კახე-

თის დამშევა“. მისი სიტყვა აქაც გონივრული განზოგადებით იწყება: „ძნელია გაჭირება კერძო კაცისა, მაგრამ ათასჯერ უფრო ძნელია და მძიმე — გაჭირება მთელის ქვეყნისა“¹. მართლაც, ეს ბევრად მძიმეა, და მხოლოდ სოციალურ უკულ-მართობას შეუძლია მდიდარი ქვეყნის ხალხი საყოველთაო გაჭირვებამდე მიიყვანოს. ამიტომ მეველის მამხილებელი წერილი არსებითად ნიღაბს ხდის ამ უკულმართ წყობილებას. ამასთან იშველიებს წარსულ მაგალითს და ითხოვს დაეხმარონ დამშეულ ხალხს.

შომდევნო ნომერში იბეჭდება მისივე სტატია, რომელშიაც დაყენებით ითხოვს სასწრაფო დახმარებას, კომიტეტების შედგენას, ხალხის დახსნას.

სამიოდე თვის შემდეგ „ივერიის“ პირველსავე გვერდზე ქვეყნდება მეველის სტატია „შიმშილი სვანეთში“. ავტორი გაცხადებულია, აქამდე როგორ ვერ შევიტყვეთ და ასე უყურადღებოდ როგორ გამორჩათ ეს საქმე ადგილობრივ მესვეურებსა „ჯერ ისა, რომ სვანები თავისთავად ღარიბი ხალხია, ღვინო იმათ არ მოსდით და პური. მთელი წელიწადი მხოლოდ ქერით იკვებებიან და ესეც თუ მოაკლდათ, სწორედ ღვთის რისხვა იქნებაო“, — შენიშნავს მეველე, და მოუწოდებს ყველას, რომ, თუ კორესპონდენტი არ აზვიადებს, სასწრაფოდ ხელი გაუწოდონ „შორეულ ჩვენს ძმებს“.

ამრიგად, მართლაც ჭეშმარიტი „მეველის“ გულმოდგინებით დატრიალებს თავს დ. მიქელაძე თავის ხალხს.

¹ „ივერია“, 1893, № 88.

1893 წლის აგვისტოში ხევის სოფელ სნოში გაჩენილა ბნედის მსგავსი მძიმე სენი. ცრუ ქადაგებსა და წინასწარმეტყველთ ამაზე ხელის მოთბობა განუზრახავთ. მეველე აღწოთებულა და „ივერიაში“ მოუთავსებია სტატია „საოცარი სენი“, რომელშიაც გადაჭრით მოითხოვს ამ ისედაც ბეჩავი ხალხის განთავისუფლებას ცრუმორწმუნეთა უმეცრებისაგან, თანაც „გამოიძიონ მიზეზი ამ უცნაური სენისა“ და უშველონ აღამიანებს. იქვე მოუწოდებს ქართველ ექიმებს სასწრაფოდ გაემგზავრონ ხევში. მომდევნო ნომერშივე მეველე ათავსებს სტატიას „მივიწყებულ საჭიროებაზე“: მოითხოვს ჩაატარონ ხალხში ლექციები ხოლერაზე და დაეხმარონ ისედაც ლუკმაპურის შოვნით დატანჯულ თანამემამულეებს იმისი ახსნა-განმარტებით, თუ როგორ უშველონ თავს ამ ეპიდემიის ყამს. ესაა მოვალეობა მამულის წინაშე და ასეთ საქმეზე დაღუპულიც შეიძლება შევადაროთ სამშობლოსათვის ბრძოლაში დაღუპულ მეომარსო. მართალია, ექიმებს სწავლა რუსულად აქვთ მიღებული და ქართულად ჯეროვნად ლექციის ჩატარება უჭირთ ხოლმე, მაგრამ აქ დრო არ არის სტილზე ვიფიქროთ, საჭიროა ხალხის დახმარება, რათა განსაცდელი შეუმსუბუქოთ. სამაგიეროდ „ერიც მარად სიყვარულით მოიგონებს მას, ვინც სიყვარული დაუმტკიცაო“.

აი, მარტვილში ვინმე მიხეილ ბოჩილავა მომკვდარა ხოლერით და ვერაფის გაუტანია, შემდეგ კი ძაღლებს შეუჭამიათ. ამ „საზარელი შემთხვევის“ გამო მეველე „ივერიაში“ ათავსებს წერილს, რომლითაც კიცხავს მთელს სოფელს, მეტადრე ამ ცნობილი სამონასტრო ადგილის ღვთისმსახურთ, რომელთაც სიკვდილის შიშით ვერ გაბედეს მიცვალებულის გასვენე-

ბა. ომშიც ხომ ემუქრებაო ტყვია ჯარისკაცს, რომელიც დაქრილ თანამებრძოლს შველის! განა აქაც ასეთივე გმირობის გამოჩენა არ გვმართებსო? — ასეთია მეველის ბრძოლა საზოგადოებრივი ზნეობის ამალგებისათვის.

მეველე იმედიანია თვით ხოლერის საშინელი ეპიდემიის დროს, და მოუწოდებს ხალხს შეგნებული ბრძოლისაკენ. საგულისხმოა, რომ თვით ამ ეპიდემიის შემთხვევასაც კი იმისათვის იყენებს, სიტყვა ყოველგვარ ბოროტებაზე გადაიტანოს და გადაჰკრას ხალხის იმ ნაწილს, რომელიც ყოველგვარ უბედურებას — ომს, ეპიდემიას „თუ სხვა რამ სოციალურ უსამართლობას“ ეჩვევა. მათგან განსხვავებით, არიან მაღალი ბუნების ადამიანები, რომლებიც სავალ გზას უჩვენებენ ადამიანებს. აი ასეთი პროტესტანტები მიაჩნია მეველეს ბუნების უზენაესი კანონის გამომხატველად და თვლის მათ კაცობრიობის გმირებად.

მეველე, ქვეყნის ავ-კარგის გამრჩევი, ზრუნავს ქვეყნის წინსვლისათვის, მოითხოვს ქართული ენის ზედმიწევნით მცოდნე მქადაგებელთა მომზადებას, იბრძვის სკოლების გახსნისათვის, სიხარულით აუწყებს მკითხველს, რომ ექვთიმე თაყაიშვილი ქართული სათავადაზნაურო სკოლის ინსპექტორად დანიშნეს, რომ ამით ჩვენს სკოლას ჰირისუფალი გაუჩნდა.

საერთოდ, დ. მიქელაძეს საგრძნობი ღვაწლი მიუძღვის ჩვენი ქვეყნის სახალხო განათლების ისტორიაში.

როგორც ყველაფერს სხვას, დ. მიქელაძე სახალხო განათლების საკითხსაც მკვიდროდ უკავშირებს: საყოველთაო კეთილდღეობას, ქვეყნის ტკივილსა და საჭიროებას: „ქართველი კა-

ცის. სწავლა, მეცადინეობა და მოღვაწეობაც მხოლოდ მაშინ არის დასაფასებელი და პატივსაცემი, თუ იგი ჰმატებს თავის სამშობლოს რამეს... აქ ყველას თავისი ნიჭის შესაფერისად მოეთხოვება“¹.

დ. მიქელაძეს კარგად ესმის, რომ პროგრესის კანონის გადალახვა და უარყოფა — პატარა ერისათვის კი არა, დიდი ერისთვისაც — საფრთხილოა. ის უნდა განათლდეს და თან დაიცივას თავისი ეროვნული სახე. ხმლის დროს ხმალი გვეჭირა. ახლა კი იგივე დიდება უნდა შევიწინარჩუნოთ სწავლით, — ასეთია მეველის დასკვნა. საამისოდ მინისტრის დაპირებას არ უნდა დაეჯერდეთო, დასძენს ბოლოს, და იგონებს ანდაზას: „სხვისი იმედი გქონდეს, მაგრამ შენც ნუ დაძაბუნდებიო“.

მეველე იგონებს ცნობილ თქმას: „საფრანგეთი იმიტომ დაამარცხა გერმანიამ, რომ კარგი სასწავლებლები ჰქონდაო“; ამასთან მოაგონებს მკითხველს ჩვენი ახალგაზრდობის უპატრონობაზე, გზაკვალის არევაზე, და გადაჭრით ითხოვს რაიმე წრის შექმნას, დახმარებას, რათა მოზარდმა თაობამ იმედი იქონიოს, რომ მას დაეხმარებიან, აუხსნიან, თუ როგორ მოიქცეს.

სკოლასა და განათლებას ეძღვნა მეველის სტატია 1874 წლის 31 მაისს.

სწავლა-განათლების საკითხს მეველე ისედაც თითქმის ყოველ მეორე-მესამე სტატიაში ეხება, მაგრამ ეს წერილი მეტად საინტერესოა. ყველამ გაიგო და იცის სკოლის მნიშვნელობა, მაგრამ ცოდნას საქმეც უნდა მოჰყვეს, — ამბობს „დროების“

¹ „ივერია“, 1893, № 157.

ბურჯი და მოითხოვს უმადლესი სასწავლებლის დაარსებას. გიმნაზიებშიც კი ცოტაა ქართველი და ზედა კლასებში მათი რიცხვი უფრო მცირდება. ამის მიზეზს მეველე ხედავს ერთი მხრივ უაზრო და „გონების დამბლაგველ“ დაზეპირებაში, მეორე მხრივ კი იმაში, რომ ქართველ ბავშვს, რომელმაც ჯერ ერთი რუსული სიტყვაც არ იცის, ერთბაშად უწყებენ რუსულ ენაზე სწავლებას. მეველე მოითხოვს პედაგოგიური მეცნიერების ელემენტარული კანონის დაცვას: რომ ჯერ მშობლიურ ენაზე ასწავლონ, გონება გაუხსნან და მერე რუსულსაც საფუძვლიანად შეისწავლისო. ხოლო ვინც ამტკიცებს, რომ ქართველი ზარმაცი ან უნიჭოა, მეველე ასეთებთან ბაასსაც ზედმეტად თვლის.

მეველე არაერთხელ უბრუნდება სწავლის საკითხს და უანგარო სიყვარულით ლაპარაკობს გლეხის შვილებზე. რომელთაც გული სკოლისკენ მიუწევთ, არ ერიდებიან წვიმასა და სიცოცხეს, უმკლავდებიან ათას დაბრკოლებას, ოღონდ ისწავლონ; აგრეთვე გლეხებზე, რომლებიც უკანასკნელ დანაზოგს იმეტებენ, რათა შვილს განათლება მისცენ. იგივე არ ითქმის თავდაზნაურობაზე, რომელიც ფულს ხელს უჭერს, თუმცა არ უჭირს და შვილის განათლებაზე ნაკლებად ფიქრობს, მიუხედავად იმისა, რომ დიდგვაროვანს იოლი პატივი და დაწინაურება მოეღოს.

მაგრამ აქ თავს იჩენს მეორე სიძნელეც: ბავშვი ვერ აღწევს დაწყებით კლასებზე მაღლა, რადგან საქართველოში არ არის უმადლესი სასწავლებლები, რუსეთში კი ერთეულები თუ შეძლებენ წასვლას, მერე იქ კლექტდებიან და იღუპებიანო.

მეველე ითხოვს უნივერსიტეტის დაარსებას და იშველიებს „დროების“ იმავე ნომერში დაბეჭდილ სკალკოვსკის საინტერესო სტატიას. ეს სკალკოვსკი კრაევსკის როდი ჰგავს. მისი სტატია მოკლედ და ღრმად ასაბუთებს თბილისში უნივერსიტეტის გახსნის საჭიროებას და აკრიტიკებს უსაფუძვლო მოსაზრებებს, რითაც უარყოფდნენ ამ დიდ საქმეს.

მეველე ეძებს სახსრებს განათლების საქმისათვის, ეპვიით შესცქერის რუსეთის საშართლის მინისტრის მურავიოვის სიტყვას, — საერო განათლებისათვის ფულს ყოველთვის ვიშოვნითო, მაგრამ თანაც იმედოვნებს, რომ განათლების ხარჯებს მოუმატებენ. ამასთან დაკავშირებით მეველე ამტკიცებს, რომ არასოდეს არ ყოფილა ჩვენთვის განათლება ისე საჭირო, როგორც ამჟამად. ეს დროისთვის ალღოს აღების შედეგია. „ზოგს საუკუნეს სჭირია ალექსანდრე მაკედონელი, ზოგს კოლუმბი, ზოგს ლოუ და ზოგსაც ლინკოლნი. ჩვენს საუკუნეს კი ყოველ სფეროში და ყველგან სჭირია სწავლით შეიარაღებული ადამიანი“¹.

მეველე მუდამ საქმეზე ლაპარაკობს.

ხშირად სოციალურ საკითხებზე მსჯელობის შემდეგ მხოლოდ გადაკვრით მიუთითებს, რომ, მაგალითად, პატარა დანისას ოცდაორი გიმნაზია, ორი უნივერსიტეტი და ბევრი სპეციალური სასწავლებელი აქვს, ჩვენ კი ორად ორი საშუალო სასწავლებელი. ამ საკითხის ასე მტკივნეულად აღძვრა და საზოგადოების ჩაფიქრება უკვე ბალავრის ერთ-ერთი ქვა იყო, რახედაც შემდეგ აიგო ჩვენი სახელოვანი ცოდნის ტაძრები.

¹ „ივერია“, 1894, № 36.

ეურნალ „მომამბის“ გამოსვლასთან დაკავშირებით მეველე წერს: „რაც დღე მოდის, თითო-ორი პაწია მნათობი ჩნდება აქა-იქ საქართველოს ბნელ ცაზედ და სანამდის ქეშმარიტი სინათლე მოეფინებოდეს მთელს ქვეყანას, ვინუგეშოთ იმ აზრით, რომ ასეთი დღე ჩვენს სამშობლოსაც ელირსება ოდესმე“¹. სრულიად გასაგები და ბუნებრივია ასეთი წინასწარმეტყველური სიტყვების თქმა იმ გაზეთში, რომლის რედაქტორ-გამომცემელია ილია ჭავჭავაძე. მაგრამ დ. მიქელაძე თვით არის ამ სიტყვების მთქმელი და ამაყი მქადაგებელი.

ყოველ კრებასა თუ ბეჭდური გამოსვლის შესაძლებლობას იყენებს მიქელაძე, რომ რაიმე არგოს ხალხს, ენას, ზნეობის ამალლებას. ერთ საბანკო პაექრობაზე ქუთაისში (1879 წლის 28 აპრილს) გიორგი წერეთელთან და სხვა პროგრესულ მოღვაწეებთან ერთად მოითხოვს ხარჯების გაღებას განათლების საქმეზე: „ქართველს ენა ვერ მოუბრუნებია, რომ უცხო სიტყვები არ გაურიოს და საჭიროა წერა-კითხვის საქმეზე შეტი ზრუნვაო“². მისი შეწყვენითაც იყო, რომ მაშინ „ქართველთა შორის წერა-კითხვის გამავრცელებელ საზოგადოებას“ გაეგზავნა სამი ათასი მანეთი.

დ. მიქელაძე გულშემატკივარი პედაგოგისა და მოღვაწის გულით შენიშნავს, რომ ჩვენივე დაუდევრობით სასკოლო სახელმძღვანელოები არა გვაქვს. „ქართულ დაუდევრობაზე“ ის ხშირად ჩამოაგდებს ხოლმე სიტყვას. ასე. როცა თბილისის გუბერნიის საერო სკოლების დირექტორმა ბრძანა, სკოლებში სწავლება რუსულად უნდა წარმოებდესო, და საბუთად ქარ-

¹ „ივერია“ 1893, № 159.

² „ივერია“, 1893 № 96.

თულ ენაზე სახელმძღვანელოების უქონლობა დაასახელა, მე-ველე შენიშნავს, დიახაც გამოიყენებენ ასეთ საბუთსო, და მოითხოვს დაუყოვნებლივ გამოსწორდეს ეს ხარვეზი, თან აცხადებს, საუკეთესო სახელმძღვანელოზე ჯილდო დავაწესოთო. იქვე მოითხოვს ტერმინოლოგიის დამუშავებას და სხვა საჭირო ღონისძიებებსაც სახავს.

მეველე ხმას იმაღლებდა მუდამ, როცა უაზრო და საზიანო ღონისძიების გატარებას ითხოვდა ვინმე. 1889 წლის ივნისში „ივერიაში“ გამოქვეყნდა სამი ვრცელი წერილი თბილისის ქართველობაზე. მათი ავტორი (პ.) ამტკიცებდა, რომ თბილისის ქართველი ინტელიგენცია დაქსაქსული და თავგზააბნეულია, „ცხოვრების აზრი არ ასულდგმულებს“, არ ესმის თავისი მნიშვნელობა და მხოლოდ ჩამოსული ქართველობა აძლევს მას ღონესა და მნიშვნელობასო. მისი აზრით, ამ დაცემიდან გამოსავალია ეკლესიებთან სამრევლო მზრუნველობათა დაარსება, რაც დააკმაყოფილებს მის სულიერ და ხორციელ საჭიროებასო. დავით მიქელაძე საპასუხო წერილში აბათილებს ამ პუბლიცისტის მიერ დახატულ „უნუგემო და შემადრწუნებელ სურათს“ და ამბობს: „მერე რა გამოვა აქედან? რა შეუძლია სამრევლო მზრუნველობას. სოლოლაკის ეკლესიასთან დაარსებულს? რომელს ერთს ხორციელსა და ან სულიერს ხალხის საჭიროებას დასდებს ის მალამოს?“¹.

დ. მიქელაძის მსჯელობა აქაც საღი, რეალისტური და საქმიანი, მაგრამ მას, ეტყობა, კარგად არ ესმოდა სამრევლო სა-

¹ „ივერია“, 1889, № 117.

ზოგადობების მნიშვნელობა. ორიოდ დღის შემდეგ იმავე „ივე-რიაში“ მას მკაცრად გასცა პასუხი ვლ. მიქელაძემ, რომელიც „დიდრონ და დიდრონ საგნებზე“ ლაპარაკს მიჩვეულ პუბლიცისტს უხსნის, რომ სამრევლო მზრუნველობის მიერ დაარსებულ სკოლებში ათასობით ქართველი ისწავლისო, რაც უდავოდ საყურადღებო აზრია. კიდევ უფრო მკაცრია თვით პ-ს პასუხი: მას თბილისელ ქართველთა უმოქმედობა აწუხებს, ეძებს მათი სულიერი ძალის გამოვლენის გზას და ვერ გაუგია, რატომ ედავება დავით მიქელაძე, რომელსაც ალბათ იგივე აღელვებს?

რამდენიმე დღის შემდეგ ქვეყნდება დავით მიქელაძის საპასუხო წერილი, რომელშიაც იმეორებს ადრე თქმულს: „თუნდაც დამახრჩოთ, ვერ დავიჭრებ, რომ ქართველი ერის სულიერი და ხორციელი საჭიროებანი თავს მოიყრიან სოლოლაკის ძირას ეკლესიაში, რომლის მზრუნველადაც პ. ნიშნავს თავად ვლადიმერ მიქელაძესო! თუ მათ ეს სწამთ, დე სწამდეთ: ნეტარ არიან მორწმუნენი!“

ამ წერილში თავს იჩენს დ. მიქელაძის პაექრობის ნიჭი: მე თუ ჩემი აზრი მაქვს, ეს სულაც არ ნიშნავს, რომ თქვენი დაცივნის ქეიფზედ ვიყო! თან ბოდის იხდის მკითხველის წინაშე, რომ მის მოთმინებას ორივე მხარე ბოროტად ვიყენებთო.

მართლაც. პოლემიკა თავად მიქელაძეებს შორის სამრევლო მზრუნველობაზე დიდხანს გაგრძელდა. „ივერიის“ 131-ე ნომერში ისევ ქვეყნდება პ-ს „დავით მიქელაძის პასუხი“. ავტორი აღნიშნავს, რომ: „სამრევლო მზრუნველობის მოვალე-

ობად სულაც არ მიაჩნია ზედაშესა და სეფისკვერის მომზადება“.

საერთოდ, ამ პოლემიკაში სიმართლის ნაწილი ორივეს მხარეზე უდავოდ არის. მაგრამ მეველის პოზიცია იმითაა უფრო მყარი, რომ საეკვოდ მიაჩნია საეკლესიო სამრევლომ გამოიჩინოს ისეთი ქეშმარიტი ზრუნვა, როგორც წესდებაში უწერია.

დ. მიქელაძე არ არის ზეპირი ფრაზების კაცი. სკოლების გახსნას რომ ითხოვს, გახსნილი სკოლების მუშაობასაც ფხიზლად ადევნებს თვალყურს.

აი, მეველემ შენიშნა რაღაც მტრული დამოკიდებულება მასწავლებელსა და მოწაფეს შორის, და მოითხოვს ამ არანორმალური მდგომარეობის გამოსწორებას.

მორიგ სტატიაში „საჭირო ღვაწლი“ მეველე მიუთითებს სოფლის მასწავლებლის მაღალ დანიშნულებაზე, მოითხოვს მისგან, დააკვირდეს ხალხის ჭირვარამს და შეიტანოს თავისი წვლილი ქვეყნის ცხოვრებაში სიტყვით თუ საქმით, — დაწეროს და ილაპარაკოს.

მეველე განათლებისა და საერთოდ პროგრესის ყოველ საკითხსაც შეძლებისამებრ უკავშირებს რაიმე საგულისხმო მოვლენას.

1893 წელს ის „ივერიის“ შესვეურია და რედაქციის სახელით ლაპარაკობს. არა მარტო თვით წერს საჭირბოროტო საკითხებზე, არამედ რჩევა-დარიგებას აძლევს კორესპონდენტებს, საყვედურობს სტუდენტობას, რომელიც არ წერს, აოიჩენს ინტერესს, თითქოს გულგრილად შესცქეროდეს სალიტერატურო, სამეცნიერო და საზოგადოებრივ მოვლენებს. „მაშ რა არის მიზეზი ესეთის მდუმარებისა? — სვამს კითხვას

მეველე, და ეს კითხვა, დასმულია სწორედ „ივერიის“ იმავე ნომერში, სადაც გამოქვეყნებულია ცნობა ნიკოლოზ ბარათაშვილის ნეშტის გადმოსვენებისა განჯიდან თბილისს და იგი გაისმის, როგორც მოწოდება ჩვენი საზოგადოებრივი თუ კულტურული ცხოვრების გამოფხიზლებისაკენ.

რამდენიმე დღის შემდეგ ქვეყნდება მისივე სტატია „მიწყვებული საკიროება“. საქმე ~~ქალთა სასწავლებლის~~ გახსნას ეხება. მეველე მთელი სიმწვავეთ სვამს ქალთა სასწავლებლის გახსნის საკითხს, გმობს ამ საქმეში გამოჩენილ დაუდევრობას და აფრთხილებს მკითხველს, რომ ეს დამახასიათებელი დაუდევრობა „კიდევ მრავალჯერ წაგვაკვრევენებს ფეხს, თუ რაიმე ღონისძიება არ მივიღეთ“.

მეველე ხარობს, როცა ბათუმში სკოლას ხსნიან.

მეველე შეწუხებულია, როცა თბილისის მშენებლობა სამას ოჯახს ქუჩაში გაგდებით ემუქრება; მისი თავმოყვარეობა შელახულია, როცა ამომრჩეველთა სინდისს ფულით ყიდულობენ. ამასთან დაკავშირებით მეველე ეხება არჩევნების საკითხს. გამარჯვების სურვილი კანონიერია ყველასათვის, მაგრამ აქედან ის აზრი არ გამოდის, რომ ყოველ გამარჯვებას უთუოდ მსხვერპლად უნდა შეეწიროს. „რაც კი ძვირფასია და უმშვენიერესია ადამიანში: სიმართლე, თავმოყვარეობა, სიმტკიცე და თვით პატიოსნება“. ასეთი გამარჯვება „მეტს ვნებასა და სირცხვილს სძენს ადამიანს, ვიდრე დამარცხება“.

მეველე ერთი პირველთაგანი იბრძვის ქართული უნივერსიტეტის დაარსებისათვის, ერთი პირველთაგანი მიესალმება სტატიით კაიდანოვს, რომელმაც თავის სიტყვაში 1894 წლის 8 თებერვალს, პეტერბურგის უნივერსიტეტის 75 წლის საიუ-

ბილეთ სადილზე, ხელახლა აღძრა ეს საკითხი და მოაგონ. ხალხს, რომ საამისოდ გადადებული 10 000 მანეთი უკვე გაიზარდა და დროა ვიხილოთ კავკასიის უნივერსიტეტიო. მეველეს სხვა საბუთებს შორის მოჰყავს ისიც, რომ ხელმოკლე ქართველებს უჭირთ შვილების გაგზავნა შორეულ პეტერბურგში, თანაც მკაცრი ჰავა ხშირად ღუპავს სამხრეთელებს და ითხოვს საქმის დაწყებას, რაც „განაახლებს ჩვენს ცხოვრებას, შეიტანს ხალხში სწავლისა და მეცნიერების შუქს, გამოაღვიძებს და წინ წასწევს ქვეყნის გონებითს და ზნეობითს განვითარებას“¹.

დ. მიქელაძეს გული შესტკივა ჩვენი ერის ცხოვრების ყოველი მხარისათვის. როცა გაიგო, რომ ფლორენციაში იბეჭდებოდა ლიტერატურული ენციკლოპედია, ირონიულად შენიშნავს: ცხადია, ამ წიგნში საქართველოს ლიტერატურაზე ან არაფერი არ იქნება ნათქვამი ან იქნება ისეთი სასაცილო ამბები, როგორიც აქვთ ელიზა რეკლიუს თავის „მსოფლიო გეოგრაფიაში“ ან ბ-ნ ზოტოვს „მსოფლიოს ლიტერატურის ისტორიაში“.

მისი აზრით, კარგია, რომ კულტურულ ერებს ჩვენზე კარგი წარმოდგენა ჰქონდეთ, მაგრამ თუ სიმართლეს ვერ იტყვიან. ჯობს არაფერი არა თქვან. დროა გამოჩნდეს მოღვაწე, როგორც სწორად გააშუქებს ჩვენი მწერლობის ავკარგს და წორად მოჰყავს ქვეყნიერებას. ჩვენში უფრო იმაზე ვზრუნავთ, ქუთაისის ან თბილისის ქართველებზე ცუდი არაფერი იქვანო, და არავინ ზრუნავს იმისათვის, რომ განათლებულმა

კაცობრიობამ სწორი აზრი იქონიოს „დედამიწის უმშვენიერეს კუთხეზე“, როგორც ეძახდა ნაპოლეონ პირველი საქართველოს, — შენიშნავს დ. მიქელაძე.

დ. მიქელაძე სამართლიანად არის აღშფოთებული ბევრ ზერელე და არასასიამოვნო აზრზე, რაც დადებითთან ერთად გამოუთქვამს რეკლიუს იმერლებზე, სვანებზე, მეგრელებზე, კახელებზე და საერთოდ კავკასიელებზე. რომლებიც „ნაკლებ ნიჭიერად ითვლებიან“. მართლაც, გამოჩენილი გეოგრაფისათვის ეს მიუტყვებელ დაუდევრობად და უმეცრებად ჩაითვლება. იქვე მიქელაძე იმოწმებს რეკლიუს სიტყვებს: „ერთი წილი ჩემი შრომისა კავკასიაზე სიამოვნებით გადაათვალიერა ბ-ნმა მეუნარგიაშო“ და თავის მხრივ კითხულობს: „ნეტა, რომელი ნაწილი გადაუთვალიერებია სიამოვნებით ბ-ნ მეუნარგისო?“¹.

ახლა მიქელაძე „იმოწმებს“ მეორე „მეცნიერის“ სიტყვებს: „შეცხრამეტე საუკუნეში ქართველებს ჰყავდათ მწერლები: ბარათაევი, წერეთელევი და მალოვი, ქართული ხალხური პოეზია ძალიან ღარიბია“. ამნაირი აბდაუბდის დამოწმების შემდეგ მიქელაძე სამართლიანად საყვედურობს პროფესორ ცაგარელს, რატომ არ მიიღო ზომები პეტერბურგში, რათა „ქართულ მწერლობაზე ამნაირი უშვერი და ყოვლად სასაცილო ცნობები არ დაებეჭდათო!“.

დ. მიქელაძისათვის ერთნაირად მნიშვნელოვანი და ახლობელია კულტურული ცხოვრების ყოველი სფერო.

როცა 1894 წლის შემოდგომაზე დაიწვა ქუთაისის თეატრი

¹ „ივერია“, 1888, № 73.

და მასთან მთელი ქონება, რაც წლების მანძილზე ჰქონდა შე-
ძენილი თეატრის სულის ჩამდგმელს კოტე მესხს, მეველე
„ივერიაში“ ათავსებს სტატიას, რომლითაც მოუწოდებს მთელ
ქართველ საზოგადოებრიობას დახმარება აღმოუჩინონ უანგა-
რო არტისტს, რათა აღდგეს ის, რაც ხანძარმა შთანქთა.

მეველეს არ დარჩენია შეუმჩნეველი არც მუსიკის დიდი
შთამაგონებელი ძალა მამულისათვის ბრძოლაში, „სამშობ-
ლოს ერთგულებისა და მისის ბედნიერებისათვის თავის შე-
წირვის გრძნობის გაღვივებისათვის“. განსაკუთრებით მოსწო-
ნებია ერთი სვანური სიმღერა („უშგული“) და ერთიც კახური.
მისი აზრით, „ქართული მუსიკა ჯერ აკვანშია და დიდად ნა-
ყოფიერი. და სამნიშვნელო იქნება ამ მუსიკის მოვლა და ზეზე
ამოყვანა. ჩვენ ვუსურვებთ ბ. ბ. ფილიშონ ქორიძეს და მელი-
ტონ ბალანჩივაძეს, რომელიც ამხანად მიდის კახეთში კახური
ხმების გადასაღებად, მხნედ გასძლოლოდნენ ქართული ეროვ-
ნული მუსიკის საქმეს“¹. სწორედ შენიშნავს, რომ ქართული
მუსიკის ხმები სრულიად თავისებურია და „ვინც ამ საქმეს
მოანდომებს თავის ერთგულ შრომას, სამშობლო დიდ მად-
ლობას ეტყვის“. მართლაც, დრომ დაადასტურა მეველის იმე-
დი და პერსპექტივა, რასაც ქართულ ეროვნულ მუსიკას უსა-
ხავდა ჯერ კიდევ 1893 წელს.

მეველე საგანგებოდ მოითხოვს აღდგეს ძველი ტრადიცი-
ული ქართული სპორტი: ყაბახი, ჯირითი, ბურთაობა, თოფის
სროლა... „სრულიად არ მესმის, რად უნდა დავივიწყოთ ეს
ჩინებული — თვალისა და გულისათვის სასიამოვნო, ძველე-

¹ „ივერია“, 1893, № 166.

ბური, ჩვენთა მამა-პაპათა დროს ტარების წესი, რომელსაც მრავალი სასიკეთო ხასიათი აქვს“ — კითხულობს მეველე და მომეტებულ მნიშვნელობას ანიჭებს ბურთაობას, რასაც ღონესთან ერთად ნიჭი და სისწრაფეც ესაჭიროებაო. მისი აზრით, ქართველებივით ბურთს მხოლოდ შოტლანდიელები თამაშობენ.

1894 წ. 4 თებერვალს მეველე „ივერიაში“ წერილით ეხმაურება ცხენისწყლის არხის გაყვანის საშვილიშვილო საქმეს, რომლის მესვეურებად არჩეულ იქნენ ნიკო ნიკოლაძე, დავით ლორთქიფანიძე და დავით ლოლობერიძე. ვაკე იმერეთის წყლით მომარაგება 130 ვერსის სიგრძის არხით მართლაც დიდი საქმე იყო და მეველე კი არ თაკილობს ამ საქმეში გარეევას, არამედ მოითხოვს გამოიყენოს ხალხმა თავისი უფლება და დროზე აირჩიონ არხის საბჭოს მესამე წევრი, ვიდრე მას ზემოდან დანიშნავენ.

მეველეს ახარებს ყოველი ახალი კულტურული წამოწყება, საშვილიშვილო საქმე და ღვაწლი. „ივერიის“ ერთ ნომერში აღფრთოვანებით წერს ალექსანდრე როინაშვილზე, რომელმაც ქართული მუზეუმის შესაქმნელად „წერა-კითხვის გამავრცელებელ საზოგადოებას“ შესწირა 50 000 მანეთად ღირებული საგანძური, აგრეთვე მეორე განათლებულ ქართველზე, რომელსაც ამდენივე თანხა გაუღია, და მთელი ქართველი ხალხის სახელით უძღვნის მათ მადლობას.

1893 წელს კოცებუ „ივერიაში“ გზავნის შეწირულობას, რომლითაც უნდა ჩაყროდა საფუძველი რუსთაველის ძეგლს.

¹ „ივერია“, 1894, № 85.

მეველე მოხიბლულია კოცებუს საქციელით და საგანგებო კორესპონდენციაში შენიშნავს: „ამ შშვენნიერსა და საგულისხმო მაგალითს რაღა განმარტება სჭირია ქართველის გულისათვის?“ და რაკი ეს საქმე ითავა უცხო ტომის კაცმა, მეველე მოუწოდებს შოთასაგან დავალებულ ქართველ ხალხს შეაგროვონ საქირო თანხა.

რუსთაველის ძეგლის საკითხს შემდგეაც უბრუნდება (1893 წ. 4 აგვისტოს), მაშინ, როცა ამ ძეგლისათვის შეწირულობა გაიღო „ჩვენმა დიად სახელოვანმა და ერთგულმა საზოგადო მოღვაწემ ბ-ნმა იაკობ გოგებაშვილმა“. მეველე განაზოგადებს ამ ფაქტს და აღფრთოვანებით ლაპარაკობს იმ მოღვაწის დიდ მაგალითზე, რომელმაც განიზრახა გამოეცა თავისი ოცდაათწლიანი შრომის ნაყოფი და შემოსავალი მთლიანად შეეწირა დიდი შოთას ძეგლისათვის. მეველის სტატია ამ საკითხზე ნამდვილი ჰიმნია ერის გონიერებასა და მხნეობაზე.

საზოგადო საქმეში მონაწილეობის მიღება, მისთვის სიკეთის მოტანა — აი მეველის სიკოცხლისა და მოღვაწეობის მთავარი შიზანი. აქეთკენ მოუწოდებს გლეხსა და აზნაურს, უსწავლელსა თუ სწავლულს. ქვემარტება და პატიოსნება, რა ჰავის ქვეყანაშიც არ უნდა იყოს, ერთნაირად კარგია, მაგრამ მათი გამოცხადებით „ავ გუნებაზე დგებიან ისინი, ვისთვისაც სასარგებლოა ქვეყნის სიბნელეში დაგდება“¹. მჩაგვრელებს ეშინიათ სიმართლისა, ეშინიათ, „სადმე ნათელმა აზრმა თავი არ გამოჰყოს და არ დაანახოს კაცს თავისი დაჩაგრული მდგომარეობა“. რა ნათელი აზრია! ის ამხელს ყოველი უსამართლო

¹ „ღროება“, 1874, № 414.

და ძალადობაზე აგებული წყობილების ხეპრე მმართველებს. მაგრამ მეველე გაუტეხელია, როგორც მუდამ. არა როგორც დღემეხვალე. საკვირადღეო, ფილისტური მიმომხილველი, არამედ როგორც ერის გამოჩენილი მოღვაწე. ისე მიმართავს დ. მიქელაძე მოძალადეებს: „რა გინდ ბევრი და დიდი სათავეები არ გაუკეთოთ, შეგუბებული პროგრესი ერთ დღეს მთლად ერთიანად ჩაიტანს თქვენს დიდ ხანს ნაჭირნახულევს და შთამომავლობისათვის გაიწმინდება გზა“.

მეველე ხალისით ეხმაურება ყოველ კულტურულ თუ საზოგადოებრივ ღონისძიებას, რომელიც ხალხის მდგომარეობას ოდნავ მაინც ამსუბუქებს. ასე, 1874 წლის იანვარში მას ახარებს „ერთი ნაბიჯი ქუთაისის თვითმმართველობისაკენ“. ქუთაისელებმა, მართალია, ახლაც კარგად იციან, რაში დახარჯონ თავიანთი აბაზი, მაგრამ თვითმმართველობის მიღების შემდეგ. რასაც დაჰპირდნენ, მას შეეძლება იქონიოს თავისი სკოლა, ბანკი, საავადმყოფო, სუფთა ქუჩები და ა. შ. „დროების“ კორეაპოდენტიც მოხერხებულად ეფერება „შავ ძროხას“ — გუბერნატორ ბალაშოვს, რომ რძე მისცეს.

ვინც ვალსა და ქვეყნის სამსახურს გაუბრძის, მეველეში ის ალტაცებას ვერ იწვევს, რა მიზეზიც არ უნდა ჰქონდეს საამისოდ.

როცა ბარონი კორფი, ლიხაჩოვი და სხვა კანდიდატები უარს ამბობენ პეტერბურგის მოურავობაზე იმ მოსაზრებით, რომ სიმართლის თქმა ბევრ მტერსა და მლანძღველს შესძენთ, მეველეს ერთი მხრივ ესმის მათი, მეორე მხრივ კი „არ მოსწონს ასეთი სიფრთხილე“ და შენიშნავს, რომ ბრძოლის ველიდან მხოლოდ ჯაბანნი გარბიან. ქვეყნის სამსახურისათვის

თავდადებულ მეველესაც უწვენევია მრავალი ანგარებიანი ვაჟ-ბატონის შხამი, მაგრამ მოვალეობას არ გაქცევია, ხმლითა თუ კალმით იბრძოდა პატიოსნების სადარაჯოზე.

თვით რაიმე უმნიშვნელო საშინაო საკითხს ის განაზოგადებს- ხოლმე და საყოველთაო მნიშვნელობის დასკვნისათვის იყენებს. ასე, სკოლის საზოგადოების კრებაზე თავი უჩენა გამობილ „ამერ-იმერობას“, და ამასთან დაკავშირებით მეველე შენიშნავს: „როგორც კერძო კაცი, აგრეთვე საზოგადოების ცხოვრება ერთ რაიმე მტკიცე საფუძველზედ უნდა იყოს აშენებული. ეს საფუძველი უნდა იყოს შეურყეველი, სამუდამო. ვისაც მეთაურობის პრეტენზია აქვს, ეს მცნება უნდა ახსოვდეს ნიადაგ. თორემ „დღეს ერთი უნდის, ხვალე სხვა“ არ ვარგა!“¹.

ჩვენ არაერთხელ მოგვიხდა საუბარი მეველის ბრძოლაზე რეაქციონერ ყურნალისტებთან. სუვორინსა და ნოტოვიჩს, რეაქციული პრესის წარმომადგენლებს, განხილული შემთხვევების გარდა, არაერთხელ გადაჰკრავს, მაგალითად, ემილ ზოლას ახირებულ მოთხოვნასთან დაკავშირებით, რასაც რუსეთის მწერლობის საზარალოდ ეს საქმოსნები დაეთანხმნენ: ზოლამ მოითხოვა, რუსეთსა და საფრანგეთს შორის სალიტერატურო ხელშეკრულება დაიდოსო, ე. ი. შეიზღუდოს ხელადებით თარგმნა, თორემ ფრანგული წიგნი მეტი ითარგმნება და საფრანგეთი ზარალშიაო (უკეთ—ფრანგი საქმოსნები!). მეველე შენიშნავს, რომ თუ ასეთი ახირებული მოთხოვნა შესრულდა,

¹ „ივერია“, 1893, № 93.

თვით ზოლას აღარ ეყოლებათ რუსეთში ამდენი თაყვანისმცემელი.

ცხადია, მეველეს აქაც სამართლიანობის მხარე უჭირავს. ის იცავს თავისუფლად თარგმნის უფლებას და ებრძვის იმ მოხელეებს, რომელთაც დიპლომატიურ ბანკეტზე მწერლები არც კი დაუპატიებიათ, „ლაქიებსა და მზარეულებში გაურევიათ“, და „ისიც კონტრაბანდით“¹.

მეველის ბრძოლა რუსეთის ზოგიერთ რეაქციულ ორგანოსთან კარგად ახასიათებს მას, როგორც დიდი რუსი რევოლუციონერი დემოკრატების ღირსეულ თანამებრძოლსა და მოწაფეს.

„მოსკოვის უწყებები“ და „ნოვოე ვრემია“ რეაქციული ორგანოები იყო. პირველს ერთხანს პროგრესული ხასიათი ჰქონდა, ნოვიკოვის ხელში, 1889 წლიდან კი ისევ მეფის წყობილების სამსახურში ჩადგა. „ნოვოე ვრემიას“ კი, იმავე სუვორინის ორგანოს, დიდი ლენინი ასე ახასიათებდა: „აქ ვაჭრობენ ყველაფრით, დაწყებული პოლიტიკური რწმენით და დამთავრებული პორნოგრაფიული განცხადებებით“². ცხადია, ასეთი გაზეთების მესვეურთა წინააღმდეგ მეველის მახვილი ბრძოლა საერთოდ მოწინავე აზრის ბრძოლის ნაწილია რეაქციულ თვალსაზრისთან.

დ. მიქელაძეს ხშირად უხდება წერა სამართალზე.

მეველის ყოველ თვალსაზრისს აქაც საფუძვლად უდევს ადამიანის ღირსების დაცვა.

¹ „ივერია“, 1893, № 270.

² ლენინი, ტ. 18, გვ. 225, მეოთხე გამოცემა.

მეველე მიესალმება გერმანიაში გამოცემულ კანონს იმის შესახებ, რომ გამართლებულ ბრალდებულს აუნაზღაურდეს უსამართლოდ დაპატიმრებასთან დაკავშირებული ხარჯები და თავის მხრივ მოითხოვს პატივით მოეპყრან შეპყრობილ კაცს: „სანამდის სამართალს თავისი მსჯავრი არ წარმოუთქვამს და ბრალდებული დამნაშავედ უცვნია, მანამდის არ მოაკლდეს არც პატივი და არც ჩვეულებრივის ცხოვრების წესი“¹.

ერის ღირსებისათვის ბრძოლის ნიმუშია დ. მიქელაძის გამოხატვა ერთი „უფლებამოსილი გვამის“, ქუთაისის პროკურორის თანაშემწის წინააღმდეგ. ეს „შოლაპარაკე მსაჯული“, გვარად ბაიკოვი, ცნობილი გახდა არა თავისი იურიდიული ნიჭით, არამედ თავხედური, შეურაცხმყოფელი გამოხატვით ქართველი ერის წინააღმდეგ.

ბაიკოვს რომ აკრიტიკებს, დ. მიქელაძე აყენებს ან იმეორებს საგულისხმო აზრებს სამართლის საკითხებზე. „სადაც ხალხი ცხოვრობს, იქ დანაშაულობაც ხდება. შეუმცდარი ქვეყანაზე არც კაცი არის და არც ერი“, მაგრამ მსაჯულის და სწავლულის ვალია შეისწავლოს, გაარკვიოს ამ დანაშაულის მიზეზი, ადგილი და ხასიათი, და მხოლოდ ამის შემდეგ გამოთქვას თავისი აზრი. ამასთან მეველე სასტიკად ებრძვის მსაჯულის უმთავრეს საფრთხეს — წინასწარ აღებულ აზრს. განა საჭიროა ბრალდების გავრცელება მთელ ქართველ ხალხზე? თვით საფრანგეთში მოხდა გახმაურებული დანაშაული, რაც ცნობილია „პანამის საქმის“ სახელით. გაიფლანგა მილიარდ-ნახევარი ფრანკი, დანაშაულს აკისრებდნენ პარლამენტს,

¹ „ივერია“, 1893, № 204.

სენატს, მინისტრებს, მწერლებს, პრეზიდენტსაც კი, მაგრამ დამნაშავედ ცნეს მხოლოდ რამდენიმე კაცი. ანალოგიური დანაშაულობანი ხდებოდა იტალიაში, პეტერბურგში, ესპანეთში, ამერიკაში... „მაგრამ განა ამეების გამო, რაც ჩვენ ჩამოვთვალეთ, ითქმება, რომ მთელი ევროპა, ამერიკა და რუსეთი დაღუპული ქვეყანაა, რომ იქაური ხალხი ქურდია, ავაზაკია და სხვა?“¹ ამ გამოსვლით მეველე სულაც არ ცდილობს ქართველი დამნაშავეების გამართლებას, მაგრამ ბაიკოვის გამოხდომაც დანაშაულად მიაჩნია.

მეველე ყოველთვის ებრძოდა მთავრობის თვითნებობას. მიუთითებდა მის მაღალ ვალზე ხალხის წინაშე და მრუდედ მიაჩნდა ყოველი გადაწყვეტილება, რაც არ ითვალისწინებდა ხალხისა და მთავრობის მეთაურთა მჭიდრო კავშირს. როცა მთავარმართებელმა მეფისაგან შიილო ნებართვა ზოგიერთ დამნაშავის სამხედრო წესით გასამართლებაზე, მეველემ გამოაქვეყნა სტატია, რომელშიაც გამოთქვამს აზრს, რომ მხოლოდ მმართველები ვერაფერს საგულისხმოს ვერ გააკეთებენ, თუ მათ მხარს არ დაუჭერს ხალხი და საერთო ძალით არ შეებრძოლებიან ქვეყნის დამამცირებელ სიავეს.

მეველე არა მარტო ეხმაურება, ხშირად წინ უსწრებს მოვლენას, კანონსა თუ განაჩენს და ცდილობს მათ სასურველი მიმართულება მისცეს. აი, სენატი ამზადებს კანონს უკანონოდ შობილ ბავშვებზე, — მეველე ბეჭდავს მგზნებარე სტატიას², რომელშიაც მოითხოვს ამ კანონის შედგენისას დაიცვან სა-

¹ „ივერია“, 1893, № 200.

² „ივერია“, 1893, № 246.

მართლიანობა და სინდისის შოთხოვნა, „მიიხედონ მაცხოვრის ხატისაკენ“, მიანიჭონ ჭეროვანი უფლება უკანონოდ შობილთ, რომელთაც პასუხი არ უნდა აგონ დედისა და მამის ცოდვისათვის. საზოგადოება მოვალეა ყრმის წინაშე, რომელიც ჩვენს მომავლის იმედია, და ის ითხოვს თანასწორობას.

დ. მიქელაძე მთელი თავისი ავტორიტეტით იბრძვის სამართლიანობისა და ადამიანის ღირსებისათვის. კერძოდ, სასტიკად გმობს ადამიანის ღირსების გათელვას და ცხოვრების წესის წართმევას, ვიდრე დანაშაული არ დამტკიცდება: „სამსჯავროს განაჩენის დადგენამდის ადამიანის ღირსების აყრა არც სამართლიანი საქმეა და არც საჭიროა“¹.

საგულისხმოა მეველის სტატია, რომელიც სასჯელს ეხება. სისხლის სამართლის მეცნიერებს ამ საკითხში ის სამ ჯგუფად ყოფს. პირველნი მოითხოვენ დამნაშავეს შეწყალებას, მეორენი — სასტიკად დასჯას, მესამენი კი — იმ მიზეზების აღმოფხვრას, რომლებიც დანაშაულს წარმოშობენ. ეს უკანასკნელი თვალსაზრისი მიაჩნია მეველეს უგონიერესად და მოითხოვს არ დაივიწყონ ის მიზეზი, რამაც დანაშაული წარმოშვა. მისი აზრით, ადამიანში ზის „მხეცი“, და საჭიროა მისი გაუვნებლება, ხოლო საამისო გზას კი ხედავს უფრო „სოციოლოგიურ მეცნიერებაში, რომლის ასპარეზი სულ უფრო ფართოვდება ამ ბოლო დროს“².

აქ უდავოდ იგრძნობა ახალი სიოს ქროლა.

დ. მიქელაძე, ისევე როგორც დიდი ილია, წინააღმდეგია

¹ „ივერია“, 1893, № 204.

² „ივერია“, 1894, № 143.

სიკვდილით დასჯისა. მას უმჯობესად მიაჩნია აღზრდის გზით ადამიანის ბუნებაში დაბუდებული მხეცის განდევნა, და ერის განათლების ერთ-ერთ საზომად მიაჩნია ლმობიერი კანონები, რაც სულაც არ უნდა ნიშნავდეს კანონის სისუსტეს. ასეთი მსჯელობა — ვინმე ქიქობისათვის სიკვდილის განაჩენის გამოტანის გამო — ერთხელ კიდევ მოწმობს მიქელაძის, როგორც მოღვაწისა და მოქალაქის, უაღრესად ჰუმანურ ბუნებაზე.

მეველე შენიშნავს, რომ ძველი ქართული კანონი და ჩვეულება გადავიარდა და ახალმა ცხოვრებამ სამაგიერო არა მოგვანწოდა რა. ამის გამო მიესალმება ახალი კანონის პროექტს, რომელიც ზღუდავს მამის განუსაზღვრელ უფლებას და შვილებს ანიჭებს უფლებას — მამის სიცოცხლეშივე აიღოს წილი მამაპაპური ადგილ-მამულიდან.

მეველეს, როგორც თავისი დროის ნაკლოვანებათა პირუთვნელ მამხილებელსა და პატიოსან მოღვაწეს, ხშირად უხდებოდა შეტაკება სხვადასხვა უბღღამგარ ბატონებთან, პედანტებთან და მოხელეებთან. ორთაბრძოლიდან გამარჯვებული ჩვეულებრივ გამოდიოდა მეველე, რომელსაც ხელში ეჭირა მახვილი კალამი და ისეთი ორგანო, როგორიც იყო „დროება“. ასე, საგულისხმოა მისი პაექრობა ქუთაისელ ვეჟილ დავით აბდუშელიშვილთან, რომელიც თბილისელ დამცველს, ნიკოლოზ ყიფიანს სწერდა ერთი საქმის გამო: „კასაცია დაწერე. საბუთიც რომ არა იყოს რა, მაინც დაწერე, ფულს მაინც მივიღებთო“. მეველემ ეს დოკუმენტი გამოაქვეყნა და ერთ-ერთ სტატიაში თავს დაესხა გამორჩენაზე გადასულ საქმოსან ვეჟილებს. ამაზე აღშფოთებულმა აბდუშელიშვილმა „დროებაში-

ვე“ დაბეჭდა ვრცელი სტატია, რომელშიაც მეველეს „ლამან-ჩელ აზნაურს“ უწოდებდა¹. იმავე ნომერში მოთავსებულ თავის პასუხში („უნებური საუბარი“) მეველეს აქცენტი ისევ ზოგად, საზოგადოებრივ ასპარეზზე გადააქვს, ჭერ ეპიგრაფად მოკყავს შოთას სიტყვები: „რა უთქვამს, რა მოუჩმახავს, რა წიგნი მოუწერია“, რაც უკვე ქმნის ვითარების ნათელ სურათს, შემდეგ კი ორიოდ სიტყვით მიწაზე ანარცხებს აბდუშელიშვილს: „დაანებეთ თავი, ღმერთს მიმადლეთ, ლიტერატურულ მაგალითებს! თუ დაიჯერებთ, ეს თქვენი საქმე არ არის. ამისთვის ცოტა მეტი წერა-კითხვის ცოდნა გახლავთ საჭირო და ცოტა მომეტებული აზრის ქონაც გოგრაში“. იქვე ურჩევს წერეთ კასაციები, მეტ ფულს აიღებთო! მეველის პოლემიკური ხერხია მისი მსუბუქი ირონია: „როგორც ჰაინემ თქვა, ყველას ნება აქვს, რომ სულელი იყოს, და თუ აბდუშელიშვილს განუზარხავს მფარველი კალთა გადააფაროს ყველა ადვოკატს, იყოს ნება მისი! თუ ახლანდელი საზოგადოება არა, შთამომავლობა მაინც დააფასებს ამ რაინდულ ქცევას“. ყოველივე ამის შემდეგ აბდუშელიშვილმა დუმილი არჩია. როგორც ვხედავთ, ეს შეტაკებაც, საკმაოდ დამახასიათებელი იმ დროისათვის, პირადი ინტერესების საზღვრებს სცილდება.

დ. მიქელაძე უყოყმანოდ ექომაგება ყველა თანამედროვეს, ყველა ჩაგრულსა და შევიწროვებულს, რომელსაც დახმარება ესაჭიროება. დაუვიწყარია მისი ბრძოლა 300 ნაძალადეველის დაბინავებისათვის, რასაც არაერთხელ ეხება. მეველე თავგამოდებით იცავს ნაძალადეველებს, არ უწონებს ქალაქის საბ-

¹ „დროება“, 1874, № 425.

ქოს „მინდორში მათს უბინაოდ დაგდებას“, პრესის ფურცლებზე თავს ესხმის პოლიციას, რომელიც მათ სამუშაო იარაღებს ართმევს და ზამთრის დამდეგს სუსხისა და სენის პირისპირ ტოვებს; გადაჭრით ითხოვს ქალაქის საბჭოსაგან მიხედოს ზუთას ოჯახს, რომელიც ნახევარი წელია ელის მის განაჩენს¹.

როგორც მისი დროის სხვა მოწინავე ადამიანები, დ. მიქელაძეც ქალის განთავისუფლებას იხილავს როგორც საზომს ყოველგვარი თავისუფლებისას.

„ქალები მაინც მრავალს სფეროში არიან დაწინაურებულნი და ზოგში კაცზე უპირატესობაცა აქვთ“², — წერს მეველე და მიესალმება ქალთა მემკვიდრეობითი უფლების შემოღებას, რაც მისი თქმით სიკეთეს მოუტანს მთელს კაცობრიობას.

მეველე ფართო ჰორიზონტისა და ინტერესის მქონე მოღვაწეა. სერგეი მესხი არ შემცდარა მის არჩევანში. მეველე უფრთხილდება ერთკვირეულ გაზეთ „დროებას“, ცდილობს რომ ის სავსებით გამოიყენოს ქვეყნის სასარგებლო საქმიანობისათვის, არ გადატვირთოს ზედმეტი წვრილმანებით. ასე, მას სწერენ ერთ „დარბაისელ კაცზე“, რომელმაც თურმე ხუთმეტრიოდე პირის თვალწინ მათრახით სცემა ცოლს და ხმა არავინ გაიღო. ცხადია, ფაქტი საწყენია, მაგრამ ჩვენს გაზეთს ყოველგვარი კერძო ფაქტით ვერ გადატვირთავთო, — სწერს კორესპონდენტებს. მხოლოდ მაშინ, როცა უძსგავსო ფაქტები უკვე საზოგადოებრივ ხასიათს იღებენ, მეველე აქვეყნებს ზო-

¹ „ივერია“, 1893, № 227.

² „ივერია“, 1893, № 198.

გადი ხასიათის ფელეტონს, რომელიც უკვე ლიტერატურულ და ისტორიულ ღირებულებას შეადგენს.

იქვე მაგალითად იღებს ქალის ცემის ამბავს და სამარცხვინო ბოძზე აკრავს ბარბაროსებს, რომელთაც ისეთ წესი აქვთ, რაც ჩვენს წინაპრებს არ ჰქონიათ. თუ ძველი ქართველი ცოლს მოკლავდა, პასუხსაც აგებდა. ახლა კი ყოველდღე სცემენ ცოლებს და მერე „ლოშნასაც კი დაუწყებენ დალილავებულ ცოლს. რა საძაგლობაა! როგორი სიბინძურე და ზნეობითი დაცემაა!“

აქ მეველე ქალის ღირსებას ეხება, და როგორც ყოველ საკითხში, აქაც ნათელი, მოწინავე აზრის მქადაგებელია. საზოგადოების პროგრესი შეუძლებელია ქალის გარეშე, და დედაკაცის გამოყენება მარტო ნივთად — მისი ძუ ცხოველზე მეტად დამცირება იქნებაო.

მეველე შენიშნავს ქალის მრავალ კეთილისმყოფელ ზეგავლენას საზოგადოების განვითარებაზე. თუ წიგნებს და კანონებს კაცი წერს, ზნეობას ქალი ქმნის და აღადგენს, ზნეობას კაცი ვერ შექმნისო. „ქალში მხოლოდ გასართობი ნივთის დანახვა ბუნების დამახინჯებაა, ძველი წესია, და დროა გამოვიდეთ ამ უდაბნოდან. კაცი ითხოვს ქალს და გაბატონდება ხოლმე, რათა? იქნებ ცოლი ქმარზე ჰკვიანია და უკეთ მოუვლის საქმეს? ქალი მკერდზე ატარებს არა მატრო ბავშვს, არამედ მთელს კაცობრიობასაც. ამ საგულისხმო მსჯელობას მოსდევს შესანიშნავი თქმა: „განათლების ხარისხი იზომება იმით, თუ როგორი უფლებები აქვს მინიჭებული დედაკაცს“. თუ კაცი მხოლოდ მბრძანებლობს, ეს ბარბაროსობაა. როცა კაცის ნიჭიც და აზრიც შეთანხმებულია ქალის ნიჭთან, მაშინ

თქვენს წინ დიდებული და განათლებული ხალხია. დღეს კი, — დაასკვნის ფელეტონის ავტორი, — იმის ნაცვლად, რომ შეერთდნენ არა მარტო ხორციელად, „კერიასთან ცხვირ-პირს ამტვრევენ ერთმანეთს და ამით წინსვლა შეჩერებულია“.

ეს მსჯელობა ქალის მდგომარეობაზე ნიმუშია იმისა, რა მაღალი, საზოგადოებრივი პოზიციებიდან შესცქერის მეველე ყოველ-სერიოზულ საქმეს.

ჩვენ თვალი მოვაველეთ მეველის მრავალმხრივ მოღვაწეობას ქვეყნის ცხოვრების სხვადასხვა დარგში. ესაა იგივე ზრუნვა ქვეყნის კეთილდღეობისათვის, ილუსტრაცია მისი სოციალ-პოლიტიკური თვალსაზრისისა, ბრძოლა ხალხის თავისუფლებისათვის, ერის წინსვლისათვის და ა. შ. მისი ცალკე გამოყოფა საჭიროდ მივიჩნიეთ მხოლოდ იმისათვის, რომ უფრო თვალსაჩინო გაგვეხადა მეველის მოღვაწეობის პრაქტიკული ხასიათი, მისი თეორიული მსჯელობის მჭიდრო კავშირი ხალხის ყოველდღიურ საჭიროებებთან.

ზნეობრივი უხედეულეზანი

„ზრდილობა და მარტებულობა დიდი საქმეა და ნამეტურ მათთვის, ვისაც საქვეყნოდ ლაპარაკი სნეულებად გადაქცევიან“.

დ. მიქელაძე

მეველის ეთიკური მრწამსი არაფერს მოულოდნელს არ შეიცავს. ის ბუნებრივად გამომდინარეობს მისი სოციალ-პოლიტიკური, პატრიოტული და ლიტერატურული თვალსაზრისიდან და დგას ისევე პროგრესის, თავისუფლების, სამართლიანობის სამსახურში. პირად ცხოვრებაში მართალი, სპეტაკი, თავდადებული დ. მიქელაძე იმასვე მოითხოვს თანამედროვეებისაგან. ამასთან ზნეობრივ სიწმინდეს მუდამ უკავშირებს ქვეყნისათვის ზრუნვის საქიროებას, მაღალი ადამიანური ვალის შეგნებას.

ადამიანის მოვალეობად მეველეს ის მიაჩნია, რომ „ერის ქემმარიტი სამსახურით და ერთგულებით დაიკმაყოფილოს თავი და ძვირფასს სამშობლოს მტლედ დაედოს“¹.

¹ „ივერია“, 1894, № 187.

რაკი შეუბღალავ ზნეობას ასე მაღალ დანიშნულებას აღ-
ლევს, ბუნებრივია, მისთვის ბრძოლასაც მეორეხარისხოვან
საქმედ არა თვლის.

„ბოროტებას, ზნეობრივს განხრწნას, ბრძოლა უნდა, —
წერს დ. მიქელაძე „ივერიაში“, — ბრძოლა გონიერი და გაბე-
დული. ბრძოლის ველიდგან მხოლოდ უღონონი გარბიან. ვაჟ-
კაცი კი ან სძლევს, ან დაძარცხდება“¹.

როგორი სურათი ესახება თვალწინ? — არც ისე სანუგე-
შო. მახინჯი წყობილება ამახინჯებს ზნეობასაც.

მეველეს აღელვებს ქვეყნის ბედი, ზნეობის დაცემა, გადა-
გვარება, და ქრისტეს მცნებასაც კი იშველიებს, რომ აჩვენოს
იმ ადამიანთა სიმდაბლე, რომლებიც მოგვაგონებენ ქართულ
ანდაზას: ქარი საბძელს კარის გაღებას ურჩევს, ბზეს შემოგი-
ტანო.

1874 წელს მეველე ძირითადად „საქართველოს“ რუბრი-
კის ქვეშ ბეჭდავს თავის აქტუალურ სტატიებს ქვეყნის ქირ-
ვარამზე.

წერილში „უბრალო საიდუმლო“ ის იგონებს მოხუცთა სიტყ-
ვებს: „განხრწნა ქვეყანა! აღარ არის პატიოსნება, ნდობა,
პირის წყალი... მოისპო სიტყვის სიმტკიცე ამ ჩვენს ძველად
რაინდულ საქართველოში!.. წახდა დრო!“².

მეველე ეთანხმება ამნაირ საყვედურებს და მდგომარეობი-
დან გამოსავლად ისევ სწავლა-განათლების გავრცელებას
თვლის. ცხადია, ის შორს არის უსამართლობის ძალით დამხო-

¹ „ივერია“, 1893, № 139.

² „დროება“, 1874, № 416.

ბის აშკარა ქადაგებისაგან, რასაც უცხოეთიდან გამოგზავნილ წერილებში უფრო აშკარად აკეთებს, მაგრამ გულის სიღრმეში გრძნობს ამ გადაგვარების ნამდვილ მიზეზებს და დარწმუნებულია, რომ „ოდესმე საქართველოს ეღირსება ის, რაზედაც დღეს დრტვინვაა“. მეველე ხედავს, რომ ჭირს პატიოსანი კაცის ცხოვრება, რომ ის იძულებულია ნიადაგ ქედს იღრეკდეს. და თუ ყოველ კეთილ საქმეს თანხმობა და კმაყოფილების ღიმილიც არ მიაყოლა, ისე გაისრისება. ამიტომაც ძნელია წინსვლა და ზნეობის ამალღება; ესმის ისიც, რომ არ კმარა მიზეზის დასახელება, საჭიროა მისი მოსპობა, რადგან „ქეშმარიტი საფუძველი ამ გაფუჭებისა არის საზოგადოებრივი წყობილება, უთანასწორო დამოკიდებულება მოქალაქეთა“. და აი „უბრალო საიდუმლოს“ ახსნის შემდეგ მეველე სვამს საკითხს მისგან თავის დახსნის ღონისძიების გამონახვაზე. უნდა ითქვას, რომ დ. მიქელაძის მიერ საკმაოდ ნათლად არის დახასიათებული უზნეობის ნამდვილი არსი, მისი მიზეზი და მრუდე წყობილების მრუდე ზეგავლენა ადამიანის ბუნებაზე.

„დროების“ ერთ-ერთ ნომერში „საქართველოს“ რუბრიკის ქვეშ დაბეჭდილია მეველის სტატია „სიკვდილის შემდეგ სინანული“,¹ რომელიც აგრეთვე ზნეობის საქმეს ეხება. მამა შვილს კლავს, საბრალო ოჯახს თავს ესხმიან და ა. შ. — ადამიანს საოცარი შემთხვევა მოეწივს! ასეთ დროს სასჯელი და ტანჯვა ვერ გაასწორებენ დაცემულ ზნეობას. მაშ რა აზრისაა მეველე? ფრიად საყურადღებოა და გაბედული მისი მსჯელობა: „ყოველი დასჯა, სისასტიკე, კიდევ უმეტესად აბრაზებენ

¹ „დროება“, 1874, № 409.

და აქეზებენ კაცს ცუდის მოხდენაზედ. იქ, სადაც უფრო ლმობიერი კანონებია, ყოველთვის ნაკლებათ ზდება დანაშაულობა“. დასჯა, მეველის რწმენით (რასაც სათანადო სტატისტიკით ამტკიცებს), წამალი კი არა, სიბრმავეა, საჭიროა სხვა ღონისძიებანი, თორემ საზოგადოებას მხეცური ანარქია მოეღოს.

მეველის აზრით, ყოველ ყმაწვილს განათლება უნდა მიეცეთ, ჩავუნერგოთ მოქალაქეობრივი მოვალეობა, საკუთარი და მოძმის უფლება. „მაშინ ჩვენ აღარ ვიქნებით ნიადაგ სამხედრო მდგომარეობაში, თორემ რასა ჰგავს ეს, ბატონებო?“

იქნებ მშობელს არ სურს შვილის სწავლა? მეველე გმობს ამ საბუთს და ადარებს მას ბატონის ძველ უფლებას, გლეხის შვილს რომ სწავლას უკრძალავდა.

მეველე ითხოვს უფასოდ სწავლას, რაც მოსპობს უმეცრეობას, აღკვეთს დანაშაულს.

იმავე წელს, რამდენიმე თვის შემდეგ, მეველე ეხება ახალგაზრდობის განათლების საკითხს, მოაგონებს მაღალ ვალს და მკაცრად ლაპარაკობს იმ ახალგაზრდებზე, რომელთაც ნიჭი და გამჭრიახობა აღმოაჩნდათ მხოლოდ მოხელეობაზე, საკუთარი სარგებლობისათვის, და არ ეყოთ ზნეობითი სიმხნე, რომ ეთქვათ: „დიად, მე ვერ აფასრულე მამულის შვილის დანიშნულებაო!“¹ მეველის აზრით, „ჩვენებურ ჩინოვნიკს ისევ რუსის ჩინოვნიკი სჯობია: რუსს ყოველთვის მომეტებულად თავისუფლად და თამამად შეუძლია მოქმედება, ვიდრე ჩვენსას. მას არავინ შესწამებს — არც ჩვენი კაცის მიდგომას, არც ქო-

¹ „დროება“, 1874, № 432.

მაგობას“; ჩვენი ჩინოვნიკი მხოლოდ თავის თავზე და ნათესა-
ვებზე ფიქრობს. მეველე მათ გაბედულად ეუბნება: „არა! ქვე-
ყანა მოელის თავის შვილებისაგან, რომ ის თუ დღეს არა, მო-
მავალში მაინც მოუმზადებს შას ბედნიერ და ნათელ ცხოვრე-
ბას“. სხვანაირად განათლების მიცემა ხარჯადაც არ ღირს. მე-
ველე არ ივიწყებს იმ ახალგაზრდებსაც, რომლებიც გამობენ
ისეთ საქმეს, რაც ხალხს სარგებლობას არ მოუტანს, და გზას
ულოცავს მათ.

ყოველივე ამას უდავოდ ჰქონდა შედეგი. „დროება“ —
ხალხის გულის შესაიდუმლე იყო.

მეველეს კარგი ზნეობის სამკვდლოდ ოჯახი მიაჩნია და
ოჯახის ღირსების ბურჯად — დედა.

მეველეს რწმენით: „არც ერთი ერის წარმატება და აღორ-
ძინება არ არის დასაჯერებელი, სანამდის ამ ერს კარგი ოჯახი
არ გაუჩნდება“¹. კარგი ოჯახის ბურჯი კი დედაა. ამიტომ მოი-
თხოვს ქალთა განათლებას.

„მხოლოდ წესიერად აღზრდილ დედას შეუძლია ჩაუნერ-
გოს შვილის მალალი გრძნობა“. ცნობილია, რომ სწორედ დე-
დას თვლიდა ჯანსაღი თაობის საძირკველად სხვადასხვა დრო-
ის შრავალი გამოჩენილი ადამიანი. ამ მოსაზრებას კიდევ ერ-
თხელ ჩაუფიქრდება ყოველი ქართველი დედა, ვინც მეველის
ცხოვრებას გაეცნობა.

მეველეს უზრდელობა და უზნეობა მიაჩნია საზოგადოებ-
რივ ბოროტებად, რასაც აღმოფხვრა უნდა. სხვათაშორის, იმა-

¹ „ივერია“, 1893, № 80.

საც სწორად შენიშნავს, რომ უზრდელობა და უწმაწური სიტყვა-პასუხი საწყენია ყველასათვის, — მაგრამ განსაკუთრებულ მგრძობელობას იჩენს ქართველი კაცი — თვითონ ზრდილი და თავაზიანი, როცა უზრდელად ექცევიან; თან იმოწმებს ფრანგულ თქმას: ზრდილობა ყველაზე უწინარესო! მცირე უკმეხობას ხშირად მძიმე შედეგი მოსდევს: ამიტომ მეველე მოითხოვს უფროსთა მეტ ყურადღებას, რომ ალაგმონ უხეშობა.

არა მარტო სამშობლოში ყოფნის დროს, არამედ შორეული ქენევიდანაც კი იწერება მეველე ზნეობის ამალგების აუცილებლობაზე, ეძებს საამისო გზებს.

„ხალხი ზნეობით და გონებით უნდა იყოს ძლიერი, მას სასარგებლო ნაყოფი უნდა მოჰქონდეს კაცობრიობის სახლობაში, თორემ მისი მომავალი, რაც გინდა ბევრი მცხოვრები ჰყავდეს, სანატრელი არ არის“¹. საგულისხმო შენიშვნაა. ღირსება, ზნეობრივი დონე, სასარგებლო საქმიანობა, და არა რიცხვობრივი სიმრავლე ან ტლანქი ძალა — აი, რა მიაჩნია ხალხის ღირსების საზომად.

მეველე უღმობელია იმ ქაბუკების მიმართ, რომლებიც ჩვენს საზოგადოებაში წინ მიდიან, მაგრამ დაინახავენ თუ არა გულგრილობას და ამოებას, პირველსავე კედელთან დგებიან. იწყებენ უკან სვლას და „კაცი ჩვრად იქცევა“. ცხადია, არიან სხვანაირებიც, მაგრამ მეველე აქ სენზე ლაპარაკობს, და მოუწოდებს ქართველ აზნაურობას, რუსეთის აზნაურების მსგავ-

¹ „დროება“, 1872, № 46.

სად, დაეხმაროს განათლების საქმეში მას, ვისი მოყვანილი პურითაც გამოზრდილა.

ყურადღებას იქცევს მეველის სტატია „ჩვენებური იეზუიტობა“. რა კარგადაა დახასიათებული ეს საშინელი ორდენი!

თითქოს ჩვენი დროის სწავლული წერდეს, ყველაფერი სწორი, ნათელი და მოხდენილად თქმულია: „იეზუიტების ისტორია ერთი უბნელესი და უსასტიკესი ფურცელთაგანია კაცობრიობის ისტორიაში. მათ მოქმედებაში თქვენ ხედავთ მგელს, სატანად გარდაქცეულს. მაგრამ ყველა ეს ბოროტება და შემადრწუნებელი საძაგლობა „უმალღესი საქროებისათვის“ ხდება“¹.

მსჯელობა იეზუიტებზე, რომელთაც ყველგან ზიზღი დაიმსახურეს, მეველეს თავშესაქცევ არაკად კი არ უქცევია; იეზუიტთა მაგალითს ის იყენებს „ჩვენებური იეზუიტების“ განსაკიცხავად; მათი დევიზი — „შიზანი ამართლებს საშუალებას“ — მეველეს დამგობის ღირსად მიაჩნია.

პრინციპი „არაფრის დათმობა“ აგრეთვე გამოუსადეგარია ჩვენთვის; შეიძლება ის გამოადგეს ბუღას, მაჰმადს, მაგრამ არა — უმრავლესობას.

მესამე. პრინციპი — ზოგად შიზანში სიმტკიცე, მაგრამ წვრილმანებში საზოგადოებისათვის ანგარიშის გაწევა — მეველეს მიაჩნია თანამედროვე ვითარებისათვის მისაღებ დევიზად. რა გზას ადგას ჩვენი ახალგაზრდობა? — სვამს კითხვას მეველე და პასუხობს: — იეზუიტურს, და ისიც, სამწუხაროდ,

¹ „ღროება“, 1874, № 426.

იეზუიტებისაგან განსხვავებით, საკუთარი საჭიროებისათვის! — იეზუიტები ორდენის საჭიროებას მაინც ემსახურებოდნენ.

რას სჩადიან ასეთს? აი მეველის პასუხი: „ეს საზოგადოებისათვის თითქოს მზრუნველნი ცრუობენ და ორპირობენ, ცარცვენ და გლეჯენ ხალხსა ვითომ უმაღლესი ანგარიშების გამო! ისინი ორ-სამ წელიწადს აგროვებენ ფულს ათი ათასი მანეთობით, იშენებენ სასახლეებს, ყიდულობენ მიწა-წყალს... და რომ ჰკითხო: „ეი, საპატიო კაცო, საით მიბრძანდები? ამდენ სიბინძურეს რათ შვრები“... ეს გადარჩულებული, უტიფარი კაცი წარბშეუხრელად გიპასუხებს: „დიახაც იმიტომ ვაღარიბებ ხალხს, რომ შესანიშნავი ქველის მოქმედება რამე მოვახდინო“¹.

აი, ვის ხელში ჩავარდნილა დღეს საზოგადოება! — მწარედ ასკვნის მეველე. მისი უდავო ისტორიული დამსახურებაა, რომ ფარდა ახადა იეზუიტებს, რომელთაც საკუთარი მუცლისათვის შეუწირავთ მოვალეობა, პატიოსნება და სინდისი, რომელთა მიზანია მხოლოდ ფული. აქ მეველე იმოწმებს შექსპირის სიტყვებს: „რაკი ბოროტებაში შეტოპავს კაცი, შეშდეგ იმას ფეხი აუცურდება და ველარ ამოდის იქიდანო“.

აი მეველის პატიოსანი, უანგარო, მამხილებელი კალმის კვალი! ის არასოდეს არ ამოიშლება ქართული აზროვნების ისტორიიდან.

როცა ზნეობრივ სრულყოფაზე ლაპარაკობს, დ. მიქელაძეს, ბუნებრივია, მხედველობაში ჰყავს პირველ რიგში ჩვენი ახალგაზრდობა, მისი სწავლა, აღზრდა და საქმიანობა. იგი მო-

¹ „დროება“, 1874, № 426.

ითხოვს, სკოლა და ოჯახი ერთი მიზნით იყოს გამსჭვალული, უამისოდ არ სჯერა წარმატება ახალგაზრდობის აღზრდის საქმეში.

მეველეს უსამართლობად მიაჩნია საყვედური, — ახალგაზრდობას იდეალი აღარა აქვსო, — და სწამს, რომ ახალი თაობა მოწადინებულია, გატაცებულია მეცნიერებით და აღელვებს ქვეყნის ბედი, მაგრამ სააშისოდ საჭიროა მოცალეობა, უზრუნველი ლუკმა-პური, „ყველაფერი გარემოებაზედ და სასიცოცხლო პირობებზედ არის დამოკიდებული. უსამართლო განაჩენი აძრწუნებს ადამიანის სამართლიანობის გრძნობას“¹.

ცოტა მოგვიანებით მეველე ისევ უბრუნდება იმ საყვედურს, რომელიც ახალ თაობას შეეხება, — იდეალები არა აქვსო, და ამბობს: თუ ეს საჩივარი მართალია, „დანაშაული მთლად ეკუთვნის თვითონ ამ მდრტვინავ და მგოდებელ საზოგადოებას და არა მარტო ახალგაზრდობას“². ამ ვარაუდიდან ჩანს მეველის ფართო დიაპაზონი: როცა საზოგადოებრივი ცხოვრება, წყობა, აზრი თუ მწერლობა ჭაობში ჩაეშვება, მართოდენ ახალგაზრდობისათვის ბრალის დადება „უსაფუძვლო და უსამართლოა“.

მეველეს შეგნებული აქვს, რომ ჩვენი ცხოვრების, ჩვენი პროგრესის მსვლელობა დამოკიდებულია რუსეთზე, და მსჯელობის საგანი აქ ერთია: თუ ახალგაზრდობის მიმართ საყვე-

¹ „ივერია“, 1893, № 102.

² „ივერია“, 1893, № 134.

დურს საფუძველი აქვს მოსკოვსა და პეტერბურგში, „ამნაირი-
ვე საფუძველი უნდა ჰქონდეს ქუთაისსა და ტფილისშიაც“¹.

ამასთან დაკავშირებით მეველე ქართველ ახალგაზრდობას მიზნად უსახავს, შეისწავლოს ერის წარსული და აწმყო, „და-
იცვას და განავითაროს სამშობლო ენა, აღადგინოს მოქალაქე-
ობრივი მხნეობა და კმაყოფილება... ის ქვეყნის გონებითი
ლონე, რომელიც ჩვენ გვეზრდება ყოველს წელს, სასურველია
შიმართულ იქნეს ისეთს საგნების შესწავლაზედ, რომელსაც
უფრო საჭიროებს დღეს ქართველი ერი“. მეველე მოუწოდებს
ახალგაზრდობას ქვეყნის სიმდიდრის შესწავლისაკენ, ცარიე-
ლი მკვერმეტყველება კა, მისი აზრით, ბევრს ვერაფერს გვარ-
გებს. ვისაც სამშობლოსათვის გამოსადეგი ცხოვრება სურს,
საქმე სხვის სახვეწად და სავედრებლად როდი უნდა გაიხი-
დოს! — ესაა ძირითადი იდეა, რომელსაც მეველე ახალგაზრ-
დობის აღზრდის ქვაკუთხედად აცხადებს.

დ. მიქელაძე მიესალმება ყოველ კარგ მაგალითს ზნეობრივ
და ინტელექტუალურ სამყაროში. ის აღფრთოვანებულია ვინ-
მე ჩხარტიშვილის მოქმედებით, თავის დამკრეღს რომ შეუ-
რიგდა და ჯარიმა რუსთაველის ძეგლის ასაგებად შესწირა.

მაგრამ ახალ სიოს ქროლასთან ერთად მეველეს შეუმჩნე-
ველი არა რჩება უარყოფითი სიოც, რომელსაც მოაქვს ეგოიზ-
მი, უაზრო აყალმაყალი, ხანჯლის ტრიალი, ღრეობა და საერ-
თოდ ერის ენერგიის ფუჭად ფლანგვა. ის გულნატკენია, რომ
ახალგაზრდობამ დაკარგა პატივისცემა იარაღის მიმართ, მზა-
დაა სუფრაზე, ქალებისა და ბავშვების თვალწინ იძროს ხმა-

¹ „ივერია“, 1893, № 134.

ლი და ა. შ. თუ უწინ ქეიფიდან მისულს ეკითხებოდნენ, როგორი მხიარულება იყო, ახლა ეკითხებიან: როგორ მშვიდობა იყო? ხომ არავინ მოუკლავთო?

მეველე ყველგან დაეძებს და პოულობს კიდევ „დიდებულსა და სხივოსანს მაგალითებს“, რათა ნიმუშად დაუსახოს თანამემამულეებს, ახალგაზრდობას. ასეთად მიაჩნია, მაგალითად, ინგლისელი მანდილოსანი მის კეტი მარსდენი, რომელმაც შიატოვა უზრუნველი ცხოვრება და წავიდა 15 ათასი ვერსის დაშორებით, ციმბირში, რათა კეთროვანთათვის მოეველო; „ნეტავი იმ ქვეყანას, სადაც ამისთანა მაღალის გრძნობის ადამიანი აღიზრდება!“ — წერს აღტაცებული მეველე და მისი სიტყვა უდავოდ ტოვებს სათანადო კვალს. არა, მეველეს არ შურს, არც ქართული ნიადაგისთვისაა უცხო მსგავსი სიკეთე, საჭიროა მხოლოდ „ამ თესლის გონიერი მოვლა და აღზრდა“. ბევრი ქართველის დაუდევრობის წყალობით კი „სისხლის ამღვრევ რომანებიდან უნდა შეიძინოს ჩვენმა ახალგაზრდობამ ზნეობა და სიბრძნე ამა სოფლისა! ვერაფერი სანუგეშო ამბავია“¹.

მაგრამ მეველე არსად და არასოდეს არ ბაძავს უცხოეთს ბრმად და უკრიტიკოდ.

ერთ-ერთ უცხოურ ცნობას დ. მიქელაძე საჭირბოროტო ეროვნული საკითხის დასმით ამთავრებს: სამწუხაროდ, ხშირად ჩვენ ვბაძავთ ევროპას „ისეთ რამეებში, რომელთაც წმინდა გარეგანი მნიშვნელობა აქვს. — თუ გვსურს პატივის მოპოვება, მომავალში ნათელი ცხოვრება, თათქარიძობას, რუ-

¹ „ივერია“, 1893, № 145.

სეთუმობას, გაიძვერობას და ყალბ განათლებას უნდა დავანებოთ თავი საუკუნოთ. ხალხის ისტორიაში არის ისეთი წამები, როდესაც თუ არ შეუხვია საზოგადოებამ იმ გზას, მერმე იმისი მობრუნება ათას მთავარ ანგელოზსაც აღარ შეუძლიან. იქნებ ჩვენ ეს ქაში გვადგია ეხლა? იქნებ ჩვენს ენერგიაზედ, ამ წამში, იყოს დამოკიდებული ჩვენი ბედი? იქნებ თვითონვე ვუმზადებთ თავს ისეთს ორმოს, საიდგანაც არასოდეს აღარ გვეღირსება სინათლის დანახვა, წმინდა ჰაერით სუნთქვა?.. ამაზე დაფიქრება, ვგონებ, ღირდეს?“¹.

მეველის მახვილ შენიშვნებს ცოლებისადმი უკაცური მოპყრობის შესახებ გულგრილად არ შეხვედრია მკითხველი. ემუქრებიან კიდევ წერილის ავტორს. „ღროების“ ფურცლებზევე გამოქვეყნდა ქმრების საყვედური: ცოლები გადაგვიდგნენ, ჩვენც უფლებები გვქონიაო, და თუ ჩვენს შორის ისევ მშვიდობას არ ჩამოაგდებ, თუ გადარეულ ცოლებს არ დაგვიწყნარებ, „ცუდს რასმეს მოელოდეთო“. მეველე გაცებულება შექმნილი ხათაბალით — ცოლების ცემა დაგიშალეთ და ეს არის ოჯახში შფოთის ჩამოგდებაო? „მე მშვიდობის მოყვარე კაცი ვარ, — განაგრძობს იგი, — და ღმერთმა დამიფაროს ჩხუბისა და დავიდარაბისაგანო“.

უსიამოვნება მაინც ფაქტია. მეველეს არაერთი უსიამოვნება შეხვედრია რუტინიორებისაგან, მაგრამ უკან არასოდეს დაუხევია.

ფრიად საყურადღებო და პროგრესულია მეველის მოსაზრება, რომელიც ეხება ადამიანის ბედს სატუსალოში. ამ სა-

¹ „ღროება“, 1873, № 15.

ჭირბოროტო საკითხს ეძღვნა მისი სტატია „საპყრობილის გავლენა“¹.

მეველე სვამს საკითხს, რაც მოწინავე ქვეყნებმა უკვე განხორციელეს: რომ ტუსაღში კი არ ჩაკლან ადამიანური საწყისები, არამედ, პირიქით, აღზარდონ და გამოასწორონ. თუ ერთ ბნელ ოთახში შეყრიან და ნადირებივით ექცევიან, „საპყრობილე ურყვნის ხასიათს, ჩვეულებას, რწმუნებას“, — წერს მეველე, და მოითხოვს ტუსაღის ჩაბმას შრომაში, სასარგებლო საქმიანობაში, მოითხოვს ასწავლონ წერა-კითხვა და ა. შ. უწინ დამნაშავეს სჯიდნენ შურისძიების მიზნით და სპობდნენ მასში ადამიანს, დღეს კი დროა შევიგნოთ, რომ დამნაშავეს შურისძიების ნაცვლად ასწორებენ, რომ ხელახლა გახდეს ადამიანი. ამით საზოგადოებაც მოგებული რჩება და დამნაშავეთა რიცხვიც მცირდება. მეველის დასკვნით, „ერთ საუკეთესო საშუალებად ზნეობის ასამაღლებლად უნდა ჩაითვალოს საპყრობილეების რეფორმა“. ასეთ მტკივნეულ საკითხზე ასეთი პროგრესული, ჰუმანური, საზოგადოებრივად სასარგებლო აზრის წამოჭრა პრესაში თვალსაჩინო დამსახურებად უნდა ჩაეთვალოს ჩვენი კულტურულ-საზოგადოებრივი წარსულის ამ თვალსაჩინო მოღვაწეს.

მეველის მოწინავე ზნეობრივი შეხედულებანი ბევრს საგულღისხმოს ეუბნებიან ჩვენი დროის ახალგაზრდებსაც არა მარტო ისტორიული, არამედ წმინდა პრაქტიკული თვალსაზრისითაც.

¹ „დროება“, 1874, № 415.

ომისა და მუვილოზის საკითხი

„ხანჯალი, თოფი, ზარბაზანი... ემბლე-
მა მხოლოდ ბარბაროსობისა“.

დ. შიქელაძე

ასე აღელვებს მეველეს ქვეყნის ცხოვრების ყველა მხარე, ასე დაუზარებლად ეხმაურება ყველა საჭირბოროტო საკითხს და არ თაკილობს არავითარ „სამეურნეო წვრილმანზე“ წერას, თუ ამ წვრილმანს ეძლევა საზოგადოებრივი მნიშვნელობა.

მაგრამ იქ, სადაც მეველე ეხება საერთაშორისო საკითხს, ომსა და მშვიდობას, ქვეყნებისა და ერების ბედს, ჩვენს წინაშე დგება არა უბრალო საგაზეთო მიმომხილველი, არამედ მაღალი რანგის მოღვაწე, მოაზროვნე, მწერალი, რომელიც დასცინის რეაქციონერ კალმოსნებს და უნიჭო პოლიტიკოსებს.

მეველე ირონიულად უყურობს ომსა და უგუნურ მისწრაფებას შეიარაღებისაკენ. „დროების“ კორესპონდენტი, ჯერ კიდევ 28 წლის ჭაბუკი, მოხდენილად ხუმრობს: „ვეფიქრობდი ხოლმე, კმარა, ღმერთმანი, რათ გვინდა ამდენი აფიცრებამეთქი! ალბათ საკმაოდ დაცულნი არა ვართ მტრისაგან?.. ახლა მთელი ნევის პროსპექტი სავსეა ამ მხედრებით. რამდენ

სარგებლობას მოუტანდნენ ეს ჭაბუკები თავის სამშობლოს პატიოსანი შრომით!.. ყველა სახელმწიფო რომ სამარ იარაღს სამუშაო იარაღათ გადააკეთებდეს, ხალხისათვის ბევრათ საუმჯობესო იქნებოდა... მგონია, ქვეყანა სამოთხეთ გადაიქცეოდა“¹.

მეველეს მშვენივრად ესმის, რომ „ხანჯალი, ისე როგორც ყოველი სხვა მომაკვდინებელი იარაღი, თოფი, დამბაჩა, ზარბაზანი, არ არის უებარი საშუალება ადამიანთა შორის ბედნიერების და სიყვარულის დამკვიდრებისა... ემბლემაა მხოლოდ ბარბაროსობისა და არა განათლებისა“², და მოითხოვს, რომ ადამიანთა შორის, ისევე როგორც სახელმწიფოთა შორის, „ძალა კი არ იყოს დავის გადამწყვეტი, არამედ სამართალი. როგორც ცალკეული ადამიანის მიერ ხანჯლით ჩადენილი დანაშაული, ამდენადვე დანაშაულობაა მთელი სახელმწიფოსათვის გალაშქრება, ათასის და ასი ათასის ადამიანის გაჟლეტა, ქვეყნის განადგურება და თავის სიმართლის თოფითა და ზარბაზნით დამტკიცება“³. ცხადია, ერთი კაცის მოკვლაზე დიდი დანაშაულია მილიონი კაცის მოკვლა, ეს იგივე ავაზაკობაა, ოღონდ უფრო დიდი ხარისხისა. ყოველივე ამასთან ერთად მეველე ედავება გაზეთ „კავკაზს“, რომელსაც წელზე დაკიდებული ხანჯალი უფრო სახიფათოდ და საზიანოდ მიუჩნევია, ვიდრე უბეში დამალული; და ამტკიცებს, რომ იარაღი, ჩოხაზე გკიდია თუ სერთუქს ქვეშ გაქვს დამალული, მაინც იარაღია,

¹ „დროება“, 1872, № 32.

² „ივერია“, 1894, № 146.

³ „ივერია“, 1894, № 146.

საძაგელია, და საჭიროა მისი აკრძალვა, ოღონდ ისე, რომ ჩვეულებას უხეშად არ შევეხოთ.

უდავოა, ხალხის უკეთესი ნაწილის განწყობილებას გამოხატავს მეველე, როცა მშვიდობის სიტყვას მიესალმება: „ყოველის მხრით მშვიდობის ამბავი მოდის; ყოველის მხრით ძმობასა და სიყვარულზეა გამართული ლაპარაკი, თითქოს ერთი მცირეოდენი ეჭვის ღრუბელიც არა სჩანდეს ევროპის საპოლიტიკო ცაზე!“.

ასე აღტაცებით ლაპარაკობს „ივერიის“ უანგარო მოღვაწე. მაგრამ მწარეა მისი სიხარული. მან იცის, რომ „საშინელ გრიგალსა და ზეცის სასტიკ რისხვას ხშირად წინამორბედობს სრული მყუდროება და მშვიდობა. გამოუტღელი თვალი ვერაოდეს ვერ შეამჩნევს, რომ ბუნება რაღაცა უცნაურსა და სასმეტერბელ ამბის მოვლინებას აპირობს ქვეყნად“.

მართლაც, საგულისხმოა მეველის ეს არაერთგზის გამოხატული შეშფოთება, რასაც ოცი წლის შემდეგ მართლაც მოჰყვა მსოფლიო ომის ქარიშხალი! ის უფრო ფხიზელია ევროპელ ერთა იმ მოღვაწეებზე, რომლებიც „სიამოვნებითა და ნუგეშით შესცქერიან თავის მეფეებს და ქვეყნის მმართველთ, რომელნიც უქადიან მშვიდობიანსა და ბეჯითს პროგრესს“. დედები დამშვიდებით არწევენ აკვანს, მუშაკნი სახნისს ფერავენ, და არაფერი აფრთხობს ქვეყნიერებას, რასაც თითქოს ზეცის მადლი ეფინება. ამ მწერლის მახვილი თვალით შენიშნულ და აღწერილ ამბავს მოსდევს ავტორის შეშფოთება: „საკმარისია ერთი პატარა მიზეზი, ერთი უმნიშვნელო საგანი, საკმაოა გაღ-

1 „ივერია“, 1893. № 220.

ვიძებულო მადა რომლისაჲე ერისა და მთელი ეს სურვილი მშვიდობიანი შრომისა ერთ წამს იცვლება თოფ-ზარბაზნის ჰეჲა ქუხილით, ხმლის ტრიალით, ცეცხლით და სიკედილით“.

ვეითხულობთ ამ თითქოს წინასწარმეტყველურ სიტყვებს, ასე ხატოვნად თქმულს ჩვენი თავმდაბალი მოღვაწის მიერ, და თვალწინ აღდგება „ერთი პატარა მიზეზი“ — სარაევოში გას-
როლილი ტყვია.

ეს სტატია მეველის საღი აზროვნების ძეგლია.

მეველე მუდამ მომხრეა ერთა შორის კავშირისა და ძმობი-
სა, მაგრამ თუ ამ კავშირის მიზანია ომი, ძარცვა და პირადი ანგარიში, მას ეჭვით უცქერის, იცის, რომ ასეთი კავშირი სარგებლობას არ მოუტანს არც ერთ მხარეს. ასეთ კავშირად მიაჩნია მეველეს, მაგალითად, „ნაპოლეონ III-საგან გაოხრე-
ბული, დამცირებული და გალანძღული“, მაგრამ მოკლე ხანში ფეხზე დამდგარი საფრანგეთის ცდა — რუსეთთან კავშირით მიაღწიოს თავის მიზანს. ეს ვარაუდიც მართლდება ოცი წლის შემდეგ, როცა მტაცებელურმა კავშირებმა პირველი მსოფლიო ომის ხანძარი გააჩაღეს.

მეველე მიესალმება იმ ერებს, რომლებიც საყოველთაო თავისუფლებისა და სამართლიანობისათვის იბრძვიან, ხოლო ნიღაბს ხდის „კეთილშობილ ევროპას“, რომელიც დუმს მაშინ, როცა საჭიროა ხმის ამოღება. „როცა ერთი ადამიანი მეორეს ატყუებს, ამას სიცრუე ჰქვია და კანონი სჯის; მაგრამ როდესაც ერთი ერი მეორეს ატყუებს, ამას კი პოლიტიკა ეწოდება, რომელიც დღეს მოწონებულია და დაჯილდოებულია მსოფ-
ლიოს თანაგრძნობით“, — ასე სხარტად და ნათლად ხატავს სინამდვილეს ივერიის მესვეური, ილიას თანამედროშე.

მეველეს ეკუთვნის ბრწყინვალე მსჯელობა, რასაც გვიან სხვა, აღიარებულ დიპლომატებს დამსახურებად უთვლიან: „როდესაც ერთი კაცი მეორეს რასმე ძალით ართმევს ან სიცოცხლეს უსპობს თავის მოპირდაპირეს — შემადრწუნებელი ავაზაკობაა, რომლისთვისაც დამნაშავეს კანონი სასტიკად სჯის. ხოლო როდესაც ერთი სახელმწიფო მეორეს ძალით მამულსა და მიწაწყალს ართმევს, ქვეყანას უნადგურებს და აუარებელს ხალხს უხოცავს, ხშირად ბავშვებსა და დედაკაცებსაც კი — ამას გამარჯვება ჰქვია და ამის მოქმედთ ქვეყანა დაფნის გვირგვინათ ამკობს, საგალობელს უთხზავს, თაყვანსა სცემს!“¹. ასეთ პირობებში, ცხადია, თავისუფლება ფეხს ვერ იდგამს.

დ. მიქელაძე ებრძვის ომის გამჩაღებლებსა და მათს ყურმოკრილ ლაქიებს, მოსყიდულ მჯღაბნელებს.

1893 წ. შემოდგომაზე დ. მიქელაძე მოურიდებლად პასუხს აძლევს „ნოვოე ვრემიას“ და „მოსკოვსკიე ვედომოსტის“ კალმოსნებს. ამ „პირთაგან ცეცხლას მფრქვეველი“ გაზეთების მესვეურები სიტყვით მშვიდობას ქადაგებდნენ, საქმით კი მისთვის არაფერს აკეთებდნენ. აი, მას ისევ თვალში მოხვდა ცნობილი ალექსი სუვორინი, ბურჟუაზიული ჟურნალისტი და საქმოსანი, რომელიც მხოლოდ მეფისათვის ხელსაყრელ წიგნებს ასაღებდა და თვითვე იყო თავისი გამოცემების ცენზორი; დიდი ლენინის დახასიათებით, ეს სუვორინი იყო „მილიონერი, თვითკმაყოფილა და უსირცხვილო მეხოტბე ბურჟუაზიისა“²...

მეფის წყობილების ამ უბადრუკი ლაქიის კრიტიკა უკვე

¹ „ივერია“, 1894, № 149.

² ლენინი, ტ. 18, გვ. 324, მეოთხე გამოცემა.

ხათლად ლაპარაკობს მეველის თვალსაზრისის პროგრესულ ხასიათზე. ჩვენი მოღვაწე დასცინის რუსეთ-საფრანგეთის კავშირის გამო „მშვიდობის გუნებაზე დამღვარ“ რეაქციონერ მწერლებს და კერძოდ სუვორინს, რომელიც გერმანიის იმპერატორს ურჩევს „მოსპეთ ჯარები და დაამყარეთ მშვიდობაო“. „განზრახვა დიად კეთილია, მაგრამ სახე ამ განზრახვისა სუსტობს, — შენიშნავს მეველე. — თუ რუსეთის გაზეთის მმართველს ნამღვილად სურს მშვიდობა, იმან მხოლოდ ერთს მპყრობელს კი არ უნდა ურჩიოს: იარაღი დაჰყარე და ჯარები სახლში დაითხოვეო, არამედ ესევე უნდა უთხრას ყველა სახელმწიფოს, ყველა მეფეს“¹.

მეველის ისარი შიგ გულში ხვდება დიდმპყრობელური შოვინიზმისა და ანტისემიტის მქადაგებელ საქმოსანს, რომელთანაც მას ბევრი ანგარიში აქვს: ფხიზელი გონების კაცს არ გაუჭირდებაო იმისი გამოცნობა, მშვიდობა ჯობია თუ ომი. ეს სუვორინის დაუხმარებლადაც ვიცით. საქმე ისაა, რას აკეთებს საამისოდ სუვორინი. მეველე იშველიებს ვაქტორ ჰიუგოს აზრს: „ვიდრე ქვეყნად არსებობს გამარჯვებული და დამარცხებული ერი, მანამდე ეეროპას მშვიდობა და ნორმალური პროგრესი არ ეღირსებაო“.

გამაფრთხილებელი და წინასწარმეტყველურია მეველის ბევრი სტატია ომსა და მშვიდობაზე. 1893 წლის შემოდგომაზე ის ფხიზლად ადევნებს თვალს რუსეთის აღმირალ აველანის ჩასვლას ტულონში და იმ ზეიმს, რომელსაც მას ფრანგები უწყობენ. მას უხარია მეგობრობის ყოველი აქტი, მაგრამ თან

¹ „ივერია“, 1893, № 234.

აფიქრებს სამთა კავშირის შეკვრა, რასაც შეიძლება მძიმე შედეგები მოჰყვეს: „ევროპა გაიყოფა ორ ბანაკად და საკმაო იქნება მაშინ ერთი პატარა ნაპერწკალი, რომ დღეს მშვიდობით მცხოვრები ერთი ერთი-მეორეს წაესივნენ და სისხლით შეღებონ ესოდენ განახლებული და ბედნიერი ქვეყნები“¹. მართალია, ყოველ ომს მოჰყვება სიმშვიდე, მაგრამ „რამდენი ოჯახი, რამდენი ქვეყანა დაიღუპება ამ საერთოდ მოდებულ ცეცხლში... ამას ვინ აღრიცხავს!“

მეველის დასკვნით, „ერთია უეჭველი, რომ ომი კარზე გვადგია, რადგან ამდენ სამხედრო ხარჯს ვერც ერთი ქვეყანა ვედარ უძლებს და ყოველგან დიდი დრტვინვა ისმის“. ვკითხულობთ 1893 წელს დაწერილ ამ გამაფრთხილებელ სიტყვებს და თვალწინ გვიდგას 1914 წლის საშინელი სვრემა!

თითქოს მოვლენების ანალიზითა და ალლოთი მიხვდა მეველე იმ ომის გარდუვალობას, რომელიც მტაცებელთა ვნების დასაოკებლად უნდა ატეხილიყო ოცი წლის შემდეგ. ეს მარჩიელობა როდი იყო. მეველე გამოდაოდა ისტორიის გამოცდილებიდან, რომ ევროპაში „ყოველს 20-25 წლის განმავლობაში უთუოდ ომი მოხდება ხოლმე“.

მეველე ხალხთა ძმობისა და მეგობრობის მომხრეა და თავისი წვლილი შეაქვს ამ საქმეში. ეს მეღავენდება, მაგალითად, „ივერიისათვის“ დაწერილ სტატიებშიც, რომლებშიაც იმედოვნებს რუსეთ-საფრანგეთის მეგობრობას. მაგრამ ყოველგვარი დიპლომატიური მანქვა როდი მიაჩნია მეგობრობად. სანიმუშოდ მოვიტანოთ მისი ერთი მსჯელობა: „ერთა შორის სიყვა-

¹ „ივერია“, 1893, № 212.

რულისა და თანაგრძნობის დანახვა, რასაკვირველია, სასიამოვნო ამბავია, მაგრამ სანამდის არ გამოცხადდება ხელშეკრულება მტკიცე და სავალდებულო ორთავე სახელმწიფოსათვის, მანამდის ყველა ეს ამბები, სიტყვები, სადღეგრძელოები, სტუმრობა და დღესასწაულები ბოლოს და ბოლოს ხსენებული ქვეყნებისათვის რჩება საამო მოსაგონ შემთხვევად და სხვად არასფრად“¹.

ეს შორსმჭვრეტელური დიპლომატიური ჭკუა დავით მიქელაძისა მეტყველებს მის ნათელ გონებასა და სწორ ალლოზე, რითაც უყურებს ისტორიულ ამბებს. ეს მისი დროის ბევრი ბეცი დიპლომატიისათვის გამოდგებოდა ჭკუისსასწავლებელ დარაგებად.

დ. მიქელაძის მოსაზრებანი ომსა და მშვიდობაზე გამომდინარეობენ მისი ერუდიციისა და პირადი დაკვირვების არსენალიდან, ამიტომ მათაც გარკვეული მნიშვნელობა ენიჭებათ არა მარტო ისტორიულა, არამედ წმინდა შემეცნებითი თვალსაზრისითაც, როგორც გასული საუკუნის ერთი ფხიზელი ჟურნალისტიისა და მოღვაწის ცოცხალი მსჯელობის ნაყოფს.

¹ „ივერია“, 1893, № 202.

მეველე — დრამატურგი და მთარგმნელი

„თარგმანს გვიძღვის თუ გამოთქმებს,
განძი არის და შექენა“.

ნიკო. დადიანი.

დავით მიქელაძე უწინარეს ყოვლისა ჟურნალისტიკა. მაგრამ მისი სამწერლო ნიჭი ისევე არ იწვევს ეჭვს, როგორც მისი მოქალაქეობრივი სინდისი და უმწიკვლო პატრიოტიზმი. დაკარგულ ხელნაწერებზე რომ არაფერი ვთქვათ, გამოქვეყნებული ნიმუშებიც საკმაო საფუძველს გვაძლევენ, რომ ვილაპარაკოთ დ. მიქელაძეზე, როგორც სიტყვის ოსტატზე, მეტადრე — როგორც დრამატურგსა და მთარგმნელზე.

ქართულ სცენაზე არაერთხელ დადგმულა დ. მიქელაძის „ხაფანგიც“ და მის მიერ თარგმნილი ლევ ტოლსტოის დრამაც „მეუფემა წყვდიადისა“. ერთმაც და მეორემაც საერთო მოწონება დაიმსახურეს.

ეს ორი პიესაა დ. მიქელაძის დღეისათვის ცნობილი უმთავრესი ლიტერატურული ნაწარმოებები. რა ითქმის მათზე? შეიძლება ძველი დროის მოკლე გამოთქმა ვიხმაროთ: „ცოტა და კარგი“.

1899 წელს აკაკის „კრებულის“ მეორე ნომერში ქვეყნდება მეველის ოთხმოქმედებიანი დრამა „ხაფანგი“. პიესის მთავარი გმირებია გლეხი ტიმოთეს მშვენიერი ასული ნინო და თავადი-შვილი ვარდენ ლომიძე, რომელსაც გულწრფელად უყვარს ეს ქალი. ქორწინებას წინ აღუდგება ვარდენის მამა ზაქარია.

ზაქარია ლომიძეს იმედი აქვს, რომ თავადის მზითვიან ქალს შერთავს შვილს, ვალებს გაისტუმრებს, და წარმოადგინეთ მისი აღშფოთება, როცა გებულობს, რომ მისი ვარდენი გლეხის ქალს ირთავს.

„სანამ ცოცხალი ვარ და ზაქარია ლომიძეს მეძახიან, ჩემს რძლად ჩემისავე გლეხის ქალს არ მოვიყვან! — აი შედეგი ამ საქებურის თავისუფლებისა და თანასწორობისა, როგორცა სწერენ გაზეთებში!“

ზაქარია ყველა ღონეს ხმარობს, რომ შვილს უარი ათქმევი-ნოს ამ „სამარცხინო ქორწინებაზე“, მაგრამ ამაოდ.

ნინო უყვარს აგრეთვე ღარიბ აზნაურს სარდიონს, რომელიც ამ დროს დაპატიმრებულია ზაქარიას ტყისმცველის მოკვლის გამო. გაბოროტებული და ვერაგი ზაქარია საპყრობელეში სარდიონს ღამით შეახვედრებს მისსავე დას, რომელსაც აგრეთვე ნინო ჰქვია, და აქვე დაასწრებს თავის ჩასაფრებულ შვილს ვარდენს, რომელსაც ეს ქალი თავისი დანიშნული ნინო ჰგონია.

ვარდენი დარწმუნდება დანიშნულის ღალატში, ზურგს აქცევს მას, ლოთობს, კლავს უდანაშაულო სარდიონს და მხოლოდ ახლა გებულობს, რომ ორი ადამიანის მკვლელია...

ვარდენი ნინოს სწერს: „მოღალატე და გარყვნილი ხარ და შენი არა მინდა რაო“. შეურაცხყოფილი და დამცირებული

ნინო წყალში ვარდება, გადაარჩენენ, ანთება ემართება და სიკვდილის სარეველზეა.

ტიმოთე ეუბნება მომაკვდავი ასულის სანახავად მოსულ ზაქარიას: „მე, თქვენი მონა, როგორ გავბედავ გაწყენინო მაგ რამ ჩემი ქალი, ჩემი ერთადერთი ქალი რომ დამიღუპე, შე ავიკაცო? გამშორდი ამ წმინდა ალაგოდან!“

ზაქარია ნანობს. ნინოს ბოღვა, — ჩქარა, ქორწილში წამიყვანეთო, — სიმაართლე ჰგონია, და ლოცავს: „ოლონდ კარგად იყავით და ღმერთმა გაკურახოთ ორივენიო!“

მაგრამ გვიანაა. ნინო უბრუნებს ვარდენს მის ნაჩუქარ ხობს — ეს მაინც გაათავისუფლეო — და კვდება. უმწიკვლოა ეს სწყვარული და ტრაგიკულია მისი ბოლო.

პიესა უაღრესად დაძაბული, სხარტი, ლაკონური, ცხოვრებისეული და სცენიურია. 1893 წელს ეს დრამა წარმატებრივად იდგმება. პიესა მას დაღებით შეფასებას აძლევს.

მეორე ლიტერატურული ნაწარმოები, რომელიც დ. მიქელაძის ხელიდან გამოსულა, არის თარგმანი ლევ ტოლსტოის დრამისა „მეუფება წყვდიადისა“.

საკითხავია: რაღა ტოლსტოის პიესა და რაღა „მეუფება წყვდიადისა“?

ეს შერჩევა შემთხვევითი არაა და მოწმობს ჩვენი მოღვაწის ალღოს, ხოლო თარგმანი — მის მაღალ გემოვნებას.

„მეუფება წყვდიადისა“ 1908 წელს გამოვიდა ქუთაისში ცალკე წიგნად.

დრამის სიუჟეტი ტოლსტოის აუღია სისხლის სამართლის ერთი საქმიდან, რომელიც ტულის გუბერნიაში გაირჩა, და ქა-

ლის მიერ ქმრის მოწამვლის გარდა თათქმის ყველაფერი სინამდვილიდანაა აღებული. თვით ტოლსტოი, რომელსაც ამ პიესის დაწერა გოგოლისა და ოსტროვსკის პიესების კითხვამ შთააგონა, აღტაცებული იყო თავისი დრამით და მაღალ შეფასებას აძლევდა მას.

რატომ შეარჩია მეველემ მაინცა და მაინც „მეუფება წყვდიალისა“? პასუხი ამ კითხვაზე ფრიად ხელსაყრელია მთარგმნელისათვის. რუსეთის პროგრესული ინტელიგენცია აღტაცებით შეხვდა ამ პიესას. რეპინი სწერდა ავტორს: „გუშინ ვკითხულობდით თქვენს ახალ დრამას... რა შემადრწუნებელი სიმართლეა, რა ულმობელი ძალაა ცხოვრების ასახვისა!“ სტასოვიც აღიარებდა: „მსგავსი არაფერი წამიკითხავს მრავალი, მრავალი წლის განმავლობაშიო“. იმასვე აღნიშნავდა ნემიროვიჩ-დანჩენკო. მხოლოდ რეაქციონერები შეხვდნენ ღრენით საშინელ სიმართლეს. მეფემ შინაგან საქმეთა მინისტრს ურჩია „ბოლო მოეღო ლევ ტოლსტოის უმსგავსოებისათვის“ და აეკრძალა დრამის გაყიდვა.

მხოლოდ 1895 წელს მოხერხდა დრამის დადგმის ნებართვის მიღება. მოსკოვის ერთ თეატრში ასჯერ და მეტად დაიდგა და ერთ-ერთ დადგმას ესწრებოდა თვით ტოლსტოი.

ასეთი იყო პოლიტიკური ხასიათი იმ პიესისა, რომელიც ქართულად სათარგმნელად შეარჩია მეველემ.

პიესის ენა უაღრესად მდიდარი და ხალხურია, აღსავსე ხატოვანი თქმებითა და სოფლური მეტყველებით. თვით ტოლსტოი წერდა: „პირდაპირ გავძარცვე ჩემი უბის წიგნაკები, რათა ეს დრამა დამეწერაო!“ აქედანაც ცხადია, რა ძნელი

იქნებოდა ამ ტიტანის პიესის ღირსეულად გადმოღება სხვა ენაზე. ეს ამოცანა მეველემ ღირსეულად შეასრულა.

ასეთია ერთი თვალის გადავლებით მეველის დრამატურგიული და მთარგმნელობითი ღვაწლი. თავმდაბალ მწერალს, ცხადია, ბევრი რამ შეეძლო კიდევ შეექმნა და ეთარგმნა, რომ ჟურნალისტური და საზოგადოებრივი მოღვაწეობისათვის არ შეეწირა მთელი თავისი დრო, ენერჯია, ქონება და კარიერა.

ს ტ ი ლ ი

დავით მიქელაძე თავისი მთლვაწეობით, პოლიტიკური შეხედულებებით, ესთეტიკური იდეალებით, ეკუთვნის გასული საუკუნის 60-იანი წლების ახალ თაობას, რომელმაც თავის დროშას დააწერა ხალხისადმი ერთგულება, წამოაყენა ხელოვნებისა და ლიტერატურის ფართო მასებისადმი სამსახურში ჩადგომის იდეა და ბრძოლით გაკვალა გზები ქართული სალიტერატურო ენის დემოკრატიზაციისაკენ. ამან განსაზღვრა მეველის, როგორც პუბლიცისტის, მიმომხილველის, მთარგმნელისა და მწერლის, ლიტერატურული სტილი.

სამართლიანობა მოითხოვს, აღინიშნოს, რომ, როცა ქართველ მესამოციანელთა ბრწყინვალე თაობა გამოვიდა სამოღვაწეო ასპარეზზე, ქართული პუბლიცისტური სტილი არ არსებობდა. ქართველ მესამოციანელთა კიდევ ერთი დამსახურება, სხვა მნიშვნელოვან და ყურადსაღებ ამბებთან ერთად, ისიცაა, რომ მათ სათავე დაუდეს და შექმნეს მანამდე არარსებული ქართული პუბლიცისტური სტილი.

ილია, აკაკი, მაჩაბელი და შვილთა ბანაკის სხვა წარმომადგენლები, რომელთა შორის მეველეს უცილოდ უჭირავს თვალსაჩინო ადგილი, იყვნენ ახალი ქართული სალიტერატურო

ენის არამარტო შემქმნელები და კანონმდებლები, არამედ დამნერგავებიც. ისინი უშუალოდ თვითონ ტრიალებდნენ სამკედლო ქურასთან, რომელშიაც ახალი სალიტერატურო ქართული ენა ნაკვერჩხალივით გააღვივეს, ფოლადივით აწრთეს. ღვედივით ჩამოქნეს და მკითხველი დახვეწილ, ჩამოყალიბებულ და შემოქმედებითად დამუშავებულ ახალ ქართულ ენას აზიარეს. საყოველთაოდ ცნობილია, რომ გამოჩენილ სიტყვის ოსტატთა ნაწარმოებებში სრულად აისარკება ხოლმე არამარტო სალიტერატურო ენის სტრუქტურა, არამედ მისი განვითარების ძირითადი ტენდენციებიც. მათ გაამარტივეს სალიტერატურო ენა ისე, რომ იგი კი არ დაულარიბებიათ, არამედ, პირიქით, გაამდიდრეს ენობრივი ქსოვილი ხალხური ენიდან ნასესხები მხატვრული ნაწარმოებისათვის დამახასიათებელი ესთეტიკური თვისებებით: ხატოვანი თქმებითა და მხატვრულ სახეებით.

მეველე ორატორული მეტყველებისა და პუბლიცისტიკის ევროპულ სკოლას იყო ნაზიარები და მან ზედმიწევნით სრულყოფილად იცოდა პუბლიცისტური პასაჟები და ამ ქანრის სპეციფიკური კანონზომიერებანი. იგი ნიადაგ ცდილობდა, რომ წერილებში გამომსახველობითი თვალსაჩინოებისათვის მიედწია და უბრალო მოვლენებიც კი ტიპიურობამდე აეყვანა და განეზოგადებინა.

ერთ თავის სარედაქციო წერილში მეველე ირონიულად შენიშნავს, რომ ზოგი ავტორი კერძო მნიშვნელობის საკითხებზე წერს, ზოგიც მნიშვნელოვან თემას ეხება, მაგრამ ისე ბუნდოვნად, რომ კაცი ვერაფერს გაიგებსო. მკითხველისათვის გასაგებად წერა, მეორეს მხრივ, გულისხმობს ხალხის განათ-

ლებულობის საერთო დონის გათვალისწინებასაც. თუ დავუკვირდებით მეველის პუბლიცისტურ ნაწერებს, რასაც არ უნდა ეხებოდეს იგი, — შინაურ საპირბოროტო საკითხებს, საერთაშორისო მდგომარეობას, თეატრალურ ამბებს, თუ რომელიმე საყურადღებო ლიტერატურულ მოვლენას, — აშკარად შეინიშნება ერთი რამ: მწერალი ყოველთვის ცდილობს დაიყვანოს თავისი სიტყვა მკითხველის შემეცნებად. როგორც ცნობილია, პუბლიცისტური ჟანრი, მხატვრული ნაწარმოებებისაგან განსხვავებით, სილოგისტიკას უფრო ეყრდნობა, ვიდრე მხატვრულ ელემენტს. მეველის პუბლიცისტურ წერილებში ეს კანონზომიერება, რა თქმა უნდა, დაცულია, მაგრამ ძალზე პირობითად. ითვალისწინებს რა იმდროინდელი მკითხველის ინტელექტუალურ დონეს, იგი ხშირად ტვირთავს პუბლიცისტურ წერილებს მხატვრული ელემენტით, მიმართავს თვალსაჩინოებისათვის სურათებს, ემოციურ ფაქტებს. ამაშიც იგრძნობა დ. მიქელაძის დიდი შემოქმედებითი ალღო. მაშასადამე, მან შესანიშნავად იცოდა დღეს უკვე საბოლოოდ დამტკიცებული დებულება, რომ შედარებით ნაკლებად განათლებულ ადამიანებში მრავლად მოიპოვებიან ისეთები, რომლებიც უხვად არიან დაჯილდოებულნი ესთეტიკურის, მხატვრულის გრძნობით, ყოველივე ეს დ. მიქელაძის წერილებს, სტატიებს, კორესპონდენციებს დიდ მიმზიდველობას ანიჭებს. იგი წერს მოკლედ, სხარტად და ყოველთვის საქმიანად. დიახ, მოკლედ და საქმიანად. ლაკონიზმი ერთ-ერთი მთავარი დამახასიათებელი ნიშანია მისი სტილისა. იგი მკაცრად აკრიტიკებს ისეთ ლიტერატორებს, რომლებიც „უბრალო და ჩვეულებრივ ამბებს უთუოდ აბრაშიდან დაიწყებენ, შეუდგებიან შიზეზისა

და მიზეზის განმარტებას, გამოკვლევას და ქადაგებას... ეს ხომ სულ მოსაწყენი ამბავია¹!... თუ დავუკვირდებით მოყვანილ ციტატას, ლაკონიზმის მკაცრ მოთხოვნილებასთან ერთად, ავტორი აყენებს ერთ უმნიშვნელოვანეს თეზისსაც: მეველეს აზრით, მაღალი საზოგადოებრივი მიზანი ასულდგმულებს თვით ლიტერატურულ სტილსაც კი. ეს ჭეშმარიტებაა: თუ მწერალს არ ამოძრავებს დიდი საზოგადოებრივი მიზნები, მისი სტილიც ზერელე, მოდუნებული და უფერულია. ამ მოსაზრებას იგი შემდეგში კიდევ უფრო აღრმავებს და ამახვილებს. მისი აზრით, თუ მწერლის მსჯელობის საგანი კერძო ხასიათისაა, მაშინაც საჭიროა ამ საგანს რაიმე თავისებური, განსაკუთრებული ინტერესი ჰქონდეს და, საყურადღებო იყოს არა მარტო ათისა და ასისათვის, არამედ მრავლისათვის. საგანი უნდა იყოს ყოველდღიური ცხოვრება, ხალხის ავკარგი და ა. შ. მეტად საგულისხმოა ამ შემთხვევაში მეველის აზრი: „თავისთავად მცირესა და უმნიშვნელო საგნის საგულისხმოდ საინტერესოდ გადაქცევა დიდად ნიჭიერი მწერლის პრივილეგია არის“. ამიტომ შენიშნავს დ. მიქელაძე: „ის, რაც შეშვენოდანთ ჰაინეს, ბერნეს, ლუი ბლანს, არ შეშვენის ყოველ კორესპონდენტსა“. ზემომოყვანილი დებულებანი სრულ საფუძველს გვაძლევს განვაცხადოთ, რომ მეველის სტილის ამოსაველი წერტილი ყველგან და ყველაფერში რეალიზშია.

დაუკვირვებელი თვალის ადვილად შეამჩნევს, რომ სამოციანელთა მთელ პუბლიცისტიკას წითელი ზოლივით გასდევს მძაფრი პოლემიკური ტონი. ეს ბუნებრივიცაა. ახალი იდეა-

¹ „ივერია“, 1893, № 79.

ლებისათვის მებრძოლ ლიტერატურას ის ყველაზე მეტად ესაჭიროებოდა.

ეჭახებოდნენ რა თვითმპყრობელურ სინამდვილეში მრავალ წინააღმდეგობას, ახალი ეროვნულ-განმათავისუფლებელი იდეები გააფთრებული ბრძოლით მიიკვლევდნენ გზას ცხოვრებაში. ამ მძაფრ ჭიდილში ძველსა და ახალს შორის ერთ-ერთს ყველაზე ძლიერსა და მახვილ იარაღს წარმოადგენდა სატირა და იუმორი, რომელმაც სრულიად ახალი ფორმა და შინაარსი შეიძინა იმ დროისათვის. ამ იარაღს თერგდალეულნი, არამართო პუბლიცისტიკაში, სიტყვაკაზმულ ლიტერატურაშიაც უხვად იყენებდნენ და, ამრიგად, იგი იქცა სამოციანელთა სტილის განუყოფელ ორგანულ ნაწილად. მეველეს, ამ მხრივ, განსაკუთრებული დამსახურება მიუძღვის ჩვენი მშობლიური ლიტერატურის წინაშე. შეიძლება ითქვას, იგი განსაკუთრებული იუმორისტული ნიჭითაა დაჯილდოებული.

ერთ-ერთ კორესპონდენციაში მეველე პეტერბურგიდან იტყობინება კრასნოე სელოში გამართული მანევრების ამბავს, დასცინის მანდილოსანს, რომელსაც ეთქვა: „კაცის თვალი უკეთესს ვერაღ ნახავდარ“, — და თავის მხრივ შენიშნავს: „მოდრი და ნუ იტყვი ახლა შენ, რომ ომი ღვთაებრივი მოქმედება არის!“.

იქვე იგონებს სურათს, რომელზედაც გამოხატულია ბონაპარტე, ღრუბლებზე რომ ზის და ზიზლით დასცქერის მტვერში დაცემულ თავის ძმისწულს ნაპოლეონ შესამეს და თითქოს ეუბნება: „რა შვილი შენ იყავი, რომ ევროპაში ბატონობა მოინდომე? განა არ იცი, რომ არწივის წაბაძვა თუთიყუშებისათვის დამღუპველიაო?“...

1872 წლის სექტემბერში პეტერბურგიდან ყენევაში მიმავალი დ. მიქელაძე ირონიულად წერს, რომ პეტერბურგი ვარშავის რკინიგზის მხარეს ყაზარმებით თავდება, და „ძალიან მომეწონა — კაცია და გუნება — რომ „განხრწნილ დასავლეთის“ აზრებისათვის ესრეთი მტკიცე და საიმედო ჯებირი აუგიათ“... ამ თქმაში მახვილი სარკაზმი იგრძნობა.

კორესპონდენტს არ ღალატობს აზრი, ალლო და სინდისი, როცა რუსეთისა და უცხოეთის სინამდვილეს აღწერს, და მისი ეს სამგზავრო ჩანაწერები ნიმუშია საინტერესო ქანრისა, რომელშიაც ასე იშვიათად აღწევენ ხოლმე წარმატებას.

მართალია, „რკინის გზაზე ყველაფერს გიჟური ხასიათი აქვს, მხოლოდ ცხოვრების გარეგან სახეს იქნება მოავლოთ თვალი“, მაგრამ ასეთი თვალის მოვლებითაც შეუნიშნავს მეველეს „ხალხის შინაური მდგომარეობის“ უტყუარი სინამდვილე. ასე, „როცა ვაგონები ამ ხალხის საცხოვრებელ ადგილებზე ჩაგვაქროლებდა, ძალიან მაგარი კაცი უნდა ყოფილიყო, რომ გულგრილათ ეცქირა გასაოცარი სიღარიბისათვის, რომელშიაც აქაური ხალხი იმყოფება“... მაგრამ, აი, გერმანიაში შევიდნენ: „აქ ყველაფერს განსხვავებულსა ჰხედავთ. ალბათ გამოგიცდიათ, როდესაც თეატრში, გულის დამბნელებელ დეკორაციის შემდეგ, ერთბაშად წარმოუდგება თქვენს თვალს სასიამოვნო და აღმტაცებელი მხატვრობა. თითქმის ამნაირად ეკორაციის გამოცვლა იყო გერმანიაში შესვლა“. მეველე ხედავს ხალხის მუყაითობას, მეტ სიცოცხლესა და სიუხვეს. ცხადია, ცხოვრების მთელ სიღრმეს ვერ ნახავდა, მაგრამ აშკარაა განსხვავება, რაც შეუნიშნავს კავის რუსეთსა და გერმანიას შორის; მას მოსწონებია გერმანელთა თანხმობა შრომაში. „ევ-

როპიელთ კარგა ხანია გაუგიათ, რომ ერთმანეთის დახმარება, კავშირი ძლიერებას შეჰქმნის და იმისთვის არის, რომ საზოგადო საქმისათვის ისე ცდილობენ, როგორც თავისათვის. ღმერთო, როდის იქნება, რომ საქართველო ამ მდგომარეობას მოესწროს! — ვფიქრობდი ჩემთვის“¹.

დ. მიქელაძეს არსად არ ღალატობს იუმორის გრძნობა. ერთ-ერთ კორესპონდენციაში, რომელშიაც პარიზში სპარსეთის შაჰის მიღების ამბავს აღწერს, ირონიულად შენიშნავს, ბრილიანტებში ჩამჯდარ შაჰსა და მის ცხენს ქალები ტაშს უკრავდნენო, და განაგრძობს: „ძნელი სათქმელია, რამ მოიყვანა ეს საპატიოები აღტაცებაში: ულვაშგრძელმა სპარსელმა, თუ მისმა მოელვარე ბრილიანტებმა! მეჭორეები ამბობდნენ — უკანასკნელმაო. ამ ხმას ცოტაოდენი საფუძველი მაშინ მიეცემა, როცა მივიღებთ სახეში, რომ შაჰის ერთი ხელი ტანისამოსი ოცდაოთხი მილიონი ღირს“.

ამ ირონიული შენიშვნის შემდეგ დ. მიქელაძე გადადის იმ აღშაფრენაზე, რომლითაც შეხვდნენ ევროპის მონარქიული გაზეთები გარეშე ხელმწიფის მობრძანებას: წარსული დრო მოაგონათო! ახლა შაჰი გადაიღებს ევროპულ წესებს, ევროპულად დაამშვენებს სასახლეს, გაწრთვნის არმიას, იქნებ პარლამენტიც კი შემოიღოს! „მაშ რაღა გნებავთ კიდევ? განა ეს დიდი ნაბიჯი არ არის წინ?“

მეველის, როგორც მწერლის, გონებამახვილობას მოწმობს შისი ფელეტონი „სწავლულ კაცებსა“ და მათ განყენებულ

¹ „დროება“, 1872, № 39.

ლექცია-საღამოებზე: „საკვირველია ჰეშმარიტად ამათი საქმე! დღემდის მე ლირსავით მეგონა, რომ „არარაისგან არ იქნების არარაიცა“. მაგრამ ახლა სულ წინააღმდეგ აზრზე ვრწმუნდები. საპატიო და პატიოსანი ლექტორები ნათლად ამტკიცებენ, რომ „არარაისგან“ იქმნებიან გვარიან კარგი ძალი რგვალ-რგვალნი მანეთები. ეს მათის მხრით დიდი დამსახურებაა შთამომავლობის წინაშე და დაუფასებელი ღვაწლი მეცნიერებისათვის!“¹ სატირის მახვილი აქ სწორედ მიზანში ხედება.

ასე უღმობელია მეველე იმ ლექტორთა მიმართ, თავიანთი საზოგადოებრივი ვალი რომ დავიწყებიათ, აგრეთვე დამცველებისადმი, რომლებიც უფრო საკუთარი ჯიბის დასაცავ სიტყვას ამბობენ.

მრავალფეროვანია მეველის პოლემიკური და მხატვრული ხერხი მოწინააღმდეგეებთან ბრძოლაში თუ ხალხის ბედზე მსჯელობის დროს. აი, იგი პეტერბურგის ერთ დიდებულ ბაღში შედის, თვალს სჭრის ძვირფასი სამოსი, აბრეშუმი, ფარჩა და ბრილიანტი. „მაგრამ სრული ნეტარების ღირსი არ გავხდით“,—შენიშნავს ირონიულად: თურმე სინათლეში თვალებს ტკივილი სჩვევია, დახუჭა და წარმოიდგინა სიბნელეში ლუქმა-პურისათვის მებრძოლი ადამიანი. უეცრად მუსიკის გრილმა გამოაფხიზლა. რისი გაჭირვება! შეხედეთ ამ მოზიმიე ხალხს! ბრწყინვალე, კმაყოფილი საზოგადოება ბედს შეჰხარის. ამ დეტალში სვიფტისებური ირონია იგრძნობა.

საერთოდ, მეველეს ხელში იუმორი ბასრი იარაღია ობს-

¹ „დროება“, 1879, № 413.

კურანტების, ზარმაცთა, რეაქციონერთა, ბოროტ მოხელეთა და მსგავსთა წინააღმდეგ საბრძოლველად.

სამეურნეო ქარხნის დაარსებას წინ აღუდგა ვინმე დავიდოვიჩი იმ მოსაზრებით, რომ ყველას მაინც ვერ შევეწევიით. მეველე ამაზე ირონიულად 'შენიშნავს: „ვთქვათ, ეს დავიდოვიჩი კაპიტანია. გემს ცეცხლი ედება. ის ვერ იხსნის ყველას, მაგრამ ნუთუ ამის გამო უარს იტყვის იმათ დახსნაზე, რომელთა გადარჩენაც შეუძლია?“

აქ საგანგებოდ არ შევეხებით მეველის მთარგმნელობითს სტილს. ეს საკითხი განხილული უნდა იქნას მის მხატვრულ ენასა და სტილთან ორგანულ კავშირში, რადგან მეველე მტკიცედა დგას დედნის ადექვატური განმეორებისა და გადმოქართულების შემოქმედებითს პოზიციაზე. ამას ადასტურებს მის მიერ თარგმნილი ლ. ტოლსტოის პიესის შედარებითი ანალიზი. თარგმანში ზედმიწევნით სწორადაა გადმოცემული დედნის ტონი, აზრი, სახე და კოლორიტი, და ყველაფერი ეს ისე მაღალი გემოვნებითაა და ოსტატობითაა შესრულებული, რომ მკითხველი იმთავითვე მიხვდება, რომ თარგმანის სახით საქმე აქვს მაღალხარისხოვან ლიტერატურულ აქტთან.

ჩვენ ზემოთ გავეცანით მეველის ერთადერთ ორიგინალურ ოთხმოქმედებიან დრამას „ხაფანგი“. იგი ენობრივადაც ძალზე უხვ და საინტერესო მასალას იძლევა. ცნობილია, რომ დრამატული ნაწარმოების ენა შედარებით ყოვლის მომცველი და მეტად რთული სპეციფიკური ენაა, რამდენადაც იგი თავიდან ბოლომდე დიალოგის შინაგან ბუნებაზეა დამყარებული სწორედ აქ ცნაურდება მწერლის ტალანტი. პიესაში ნაწარმოების გმირის პერსონიფიკაცია, მისი ინდივიდუალური ტი-

პიური სახისა და ხასიათის გამოკვეთა უმთავრესად მეტყველებაში ვლინდება (ნაწილობრივ მსახიობის მოქმედებაშიც, მაგრამ სცენიური მოქმედების არე საერთოდ საკმაოდ შეზღუდულია); ამასთან მოქმედების გაშლის ფუნქციებსაც ნაწილობრივ მეტყველების შინაგანი დინამიკა ასრულებს. მოკლედ რომ ვთქვათ, სიუჟეტის განვითარება მოქმედ პირთა ღრმად გააზრებულ დიალოგურ ურთიერთმიმართებისა და ორმხრივი რეპლიკის ფონზე მიიწევს წინ. თუ რომანში, პოემაში, მოთხრობაში, ნოველაში შეიძლება ფართოდ გამოვიყენოთ თხრობა, აღწერა, პეიზაჟი, მივმართოთ ვრცელ ისტორიულ ექსკურსს, თვით დიალოგსაც კი და ამრიგად, მკითხველს წარმოვუსახოთ ტიპიური გარემო გმირის მოქმედებისა, პიესა ამ საშუალებებს შედარებით მოკლებულია და ამას უმთავრესად დიალოგის ხარჯზე ინაზღაურებს. ამრიგად, პიესის ავტორის წინაშე მეტად რთული ამოცანა დგას. მან მეტყველებაში უნდა წარმოგვისახოს გმირის ღრმად ინდივიდუალური, შთამბეჭდავი, დასამახსოვრებელი სახე. მაშასადამე, თვითეული გმირისათვის უნდა გამოინახოს მხოლოდ მისთვის დამახასიათებელი მეტყველების მანერა. თანაც თვითეული მოქმედი პირის ლაპარაკში უნდა ჩანდეს გარემოს დამახასიათებელი ფართო საგნობრივი ფაქტურა, რომელთანაც გმირს უხდება ურთიერთობა და რომელიც განსაზღვრავს მისი ცხოვრების ინტერესს. და ბოლოს, ყოველივე ეს უნდა განხორციელდეს ფრაზის მეტად ლაკონურ მონაკვეთზე, რომ ძირითადად დიალოგში მოთავსდეს მსჯელობაც, მოქმედებაც და ამბის მომავალი განვითარების შინაარსიც. ჩვენი აზრით, ეს საყოველთაოდ აღიარებული და ცნობილი დებულებანი განაპირობებს ჩვენი ლიტერატური-

სათვის დამახასიათებელ ერთ მეტად საჭირობოროტო საკითხს, სახელდობრ იმას, რომ დრამატურგია ქართული ლიტერატურის ისტორიაში უკანა პლანზეა გადაწეული სხვა ლიტერატურულ ჟანრებთან შედარებით.

მეველე თავის პიესაში „ხაფანგი“ პირველი სტრიქონებიდანვე ჭეშმარიტ დრამატურგად, კომპოზიციის გრძნობით დაჯილდოებულ კონფლიქტის ოსტატად გვევლინება. მოქმედ პირთა პირველი სიტყვებიდანვე ნათელი ხდება, ვისზეა ლაპარაკი:

„მ ა რ ი ნ ე — მართლა რომ ძალიან დააგვიანდათ... ვახშამიც გაცივდა... რა ვქნა, ქორი ხომ არ გაექცათ?!

ტ ი მ ო თ ე — ქორი თუ გაექცათ, ხვალამდინაც ვერ მოვლენ, მაგრამ ფილიპესთანა კარგ ბაზიერს ქორი ვერ გაექცევა.

მ ა რ ი ნ ე — ერთი რამ უნდა გითხრა, ძმაო: ამ ჩვენს ბატონის შვილს ძალიან კი გაუტკბა ნადირობა...

ტ ი მ ო თ ე — მერე რათ გიკვირს? ყმაწვილია, ნადირობა ეხალისება და ჩვენ რაც შეგვიძლია, ვცდილობთ ვემსახუროთ.

მ ა რ ი ნ ე — ეჰ, დიდხანს ამყოფოს უფალმა უზრუნველათ! კარგი გულისაა... ყოველისფრათ ძვირფასი ყმაწვილია.

ტ ი მ ო თ ე — კარგიო? რას ამბობ. მაგისთანა ახალგაზრდა ჩვენში მეორე არ მოიძებნება... ბედნიერია, ჭეშმარიტათ, მაგის პატრონი.

მ ა რ ი ნ ე — და ის კიდევ უფრო ბედნიერი იქნება, ვისაც ეგ დაუმოყვრდება!

ტ ი მ ო თ ე — მართალია, ვერავინ დაიწუნებს, მაგრამ ჭერ კი ადრეა ცოლშვილის მოკიდება, ყმაწვილია...

მ ა რ ი ნ ე — რატომ? ჩემი ვარდენი აგერ ოცდაორი წლისა იქნება მალე“.

მკითხველი ერთბაშად მიხვდება, რომ აქ ლაპარაკია პრი-ვილეგიური კლასის წარმომადგენელზე და ამას მარტო ერთი შტრიხიც კი ცხადყოფს: ქორი და ბაზიერი! ქართველი თავა-დიშვილების ცხოვრებისათვის ქორი და ბაზიერი ისეთივე აუ-ცილებელი ატრიბუტები იყო, როგორც ქრისტეს მსახურისა-თვის ჭვარი. ამას გარდა, დიალოგის ამ მოკლე ფონზე უკვე ჩასახულია კონფლიქტის ნიშნები და მინიშნებულია ისიც, თუ საით წაიმართება მოქმედება.

მაინც რა არის მეველის სტილის მთავარი დამახასიათებ-ლი პრინციპი? მთავარი პრინციპი, მთავარი დამახასიათებელი ნიშანი მეველის სტილისა არის ნათლად გამოხატული აზრი, მკაფიო გამოთქმები, სიზუსტე, სიცხადე და უშუალობა. მისი ყოველი წერილი ცოცხალი, მიზანსწრაფული, მგზნებარე, მხატვრულად ძლიერი და დამაჯერებელია. სწორედ ამ ემო-ციურ-ესთეტიკური თვისებების ერთობლიობით ახდენდნენ ისინი ძლიერ ზეგავლენას მკითხველზე და სამუდამოდ აღიბეჭ-დებოდნენ მის მეხსიერებაში.

თავისი სიცოცხლის მანძილზე მეველემ ბევრი მებრძოლო სულით გაჟღენთილი წერილი და სტატია შექმნა, რომლებში-აც უმეტესად სრულად ასახა იმდროინდელი ცხოვრების მრავალფეროვანი ჩრდილოვანი მხარეები, უპასუხა აუარებელ სა-სიცოცხლო მნიშვნელობის მოთხოვნილებათ და თავისი უან-გარო მოღვაწეობით მონაწილეობა მიიღო მრავალი საყურად-ღებო, საზოგადოებრივი და პოლიტიკური საკითხის გადა-წყვეტაში.

თავისი შეგნებული სიცოცხლე მეველემ სამსხვერპლოდ მიიტანა ქართველი ხალხის სამსახურში, მის სამშობლოს სა-

ყვარულით ანთებულ გულს მუდამ „ერის წყლული აჩნდა წყლულად“, ნიადაგ საქვეყნო საქმეს ედგა იგი ერთგულ გუ-
შაგად, აღიარებდა და უღვიძებდა თანამემამულეთ მაღალკუ-
მანურ და პატრიოტულ შეგნებას, მოუწოდებდა ძნელი, მაგ-
რამ სასახელო საქმეებისაკენ, იღწვოდა ხალხის შეგნების
ამაღლებისა და განათლებისათვის, ებრძოდა ყველა უგვანო
საქმეს და მის გამოვლინებას, მოითხოვდა ბრძოლას, არა მარ-
ტო დანაშაულის, არამედ მისი წარმომშობი მიზეზების წინა-
აღმდეგ, ქადაგებდა ხალხთა შორის ძმობას და ერთობას. მისი,
თითქოს უბრალო ენით დაწერილი, მაგრამ ნათელი და მგზნე-
ბარე წერილები და სტატიები აღაფრთოვანებდნენ, ძალას მა-
ტებდნენ, სულის მხნეობას უმტკიცებდნენ და გამარჯვების
რწმენას უნერგავდნენ მის თანამედროვეთ.

ს ა რ ჩ ე ვ ი

შესავალი	5
ცხოვრების გზა	10
სოციალ-პოლიტიკური და ეკონომიური შეხედულებანი	43
მეველე — საერთაშორისო მდგომარეობის მიმომხილველი	<u>22</u>
ეროვნული საკითხი	<u>98</u>
მეველე — ლიტერატურული და თეატრალური მიმომხილველი	<u>127</u>
მეველე — ილია ჭავჭავაძის თანამებრძოლი და „შვილთა“ ბანაკის ერთ-ერთი ბურჯი	139
მეველე — სადღეისო საჭიროებათა მიმომხილველი, სახალხო განათ- ლებისათვის მზრუნველი და პროგრესის მესიტყვე	143
ზნეობრივი შეხედულებანი	186
ომისა და მშვიდობის საკითხი	<u>199</u>
მეველე — დრამატურგი და მთარგმნელი	207
სტილი	212

რედაქტორი ვ. ჭავჭავაძე
მხატვარი გ. გორდელაძე
მხატვრული რედაქტორი გ. ქუთათელაძე
ტექნიკური რედაქტორი ე. აბდუშელიშვილი
კორექტორი ვ. კუპრაშვილი

ხელმოწერილია დასაბეჭდად 12/II-63 წ. ქალაქის ზომა
70X108¹/₃₂. ნაბეჭდი თაბახი 9,75. სააღრ.-საგამომც. თაბახი
7,5. საავტორო თაბახი 7,31.

უე 00335. ტირაჟი 2.000. შეკვ. № 814.
ფასი 50 კაპ.

მე-4 სტამბა, თბილისი, მედიკალაქი.
Типография № 4, Тбилиси, Медгородок.

Элгуджа Самуилович Маградзе

Мевеле (Давид Микеладзе)

Монография

(На грузинском языке)

Государственное издательство

«Сабчота Сакартвело»

Тбилиси

1963